

# জগন্নাথ

( ভক্তিমূলক পঞ্চাঙ্ক নাটক )

শ্রীজ্যোতিষচন্দ্র) বিশ্বাস প্রণীত ।

চাঁপাতলা অবৈতনিক প্রভাবতী নাট্য-সমাজ  
কর্তৃক অভিনীত

প্রথম অভিনয়—

বুধবার, ২০শে ফাল্গুন, ১৩৩৭ সাল ।

মূল্য এক টাকা ।

প্রকাশক :—  
শ্রীজুড়নচন্দ্র বিশ্বাস  
২৩২, রমানাথ কবিরাজ লেন,  
কলিকাতা।

আনন্দময়ী প্রিন্টিং ওয়ার্কস.  
২৫, নিমতলাঘাট স্ট্রীট, কলিকাতা  
শ্রীচুনিলাল শীল কর্তৃক মুদ্রিত।

## উৎসর্গ

মা!

প্রথম জগন্নাথ দর্শন করি তোমার কোলে চেপে। তার পর যে ক'বার জগবন্ধু দর্শনে গেছি—একবারও তুমি সঙ্গে নেই।

আজ জগন্নাথকে নীলাচলের গুপ্ত কন্দর থেকে এনে আমি সারস্বত কুঞ্জে বসিয়েছি; কিন্তু দুর্ভাগ্য আমার যে, এ “জগন্নাথ” তোমাকে দেখাতে পারছি না।

শুনেছি, স্বর্গে মর্ত্যে সম্বন্ধ বর্তমান। তাই ভরসা হয়, স্বর্গবাসিনী তুমি তোমার স্নেহের সস্তানের এই সামান্য নৈবেদ্য স্বর্গ হ'তেও নেবে।

জ্যোতিস



## নিবেদন

জগন্নাথ সম্বন্ধে বিবিধ পুরাণে ভিন্নরূপ মত দৃষ্ট হয়। যে সকল প্রাচীন কাব্যে জগন্নাথের বিষয় বর্ণিত আছে, তাহাদেরও মতের মিল নাই। এতদ্ব্যতীত প্রচলিত নানা কিংবদন্তী নানা বিকৃত মতের পোষকতা করে। এরূপ অবস্থায় নাটক লিখিতে হইলে কল্পনার আশ্রয় লওয়াই সুবিধাজনক। কিন্তু আমার জ্ঞান অরসিকের কল্পনা সরস ত' হইবেই না, উপরন্তু এক কিছুত কিমাকার বস্তুর সৃষ্টি করিবে, এই আশঙ্কায় মালী-বৃত্তি অবলম্বন করিয়া পুরাণ কাব্য ও কিংবদন্তী হইতে পুষ্প চয়ন করিয়া এই হার রচনা করিয়াছি। এখন ইহা দেব-সেবায় লাগিলে নিজেকে ভাগ্যবান্ বোধ করিব।

চাঁপাতলা অবৈতনিক প্রভাবতী নাট্যসমাজে যাত্রা অভিনয়ের জন্ত, উক্ত নাট্যসমাজের সভ্যগণের উৎসাহে ও আগ্রহে এই নাটক রচিত হয়। অনেকের ধারণা সৌখীন যাত্রার জুড়ির গান একটা অপরিহার্য অঙ্গ। আমি বহু দিন সৌখীন যাত্রার সংশ্রবে থাকিয়া বুঝিয়াছি যে, জুড়ির গান উহার অঙ্গ নয়—ভূষণ যাত্র। কিন্তু বর্তমান শ্রোতৃগণের নিকট সে ভূষণ আনন্দ বর্ধক নয়—পীড়াদায়ক। তাই আমি সে ভূষণ পরিহার করিয়াছি। সে জন্ত এই নাটক অভিনয় দর্শনাস্ত্রে কোন কোন সহৃদয় শ্রোতা আমার নিকট জুড়ির গানের অভাবের অল্পবোগ করিয়াছেন—কেহ বা “থিয়েটারিক্যাল্ যাত্রা” বলিয়া মত দিয়াছেন। আবার কাহারও মতে রঙ্গমঞ্চের ব্যয় বাঁচাইয়া দিনে রাত্রে অভিনয় করিবার সুবিধা হইবে বলিয়া আমরা যাত্রা নাম দিয়া এই নাটক অভিনয় করিতেছি—কিন্তু প্রকৃত প্রস্তাবে ইহা থিয়েটার।

যাত্রার দলের সহিত সংশ্লিষ্ট যে কোন ব্যক্তি ইহা স্বীকার করিবেন যে, আজকাল জুড়ির গান ত' আরম্ভ হইবা মাত্রই শ্রোতৃবৃন্দের মধ্যে চাঞ্চল্য লক্ষিত হয়। গান যত ভাল, যত মধুর, যত কেন কালওয়ামী ভরা হউক না কেন, গায়কগণকে প্রকাশ্যে গালি পাড়েন এমন শ্রোতাও বিরল নন। তা ছাড়া, সময় সংক্ষেপের জন্তও এখন যাত্রা অভিনয়ে জুড়ির গান বর্জন করার প্রয়োজন দাঁড়াইয়াছে বড় অল্প নয়।

যাঁহারা জুড়ি-হীন যাত্রাকে মঞ্চ-হীন থিয়েটার বলিয়া অভিহিত করেন, তাঁহাদের নিকট আনার নিবেদন, যাত্রা মাত্রই জুড়ি-হীন। যাত্রার প্রচলনের সময় হইতে কিঞ্চিদূর্ক অর্ধশতাব্দী পূর্ব পর্যন্ত সকল যাত্রাই জুড়ি-শূন্য ছিল। অভিনেতাগণ নিজ নিজ ভূমিকা সুর যোগে আবৃত্তি করিত এবং সময় সময় বিশেষ অংশগুলি গান গাহিয়া শুনাইত। অল্প দিন পূর্বের অভিনীত “কৃষ্ণযাত্রা” “বিদ্যাসুন্দর যাত্রা” প্রভৃতির উল্লেখ, উদাহরণ স্বরূপ করা যাইতে পারে।

যাত্রায় প্রথম জুড়ির প্রবর্তন করেন সুগায়ক স্বনামধন্য অধিকারী “মদন মাষ্টার”। তিনি স্বেচ্ছা-প্রণোদিত হইয়া জুড়ির সৃষ্টি করেন নাই। পারিপার্শ্বিক অবস্থা তাঁহার প্রতিভাকে এই পথে চালনা করিয়াছিল।

পূর্বে একস্থানে যাত্রা গান হইলে প্রায় ৫০৭ সহস্র শ্রোতা সমবেত হইতেন। তাঁহারা সকলে অভিনয় দেখিতে ও গান শুনিতে সমান উৎসুক থাকিতেন। কিন্তু একটা বালক-নট—যে শ্রীকৃষ্ণ বা শ্রীরাধার অংশ গ্রহণ করিয়াছে—তাঁহার কণ্ঠোচ্চারিত গীত সমবেত সমস্ত লোকের কর্ণগোচর হওয়া কঠিন, অথচ শ্রোতৃগণ সেই গান শুনিতে ব্যগ্র—না শুনিতে পাইলে ক্ষুব্ধ হন। তাই প্রতিভাবান সুকণ্ঠ মদন মাষ্টার স্ব দলস্থ বালক অভিনেতার গানের সঙ্গে নিজ কণ্ঠস্থ জুড়িয়া

দিতেন। ইহাতে শ্রোতৃগণ সন্তুষ্ট হইতেন, এবং তাঁহার প্রশংসাও করিতেন।

তারপর সম ব্যবসায়ী অধিকারীগণ প্রতিদ্বন্দ্বিতা করিয়া নিজ নিজ দলের গায়কগণের সঙ্গে এক, দুই, পাঁচ, সাত, দশজন বালক, যুবক, বৃদ্ধ নানারূপ কণ্ঠ যোজনা করিয়া মূল অভিনেতাকে পশ্চাতে ফেলিয়া জুড়ির প্রাধান্য স্থাপন করেন। ক্রমে জুড়ির গান যাত্রার অঙ্গ হইয়া দাঁড়ায়।

কিন্তু ঐ সকল গায়কের সমবেত কণ্ঠস্বর সঙ্গীতের মাধুর্য্যবর্ষণে লোকের মনোরঞ্জন করিতে যত পারুক আর না পারুক—কালোয়াতী তান—উদ্ভট উচ্চারণ—বিকট চীৎকার—বিকৃত অঙ্গভঙ্গির দ্বারা সকলকে “পরিভ্রাহি” ডাক ডাকাইতেছিল যথেষ্ট। ক্রমে কি পেশাদার, কি সৌখীন সকল যাত্রার দলে জুড়ির গানের অনাদর হওয়ার, উহার অনাবশ্যকতা অধিকারীগণ উপলব্ধি করিতে থাকেন। কিন্তু কি ভাবে জুড়ির গান পাল্লা হইতে বিচ্ছিন্ন করিয়া আসর জমাট রাখা যায়, সে মীমাংসাও তাঁহারা করিয়া উঠিতে পারেন নাই।

যখন এই চিন্তা সকল সম্প্রদায়ের মুখাগণের অন্তরে প্রবল, সেই সময় কলিকাতার প্রসিদ্ধ মথুরানাথ সাহার যাত্রার দলে “পদ্মিনী” নামে একটি ঐতিহাসিক নাটক অভিনয়ের আয়োজন চলিতেছিল। যাত্রার ঐতিহাসিক নাটকের প্রচলন ইহাই প্রথম এবং এই কার্যে অগ্রণী হইয়া স্বর্গীয় মথুরানাথ সাহা মহাশয় যাত্রাদলে এক যুগান্তর আনিয়াছিলেন। সেই “পদ্মিনী” নাটকের প্রথমাংশে দুই চারিটি জুড়ির গান বোঝিত হয় ও সেগুলির মহলা চলিতে থাকে। হঠাৎ কোন মুসলমান চরিত্রের উক্তিরূপে “আল্লা আল্লা” ইত্যাকার বাণী সমন্বিত একটি জুড়ির গান আবির্ভূত হয়। এই গান মহলা দিবার সময় মথুরাবাবু বলেন—

একেই ত' লোকে জুড়ির গান পছন্দ করে না, তার উপর এইরূপ বাণী শুনিলে তাহারা গায়কগণকে প্রহার করিবেন নিশ্চয়। তখন সমস্তা দাঁড়াইল যে—সে দৃশ্যে একটি জুড়ির গানও আবশ্যিক অথচ এরূপ জুড়ির গান চলিবে না। এই উভয় সঙ্কটের মীমাংসা করিতে সম্প্রদায়ের সঙ্গীতাচার্য্য শ্রীভূতনাথ দাস মহাশয় কোন চরিত্র বিশেষের মুখে সমবেত সঙ্গীতের যোজনা করিতে বলেন। তদনুসারে যাহারা জুড়ির পোষাক পরিয়া গান গাহিত তাহাদিগকে দরবেশ সাজাইয়া সেইরূপ “আল্লা আল্লা” বাণী যুক্ত একটি গান গাহিতে দেওয়া হয়। মথুরবাবু দেখিলেন ইহা ত' বেশ হইয়াছে। তখন তিনি সেই পালার সমস্ত জুড়ির গান উঠাইয়া দিয়া তৎস্থলে চরিত্র সৃষ্টি করিতে নাট্যকারকে অনুরোধ করেন। নাট্যকার স্বর্গীয় হরিপদ চট্টোপাধ্যায় মহাশয় সেই অনুরোধে বিবিধ চরিত্রের অবতারণা করতঃ “পদ্মিনী” নাটক হইতে জুড়ির গান তুলিয়া দেন। সেই পালার অভিনয় করিয়া মথুরানাথ সাহার দল যে সুখ্যাতি ও অর্থ উপার্জন করিয়াছিল—যাত্রার ইতিহাসে তাহা এক স্মরণীয় বিষয়; এবং এইভাবে জুড়ির গান ছাড়িয়া যাত্রা আবার তাহার পূর্ব অবস্থায় আইসে।

পেশাদার দলে জুড়ির গান উঠিলেও সৌখীন সম্প্রদায় হইতে ইহার তিরোধান আজও সম্ভবপর হয় নাই। ইহার সর্কশ্রেষ্ঠ হেতু তাঁহাদের রক্ষণশীল প্রবৃত্তি। অন্যান্য কারণের মধ্যে দক্ষ সুর-যোজকের অভাব প্রধান। নূতন গানে সুর সংযোগ করা বড় সহজ কাজ নয়। যাহারা সে কাজ করিতে পারেন, তাঁহাদের সাহায্য ও সহযোগ সকল সৌখীন সম্প্রদায়ের পক্ষে শুলভ নয়। এরূপ অবস্থায় তাঁহারা সেই চির-প্রচলিত গানের বাণী পরিবর্তন করিয়া জুড়ির গান বজায় রাখিতে কতকটা বাধ্য।



সৌখীন সম্প্রদায় হইতে জুড়ির গান প্রথম উঠাইয়া দেয় শ্রীরাম-পুরের “প্রিমরোজ এসোসিয়েসন”। কারণ তাহাদের ভাগ্যে সুরমাগর ভূতনাথ দাস মহাশয়ের সাহায্য লাভ ঘটিয়াছিল সহজে। তিনি স্বেচ্ছা-প্রণোদিত হইয়া উক্ত সম্প্রদায়ের অধ্যক্ষগণকে জুড়ির গান জুলিয়া দিতে বলেন এবং নিজে তাহাদের সমস্ত গানের সুর করিয়া দিতে স্বীকৃত হন।

চাঁপাতলা অবৈতনিক প্রভাবতী নাট্যসমাজ সেই প্রতিভাবান সুর-শিল্পী ভূতনাথ বাবুর সাহায্য বহু কাল ধরিয়া লাভ করিবার সৌভাগ্য পাইয়াছে। তিনি বিংশ বৎসরের অধিক কাল নিঃস্বার্থ ভাবে এই সমাজের সহিত সংশ্লিষ্ট থাকিয়া, ইহার সকল সভ্যকে নিজ পরিবারের অন্তর্ভুক্ত ব্যক্তি বলিয়া বিবেচনা করেন। তাহার সহিত এই সম্প্রদায়ের সকল সভ্যের একটা পরিবারিক কোমল মধুর সম্বন্ধ বর্তমান। বিশেষতঃ আগাকে তিনি সদাই যে স্নেহের চক্ষে দেখিয়া থাকেন, সেরূপ স্নেহ আমি আমার পূজ্যপাদ পিতৃদেব ভিন্ন অন্যের নিকট পাইয়াছি বলিয়া স্মরণ হয় না। তাহারই উৎসাহে, আগ্রহে ও ভরসায় আমি এই নাটকে জুড়ির গান বর্জন করিতে সাহসী হইয়াছি ; এবং ইহাই কলিকাতার সৌখীন সম্প্রদায়ে অভিনীত প্রথম জুড়ি-হীন যাত্রার পালা। শ্রদ্ধের ভূতনাথ বাবু যে শ্রম, যে ক্লেশ স্বীকার করিয়া, যে ষড়্ সহকারে ইহার গান গুলিতে সুর যোজনা করিয়াছেন, তাহার প্রতিদান দেওয়া আমার ক্ষুদ্র শক্তির অতীত। তবে স্নেহের পাত্রে নিকট কেহই কোন প্রতিদানের প্রত্যাশা রাখেন না, সেখানে দাতার দান ঈশ্বরের করুণার মত অবাচিত, অপরিমেয়—ইহাই আমার সাধনা।

উপসংহারে বক্তব্য এই যে চাঁপাতলা অবৈতনিক প্রভাবতী নাট্য-

সমাজের সভ্যগণ এই নাটক প্রণয়ন কালে আমায় যেরূপ উৎসাহিত করিয়াছিলেন, ইহার ক্রটি বিচ্যুতির দিকে লক্ষ্য না করিয়া তাঁহারা যে সেইরূপ উৎসাহের সহিত এই নাটকখানি অভিনয় করিয়া নিজেদের মহত্বের পরিচয় দিয়াছেন এবং প্রসিদ্ধ নর্তক শ্রদ্ধাম্পদ শ্রীভূপেন্দ্রনাথ চট্টোপাধ্যায় মহাশয় নিঃস্বার্থ ভাবে নৃত্য শিক্ষা দিয়া ইহার অভিনয়কে পূর্ণাঙ্গ করিয়াছেন ; সে জন্য আমি তাঁহাদের প্রত্যেকের নিকট কৃতজ্ঞ ।

“গণু” ভায়া ( শ্রীনরেশ চন্দ্র দাস ) ইহার প্রচ্ছদ-পট আঁকিয়াছেন । আমি সেই চিরকুমার, চিরকোমল, চিত্রকলার একনিষ্ঠ সাধকের নিকট যে পরিমাণ সৌহার্দ্যের ঋণে ঋণী—সামান্য “কৃতজ্ঞ” কথায় তাহার পরিচয় হইবে বলিয়া আমি সে কথার উল্লেখ করিতে বিরত রহিলাম । প্রার্থনা করি, জগন্নাথ তাঁহার শিল্প-সাধনাকে পূর্ণ হইতে পূর্ণতর করুন ।

সর্বশেষ হইলে ও সর্বান্তকরণে আমি কৃতজ্ঞতা স্বীকার করিতেছি, শ্রী-চরিত্র-অভিনয়-কুশল, সুকণ্ঠ, সুদর্শন, সুহৃদ্বর শ্রীপূর্ণচন্দ্র কুণ্ডুর নিকট । তাঁহার সহযোগ ও অক্লান্ত শ্রম ব্যতীত মুদ্রাযন্ত্রের গর্ভ হইতে এই নাটকের আবির্ভাব কিছুতেই সম্ভবপর হইত না, ইহা আমার ধ্রুব বিশ্বাস । ইতি—

মাঘী পূর্ণিমা, ১৩৩৮ ।

নাট্যকার

## নাট্যোল্লিখিত চরিত্র পরিচয়

নীলমাধব	...	জগন্নাথের গুপ্ত মূর্তি ।
লীলাধর	...	ছদ্মবেশী শ্রীকৃষ্ণ ।
নীলাশ্বর	...	" বলরাম ।
বলভদ্রা	...	" সুভদ্রা ।
বৃদ্ধ বর্দ্ধকী	...	" বিশ্বকর্মা ।
যম	...	ধর্মরাজ ।
সমুদ্র	...	জলাধিপতি ।
জগাপাগলা	...	মহাপুরুষ ।
ইন্দ্রদ্যুম্ন	...	অবন্তীর রাজা ।
শুশুচা	...	" রাণী ।
বিদ্যাপতি	...	ব্রাহ্মণ যুবক ।
বির্থাবসু	...	শবররাজ ।
ললিতা	...	বির্থাবসুর কন্যা ।
উৎসবচন্দ্র	...	জৈনিক নাগরিক ।
বিশ্বাধরা	...	উৎসবচন্দ্রের স্ত্রী ।

নগর-রক্ষক, মন্ত্রী, প্রহরী, পথিক, নাগরিকগণ, নাগরিকাগণ, বন্দিগণ,  
 সভাসদগণ, গ্রাম্য নরনারীগণ, দিব্য মূর্তিচয়, ললিতার সখীগণ,  
 যমদূতগণ, ঋত্বিকগণ, সুর-সপ্তক, তরঙ্গমালা,  
 দেবদাসীগণ ইত্যাদি ।



## প্রথম অঙ্ক

প্রথম গর্তাঙ্ক ।

অবন্তীপুর রাজপথ ।

নাগরিক ও নাগরিকাগণ কাণ্ডিয়া উৎসবে মাতিয়াছে  
সকলে আনন্দ, উল্লাস ও নৃত্যগীতে মগ্ন ।

সকলের হৃদয়ে প্রীতি ও বদনে  
হাস্ত ফুটিয়া উঠিয়াছে ।

একদল নরনারীর গান গাহিতে গাহিতে প্রবেশ ।

গীত

কাফি সিদ্ধু—থেম্টা ।

পুরুষগণ—হা-রা-রা-রা-রা-হো !

লুকিয়ে কোথা পালিয়ে যাবে

পালাবার কি আছে জো ।

স্ত্রীগণ—ছাড়' ছাড়' পথ ছাড়'

মিছে কেন আলিয়ে নার,'

দিও না ফাগের গুঁড়ো—

কথা রাখ,' কথা রাখ' গো ।

পুরুষগণ—এসেছে আজ বসন্ত অলির মত গুঞ্জরী,  
 রাগে রাঙা কৃষ্ণকলি ঐ উঠেছে মুঞ্জরি,  
 রাঙিয়ে দোব আজকে তোমায় সুন্দরি  
 মানা কেন শুনব লো ।

স্ত্রীগণ—কোকিল ডাকছে কুহু—মুহুমুহুঃ  
 দখিণ বায়ে শিউরে উঠি—উহুঃ-উহুঃ  
 আর জালায় জালা বাড়িও নাকো ॥

[ সকলের প্রস্থান ।

কথা কহিতে কহিতে একদল লোক প্রবেশ করিল ।

কানু । বাঃ বাঃ বাঃ ! এবার দোল-মঞ্চে গোবিন্দজীকে চমৎকার  
 সাজান হয়েছে ! দেখে চক্ষু জুড়িয়ে গেল !

মধু । তা হবে না কেন ভাই ? রাজা রাজড়ার কাণ্ড ! তা ছাড়া,  
 আমাদের মহারাজ ত' আর লোক দেখান বড়াই করতে এত  
 ক'রে ঠাকুরের "বার" দেওয়ান না ! তিনি যথার্থ ভক্ত ।  
 গোবিন্দজীর উপর তাঁর ভক্তি অগাধ । তার উপর রাণী-মা ত'  
 সাক্ষাৎ ভক্তি-ঠাকুরণ্ । ঠাকুর দেবতার উপর তাঁর যেমন  
 টান, এমনটী আর কিছুর উপর নয় । কাজেই আজকের  
 দোলঘাটার ঠাকুরের সাজ খুব চমৎকার হবে, এতে আর  
 আশ্চর্য্য কি ?

স্বরূপ । তা যা হোক মিতে, এবারে কিন্তু পর্কটা জনেছে খুব জোর ।  
 কত দেশ বিদেশের লোকই না এসে জুটেছে ! আর ক'দিন  
 তো কাণ পাতবার জো নেই ;—দিন রাত বিশ্রাম নেই,  
 কোথাও গান—কোথাও নাচ—কোথাও মানাই বাজছে—

কোথাও সংকীর্ণন হচ্ছে ; আর সবার উপর অনবরত  
“হা-রা-রা-রা-হো” ! “হোলি হায়” ! শব্দে সহর একেবারে  
তোলপাড় !

কান্নু। ঐ দেখ্—ঐ দেখ্—জগা পাগলা আসছে—জগা পাগলা  
আসছে ।

মধু। চূপ্ চূপ্ ! খবর্দার বারদিগর আর অমন ক’রে বলিস্নি ।  
পাগলা কি রে ? উনি কোন মহাপুরুষ ; ছদ্মবেশে ঐ রকম  
হ’য়ে আছেন । তুই জানিস্নি, নিজে মহারাজ ওঁকে কত  
ভক্তি-শ্রদ্ধা করেন ? ওঁর সব জায়গায় যাওয়া আসা করবার  
হুকুম আছে—তা সে অস্তঃপুরই বা কি, আর রাজসভায়ই  
বা কি ! ওঁকে কি অমন ক’রে বলে !

কান্নু। আমি জানিনি দাদা ! ঘাট মান্ছি,—অপরাধ হয়েছে !  
দোহাই ঠাকুর, অপরাধ নিও না !

### জগা পাগলার প্রবেশ ।

জগা। ই্যা হে, তুমি এত চালাকি শিখলে কোথায় ?—

মধু। দোহাই ঠাকুর—

জগা। কেন বল দেখি এমনটা করুলে ? কালো রূপ চমৎকার রূপ !  
কালোয় জগৎ আলো ! সে-টা লুকিয়ে ফাগ মেখেছ কেন ?  
ফাঁকি দেবে—আমার চোথকে ফাঁকি দিয়ে পালিয়ে যাবে ?  
তাও কি হয়—ফাঁকি কি দিতে পার ? তুমি ত’ আর শুধু  
আমার চোখেই ভাস না—মন মাঝে, হৃদয়ের স্তরে স্তরে তুমি যে  
সদাই বিরাজ করছ !

জগা পাগলা ।

গীত

কাফি মিশ্র—একতাল।

অঙ্ক আবারি' আবীর রাগে—

ভেবেছ কি দেবে ফাঁকি ?

এত রঙ্গ কেন ত্রিভঙ্গ,

কেন এ চালাকি ?

মাথ্লে মুখে কাগের গুঁড়ো,

লুকোয় কি হে শিখি চুড়ো ?

ঠোঁটের হাসি চাপ্লে কি হয়,

লুকোয় নি তো চপল ঝাঁখি !

রাঙা ক'রে পীত বসন,

এড়িয়ে যাবে আমার নয়ন ?

আমার চোখেই শুধু ভাস' কি শ্রাম,—

হৃদে আছ জান' না কি ?

[ প্রস্থান ।

স্বরূপ । চমৎকার ! খাসা গান !

মধু । গাইলেও বেশ !

( নেপথ্যে কোলাহল )

কাহ্ন । আরে কি গোলমাল উঠলো ! লোক সব ছুটেছে ভিড়্ ভিড়্  
ক'রে ।

মধু । ব্যাপার কি ? ব্যাপার কি ?

স্বরূপ । চল, দেখি গে চল ।

[ সকলের প্রস্থান ।



আর্তনাদ করিতে করিতে কতিপয় নর-নারীর প্রবেশ ।

১ম পুঃ । পালা—পালা—পালা ! বাপ্ রে, কি মূর্তি ! যেন সাক্ষাৎ  
যম ।

২য় পুঃ । ক্ষেপেছে—ক্ষেপেছে । নইলে এমন মারমুখী কখনও মানুষ  
হয় ? বাপ্, ষাকে দেখছে তাকেই মার ! ক্ষেপেছে ।

৩য় পুঃ । আমি তার বালাবন্ধু । লোকে বলে আনাদের এক গলায়  
দিলে, আর গলায় যায় ! আমার কথা শুনলে না । আমি  
নিষেধ করতে গেলুম, তা আমাকেই মারতে উদ্ভত ।

৪ম পুঃ । পুরুষ মানুষের উপর তেমন ত' পীড়ন নেই ! মেয়েগুলোকে  
দেখছে, আর ঠেঙাচ্ছে ! ছেলে বুড়ো বিচার নেই, ষাকে  
পাচ্ছে তাকেই চুলের ঝুঁটি ধরে—

৫ম স্ত্রী । ওমা, কি হবে গো ! আমি এত ক'রে চুল বেঁধে এসেছি—

৬য় পুঃ । থাম মাগী ! চুল বেঁধেছে ! এদিকে যে যমে বাঁধবার  
উপক্রম হয়েছে । একে জোয়ান ছোকরা, হাতীর মত শক্তিমান  
—তার বামুন, সাতখুন মাপ্—তার উপর ক্ষেপেছে, ক্ষেপার  
কাছে এগোর কে ! একেবারে তেরম্পর্শ যোগ ! আজকার  
আমোদ আহ্লাদ একেবারে সব মাটি ! যে যার প্রাণ নিয়ে  
“পালাই—পালাই” ডাক ছাড়াচ্ছে !

৭য় পুঃ । পালিয়ে কতক্ষণ তিষ্ঠবে ? তার চেয়ে বরং এস, সকলে মিলে  
ওকে বাধা দি । একবার পাজা-কোলা ক'রে ধরতে পারলে  
আর ষাবে কোথা । হাতে পারে বেঁধে ফেলে রেখে দোব ।

৮ম পুঃ । আশ্চর্য্য ! পথে একজনও চৌকিদার নেই ! লোকের এই  
বিপদ—একটু সাহায্য করবে—না—

২য় স্ত্রী। থাকবে না কেন? ঐ যে সব পানের গুলো গালে দিয়ে,

লোকের কাছে হোলীর খাজনা আদায় করছে।

১ম পুঃ। হোলীর খাজনা?

২য় স্ত্রী। ঐ পার্কনী।

৩য় স্ত্রী। (ক্রোড়স্থ কন্যাকে প্রহার করিয়া) হতভাগা মেয়ে!

পার্কনীর নামে অগ্নি হাত বাড়িয়েছে।

কন্যা। (ক্রন্দন) এঁগা! এঁগা!

৪র্থ পুঃ। ভাল আপদ! একে গোদ, তায় বিষফোড়া। নিজেকে

সামাল দেওয়া ভার, আবার মেয়েটাকে দিলে কাঁদিয়ে!

৩য় স্ত্রী। ধর না তবে তুমি! ঝাড়া হাত পায়ে আমি আপনার

পালাতে পারব।

৪র্থ পুঃ। পালালেই হ'ল আর কি? ওটা যে মেয়েছেলে—ধরবে

আর শানে আছড়ে মারবে। শুনছো না আণ্ডা বাচ্ছা বিচার

করছে না; মেয়ে নামে চটা।

৩য় স্ত্রী। (সরোদনে) ও—মা—গো!

২য় পুঃ। থানো বাচ্ছা! আর মাকে ডাকে না। নিজে, মেয়ে

আবার মা! একটা মেয়ে নিয়ে সামলান দায়—একেবারে তিন

পুরুষ!

৩য় পুঃ। দাঁড়িয়ে থেকে লাভ নেই। চল, যা হোক একটা উপায়

করা বাক্ গে।

[ সকলের প্রস্থান।

দ্বিতীয় গর্ভাক্ষ ।

প্রেক্ষামঞ্চ সম্মুখস্থ—রাজপথ ।

ইন্দ্রদ্বায়, গুণ্ডিচা, পার্শ্বচর ও পার্শ্বচারিণীগণ ।

( নেপথ্যে কোলাহল )

ইন্দ্র । একি হ'ল মহা নগরে !  
 আনন্দ হিল্লোল, উৎসব কল্লোল,  
 রোদনের রোলে কেন হ'ল রূপাস্বর !  
 ব্যথিত অন্তর—  
 শুনি ভীতের চীৎকার ।  
 ফুল্লচিত, উল্লসিত নাগরিক দল  
 এবে পলায়িত সবে লয়ে নিজ নিজ প্রাণ ।  
 আকস্মিক এ পরিবর্তন—  
 ইন্দ্রজাল সম মনে গণি ।

গুণ্ডিচা । কি আশ্চর্য্য মহারাজ,  
 ক্ষণ পূর্বে উৎসবেতে যারা  
 ছিল আত্মহারা,  
 প্রাণ ভয়ে পলায়ন করে তারা—  
 ত্যজি আত্মজন ।  
 রোদন—রোদন—  
 চারিদিকে উঠে শুধু কাতর রোদন !  
 হে রাজন—  
 রমণীর সঙ্করণ কঠ স্বর—  
 মর্মান্বিত করিছে আমারে ।

ইন্দ্র । নিদ্রিত কি নাগরক  
 প্রতিধ্ব, প্রহরী যত ?  
 রাজ্যময় উঠে হাহাকার,  
 প্রতিকার করিবার নাহি একজন ।  
 নারী, বৃদ্ধ, শিশু অগণন—  
 ওই আলোড়িত, বিক্ষুব্ধিত  
 নর-সিন্ধু মাঝে পড়ি,  
 নানা মত সহে নির্যাতন ।  
 ধিক্ ধিক্—শত ধিক্  
 কর্মচারীগণে নোর,  
 বিপন্ন প্রজায় বারা না করে সাহায্য কিছু !

নগর রক্ষকের প্রবেশ ।

নগর রঃ । অবধান মহারাজ !

অতি দুর্লক্ষণ আজ নগরে প্রকট ।

ইন্দ্র । বিকট চীৎকার যত আর্ন্ত আতুরের  
 বহু পূর্বে সে সংবাদ দিয়াছে আমায় ।

কেন এ দুর্দিন,

কি কারণে কাঁদে যত ভাগ্যহীন,

পেরেছ কি তথ্য তার করিবারে আবিষ্কার ?

নগর রঃ । বাজার নফর

সমস্ত নগর তন্ন তন্ন করি অন্বেষণ,

এখনি করিবে হির বিপ্লব কারণ ।

স্বসতর্ক, প্রভুভক্ত রাজপুরুষ নিচয়—

সেই কার্যে নিয়োজিত করিয়াছে  
নিজ দেহ মন ।

ইন্দ্র । তোমার কি হেতু তবে হেথা আগমন ?  
নাহি করি বিপ্লবের মূল উৎপাটন,  
রাজ পাশে কি লাগিয়া  
আছ স্থির পুত্তলি মতন ?

নগর রঃ । প্রভু !

মা জননী রাজরাণী বিরাজেন রাজপথে ;  
ভৃত্যের কর্তব্য এবে  
বিধি মতে নিরাপদ রাখিতে তাঁহার ।  
আচস্থিতে ঘটেছে বিভ্রাট—  
হে সম্রাট,  
অসম্ভব নহে কোন বহিঃ শত্রু আক্রমণ ।  
তাই রাজ দেহ করিতে রক্ষণ,  
রাজ পাশে উপস্থিত  
চির অস্ত্রধারী এই চির আজ্ঞাধীন ।

গুণ্ডিচা । মহীপাল, তিলকে করিয়া তাল  
ঘটাতে জঞ্জাল  
দক্ষ বটে নগর-রক্ষক ।  
কার্য হ'তে বাক্য এর প্রশস্ত অধিক ।

ইন্দ্র । বাক্যবীর,  
নাহি চান মহারাণী  
শুনিবারে বাক্যের পটুতা তব ।

যাও নিজে ঘরা,

বিপ্লবের হেতু আবিষ্কার তরে ।

নগর রঃ । যথা আজ্ঞা মহারাজ !

কেশে ধরে এখনি আনিব

তুষ্ট বিদ্রোহী পামরে রাজ সন্নিধানে ।

[ নগর রক্ষকের প্রস্থান :

গুণ্ডিচা । আশ্চর্য্য এ জীব !

উপভোগ্য অবসর কালে !

একদল বিপন্ন প্রজার প্রবেশ ও গীত ।

জয়জয়ন্তী মিশ্র—একতাল্লা ।

স্ত্রীগণ—মান রাখ' গো, প্রাণ রাখ' গো,

ত্রাণ কর এ বিপদে !

পুরুষগণ—দয়াল রাজা, কাতর প্রজা

শরণ নাগে শ্রীপদে ॥

স্ত্রীগণ—হায় হায় কি আক্ষেপ !

হয় নারী দেহে হস্তক্ষেপ !

পুরুষগণ—দীনের ব্যথা বুঝে রাজা,

রক্ষা কর' এ আপদে ॥

নারীর জাতি—মাতৃজাতি,

তাদের রক্তে মানব জাতি,

স্ত্রীগণ—ক'রনে মোদের এ দুর্গতি

বাজে বিশ্বপতির হৃদে ॥

সকলে । রক্ষা করুন, রক্ষা করুন, দোহাই মহারাজ রক্ষা করুন !

রাজরাণী মা জননী রক্ষা করুন !

গুণ্ডিচা । ক্ষান্ত হ'রে ওরে বৎসগণ,

শান্ত কর অশ্রু বরিষণ !

প্রপীড়িতা মর্মান্বিতা কুললক্ষ্মী সব,

ক্ষান্ত হ'ও—স্তির হ'ও—

হ'ও মা নীরব ।

নারী আমি,

অন্তরের অন্তর হইতে

বুঝি মাগো ব্যথা তোমাদের ।

নিগ্রহ, লাঞ্ছনা, আর অপমানে

তোমা সবাঁকার

অপমান হইয়াছে আমারও জননী !

রমণীর নির্যাতনে নির্যাতিতা

হন দেবী শঙ্করী আপনি ।

মাগো, নিবারিতে আকস্মিক এই অঘটন

নিয়োজিত হইয়াছে দক্ষ রক্ষীগণ ।

এখনি নিভিবে এই অশান্তি অনল,

ঘুচে যাবে অবসাদ, মুছে যাবে বিপদের রেখা,

অশ্রুভরা মুখে সবাঁকার

হাসি দিবে দেখা,

তোমাদের ব্যথাতুর বুক

সম্রাটের মহিমার সিংহাসন

পাতা হবে চির তরে ।

✓ জনৈক হৃষ্টপুষ্ট লোককে ধরিয়া নগর রক্ষকের প্রবেশ।

নগর রঃ। জর হোক মহারাজ! এই সেই বিদ্রোহী দুর্জন! দিন  
প্রভু, একে স্বহস্তে দণ্ড! আর দিন মহারাণী, আমার মুক্ত হস্তে  
পুরস্কার।

ইন্দ্র। এই সেই বিদ্রোহী দুর্জন! দণ্ড এরে দিব সমুচিত। নগর  
রক্ষক, আমি তোমার কার্যতৎপরতায় প্রীত। মহারাণীও  
তোমার উপর পরম সম্বৃত্তি করেছেন। (লোকের প্রতি) রে  
হতভাগ্য নিন্দোদ! তোর আচরণে, তোর ব্যবহারে আজ এই  
আনন্দ উচ্ছাস মুখরিত নগরী ব্যথিতের আর্তনাদে পূর্ণ হয়েছে।  
তোর জন্ত মৃত্যু সাগ্রহে অপেক্ষা করছে—তোর ইহ লীলা  
সাপ্ত হবার—

জনতা। মহারাজ, মহারাজ! ক্ষান্ত হোন। কার উপর দণ্ডাস্ত্র  
দিচ্ছেন? এ কে? এ ব্যক্তি অত্যাচারী নয়। নিরীহ  
হতভাগ্যের উপর অত্যাচার আচরণ করবেন না প্রভু।

নগর রঃ। (স্বগতঃ) কি সর্বনাশ! সব বৃষ্টি পণ্ড হয়।

ইন্দ্র। কি! এ ব্যক্তি অত্যাচারী নয়! নিরীহ নাগরিক মাত্র!  
একে অকারণ এ স্থানে আনা হয়েছে? নগর-রক্ষক!—

নগর রঃ। প্রভু! সব মিথ্যা—সব মিথ্যা। দেখছেন না মহারাজ,  
কি ভীষণ আকৃতি। ঐ আকৃতিতেই ওর প্রকৃতি জানা যাচ্ছে।  
এই ব্যক্তিই যত অনর্থের মূল!

জনতা। দোহাই মহারাজ—দোহাই না জননী রাজরাণী—অকারণ  
নির্দোষীকে শাস্তি দিয়ে রাজ্যে অমঙ্গলকে ডেকে আনবেন না।

উদ্ভিচা। মহারাজ, আমার বিশ্বাস এ ব্যক্তি নিরপরাধ। আসে,  
শকার হতভাগা জ্ঞানশূন্য—বাকশূন্য হয়ে গেছে। চতুর নগর-



রক্ষক আমাদের প্রতারণিত ক'রে নিজের কার্যকুশলতা দেখাতে একে ধরে এনেছে।

ইন্দ্র। তা কি সম্ভব ?

শুণ্ডিচা। অসম্ভব বা কেমন ক'রে হবে মহারাজ ? যারা উৎপীড়িত, লাঞ্চিত, প্রহৃত তারাই—সেই সব প্রজারাই যখন বলছে এ ব্যক্তি নির্দোষ, তখন আনার ধারণা সম্পূর্ণ অমূলক নয়—এ কথা সত্য।

ইন্দ্র। নগর রক্ষক, এই ভাবে মিথ্যার আশ্রয় নিয়ে তুমি আমার প্রতারণিত ও নিরীহ প্রজার সর্বনাশ করতে চাও !

নগর রঃ। না মহারাজ, মিথ্যা নয়—

নেপথ্যে কোলাহল ও বিদ্যাপতির প্রবেশ।

জনতা চঞ্চল হইল।

বিদ্যা। সম্পূর্ণ মিথ্যা ! মহারাজ, এই অকর্মণ্য,—অবিশ্বাসী,—  
অপদার্থের দণ্ড বিধান করুন।

ইন্দ্র। কে তুমি ? তোমার কথার প্রত্যয় কি যে এই রাজপুরুষকে  
দণ্ড দেব ?

বিদ্যা। ভাল, যদি ওকে দণ্ড দিতে না চান—নাই দেবেন। কিন্তু  
এই নিরীহ, নির্ভরোদ্ভী, ভয়ান্ত নাগরিককে মুক্তি দিন। আর  
আপনার রাজ্যে যেখানে যত রমণী আছে—বালিকা বৃদ্ধা  
বিবেচনা না ক'রে—ভিখারিণী রাজরাণী বিচার না ক'রে,  
সকলকে এই মুহূর্তে রাজ্য হতে নির্বাসিত—না—না—নির্বাসনে  
ফল হবে না। রমণী নাম ধরনী হতে মুছে যাওয়া চাই।  
সকলকে—সকলকে বধ করুন।

ইন্দ্র । উন্মাদ ব্রাহ্মণ, তুমি একি প্রলাপ বকছ ? অকারণে রাজ্য  
শুদ্ধ সমস্ত নারীর মৃত্যু আজ্ঞা দিব আমি ?

বিদ্যা । অকারণে নয় মহারাজ—অকারণে নয় । অতি উচ্চ কারণে  
আপনি সত্ত্বর এ রাজ্য রমণীশূন্য করুন । নতুবা সৰ্বনাশ হবে—  
সৰ্বনাশ হবে ।

গুণ্ডিচা । ( স্বগত ) তেজঃপুঞ্জ কলেবর  
কেবা এই দ্বিজবর ।  
নয়নে বয়ানে  
সারল্যের দিব্য জ্যোতিঃ হয় বিকীরণ ;  
স্বদৃঢ় বচন উচ্চারিত সরল বিশ্বাসে ।  
হেরি এরে  
বাতুল বলিয়া ভুল নাহি করে মন ।  
কেবা এই জন ?  
কেন হয় অন্তর চঞ্চল মম  
নেহারি ইহারে ।

ইন্দ্র । ব্রাহ্মণ, তোমার কথায় মহারাজী চঞ্চল হ'য়ে উঠেছেন । যদি  
তোমার অন্ত কিছু বক্তব্য না থাকে, তা হ'লে তুমি এস্থান হ'তে  
অন্তত্ৰ যেতে পার ।

জনতা । মহারাজ এই সেই অত্যাচারী দুর্দ্ধৰ ব্রাহ্মণ । এই ব্যক্তিই  
আজকার উৎসব পণ্ড করেছে । এরই পীড়নে সকলেই  
মর্শাহত । একে দণ্ড দিন—মহারাজ দণ্ড দিন !

ইন্দ্র । এঁ্যা ! এই সেই পাপাচারী

অধম দুর্জন ?

এরই লাগি জলে রাজ্যে অশান্তি অনল !

বটে—বটে—

দণ্ড তবে দিব সমুচিত—

এই কৃতঘ্ন পামরে ।

শাস্তি নাশি দ্বিজবেশী

আরে দুঃরাঅন্,

আত্ম পক্ষ সমর্থন করিবার

যদি থাকে কিছু

কহ ত্বরা ।

অনুথায় লহ দণ্ড

করাল ভীষণ ।

বিদ্যা । যদি অভিনাষ

মম ইতিহাস করিতে শ্রবণ,

হে রাজন,

অপূর্ব কখন তবে শুন দিয়া মন ।

সাত্ত্বিক ব্রাহ্মণ আমি—

বন্ধন বিহীন ।

নাহি মাতা—নাহি পিতা—

নাহিক বনিতা—পুত্র বা ছুহিতা ।

একা আমি ভ্রমি এই

বিশাল ব্রহ্মাণ্ডে ।

অস্তুরেতে সাধ সদা—

দেখিতে এ ব্রহ্মাণ্ডের পতি ।

হে স্মৃতি,

হয় ত' বা উচ্চ অতি

আকাজ্ঞা আমার ।  
 হয় ত' বলিবে কেহ—  
 বাতুলের অলীক কল্পনা শুধু  
 দেখিতে সে সর্ব্ব কামপ্রদ ভগবানে  
 এই কলিকালে, এই কঠিন ধরায় ।  
 যাহা হোক মহাভাগ,  
 আমি ছিছু  
 মত্ত মোর ইষ্টে আরাধনে ।  
 কায়মন প্রাণে নীতি নীতি  
 রত ছিছু ধরিবারে সেই ধরণী ঈশ্বরে  
 মোর ক্ষুদ্র ভুঞ্জে—ক্ষুদ্র বক্ষে ।  
 আমার ক্ষুদ্রতা মাঝে  
 ক্ষুদ্র হ'য়ে ধরা দিতে নোরে  
 এসেছিল গত নিশি ভোরে  
 মোর বাহা-কল্পতরু ।  
 হে রাজন,  
 উষা আসি তখন চূমে নি ধীরে  
 ধরণীর শির,  
 তখনও বিহগ কুল  
 গায় নাই আগমনী তার ;  
 শুধু সে প্রভাত-কল্পা নিশি  
 বৃকে লয়ে পাণ্ডুবর্ণ শনী,  
 বিদায়ের কথা গুলি  
 বলিতেছিল হে তার শ্রবণ কুহরে ।

হেন রজনীর চতুর্থ প্রহরে,—  
 স্বরণেও পরাণ শিহরে—  
 দেখিলাম,  
 নিদ্রা, জাগরণ, স্বপ্ন,  
 সকল অবস্থা হ'তে ভিন্ন এক ভাবে,  
 দেখিলাম আমি,  
 এসেছে ঈপ্সিত মোর বিশ্বের ঈশ্বর !  
 মরি মরি কি সে শোভা  
 প্রাণ মন লোভা !  
 অধরে মুরলী সাজে,  
 চরণে নূপুর বাজে,  
 শির শোভে শিখি-তাজে,  
 ক্ষুদ্র বপু হ'য়ে রাজে ক্ষুদ্র হৃদে মোর ।  
 ভুলে গেহু সব চিন্তা,  
 সুখ দুঃখ, ভাল মন্দ,  
 বিশ্বাসি ও অসুভৃতি সব হ'ল লোপ  
 সেই অপরূপ রূপ নিরখিয়া ।  
 হয় না স্বরণ  
 কতক্ষণ হেন ভাবে ছিনু নিমগন ।  
 বুঝি বা সে এক পল ;  
 বুঝি বা সে যুগ যুগান্তর !  
 সহসা অস্তর মোর হইল বিকল,  
 হেরিয়া বিকলাঙ্গ সে প্রাণের মূর্তি ।  
 নাহি তার হস্ত পদ,

নাহিক শ্রবণ যুগ,  
 দর দর ধারে ছুটিছে শোণিত ক্ষত মুখে ।  
 মহাদুঃখে আর্তনাদ করিলু বিষম ।  
 আমারে সাধুনা দিল সস্তাপ-নাশন  
 কত মধুমাথা বোলে ।  
 হ'য়ে স্থির কিছু পরে,  
 জিজ্ঞাসিলু সকাতরে—  
 কে তোমার হেন দশা করিয়াছে প্রভু !  
 কার তরে অঙ্গহীন শ্রীঅঙ্গ তোমার ?  
 নয়ন নির্দেশে দেখাইয়া  
 কহে ভগবান—  
 ঐ নারী ঘটায়ছে হেন দশা মোর ।  
 তখনই চাহিলু সেই নারী মূর্তি পানে ।  
 কিন্তু মহারাজ,  
 অদৃষ্ট-পূর্বা সে নারী  
 চকিতে লুকাল শূন্য নায়ে—  
 নারিলু চিনিতে কেবা সেই পাপিয়সী ।  
 ফিরে চেয়ে দেখি—  
 গেছে শূন্যে মিলাইরে মোর পরাণের ধন ।  
 ছুটে গেল নিদ্রা ঘোর,  
 টুটে গেল হৃদি মোর—  
 প্রভাতে জাগিলু  
 লয়ে ভারাক্রান্ত এ অস্তর ।  
 পথে দেখি—

চলে নারী সারি সারি কাণ্ডয়া উৎসবে ;  
অমনি ছুটিলু সবে বধিতে তখনই ।

নৃপমণি,

হয় ত বা সে রমণী,

ইহাদেরই মাঝে একজন ।

ঈন্দ্র । অলীক স্বপনে মাতি,

ভ্রান্তমতি তুমি হে ব্রাহ্মণ,

যেই ক্ষতি করেছ সাধন—

তুলনা নাহিক তার ত্রিজগত মাঝে ।

পণ্ড হইয়াছে শুভ কাণ্ডয়া উৎসব—

নিরীহের রক্তপাতে,

অবলার জীবন বিনাশে ।

যোগ্য দণ্ড তাই তোমা

দিব সুনিশ্চয় ;

দেখাব সবারে—

মম রাজ্য নয়,

অত্যাচারী দুর্বৃত্তের

লীলার আলয়,—

কিংবা সেথা না পায় প্রশ্রয়—

কোন অস্ত্র আচার ।

বিদ্যা । আজি হোলী উৎসব মহান্—

রক্তরাগে রাঙা সর্বস্থান ।

শুধু নিত্য যেথা ছুটে—

সত্য রক্তের তুফান,

সেই সে মশান  
 রঞ্জিত নহেক আজ কোনরূপ রঙে ।  
 হে ভূপাল,  
 শোণিতে আমার করি রাঙা বধ্যভূমি,  
 পূর্ণ হোক ফাগুয়া উৎসব ।  
 ব্রাহ্মণের উত্তপ্ত শোণিত—  
 মিশিয়া ফাগের রাগে,  
 হোলীর উৎসব কথা  
 চৌদিকেতে করুক প্রচার ।  
 সিদ্ধ যদি নাহি হয়  
 সঙ্কল্প আমার—  
 ধরণীতে থাকে যদি অস্তিত্ব নারীর,—  
 নাহি কাজ জীবন ধারণে ।  
 সন্দিগ্ধ কি হেতু মহীপাল ?  
 কর অজ্ঞা অমোঘ ভীষণ ।  
 মৃত্যু দণ্ড—মৃত্যু দণ্ড দেহ দণ্ডধর ।  
 গুণ্ডিচা । ( স্বগতঃ ) কি কঠোর অটল বিশ্বাস  
 সত্য কি অলীক স্বপ্ন করি দরশন,  
 উন্নত এ জন ?  
 সত্য কি  
 এ শুধু এর খেলার খেলা ?  
 না—না—  
 তেজ-দৃপ্ত স্বর  
 নন্দবৎ মোহিত করিছে মোরে ।



কে জানে এ দ্বিজ কেবা,—

প্রতি বাক্য যার

প্রত্যক্ষ বলিয়া মোর হয় অসুমান !

বিদ্যা । মহারাজ,

বিনর্ষ, বিবর্ণ, স্নান, চিন্তিত কি হেতু ?

মৃত্যু-আজ্ঞা দেহ মোর ত্বর—

নতুবা মাতির পুনঃ নারী-মেধ বাগে ।

প্রাণে সদা জাগে দুর্দশা প্রভুর,

পশে কাণে রোদনের সুর,

হৃদি ভরপুর তীব্র প্রতিবিধিৎসার ।

নররায়,

মুক্তি কিংবা মৃত্যু—

মোরে দাও—দাও হে ত্বরায় ।

ইন্দ্র । ল'য়ে যাও এরে ত্বর এই স্থান হ'তে ;

বিচার হইবে পরে ।

জনতা । জয় হোক ! জয় হোক মহারাজ !

বিদ্যা । জয় হোক ! জয় হোক তোমার নরেশ ।

সুপ্রসন্ন পরমেশ হ'নু মোর 'পরে ।

জুড়াতে আমার জালা,

তব মুখ হ'তে,

দিবেন নিশ্চয় তিনি দণ্ড শাস্তিময় !

কোথা বধ্যভূমি—কোথার জহ্লাদ—

লও মোরে ত্বর ।

ধরে না আহ্লাদ প্রাণে,

মিত্ররূপে আসে মৃত্যু

ঐ—ঐ মোর পাশে ।

[ বেগে প্রস্থান ।

নগর রঃ । আরে পালান যে ! ধর ধর—

[ সকলের প্রস্থান :

## তৃতীয় গর্ভাঙ্ক

বিশ্বাস্যুর পুরোছান ।

### ললিতা

ললিতা । আহা, কি সুন্দর চাঁদ উঠেছে ! নীল আকাশে যেন এক-  
খানি রজতের খালা পাতা । চাঁদের জ্যোৎস্নায় সকল স্থান  
আলোকিত । কোথাও কিছু লুকান নেই , সব চোখের উপর  
ভাসছে, সব যেন হাসছে ! আচ্ছা, এই উজল চাঁদের বিমল  
জ্যোৎস্নায় কি শুধু বাইরের জিনিষ-ই দেখা যায়,—না মানুষের  
মনের ভিতরটাও দেখতে পাওয়া যায় ? আমার বোধ হয় এমন  
মধুর চন্দ্রালোকে কি ভিতরের কি বাইরের কিছুই লুকান থাকে  
না । তাইতো কুঁড়ির ভিতর লুকান দল গুলি, আজ আর  
নিজেদের গোপন রাখতে না পেরে, এই সব একে একে বেরিয়ে  
পড়ছে ! এই যে তাদের বুকের মাঝে লুকান গন্ধ বাতাসে ভর  
ক'রে চারিদিকে ছড়িয়ে যাচ্ছে ! আজ আর কিছু লুকান নেই—  
কিছুই গোপন থাকবার জো নেই । তবে—তবে আমার  
মনের কথাও কি আজ গোপন থাকবে না ? বড় বিষম সমস্যা—  
কঠিন পরীক্ষা ! কোকিলের কুহ,—মলয়ের হুহ,—যুঁথির মন্দির

গন্ধ,—নদীর নাচের ছন্দ—সব যেন আমার অন্তরের কথা টেনে  
এনে মুখ দিয়ে বলাতে চায়—

## গীত

বেহাগ—একতাল।

এমন চাঁদিনী যামিনী !

কেমনে যাপিব একাকিনী ।

আবেগ ভরা একটা হিয়া

আমার নয়নে নয়ন দিয়া,

অচপল দিঠি বেড়ি মোর কটি

কই কহিছে সোহাগ-বাণী ।

আমি পুলকে ভুলোক ভুলিয়া

কই রচিলু স্বর্গ তাহারে বক্ষে তুলিয়া .

কই হাসিতে তাহার বহিছে সুধার

স্নিগ্ধ মন্দাকিনী ।

কিন্তু কি অদৃষ্ট ! এমন একজনও নেই, যে আমার এই কথাটা  
কাণ দিয়ে শোনে ! সংসারে মা নেই ; কাজেই মেয়ের মুখের  
দিকে চাইবে কে ? বাবা জানে মেয়ে আমার কচি খুকি—  
আজও সেই ফুলের কুঁড়িই আছি । এদিকে যে পাপ্‌ড়ী করে,  
বোঁটা সার হবার যোগাড় হ'তে চলো ।

নেপথ্যে লীলাধর । রাধে ! রাধে !

ললিতা । কে রে ?

নেপথ্যে লীলা । আমি ভিথিরী গো ।

## লীলাধরের প্রবেশ ।

ললিতা । ভিথিরী ? রাত্রে বেলা ভিক্ষে ? তাও আবার বাগানের  
ভিত্তর ?

লীলা । আমি রাত-ভিথিরী, তাই রাত্রে এসেছি । আর বাগানে  
এন্ম বা, হেতার ত' আর কিছু অভাব নেই—যা হোক  
ছ'টো ফল পাকড দিলেই পার' ।

ললিতা । আঃ দশা ! এমন ধারা গত্র,—খাটাতে পার না ? দেহ  
খাটালে ত' এই উঞ্জ বৃত্তি করতে হয় না । এমন ডব্কা  
ছোকরা—ভিক্ষে করতে লজ্জা হয় না ?

লীলা । বলি, খুব ত' লম্বা লম্বা কথা কইছ, কিন্তু আমার একটু  
কাজের পরিচর নাও—তার পর যত কথা আছে ব'লো ।  
দেখ, আমি গজুরী করতে গত্র খাটাই না বটে,—কিন্তু আমি  
গান গাইতে পারি । আর আমার গান শুনে, লোকে না কি  
খুসিও হয় । আমি একটা গান গাইছি—যদি তোমার ভাল  
লাগে, তা হ'লে কিছু না হয় দিও ।

## গীত

ধাম্বাজ—একতাল ।

আমার প্রেম-পাগলিনী কই ।

শয়নে স্বপনে                      ঘুমে জাগরণে

যে জানে না আমা বই ॥

আমার তরে যে নানান্ ছলে

বারে বারে ঘরের বাইরে চলে,

আমার বাঁশীটি                      শুনিতে ব্যাকুল

রহে যে সততই ॥

আমা লাগি যত লোক গঞ্জনা

কিছুই মানে না হৃদি রঞ্জনা,

সে বিনা আমার                      ভুবন আধার

আমি তো আমি নই ॥

ললিতা । বাঃ সুন্দর গান ! এ গান তুমি কোথা থেকে শিখলে ভাই ?

লীলা । ভাই ? এঁয়া ! একেবারে ভাই ব'লে সম্পর্ক পাতিয়ে ফেলে !

আমি ভিথিরী—ভিথিরীর বোন্ হয়ে লাভ কি দিদি ?

ললিতা । বাঃ ! মিষ্টি—আরো মিষ্টি ! কত মিষ্টি ! তোমার কথা

মিষ্টি—গান মিষ্টি—ডাক মিষ্টি ! তোমার নামটী কি ভাই ?

লীলা । লীলাধর । লোকে “নীলু” “নীলু” ব'লে ডাকে । শুধু মা

আদর ক'রে “নীলমণি” ব'লে ডাকতো । তা, সে মা-ও নেই

—সে মধুর স্নেহও নেই—আর সে মধুমাথা ডাকও শুনতে

পাই না ।

ললিতা । তোমার “নীলমণি” নামই সব চেয়ে ভাল লাগে ?

লীলা । ভাল আমার সবই লাগে । আদর ক'রে যে যা ব'লে

ডাকে, সেই নামই আমার ভাল লাগে । তুমি জান না—

একজন আমায় ডাকতো “নরসিংহ” ব'লে । আমি বললুম,

আচ্ছা তাতেই রাজি ।

ললিতা । তোমার কে আছে ?

লীলা । কে আর থাকবে ? আমি সবার দরজায় দরজায় ঘুরে

আত্মীয়তা পাতাতে যাই ; তার মধ্যে যে যা ব'লে আত্মীয়তা

করে সেইটাই থেকে যায় । তুমি যেমন এই ভাই পাতালে

—এমনি অনেক জায়গায় আমার অনেক রকম পাতানো লোক আছে।

ললিতা। তোমার আপনার কেউ নেই ?

লীলা। সবাই আমার আপনার—আমিও সবার আপনার। ভিথিরী  
—সব জায়গায় যাওয়া আসা করি—কাজেই সব দুনিয়াটাই  
আমার। জান না, কথায় বলে—“যাঁহা রাম তাঁহা অযোধ্যা” !

ললিতা। তোমার কথায় কেমন যেন একটা মাদকতা আছে। আমার  
যেন মাতিয়ে দিচ্ছে ! তুমি কে—সত্যি ক’রে বলো দেখি।

লীলা। ও হরি ! হ’য়েছে ! আর তুমি বেশীক্ষণ বাইরে থেক’ না  
দিদি ! চাঁদের আলোর লোকের মাথা খারাপ হ’য়ে যায় ;  
—বিশেষতঃ পূর্ণিমার চাঁদ !—তার পূর্ণিমার সেরা পূর্ণিমা  
দোল-পূর্ণিমা ! তুমি বাড়ীর ভিতর যাও। ভিক্ষে যদি আমার  
আজ না দিতে পার ক্ষতি নেই। আর একদিন এসে নিরে  
যাব’খন।

ললিতা। তুমি আবার কবে আসবে ?

লীলা। তার ঠিক নেই ! তবে তোমার ত’ শীগ্গীর বিয়ে হবে ?  
সেই দিন আসব নিশ্চয়।

ললিতা। আমার শীগ্গীর বিয়ে হবে, এ কথা তোমার কে বলে ?

লীলা। আমি খবর পাই। আরও বিয়ে হবে না গা ! বয়স হ’তে  
কি বাকী আছে ? শুধু বরের এতদিন ঘুম ভাঙেনি ব’লেই  
না বিয়ে বন্ধ আছে। তা সে কথা থাক—আজ আমি  
যাই দিদি ! আবার আসব।

[ প্রস্থান।

ললিতা। যা—চলে গেল ! লীলাধর—লীলাধর, ভাই—ভাই, নীলমণি !

কোথায় লুকিয়ে গেল—আর ত' দেখতে পাচ্ছি না! আমার  
ডাকও কি সে শুনতে পেলো না? গলা যে চেপে আসছে!  
ভাই! তাঁদের আলোও ম্লান হ'য়ে এলো!

[ প্রস্থান।

## চতুর্থ গর্ভাক ।

রাজসভা ।

রাজা ইন্দ্রদ্যুম্ন ও রাণী গুণ্ডিচা সিংহাসনে উপবিষ্ট ।  
মন্ত্রী, সভাসদগণ, বন্দিগণ যথাস্থানে দণ্ডায়মান ।

বন্দিগণ বন্দনা গাহিল ।

গীত ।

মূলতান—ঝাঁপতাল ।

মর্ত্যে ইন্দ্র সম তেজা, জয় রাজন ইন্দ্রদ্যুম্ন ।

শিষ্ট জন পালনকারী, দুঃস্থ দলন, জয় শত্রুঘ্ন ॥

করুণাময়ী জননী সমা

রাণী গুণ্ডিচা অতি মনোরমা,

রাজা ও রাণীর মিলন যেন কাঞ্চন সাথে রত্ন ॥

নির্ভীক রাজা ঋয়নিষ্ঠ,

রাণী মা চিন্তে' প্রজার ইষ্ট,

সমদর্শী চক্ষে তাঁদের কেহ নয় উচ্চ নিয় ;

প্রজার হৃদয়ে আসন যাদের সে রাজ-দম্পতী হ'উক ধন

সকলে । মহারাজ ও মহারাণীর জয় হোক !

মন্ত্রী । উৎসবের আনন্দ প্রবাহে বাধা পড়ায়, গতকল্য রাজ্যে যে বিপ্লব উপস্থিত হয়—তা যেমন আকস্মিক, তেমনি বিশ্বয় উৎপাদক । হে সনবেত সভ্যবৃন্দ, মহারাজ ও মহারাণী সেই অত্যাচারী আততায়ীর বিচিত্র বর্ণনার কথা চিন্তা ক'রে অত্যন্ত উৎকণ্ঠায় রাত্রি যাপন করেছেন । ঔঁদের চিন্তাভারাক্রান্ত বদন ও আরক্ত-নয়ন আমার কথার সত্যতার সাক্ষী । সুতরাং আজ অল্প সনস্ত রাজ-কার্য্য স্থগিত রেখে, মহারাজ শুধু সেই ব্রাহ্মণের বিচার ক'রে বিশ্রাম ক'রবেন, এই তাঁর ইচ্ছা ।

১ম সভ্যঃ । মন্ত্রী মহাশয়, মহারাজ যদি গত্যই অসুস্থ বোধ ক'রে থাকেন, তবে তাঁর আজ কোনরূপ কাৰ্য্য না করাই যুক্তিযুক্ত । বিশেষতঃ এই অদ্ভুত অলৌকিক ব্যাপারের সুবিচার, স্ত্রী-মীমাংসার জন্ত মস্তিষ্কের স্থিরতা ও চিন্তের প্রফুল্লতা একান্ত প্রয়োজন ।

ইন্দ্র । সভ্য-মহোদয় ! আপনাকে আমার আন্তরিক ধন্যবাদ জানিয়ে বলছি, যে প্রকৃত পক্ষে আমি এ বিষয়ের জন্ত কিছুমাত্র অস্থির বা বিমর্ষ নই । তবে মহারাণী সেই ব্রাহ্মণের অলৌকিক বর্ণনার বিশেষরূপ চঞ্চলা হ'য়েছেন । উনি সমস্ত রাত্রি কেবল সেই কথাই ক'রেছেন এবং সময়ে সময়ে বিশেষ আতঙ্কে জ্ঞানহারী হ'য়ে উঠেছেন । তাই আমার ইচ্ছা, সে বিষয়ের আজই মীমাংসা হ'য়ে যাক । মহারাণীর চিন্তের স্থিরতার জন্ত, সে ব্রাহ্মণ, “বাড়কর” কি না—অগ্রে তার প্রমাণ গ্রহণ প্রয়োজন !

১ম সভ্যঃ । উত্তম ! তবে ব্রাহ্মণকে সভায় আনা হোক ।



✓ বিদ্যাপতির প্রহরী বেষ্টিত হইয়া প্রবেশ।

শুশিচা। একি দিব্য জ্যোতি ! কি তেজঃপুঞ্জ মুরতি ! কি শাস্ত স্নিগ্ধ,  
ধীর গস্তীর বদন ! কি তীক্ষ্ণ সতেজ দীপ্ত চক্ষু ! আমায় যেন  
আকর্ষণ ক'রে কোথায় নিয়ে যেতে চায়। ওঃ, কি ভীষণ  
আকর্ষণ ! ( আসন ছাড়িয়া অগ্রসর )

ইন্দ্র। ইন্দ্রজাল ! ইন্দ্রজাল ! নিশ্চয় এ ইন্দ্রজাল ! ব্রাহ্মণ যাদুমন্ত্রে  
রাজ্ঞীকে মুগ্ধ করেছে। মন্ত্রী, সভাসদগণ, দেখ মহা রাণীর কি  
পরিবর্তন হলো। গলিতকেশা, স্থলিতবেশা মহিষী আসন ত্যাগ  
ক'রে ব্রাহ্মণনন্দনের নিকট গমনে উদ্ভতা। এ দুর্জন তাঁকে  
এতই উন্মত্তা করেছে। ওঃ ! হত্যা—হত্যা। যাদুকরকে হত্যা  
কর। বিচারের প্রয়োজন নাই ; বিচারে আমার আকিঞ্চন  
নাই। দুষ্টজনকে শাসন করতে রাজার কঠোর হস্ত প্রয়োজন।

মন্ত্রী। মহারাজ ! অধীনের নিবেদন—আপনি কিঞ্চৎ ধৈর্য্য ধারণ  
করুন। মহারাণী বিমনা—চঞ্চলা হয়েছেন সত্য ; কিন্তু  
আপনাকেও বেশ ধীর ও স্থিরমনা ব'লে বোধ হয় না। বিচার  
কর্তে ব'সে এত উতলা, এত উন্মত্তা হ'য়ে হঠাৎ কিছু একটা  
ক'রে ফেলেন—হয়ত বিচার-আসনের মর্যাদা ক্ষুণ্ণ হ'তে পারে।  
তাই—মহারাজের ধৈর্য্য ও নিরপেক্ষতা যতক্ষণ না ফিরে আসে,  
ততক্ষণ এ বিপের বিচার স্থগিত থাকাই শ্রেয়ঃ।

ইন্দ্র। আমার নিরপেক্ষতার সন্দেহ করবার কি কারণ আছে মন্ত্রী  
মহাশয় ? এ ব্রাহ্মণ হত্যাকারী। প্রকাশ্য রাজপথে, দিবালোকে,  
সহস্র লোক-লোচনের সম্মুখে এ ব্যক্তি বহু নিরীহ নারীর প্রাণ  
সংহার করেছে। স্মৃতরাং এর বিরুদ্ধে প্রাণদণ্ড কিছুতেই  
অবিচার বা পক্ষপাতিত্ব-দোষ-দুষ্ট আজ্ঞা বলা যায় না।

মন্ত্রী। আরও অদ্ভুত কথা মহারাজ ! এই ব্রাহ্মণ সম্বন্ধে যতদূর আমাদের জানা আছে, তাতে একে কোন দিন ছুঁ, দুর্জ্জন বা নীচ হত্যাকারী ব'লে বিশ্বাস হয় না। “প্রকাশ্য রাজপথে, দিবালোকে, সহস্র লোক-লোচনের সম্মুখে” এ যদি একাধিক অবলা রমণীকে বধ ক'রে থাকে,—তা হ'লে বুঝা উচিত যে হয় এর মস্তিষ্ক সুস্থ নয়—অথবা এ ব্যক্তি এমন কোন আকস্মিক উত্তেজনার বশবর্তী হয়েছিল, বার জন্ম এ হতভাগ্য নারী-হত্যা কর্ত্তে বাধ্য হয়েছিল। এখন মহারাজ, এই দুই অবস্থার যে কোনটাকে সত্য ব'লে মেনে নিলে আমরা এই ব্রাহ্মণকে হত্যাকারী ব'লে নির্দেশ করতে পারি না। কেন না, রাজার বিধানে উন্মাদনা বা আকস্মিক উত্তেজনার বশে হত্যা করা, মহাপরাধ ব'লে গণ্য হয় না। সুতরাং এ ব্যক্তি নারীঘাতী হ'লেও হত্যাকারীর দণ্ডে দণ্ডিত হ'তে পারে না।

২য় সভাঃ। মন্ত্রী মহাশয় যথার্থই বলেছেন। বিশেষতঃ ব্রাহ্মণ কখনই প্রাণদণ্ডে দণ্ডিত হ'তে পারে না মহারাজ !

মন্ত্রী। মহীপাল, এরূপ অবস্থায় যদি এই ব্যক্তির উপর কোন দণ্ড দিতেই হয়, তবে একে নির্বাসনের অধিক কিছু দেওয়া যায় না। যদি মহারাজ বিচারের নামে, অবিচারের প্রশয় দিতে না চান, তা হ'লে আমার মতে, এ ব্যক্তি এ রাজ্য হ'তে নির্বাসিত হোক। আর এ হতভাগ্য ব্রাহ্মণের রক্তপাতে বধ্যভূমি রঞ্জিত হ'য়ে কাজ নাই।

সভাঃ গণ। উদ্ভয় ব্যবস্থা ! মন্ত্রী মহাশয় যথার্থ ব্যবস্থাই করেছেন।

সাধু মন্ত্রীদেব।

ইন্দ্র। ভাল। যদি নির্বাসনই এই হতভাগ্য ব্রাহ্মণের যোগ্য দণ্ড

ব'লে বিবেচিত হয়, তা হ'লে আমি একে সেই দণ্ডেই দণ্ডিত করলুম। হতভাগ্য যুবক, তুমি সত্বর এ রাজ্য হ'তে নির্বাসিত হও। আমার শান্তিময় রাজ্যে আবার শান্তি ফিরে আসুক।

বিদ্যা। মহারাজ, দীন প্রজার প্রতি আপনার যে কোন বিধান সমস্তই পালিত হ'তে বাধ্য। সুতরাং আমি আপনার প্রদত্ত নির্বাসন দণ্ড গ্রহণ করলুম। কিন্তু মহারাজ, দরিদ্র ব্রাহ্মণ-কুমারের এই প্রার্থনা—আমার এই জন্মভূমি হ'তে—আমার পিতৃ-পিতামহের পুত্র পদরজম্পৃষ্টে এই রাজ্য হ'তে আমার বহিস্কৃত ক'রে না দিয়ে, যদি এইখানেই আমার মৃত্যুর ব্যবস্থা করতেন, তা হ'লে আমি হাসি মুখে সে দণ্ড গ্রহণ করতে পারতাম। তাই আমার বিষয় যদি পুনর্বিচারের কষ্ট স্বীকার করেন—

ইন্দ্র। যুবক, এ রাজসভা ; হেথায় বিচার হয় সূক্ষ্মভাবে—সনাতন নীতি অনুসারে। এখানে অনুন্নয় বা অনুরোধ রক্ষা পায় না।

গুণ্ডিকা। না, মহারাজ না। এ কথা সত্য নয়। বিচার কি শুধু কঠোর কুঠার উত্তোলনের নামাস্তর ? যে বিচারে দয়া নাই, স্নেহ নাই, ভাবের অভিব্যক্তি নাই—সে বিচার নয় মহারাজ, অবিচার। যে বিচারের লক্ষ্য কেবল অপরাধীকে শাস্তি দেওয়া,—সে বিচার ধ্বংস হ'য়ে যাবে ! সেই বিচারই জগতে দৃঢ় প্রতিষ্ঠিত হবে, যার উদ্দেশ্য পাপীকে সংশোধন করা, ভ্রান্তকে সুপথ দেখান, অত্যাচারীকে নয়—অত্যাচারকে সংসার হ'তে বিদূরিত করা। তাই আমার নিবেদন, আপনি এই দ্বিজের আবেদনে কিছু কর্ণপাত করুন। এ ব্রাহ্মণনন্দনের অন্ত কিছু না থাক, হৃদয় আছে মহারাজ।

ইন্দ্র । চিন্তার কথা মহিষী । মন্ত্রী মহাশয়ের কি মত ?

মন্ত্রী । মহারাণীর কথা সারবান্ মহারাজ ! ব্রাহ্মণকুমারের নির্বাসনের কথা, আর একবার বিবেচনা করলে মন্দ হয় না ।

ইন্দ্র । ভাল । মন্ত্রী মহাশয়, সভায় সকলে, এক বিচিত্র ব্যাপার— অলৌকিক ঘটনার কথা শুনুন । কাল অপ্রত্যাশিত ভাবে ভগবানের দোল-যাত্রার উৎসব পণ্ড হ'লে পর, সকলেই চিন্তিত ও চঞ্চল হ'য়ে পড়েন । তারপর এই ব্রাহ্মণকুমারের অকস্মাৎ আনাদের সম্মুখে আবির্ভাব ও এক অলৌকিক বৃত্তান্ত বর্ণনা শ্রবণে মহারাণী গুণ্ডিচা বিশেষ ভাবেই উন্মনা হন । আপনারা সকলেই লক্ষ্য করেছেন উনি আজ ও কি ভয়ঙ্কর চঞ্চলা । কিন্তু কাল নিশা উনি এত উদ্বেগ—এত চিত্তবিক্ষেপে কাটিয়েছেন, যে আমি তাই দেখে অত্যন্ত আতঙ্কিত হ'য়েছিলাম । মধ্যরাত্রে উনি কি এক দৃশ্য দেখে অচেতন হ'য়ে ভূপতিতা হন । তখন পাণ্ডচারিণীগণ, সেবিকাগণ সকলেই স্তম্ভিত হয়ে শারিতা । আমি মহারাণীর সেই অবস্থা দেখে সন্তোষিত হ'য়ে সর্ক নন্দনয়ন নারায়ণের স্মরণ কর্তে থাকি । তাঁর ধ্যানে, তাঁর চিন্তায়, তাঁর আরাধনায় কিছুকাল অতীত হ'লে পর, আমি যেন দেবদান—দেবর্ষি নারদ আমার সম্মুখে আবির্ভূত হ'য়ে বলছেন—“নীলাচলে ভগবান্ নীলনাথরূপে গুপ্তভাবে আছেন ! রাজন ! তুমি তাঁকে লাভ ক'রে জগতে তাঁর মহিমা প্রকাশিত কর—তোমার সর্ক সস্তাপ, সর্ক মানি দূর হবে—জগতে শান্তি স্থাপিত হবে ।” এই বলে দেবর্ষি অন্তর্হিত হলেন । আমার দেহ পুনরায় রোমন্বিত হ'য়ে উঠলো । আমি চমক ভেঙ্গে দেখি মহারাণী তখনও মুচ্ছিতা হয়েই আছেন ।

দকলে । আশ্চর্য্য ব্যাপার ! অদ্ভুত ঘটনা ।

ইন্দ্র । ব্রাহ্মণকুমার, আমি তোমার দণ্ড সম্বন্ধে পুনর্বিবেচনা ক'রে বলছি—যদি তুমি নীলাচল হ'তে সেই নীলমাধব মূর্ত্তি আবিষ্কার ক'রে আনতে পার, তা হ'লে আবার এই রাজ্যে—এই তোমার জন্মভূমিতে—তোমার পিতৃ পিতামহের দেশে তোমার স্থান হবে । না—না—দ্বিজনন্দন, তোমার স্থান হবে তা হ'লে আমার সিংহাসনের উপরে—আমার হৃদয়ের পরতে পরতে ।

সহসা জগা পাগলার প্রবেশ ও গীত ।

লুম্ব ঝিঁঝিট—একতাল।

ঐ তার ডাক শোনা যায়—“আয় আয় !”

সকল জ্বালা সকল মলা ধুয়ে নিতে তার করণায় ॥

কত আদরে সে ডাকে রে তোরে

ওরে তাপিত, ব্যথিত, পতিত রে

কেন বধির হ'য়ে আছি প'ড়ে, নিয়ে নিজের ক্ষুদ্রতায় ॥

সে যে জগৎ জুড়ে পেতেছে মেলা,

সবাই যে রে অধিকারী খেলতে সেথা খেলা,

তুই খেলবি যদি জন্ম বধির, আয় ছুটে আয় এই বেলা,

( দেখ ) তার খেলার মেলায় যোগ দিতে জীব জড় সবে ধায় ॥

ইন্দ্র । এস, এস যজ্ঞেশ্বর । আমার মহাযজ্ঞের সফল মাত্রে তোমার উদয়, আমার আশা পূর্ণের সূচনা করছে । আনন্দিত অস্তুর আজ তোমার বুকে নিতে ব্যগ্র বন্ধু !

জগা । ওরে বাবা ! জগা হ'লো যজ্ঞেশ্বর । দেমো হ'লো দামোদর । হলা হ'লো হলাধর । কালে কালে হচ্ছে কত—দেখে লাগে

থতমত । পালা—পালা জগা, পালা । ধরবে—ধরবে এখুনি  
ধরবে—পালা ।

### গীত

সিন্ধুড়া নিশ্র—একতাল্লা ।

পালা—পালা—ওরে ক্ষেপা, থাকিস্ নি আর হেথা !

এরা মুচ্ড়ে দিয়ে লেজটা রে তোর বিগ্ড়ে দেবে মাথা ॥

এদের বিদ্যে আছে, বুদ্ধি আছে,

এগোয় কেবা এদের কাছে,

এরা কহিতে জানে অনেক রকম মিষ্টি মিষ্টি কথা ॥

কেন সে সব কণার অহঙ্কারে,

ফেটে মরবি একেবারে ;

তার চেয়ে চল সেইখানেতে সে জন আছে যেথা ॥

[ প্রস্থান ।

ইন্দ্র । আনন্দময় পুরুষ ! সদা মুক্ত, সদানন্দ ! দর্শনে পাপ ক্ষয় হয় ।  
এখন ব্রাহ্মণকুমার, তুমি বোধ হয়, আমার পরিবর্তিত আদেশ  
পালন কর্তে অসম্মত নও ।

বিদ্যা । না মহারাজ, নয় । আপনার আদেশ এখন আর আমার  
নিকট দণ্ড বলে বোধ হচ্ছে না । এ যেন বহু মানে সম্মানিত  
ক'রে, আপনি আমার পাঠাচ্ছেন সেই বস্তুর আবিষ্কারে, বা  
সকল রোগের মহৌষধ—সকল শোকের সাহুনা—সকল দুঃখের  
অবসান । দাঁর নাম ক'রে তৃপ্তি—চিন্তা ক'রে আনন্দ—দর্শন  
ক'রে মোক্ষ । যাই মহারাজ ! আর বিলাস ক'রে অযথা সময়  
ক্ষেপে আবশ্যক নাই । মহারাজ ! রাজ-দণ্ডে দণ্ডিত হ'লেও,  
এই মূর্ত্তে গুচ্ছের বলে বলীয়ান্ এই অপরাধী আপনাকে

আশীর্বাদ ক'রে নিজের মঙ্গল কামনা করছে,—আপনার অভীষ্ট সিদ্ধ হোক—আপনার বাসনা পূর্ণ হোক—আপনার কামনা ফলবতী হোক। আমি মহারাজ! রাজরাণী জননী—জগদম্বার অংশরূপিণী তুমি। আশীর্বাদ কর মা, যেন আমি জয় যুক্ত হই। যেন আমার জীবনান্তের পূর্বে তোমার কোলে আশ্রয় পাই।

প্রতিষ্ঠা। বৎস, তুমি জয়ী হও। আমার মাতৃ-হৃদয় বিশ্বের সকল জননীর কণ্ঠের প্রতিধ্বনি ক'রে বলছে—তুমি জয়ী হবে—তুমি জয়ী হবে।

বিদ্যা। তবে আসি না।

প্রতিষ্ঠা। যাবার আগে বৎস, তোমার নামটি জানবার অধিকার কি তোমার জননী পাবে?

বিদ্যা। আমার নাম মা, বিদ্যাপতি।

প্রতিষ্ঠা। দাও পুত্র বিদ্যাপতি! ভপতির তুমি মুখ রক্ষা কর। শ্রীপতি তোমার সহায় হোন।

দকলে। শ্রীহরি! শ্রীহরি!

বন্দিগণের গীত।

নট নিশ্র—ঝাঁপতাল।

এস শ্রীধর ভূধর-ধর অধরে মুরলীধারী।

গোপীকেশ গোলোকেশ হৃষিকেশ হৃদ-বিহারী ॥

এস দর্পী-দর্প-মর্দন

যদুপতি জনাৰ্দ্দন

জগদানন্দ-বর্দ্ধন বৃন্দাবিনচারী ॥

এস লীলাময় রসিক প্রবর

অন্ন-মোহন শ্যাম নটবর

নব জলধর জিনি' কলেবর ভূ-ভার-হরণকারী ॥

## দ্বিতীয় অঙ্ক

### প্রথম গর্ভাঙ্ক ।

সমুদ্রতীর ।

লীলাধর ও বলভদ্রা ।

বল । এই জায়গা তোমার শেষে এত ভাল লাগলো ? সমুদ্রের নোনা হাওয়া কি দ্বারকায় বইত না ? তার জন্ত এত কষ্ট স্বীকার ক'রে এখানে আসার দরকার কি ছিল ?

লীলা । আমি কি নিজের দরকারে কিছু করি বোন ! পরের জন্তই যে আমার সব । দ্বারকা ছেড়ে এখানে এসেছি ঠিক সেই প্রয়োজনে, যে জন্ত বৃন্দাবন ছেড়ে মথুরায় গেছলুম—আবার মথুরা ছেড়ে গেছলুম দ্বারকায় ।

বল । ওঃ—ভক্তের জন্ত ? ভক্তাধীন ভগবান, তোমার ও ভণ্ডামীটুকু রাখ ত' ? ভক্ত ! কে যে তোমার ভক্ত, আর কে যে নয়, সেইটা একবার আমার বুঝিয়ে দিতে পার ? প্রহ্লাদ বলে “হরি হরি” সে হলো ভক্ত । হিরণ্যকশিপু বলে—“মিথ্যা কথা, হরি নেই” । সে পেলো তোমার কোলে স্থান । পাণ্ডবদের নাকি খুব ভক্তির জোর ছিল—তাই তুমি “পাণ্ডব-সখা” বলে পরিচয় দিতে গর্ব বোধ করতে । কিন্তু সেই পাণ্ডবদিগে—সেই তোমার সখা ধনঞ্জরকে—তোমার এই পদাশ্রিতা বোনুকে—কেন অভিমতের দারুণ শোকে জর্জরিত করলে দয়াময় ? ভক্ত ! ও সব ছেঁদো কথা কোথায় দাদা !



লীলা । ছেঁদো কথাই বটে । ভক্ত আর অভক্ত—আত্ম আর পর—  
এ সব আমি বলি না । আমি বলি “লীলা” ! আমার লীলার  
জন্য যে ভাবে যার থাকার প্রয়োজন, সে সেই ভাবে থাকে ।  
আমি শুধু তাদের নিয়ে একটু খেলা করি । খেলা সাজ হ’লে  
—আমার সামগ্রী আমি কোলে ডেকে নিই । এখানে যে  
এসেছি, এ-ও সেই লীলার—সেই খেলার তরে । বলে—  
“ভক্ত” ! ধেং, ভক্তই কি, অভক্তই কি—সবই ত আমি—

গীত ।

সিন্দু খাষাজ—একতাল্লা ।

আমি নিজের হাতে বাধন বেঁধে নিজের হাতে ছিঁড়ে ফেলি ।  
আমি আঁধার র’চে চক্ষু মুদি, আলোক জেলে চোখ মেলি ।  
আমি নিজে গ’ড়ে পারাবার,  
আপন মনে দিই সাঁতার ;  
আমি যুদ্ধ বাধাই শঙ্খ নাদে, বংশী রবে করি কেলি ॥  
যেথায় যত আছে প্রকাশ,  
আমার নানা ভাবের বিকাশ ;  
আমি সৃষ্টি ক’রে খেলার মেলা, আপন ভাবে খেলা খেলি ॥

বল । এবার এখানে কি খেলা খেলবে ? প্রেমের ফাঁদ, না রণ নাদ ?  
কোনুটি সাধ কালাচাঁদ ?

লীলা । খেলার কি কিছু ঠিক থাকে দিদি ? জল যে দিকে যায়,  
সেই দিকেই গড়াতে হয় । লীলার স্রোত কোন দিকে বইবে,  
তা ত’ আগে থেকে জানা থাকে না । যেমন পড়তা পড়ে,

তেমনি খেলতে হয়। (সহসা) ঐরে টনক্ নড়েছে—ডাক পড়েছে। তুমি এখানে একটু দাঁড়াও বোন। আমি একবার চট্ ক'রে আসছি।

বল। কি হ'লো আবার ?

লীলা। বলছি না টনক্ নড়েছে—ডাক পড়েছে, বাই, একজন ডাক্ছে—তাকে একবার দেখা দিয়ে আসি। তার সঙ্গে খেলাই এখানের বড় খেলা। [ প্রস্থান।

বল। বলিহারি ! তোমার রঙ্গ তুমিই জান দাদা ! এত চঞ্চল—এত চপল, অথচ এত স্থির, ধীর তুমি যে কেমন ক'রে হও, সেইটু বুঝি না ব'লেই যত পোঁকা লাগে। তুমি আমার মান বাড়িয়েছ “বোন” ব'লে। সেই বোন হওয়ার আনন্দে আমার প্রাণে সময় সময় গর্ক যে জাগে না, তা নয়। বরং বোধ হত নিজেকে তোমার ভগ্নী ভেবে সময় সময় অহঙ্কার ক'রে বলি দর্পহারি ! আজ তুমি তাই কি আমার সে দর্প ভেঙ্গে দিতে এই প্রসঙ্গের অবতারণা ক'রে গেলে ! তাই কি আমার বুঝিয়ে গেলে—কেউ নেই, কিছু নেই—সব মিথ্যা, সব ফাঁকা ! আচ্ছ শুধু লীলাধর, তুমি একা—একেশ্বর ! তোমার লীলার অংশী গ'ড়ে তুমি নিজেকেই নানা মূর্তিতে বিকাশ ক'রে চিরদিন খেলে বেড়াচ্ছ। ধন্য—ধন্য তুমি দয়াময়। মনের অহঙ্কার, মাৎসর্য—মধ্যে মধ্যে তুমি না ভেঙ্গে দিলে, আর যে আমি তোমার কাজে লাগব না। তোমার খেলায় যোগ দিতে চাইব না !

সমুদ্রের প্রবেশ।

দমুদ্র। বাঃ, কি সুন্দর ঠাম ! কি সুন্দর মূর্তি।

বল । কে আপনি ? এ ভয়াল, ভয়ঙ্কর রূপ, এ ভীষণ আকৃতি  
আমি ত' কখন দেখি নি ! কে আপনি ?

সমুদ্র । আমি সমুদ্র । আমি ভয়াল, ভীষণ সত্য ; কিন্তু এটা আমার  
বাহ্য আকৃতি । আমার অন্তর স্নিগ্ধ, শান্ত, শীতল ! আমি চির  
কোমল—চির তরল । ভদ্রে, তুমি কে, জানতে চাইলে আমি  
কি শুধু ধুয়েতার পরিচয় দেব ?

বল । আমি বলভদ্রা !

সমুদ্র । সুন্দর নাম—মধুর নাম ! তোমার অণু পরিচয় জানবার  
সৌভাগ্য কি আমার হবে ? শুধু নামে—শুধু নামের মাধুর্যে  
ত' নামীর সকল বিষয় জানা যায় না !

বল । (স্বগতঃ) তাই ত' কি বলি ? কি পরিচয় দিই ? দাদা কাছে  
নেই । আমার বড় ভয় হচ্ছে ।

সমুদ্র । নীরব কেন সুন্দরী ? তোমার কি পরিচয় দেবার বাধা  
আছে ? তুমি কি আত্মগোপন করতে এখানে এসেছ ? বল  
—বল যদি আত্মগোপনই তোমার ইচ্ছা হয়, আমি তোমার  
এমন স্থানে লুকিয়ে রাখতে পারি, যেখানের সন্ধান করা কারো  
সাধ্য নয় ।

বল । আমি আমার ভ্রাতার সঙ্গে সাগর তীরে বেড়াতে এসেছি ।  
আমরা বিদেশী—অল্প দিন মাত্র এখানে এসেছি । আমার  
ভ্রাতা এখনি ফিরে এলে, আমি তাঁর সঙ্গে আবাসে চ'লে যাব ।  
আপনাকে সে জন্ম ব্যস্ত হ'তে হবে না । আপনি এ স্থান হ'তে  
চ'লে গেলেই আমি সুখী হব !

সমুদ্র । আমি চ'লে যাব কি ? আমি সমুদ্র—এই উত্তাল ফেনিল  
জলরাশির অধিপতি । এ সমস্ত প্রদেশই আমার অধিকারভুক্ত ।

আমার ত' অন্ত্র যাবার উপায় নেই। বরাদ্ধনি, তুমি আমার সঙ্গিনী হও, আমি তোমায় বুকে নিয়ে, ঐ জল তলে, আমার প্রবাল-গঠিত, বহু লক্ষ-শত নগি-রত্ন-খচিত আবাসে লয়ে যাই।

বল। সে কি! আপনি কি বলছেন? আমি আপনার সঙ্গিনী হব কি? আপনি জানেন আমি কে?

সমুদ্র। কেনন ক'রে জানবো। তুমি ত' তোমার পরিচয় আমার দাও নি।

বল। আমার পরিচয় জানবার—জিজ্ঞাসা করবার আপনার অধিকার কি? আপনি যদি এক অবলা, অসহায়, কুল-ললনার প্রতি এরূপ রূঢ় বাক্য প্রয়োগ করেন—তা হ'লে আমার এ স্থান ত্যাগ করাই বিধেয়। (প্রস্থান উদ্ভতা)

সমুদ্র। তাও কি হয়। তুমি স্বেচ্ছায় আমার সঙ্গে না গেলে, আমি বলপূর্বক নিতে সঙ্কোচ করব না। তুমি রমণী—দুর্কলা রমণী! আর আমি বহু বলশালী সমুদ্র। আমার শক্তির নিকট তুমি কত ক্ষুদ্র তা তোমার ধারণা নেই, তাই এ কথা কইছ। স্মরনি, আমি তোমায় দেখে মোহিত, মুগ্ধ হয়েছি। তুমি আমার প্রাণ শীতল কর,—আমার প্রস্তাবে সম্মতি দাও,—তোমার কিছুর অভাব হবে না। ধন ঐর্ষ্য সম্পদ, মান মর্যাদা সন্ত্রম, সুখ সম্ভোগ তৃপ্তি কিছুরই অভাব থাকবে না।

বল। আমার ভ্রাতার অনুগ্রহে আমার ও সকল কিছুরই অপ্রতুল নাই। আমি ধনের ভিখারী নই। আপনি আমার আশা ত্যাগ করুন—ত্যাগ করুন।

সমুদ্র। এ জীবনে নয়—এ জনমে নয়। তোমার নিমিষের দর্শনে

আমি কত চঞ্চল হ'য়েছি জান, রঙ্গিনি ! আমি সমুদ্র ; কত শত সুন্দরী নিত্য আমার বক্ষে অবগাহন ছলে ঝাঁপিয়ে পড়ে । তাদের বিহীনিত রূপ-রাশি, বিকশিত যৌবন-ভার সব আমার অঙ্গে লুটিয়ে দেয় । আমি তা দেখেও তাদের দিকে ক্রক্ষেপ করি না । আর তুমি মাত্র আমার তটে এসেছ—সান্নিধ্যে দাঁড়িয়েছ—তাহেই আমি উন্মাদ হ'য়েছি । তোমাকে আমি এত সহজে কি ছাড়তে পারি ? না তোমার আশা এক কথায় ত্যাগ করব ?

বল । হায় লুক হতভাগ্য ! আপনি যে কি সর্কনাশকে নিমন্ত্রণ দিচ্ছেন, তা বুঝতে পারছেন না । আপনি আমায় একা দেখে—অবলা রমণী ভেবে যে কথা বলছেন—আমার ভ্রাতার কর্ণে সে সব কথা পৌঁছলে, তিনি আপনার দুর্গতির অবধি রাখবেন না ;—এই ভেবে আপনি নিরস্ত হন । স্বেচ্ছায় নিজের অমঙ্গলকে বরণ করবেন না । আমার ভ্রাতা অলৌকিক শক্তিশালী ।

সমুদ্র । সুন্দরি ! আমি পুরুষ । আমি মুগ্ধ, মোহিত, উন্মত্ত হ'তে পারি,—কিন্তু আমি পুরুষ । নারীর নিকট নিজের শক্তি সামর্থ্যকে হীন প্রতিপন্ন হ'তে দিতে, আমি কিছুতেই পারব না । আমি তোমায় জানিয়ে দিতে চাই যে আমি কতদূর শক্তিমান ;—আর তোমার ভ্রাতা আমার তুলনায় কি নগণ্য ; ভাল, আগে আমাদের শক্তির পরীক্ষা হোক, তারপর তুমি আমার অঙ্ক জুড়ে বসো । তোমার ভ্রাতা বোধ হয় এখনি তোমার নিকট ফিরে আসবে ? তুমি ত' তার সঙ্গেই এখানে বেড়াতে এসেছ ?

বল। হ্যাঁ। কিন্তু আমার ভাই বড় খেয়ালী মানুষ। হয় ত' তিনি শীঘ্র হেথায় না-ও ফিরতে পারেন।

সমুদ্র। বড় আশ্চর্য্য ত' ! তোমার এখানে একলা ফেলে রেখে, তোমার খেয়ালী ভাই কোথায় আছে—কখন ফিরবে তার কিছু ঠিক নেই ; আর তুমি বার বার তার কথা ক'য়েই আশ্ফালন করছ !

বল। আমার ভ্রাতার মহা গুণ যে তিনি বিপদের আহ্বান শুনে স্থির থাকতে পারেন না। বিপদে প'ড়ে যদি কেউ তাঁকে ডাকে, তিনি যত দূরেই থাকুন না—ছুটে এসে বিপদে উদ্ধার করেন।

সমুদ্র। কটে ? তবে তুমি যদি নিজেকে সত্য বিপন্ন মনে ক'রে থাকো—তা হ'লে একবার তাকে ডাকো। আমি তোমার সেই বিপন্ন-তারণ শক্তিমান ভাইকে দেখি। কেন আর অবশ্য কাল হরণ ক'রে, এই তপ্ত বালুর উপর কষ্ট পাও।

### নীলাম্বরের প্রবেশ।

নীল। ডাকা কি শুধু টীংকার করলেই হয় মূর্খ ? অহুরের ডাক নীরব ভাষায় উচ্চারিত হ'লেও তার কাণে গিয়ে প'ছছায়।

বল। দাদা ! দাদা !

নীলা। ভয় কি বোন। ভয় কি ভোনার ! তোমার অহুরের আহ্বান যে আমার কাণে—আমার প্রাণে প্রবেশ করেছে। তাই ত' আর স্থির থাকতে না পেরে ছুটে এসেছি বোন।

সমুদ্র। এই লাজল কাঁধে চাষা—এই তোমার ভাই ? এর এত শক্তি—এত বল ? তুমি এই ভারের সংসারে সুখ, ঐশ্বর্য্য, মান সব ধনে ধনী হ'য়ে আছ ? হাসির বিষয় সন্দেহ নাই।

নালা । হাসি ? হনধারী বীর উপেক্ষার বস্তু ? কৃষিজীবী জন হাসির সামগ্রী ? মূঢ়, এই হলের প্রভাবেই ধরিত্রী রত্নপ্রসূ । এই কৃষকের করেই জগৎবাসীর সঞ্জীবনী-সুধা সঞ্চিত । যে ইচ্ছা করলে, সমস্ত জগৎটাকে শুকিয়ে গুঁড়িয়ে মারতে পারে, যার হাতে সমস্ত নরনারীর জীবন ধারণের উপায় নিহিত, যার কল্যাণে সমস্ত ধরণী বৃদ্ধকার হাত ভ'তে নিষ্কৃতি পায়, সে উপেক্ষার বস্তু নয় । বরং সে তোমার মত পর-পীড়ক, মনগব্বী, দাণ্ডিকের নমস্কা ।

সমুদ্র । ব্রথা বাক্ বিত্তগুণ কালান্তিপাত করবার আমার অবসর ও অভিলাষ দুই-ই নাই । এখন হে হলায়ুধ, তুমি কি আমার শক্তির পরিচয় নিতে চাও, না বিনা বাধায় তোমার ভগ্নীকে আমার করে অর্পণ ক'রে জীবন রক্ষা করতে চাও ?

নালা । বিনা বাধায়, বিনা যুদ্ধে আমার ভগ্নীর একটা কেশ স্পর্শ কর' তোমার সাধের অতীত জেনো, দর্পিত্র পাণী । আগে আমাদের উভয়ের শক্তির পরীক্ষা হোক, তারপর তার কলাকলের উপর তোমার ভবিষ্যৎ নির্ভর করবে ।

সমুদ্র । উত্তম আনি প্রস্তুত । ( উভয়ের যুদ্ধ )

কি আশ্চর্য্য ! কেবা এই যুবা ?

মধ্যাহ্ন মার্ভণ্ড প্রভা বদন মণ্ডলে,

করে রণ স্ননিপুণ করে ।

ভীষণ ভয়াল আনি অস্বনিধি

দস্ত মোর চূর্ণ বুঝি হয়

আজ ইহার প্রহারে ।

কি অদ্ভুত প্রয়োগ কৌশল,

ତତୋଧିକ ବିସ୍ଵୟକର ସଂହାର ପଟୁତା !

ବ୍ୟର୍ଥ ହୁଏ ଆମି ନିଜେ ପ୍ରତି ଘାତେ ଘାତେ ।

( ହସ୍ତ ହୁଏତେ ଅସ୍ତ୍ର ଖସିଯା ପଡ଼ିଲ )

ନୀଳା । କି ବୀର ? ଏହିବାର ତୋମାର ଦନ୍ତ କୋଥାର ଥାକେ ? ତୁମି

ଆରୋ ଆନାର ଶକ୍ତିର ପରିଚୟ ଟାଓ, ନା ଏହିଧାନେହି ନିରସ୍ତ ହବେ ?

ସମୁଦ୍ର । ଜଳେ ଗରି, ଅପମାନେ !

ବାଳକେର ସନ୍ନିଧାନେ ପରାଭୂତ ଆମି !

ପ୍ରାଣ ଭିଙ୍ଗା ଲ'ତେ ହବେ ମାଗି

ଏହି ଶିଶୁର ନିକଟ ।

ବିକ—ଧିକ,

ଶତବିକ ଜୀବନେ ଆମାର ।

ନୀଳା । ବୀରପୁରୁଷ, ତୁମି ନିରସ୍ତ୍ର ଓ ନିରଂସାହ ହ'য়ে ପଡ଼େଛ ; ଏ

ଅବସ୍ଥାର ତୋମାର ପ୍ରାଣ ସଂହାର କରନ୍ତେ ଆମାର ଏକଟା ପିପିଲିକା

ବାଧେର ଜନ୍ମା ଯେ ଅନ୍ନ ସ୍ଵୀକାର କରନ୍ତେ ହୁଏ, ସେହିଟୁକୁ କରଲେହି ସଂଧେଷ୍ଟ

ହବେ । କିନ୍ତୁ ନାଂସର୍ଗ୍ୟର ଅଧିକାର, ଆମି ତୋମାର ମୃତ୍ୟୁର ବ୍ୟବସ୍ଥା

ନା କ'ରେ, ଅନ୍ତତାପେର ବ୍ୟବସ୍ଥା କରଲାମ । ଯାଓ ତୁମି ଡର୍କୁତ, ନିଃ

କର୍ମେର ଅନ୍ତଶୋଚନାମ ତିରିଦିନ ଦଶ ହ'ରେ ତିଲେ ତିଲେ ମୃତ୍ୟୁ ସନ୍ତ୍ରା

ଭୋଗ କରନ୍ତେ । ଏସ ବୋନ ।

[ ନୀଳାନ୍ତର ଓ ବଳଭଦ୍ରାର ପ୍ରସ୍ଥାନ ।

ସମୁଦ୍ର । ଚମତ୍କାବି—ଆରୋ ଚମତ୍କାର !

ବନ୍ଧ ନାହିଁ କରା ଏହି ଦର୍ପାକୁ ପାମରେ,

ଅତୁତାମେ ଦଶ ହ'ତେ ଦିଲ ଅବସର ।

କେବା ଏହି ନାରୀ ?

କେବା ଏବ ନାତା—



ক্ষমতার নাহিক সমতা যার ?

সন্ধান করিতে হবে—

কেবা এরা সাগরের দর্পহারী,

এলো এত দিনে সাগরের তীরে ?

ধীরে, গন ধীরে ।

হ'তেছে সংশয়—

হয় ত বা এই সেই জন,

যার হাতে পড়েছি বন্ধন

সেই ত্রেতা যুগে ।

সন্ধান করিতে হবে—

সন্ধান করিতে হবে—

[ ধীরে ধীরে প্রস্থান :

## দ্বিতীয় গর্ভাঙ্ক ।

রাজ-অশ্বঃপুর ।

ইন্দ্রদ্যুম্ন ও গুণ্ডিচা ।

ইন্দ্র । একি অপূর্ব বিধান ! শত অশ্বমেধ যজ্ঞ ! একটী অশ্বমেধ যজ্ঞ করতে রাজা যুধিষ্ঠিরের মত নৃপতিকে, অধিক কি স্মরণ শ্রীভগবান রামচন্দ্রকে পর্য্যন্ত কি দারুণ ক্লেণ স্বীকার, কত বাধা বিপত্তি অতিক্রম করতে হয়েছিল—তার ইয়ত্তা নাই । আর আমার জন্ম সেই মত শত অশ্বমেধ যজ্ঞ অনুষ্ঠান করতে বিধান দিলেন পণ্ডিতেরা । আমি ত' এ যজ্ঞের সমাপ্তি কল্পনায় ও আনুভূতিতে পারছি না ; স্মৃতরাং ফললাভের আশাও আমার সুদূর পরাহত ।

গুণ্ডিচা। মহারাজ কার্য্য ভার অত্যন্ত গুরু তাতে সন্দেহ নাই ; কিন্তু সে ভার বহন তো তোমার করতে হবে না। যার কার্য্য তিনি তা সম্পন্ন করবেন। যজ্ঞ অনুষ্ঠানে তুমি কেবল নিমিত্ত মাত্র। স্বয়ং শ্রীহরি এই শত অশ্বমেধ যজ্ঞের সাধন ও সমাপ্তির ভার গ্রহণ করবেন, এ বিশ্বাস আমার অন্তরে বদ্ধমূল আছে। নইলে তুমি যে আশঙ্কা করছ, আমি কি এত বালিকা, যে সে আশঙ্কা আমার মনে স্থান পায় নি ?

সহসা জগা পাগলার প্রবেশ।

জগা। ই্যা হে, তুমি নাকি যজ্ঞ করবে ? শত অশ্বমেধ যজ্ঞ ? বেশ বেশ! যজ্ঞ কর, যজ্ঞেশ্বর আপনি এসে উপস্থিত হবেন। বানুনের ছেলেটা কি ঘোরাই না ঘুরছে তাঁকে ধরবার জন্য। এইবার, এতদিনে তোমার মন্ত্রণাদাতা জুটেছে ভাল। এখন তোমার যা লেগে পড়বার বিলম্ব, কেমন ?

ইন্দ্র। ভাই জানত' আমার শক্তি কতটুকু, আমি কি করে শত অশ্বমেধ যজ্ঞ করব! শুনেছি একটা অশ্বমেধ যজ্ঞ করতে ভগবান রামচন্দ্রকে পর্য্যন্ত কি বেগই পেতে হয়েছিল।

জগা। ওরে বাপরে! সে বেগ ব'লে বেগ; একেবারে আবেগের বেটা বেগ। তা দেখ, ভগবানের চেয়ে ভক্তের শক্তি অনেক বেশী। ভগবান স্বয়ং যা করতে পারেন না—তিনি ভক্তকে দিয়ে তাই করিয়ে তাঁর মান বাড়ান। জান না!—রামচন্দ্র গীতাদেবীর খোঁজ ক'রে, সারা পৃথিবী ঘুরে, শুধু কেঁদে কেঁদেই ফিরলেন : আর তাঁর সন্ধান আনলে কে ? না ভক্তবীর হনুমান : জরাসন্ধের ভয়ে গিরিধারী ঠাকুরটা সমুদ্রে গিয়ে

লুকোলে—আর সেই জরাসন্ধকে বধ করলে ভীমসেন । লীলা-  
ময়ের এই লীলাতেই জগৎ ভ'রে আছে । শুধু ভক্ত আর  
ভগবান ।—আর কিছু নয় । ভক্তকে বাড়াবার জগুই  
ভগবানের সব ।

ইন্দ্র । তা হ'লে কি আমি এই বিরাট যজ্ঞের আরম্ভ করব ?

জগা । আরে ই্যা । যজ্ঞ করা কি জান ? যোগ্য হওয়া । তাঁকে  
পাবার উপযুক্ত হওয়া । তা, তুমি যোগ্য না হ'লে, অযোগ্যের  
কাছে তিনি আসবেন কেন ?

ঔশিচা । এ যাগের যে বিচিত্র বিধান, তা ত' তুমি শুনেছ ? কত  
ব্রাহ্মণ—কত ঋত্বিক—কত হবি—কত উপচার ! যেন একটা  
উপকথার উপাখ্যান ।

জগা । ঘট চাই বই কি না ! রাজবাড়ীর যাগ—ঘটা থাকবে না ?  
যার বেমন কাঁধ সে তেমন বইবে । ন'বে আর মশাতে কি  
সমান ভার বইতে পারে ? রাজ-রাজড়ার কাঁধ—একটু বেশী  
বইতেই হবে । ই্যা দেখ, একটা গাভী দানের ব্যবস্থা ঐ সঙ্গে  
রেখো ত' ! বেশ দুগ্ধবতী, সুলক্ষণা, হুইপুই গাভী—রোজ—  
যতদিন না তোমার যজ্ঞ সমাপ্ত হয়, ততদিন অদ্বরিত দান  
ক'রো । সংখ্যার কোন নির্দেশ নেই,—যত পার । তবে  
প্রত্যহ যেন সহস্র গাভীর কম না হয় ।

ইন্দ্র । কেন ?

জগা । আরে যজ্ঞ করবে ঋত্বিকরা । তুমি যে যাগ করছ, তার প্রমাণ  
কি ? যাগ করা কি জান—জেগে থাকা, ঘুমের ঘোরে এলিয়ে  
না পড়া—চক্ষু বুজে অন্ধকার না দেখা । জেগে থেকে—  
জাগিয়ে রেখো সবাইকে ।

ইন্দ্র । আমি কি তা পারব বন্ধু ?

জগা । নিশ্চয় পারবে । পারতে হবে । দেখ, এমন সন্দিক্ত হয়ো না—নিজেকে হীন ভেবো না । নেই—নেই করলে সাপের বিষ থাকে না । ছোট ভেবে ভেবে সিংহীও শেয়াল হ'য়ে যায় ।  
অমন ক'রো না ! ভাব, আমি তাঁর দাস—তাঁর সেবক—তাঁর চাপরাস আমার বৃকে, আমার কে রোখে ।

গীত ।

স্বরটি মিশ্র—একতাল ।

নহ ক্ষুদ্র, নহ তুচ্ছ, নও কো তুমি দীন ।  
তাঁর তখমা বৃকে তোমার, যার ইচ্ছায় রাত্রি দিন ॥  
বায়ুর মত মুক্ত তুমি, সূর্য্য সম দীপ্ত,  
ভূধর সম অচল অটল, ঝঞ্ঝা সম দৃপ্ত,  
সাগর সম গভীর তুমি, আকাশ সম সীমা হীন ॥  
তোমার কিসের মোহ, কি সন্দেহ, কেন ক্ষুণ্ণ মন ;  
চক্ষে তোমার পদ-আঁধি, শীর্ষে নারায়ণ,  
ভূজে রাজে চক্রপাণি, বক্ষে তোমার ভক্তাধীন ;  
কর্ণের স্রোতে যাও না ভেসে, কর্ণের মাঝে হ'য়ে লীন ॥

[ প্রস্থান ।

ইন্দ্র । চ'লে গেল ! চকিতের মধ্যে আসে—পলকের মধ্যে চ'লে যায় ।  
ধরা দেয় না—ধরা থাকে না । নিজের আনন্দেই নিজে মত্ত !  
চমৎকার ! হায় মহারানি, আমি যদি ঐ রকম মুক্ত বিহঙ্গ  
হ'য়ে উন্মুক্ত বাতাসে ধেরে যেতে পারতাম !

ঔষিণী । মহারাজ, এ অবসাদ, এ নিবাদ ত্যাগ কর । আমি লক্ষ্য

ক'রেছি—তুমি মাঝে মাঝে কেমন যেন উদাস, উদ্ভ্রান্ত হ'য়ে পড়'। এ তোমার যোগ্য নয় স্বামিন্! রাজ্যেশ্বর তুমি, তোমার হাতে লক্ষ লক্ষ নরনারীর সুখ-স্বাচ্ছন্দ্য, জীবন-মরণ নির্ভর ক'রছে। এমন নির্ঝিকার উদাস ভাব তোমার শোভা পায় না।

ইন্দ্র : এই রাজ্য নিয়ে ত' পড়েছি আমি বিষম ফাঁপরে। এ বে আমার বড় কঠিন নিগড় হ'য়ে দাঁড়িয়েছে। নইলে মহারাণি, সেই ব্রাহ্মণ—সেই বিদ্যাপতি—সেই বাধা-বন্ধ-হীন, নিলিপ্ত মুক্ত পুরুষ—মহানন্দে হাসি মুখে ছুটে চল্লো—শ্রীভগবানের সন্ধান ক'রতে.—শুধু আমার মুখের কথা শুনে। আর আমি স্বকর্ণে তাঁর আদেশ শুনেও এক পা এগোতে পারলুম না তাঁর খোঁজ ক'রতে—কেন? কিমের জন্ম? এই রাজ্য—এই সম্পদ—এই বৈভবের জন্ম নয় কি?

শুভিচা। তা সত্য মহারাজ। তবে শ্রীহরি আমাদের এই কাজ দিচ্ছেন, কাজে কাজেই আমরা এ কত্তে বাধ্য। কিন্তু প্রভু, কি আশ্চর্য্য সে যুবক! নির্ভীক—নিঃশঙ্ক—অকুতোভয়! তোমার আদেশ শুনে মুখ ধানা তার দীপ্ত হ'য়ে উঠলো! চোখ দু'টো জ্বলে উঠলো যেন যুগল নক্ষত্র! বুক ধানা ফলে উঠলো গর্বে—হর্ষে—আনন্দে।

ইন্দ্র। আমি নিত্য তার সেই তেজ-দীপ্ত মূর্তি—সে কর্তব্যনিষ্ঠ মুখশ্রী আমার মানস নেত্রে দেখতে পাই রাজি!

শুভিচা। আর আমি যে প্রত্যহ তার মধু-মাথা মাতৃ সন্মোদন আমার শ্রবণযুগে শুনে বিহ্বল হই মহারাজ! আমি যেন দেখি,—সে ছুটেছে; বন, পাহাড়, নদী, সাগর সব অতিক্রম ক'রে ছুটেছে,

তোনার নির্দেশ মত নীলমাধবের সন্ধান ক'রতে। আর মধ্যে মধ্যে এখন অত্যন্ত ক্লান্ত হ'য়ে প'ড়ছে, তখন শুধু এক একবার আমার দিকে উদাস নরনে চেয়ে ব'লছে—“নাগো, কত—আর কত দূর!” আমি মানস চক্ষে তাকে দেখে, আকুল হ'য়ে তার ছায়াময়ী মূর্তিকে বুকে তুলে নিতে সম্মেহে হাত বাড়াই—আর অগ্নি পলকের মধ্যে সে কোথায় লীন হ'য়ে যায়। মহারাজ, এ আমার নিত্যকার ঘটনা। কিন্তু আজ কেন আবার তার সেই বহু-কঠোর বাণী—এই আমার কাণে বেজে উঠলো? “রমণী হ'তে শ্রীভগবানের দুর্দশা সংঘটিত হ'য়েছে, তাঁর শ্রীঅঙ্গ বিকল হ'য়েছে।” এই বহুদিন-বিশ্বত, নিদারুণ বাণী—আজ সহসা কেন আমার শ্রবণ পথে শত ঢক্কা নাদে ধ্বনিত হচ্ছে! ওঃ—ওঃ কি যন্ত্রণা—কি যন্ত্রণা! মহারাজ—মহারাজ, রক্ষা কর—রক্ষা কর।

ইন্দ্র। কি—কি? সহসা এমন তুমি চঞ্চল হ'য়ে উঠলে কেন প্রিয়তমে? চল, চল, বিশ্রাম ক'রবে চল।

গুণ্ডিচা। না—না মহারাজ! আমার গোবিন্দজীর মন্দিরে নিয়ে চল।

আমি সেথায়, তাঁর চরণে আমার প্রাণের বোঝা নামাব'।

[ উভয়ের প্রস্থান।

## তৃতীয় গর্ভাঙ্ক ।

সমুদ্রতীরের একাংশ ।

গ্রাম্যরমণীগণের প্রবেশ ও গীত ।

মিশ্র ভূপালি—তাল ফেরতা ।

ভৌড়ি লো, চঞ্চড় চড় নৌটি ।

কেতে বিড়ম্ব আউ করিবু এইঠা ॥

হুড়দী নগাই গা-ধিয়া সারিচি,

হুঙ্গা-পটা সব পালটা নেইচি,

আউ কঁড় এঠি বসিবা আইচি ?

বরর নাগিনী ননদী উছনি ধরিব মুণ্ডর জট-টী ॥

মাগর কুলেরে বুলি বুলি

কেতে মানুকা নেলি তুলি,

থরা বড়ি হলা ততলা বালি—

কেমতে চলিবি ক' লো এত্তে বাট হাঁটি ॥

[ প্রস্থান ।

বিদ্যাপতির প্রবেশ ।

বিদ্যা । কোথা নীলাচল ? কোথা নীলমাধব ?

এ যে শুধু নীল সিদ্ধু করে কলরব !

বালুমর দীর্ঘ বেলা-ভূমি

রোধে পথ প্রতি পদক্ষেপে ।

কোথা তুমি দয়াময়,

রয়েছ কোথায় ?

কোন গহন কাননে—কোন পর্কত গুহায় !

রাখ' পায়—হও হে সদয় ;

নিজ গুণে রূপাময়,

দরশন দাও দীন হীনে ।

নগর, প্রান্তর, অত্রি, বিজন গহন—

বহু স্থান,—বহু স্থান করেছি ভ্রমণ

তোনার দর্শন পাব বলি ।

কিন্তু বনমাণি,

বিফল হ'য়েছি সর্কস্থানে ।

পড়েনি নয়নে

তব রম্য বাসস্থান—সে নীল অচল ।

তাই প্রাণ অনুক্ষণ কাঁদে কালাচাঁদ ।

হৃদিনাথ !

মন সাধ পুরিবে না মোর ?

শুধু কি স্বপন মাঝে ঘুরিবে আমার ?

তোনার ও অপরূপ রূপ

দেখে কি জগৎবাসী হবে না বিহ্বল ?

ছুটিবে না জগজ্জন

তোমার ও রূপ অনুসরি,

উন্মাদিনী গোপবালা সম প্রেমেতে বিভোর !

বল—বল ভক্তাধীন,

এ দীন কাকাল

শুধু কলঙ্কের হইবে কি ভাগী ?

নীরব ?—এখনও নীরব ?



দেবে না উত্তর ?—রবে নিরুত্তর ?  
 কও—কথা কও !  
 কাঁদে প্রাণ সতত কেশব ;  
 নীরব থেকেনা আর ,  
 হও হে মুখর,—  
 বল না সত্তর—  
 কোথা গেলে পাব দেখা তব বংশীধর !  
 ক্লান্ত দেহ পথ পর্য্যটনে,  
 ততোধিক ক্লান্ত মন বিফল প্রয়াসে ।  
 অবসাদ—অবসাদ হৃদে দেখা দেয় কালাচাঁদ !  
 তুলো মুখ,—হয়ো না বিমুখ ;  
 তুংপের বারিধি নাঝে  
 ফেলিও না মোরে গুণনিধি !

লীলাধরের প্রবেশ ও গীত ।

সিন্ধু—একতাল।

তোমার লাগিয়া শ্যাম দাঁড়ানে রহেছে কদম তলায়,  
 আমি বলিতে আসিলাম ।  
 সে যে উদাস অথির প্রাণে  
 চেয়ে আছে গো পথের পানে,  
 তার হাতের বেণুটি হাতেই আছে বলছে না রাধা নাম ॥  
 তুমি ছুটে চল—চল ছরা গো,  
 তোমা বিনা সে যে আঁধার দেখিছে ধরা গো ;  
 তোমার তরে সে কাঁদিয়া আকুল, আঁধি ধারার নাই বিরাম ॥

বিদ্যা। ( স্বগতঃ ) কে এ গায়ক ? আমার হৃদয়-বীণার প্রতি তারে  
এ গানের মধুর ঝঙ্কার বেজে উঠছে ; অস্তরের অন্তঃস্থলে এ  
গানের সুরে কি এক মোহন তান জেগে উঠছে . প্রাণ কি  
এক অপূর্ব উৎসাহের ছন্দে নেচে উঠছে ! কে এ গায়ক ?

লীলা। ও ঠাকুর, তুমি এখানে দাঁড়িয়ে কি বিড়্ বিড়্ ক'রে ব'কছ ?  
এখনি সমুদ্রের জল এসে গারে লাগবে। দেখছ ন', কি  
ভয়ঙ্কর ঢেউ ! আজ সমুদ্র বেন মার-মুখ হ'য়েছে।

বিদ্যা। আমি কি ব'কছি জান,—জান ?—এঁা—কি নাম তোমার  
গায়ক ?

লীলা। লীলাধর।

বিদ্যা। সুন্দর নাম। কি ব'কছি জান লীলাধর ? আমি এক অতি  
গুপ্ত—অতি দুর্লভ বস্তুর সন্ধান ক'রতে বহু দূর হ'তে এখানে  
এসেছি। নানাস্থানে আমি সে বস্তুর অন্বেষণ ক'রেছি . কিন্তু  
কোথাও সফলকাম হ'তে পারি নি। আজ এখানেও আমার  
উদ্দেশ্য সিদ্ধির কোন সম্ভাবনা না দেখে, আমি সমুদ্র সালিলে  
প্রাণ বিসর্জন দেবার সঙ্কল্প ক'রছিলাম। বোধ হয় তোমার  
আসার আর কিছু বিলম্ব হ'লে, আমি এতক্ষণ সাগরের শীতল  
কোলে, আমার এ নিরাশা দগ্ধ প্রাণের জ্বালা জড়িয়ে ফেলতুম।

লীলা। না, ছিঃ ! ডুবে মরবে কেন ? মরতে কি আছে ? তুমি  
যে জিনিষের খোঁজ ক'রছ,—আমি একজন ভবঘুরে,—খালি  
গান গেয়ে, আর পরের বেগার খেটে বেড়াই—যদি বল, তে  
আমি তোমার সঙ্গে ঘুরে ঘুরে তার খোঁজ ক'রতে পারি।  
একলা মানুষ তুমি,—আমি সঙ্গে থাকলে তবু একজন দোসর  
হবে তো ! কি বল ?

বিজা। আমার সঙ্গে থাকবে তুমি? নীলাধর, আমার কাজ খুব কঠিন—আমার সাধনা বড় কঠোর—আমার আশা অতি উচ্চ! আমার আনার বাঞ্ছিত বস্তুর সন্ধান কর্তে, হয় ত' পৃথিবীর এক প্রান্ত হ'তে অপর প্রান্তে ছুটতে হবে,—এ জগৎ হ'তে জগতান্তরে যেতে হবে। তুমি বালক, তুমি আমার সঙ্গে যাবে কি ক'রে ভাই।

নীলা। আমি তোনার কোন কাজে লাগবো না ঠাকুর? তবে আর কি হবে! আমার স্বভাব হচ্ছে, লোকের কোন কিছু কাজে সাহায্য করা। তা সে না ডাকলেও নিজে সেবে গিয়ে, উপর-পড়! হ'রে পড়ি। ওটা কেমন আগান একটা গ্রহের ফল! তা, তুমি যখন ছেলে মানুষ ভেদে, অশক্ত ভেবে সঙ্গে নেবে না, তখন আর কি ক'রবো! যাই অন্ত্র দেখি—যদি কারো কিছু কাজ থাকে। আমি তবে দেবতা—প্রণাম!

[ নীলাধরের প্রস্থান।

বিজা। দেখতে দেখতে বালক কোথায় গেল? ওঃ কি প্রখর সূর্যের তাপ! বালুরানির উপর মধ্যাহ্ন তপনের দীপ্ত রশ্মি প্রাতিফলিত হ'য়ে—আনার দৃষ্টি রোধ ক'রছে। কিছুই দেখতে পাচ্ছি না। কে জানে, সে বালক কোন্ পথে অদৃশ্য হ'য়ে গেল। উঃ! তপ্ত বালু আর দীপ্ত সূর্যরশ্মি! আমি এদের তেজ যে সহ ক'রতে পারছি না। তৃষ্ণা—তৃষ্ণা! দারুণ পিপাসায় আমার কণ্ঠ রোধ হ'য়ে আসছে। হস্ত পদ অবশ, আচ্ছন্ন হ'য়ে প'ড়ছে। কি করি—কি করি? আমার এ নিদারুণ তৃষ্ণা নিবারণের জন্য এক বিন্দু বারি ত' এখানে নাই। উঃ!

চক্ষু অন্ধকার প্রতিপন্ন হ'চ্ছে—চরণ আর দেহ-ভার বহনে  
সক্ষম নয়। হা জগদীশ! হা নীলমাধব! (মূর্ছা)

প্রসাদ হস্তে বিশ্বাবসুর প্রবেশ।

বিশ্বা। রোজই কি আমার দেৱী করিয়ে দেবে? রোজ রোজ কি  
তোমার জন্তে আমার সব কাজ পণ্ড হবে? কোন্ ভোরে—  
কত রাত থাকতে বেরিয়ে—লুকিয়ে তোমার কাছে যাই। মনে  
করি, সকাল সকাল ফিরে এসে অন্য কাজে লাগব। তা  
তোমার কাছ থেকে চ'লে আসতে ত' কিছুতেই পারি না।  
রোজই বেলা বেড়ে যায়। আজ ত' একেবারে দুপুর হ'তে  
চ'লেছে। এ তোমার ভারি অন্তায়। যদি শুধু তোমার কাছেই  
আমায় আটকে রাখবে, তবে কেন আমাকে সংসারী ক'রেছ—  
সংসারে রেখেছ—সংসারের নানা কাজে, নানা চিন্তায় ডুবিয়ে  
দিয়েছ? শুধু তোমার কাছে যে সময়টুকু থাকি, সেইটুকু  
সময়ই না অন্য সব ভাবনা চিন্তা ভুলিয়ে রাখ। কিন্তু তোমার  
কাছ ছাড়া হ'লেই ত' আবার সেই সব চিন্তা মনের মাঝে  
ভেগে ওঠে। একি তোমার অন্তায় আচরণ ঠাকুর? আমায়  
এমন ক'রে দো-টানার ফেলে, দু-নোকায় রেখে কত দিন  
চালাবে? বেলা বেড়ে গেছে বেজায়। লুকিয়ে তোমার  
কাছে যাই আনি—কেউ জানে না। কিন্তু এই এতটা বেলায়  
বাড়ী ফিরতে দেখলে, লোকের মনে একটা কিছু সন্দেহ জাগা  
আশঙ্ক্য নয়! তবে কি তুমি আর লুকিয়ে থাকতে চাও না?  
এবার কি জগন্নাথ, জগতের সমক্ষে আত্মপ্রকাশ কর্তে ব্যগ্র  
হ'য়েছ?

লীলাধরের পুনঃ প্রবেশ ।

লীলা । বুড়ো বাবা, বুড়ো বাবা, তোমার কাছে জল আছে ? ঠাণ্ডা,  
খাবার-জল ?

বিশ্বা । আছে বাবা,—আমার প্রভুর চরণামৃত ।

লীলা । তুমি বুঝি এখন ঠাকুর পূজা ক'রে ফিরছ ?

বিশ্বা । আমি ? না—হ্যাঁ—আমি ঠাকুর পূজা ত'—

লীলা । আমার কাছে আর লুকোচ্ছ কেন বাবা ? আমি যে সব  
জানি । তুমি আমার চেন না । কিন্তু তোমার মেয়ে ললিতার  
সঙ্গে আমার খুব ভাব । সে হয় আমার দিদি ; আর আমি তার  
ভাই—লীলাধর ।

বিশ্বা । লীলাধর ! লীলাধর ! হ্যাঁ—বাক্—তুমি জলের সন্ধান ক'রছিলে  
কেন ?

লীলা । একজনের বড্ড তেষ্ঠা পেয়েছে—জল জল ক'রে ছট্ফট  
ক'রছিল—কিছুক্ষণ হ'লো মূর্ছা গেছে । তাকে খাওয়াবার  
জন্যই জল খুঁজছিলুম ।

বিশ্বা । বটে, বটে ? ঐ বুঝি সেই লোক, গরম বালির উপর অজ্ঞান  
হ'য়ে প'ড়ে আছে ?

লীলা । হ্যাঁ বাবা, হ্যাঁ । ঐ লোক বটে । বামুন,—বড় ওদ্ধাচারী ;  
আর বোধ হয় একটু ক্ষেপাটে ! তা তুমি বাবা, ওর মুখে  
একটু জল দাও—আমি গাঁ থেকে দু'চার জন লোক উঁকে  
আনি । যদি সত্যি ওর জ্ঞান না ফেরে, তা হ'লে ওকে তুলে  
নিয়ে যেতে হবে ত' ?

[ লীলাধরের প্রস্থান ।

বিশ্বা । ঠাকুর,—ঠাকুর !

বিজ্ঞা। কে ?—কে তুমি আমার ধ্যান ভেঙ্গে দিয়ে, আমার প্রাণের নিধি প্রাণ হ'তে হ'রে নিলে ? তুমি ? শবর—শবর ! তুমি ? তুমি আমার এই সর্বনাশ ক'রলে ?

বিশ্বা। সে কি ঠাকুর, আমি তোমার সর্বনাশ ক'রলুম কি ? আমি ত' তোমার কোন অঙ্গায়—কোন অনিষ্ট করি নি। এই সাগর তীরে—এই গরম বালির উপর তুমি মূর্ছিত হ'য়ে পড়েছিলে ; আমি মাত্র তোমার চৈতন্য ফিরিয়ে এনেছি।

বিজ্ঞা। চেতন অচেতনের মিলন-কারণ, অখিল চৈতন্যের চিন্ময় সঙ্গাকে বুকে ধ'রে, আমি বিভোর ছিলাম। তুমি কেন আমার সে ঘোর ভেঙ্গে দিলে—কেন আমার হৃদয়ের আলো নিভিয়ে দিলে বৃদ্ধ ?

বিশ্বা। ঠাকুর বড় ক্লান্ত হ'য়ে ঘুমচ্ছিলে বটে। তা আমি অত বৃষ্টি নি। বড্ড রোদের তাত লাগছিল, তাই তোমায় জাগিয়ে দিয়েছি। তোমার মুখ দেখে বোধ হচ্ছে—তুমি বড় বেশী রকম ক্লান্ত হ'য়েছ। তা ঠাকুর, আমার এই ভাঁড়ে ঠাণ্ডা জল আছে, সঙ্গে কিছু কল মূল আছে ; যদি ইচ্ছা কর ত' তাই দিয়ে তোমার ক্ষুৎ-পিপাসা নিবারণ কর্তে পার।

বিজ্ঞা। বৃদ্ধ, আমি ক্ষুধার্ত্ত,—দারুণ পিপাসায় আমার কণ্ঠ রুদ্ধ হবার উপক্রম হ'য়েছে সত্য, কিন্তু আমি ত' তোমার ছোয়া ফল জল নেব' না।

বিশ্বা। কেন ?

বিজ্ঞা। তুমি শবর—আমি ব্রাহ্মণনন্দন।

বিশ্বা। বটে ? পিপাসায় কণ্ঠ রুদ্ধ হ'য়ে ছাতি কেটে মরবে, তবু আমার দেওয়া জল নেবে না ?

বিজ্ঞা । না বৃদ্ধ, না । সমুদ্রতীরে আমি পিপাসার্ত্ত ; কিন্তু ঐ বারিধির  
লবণাক্ত জল যেমন আমার গ্রহণ-যোগ্য নয়, তেমনি তোমার  
ভাণ্ডের স্নিগ্ধ শীতল জলও আমার গ্রহণের অযোগ্য ।

বিশ্বা । কিন্তু ব্রাহ্মণনন্দন, আমার সঞ্চিত বারি, শুধু জল নয়,—  
আমার ইষ্টদেবের চরণামৃত । তোমার জাতির গর্ব—ব্রাহ্মণত্বের  
গর্ব কি তোমায় আমার প্রভুর চরণামৃত গ্রহণেও নিবারণ  
ক'রবে ?

বিজ্ঞা । ইয়া বৃদ্ধ । আমার কুল মর্যাদা—আমার বংশাভিমান—  
আমার বর্ণ-গৌরব তোমার স্পৃষ্ট সকল কিছুই আমায় নিতে  
নিবারণ ক'রবে । তার মধ্যে শুদ্ধাশুদ্ধ ভেদ নাই,—অকিঞ্চিৎকর  
মহামূল্য বিচার নাই,—চন্দন ও পঙ্ক একইরূপে পরিহার্য্য ।

বিশ্বা । আমার দেওয়া সামগ্রী—সে যত সামান্য, যত অকিঞ্চিৎকর  
হোক—স্বয়ং ভগবান তা সাদরে গ্রহণ করেন ; আর জাত্যা-  
ভিমानी ব্রাহ্মণ, তুমি তা নেবে না ? আসন্ন মৃত্যু জেনেও,  
তুমি শ্রীভগবানের চরণামৃত অবহেলা ক'রবে ? ভাল,—চল্লম  
আমি এখন তোমার কাছ থেকে । যদি বেঁচে থাক ত'  
আবার দেখা হবে—আর হয় ত' তখন তোমায় বুঝিয়ে দিতে  
পারব যে, ভক্তির নৈবেদ্য—প্রীতির অর্ঘ্য—স্নেহের উপহার—  
করণার দান কারো কাছে উপেক্ষার বস্তু নয় । সেথায় ব্রাহ্মণ-  
শবর প্রভেদ নাই,—রাজা-প্রজা ভেদ নাই,—পণ্ডিত-মূর্খের  
ভারতম্য নাই,—স্ত্রী-পুরুষ বিচার নাই । রইলো ব্রাহ্মণ,  
তোমার নিকট আমার প্রভুর চরণামৃত ও মহাপ্রসাদ । হয় ত'  
তোমার এ মহাক্ততা কিছু পরে অপমৃত হবে,—হয় ত' তোমার  
জ্ঞান-চক্ষু কিছু পরে ফুটে উঠবে । তখন তোমার জীবনকে

আসন্ন মরণের কবল হ'তে রক্ষা ক'রতে, এইগুলিই হবে  
রক্ষাকবচ।

[ প্রসাদ রাখিয়া বিশ্বাসুর প্রস্থান।

বিজ্ঞা। নীচ শবরের স্পর্শা অসহ্য। অস্পৃশ্য অস্ত্যজ আজ ব্রাহ্মণকে  
উপদেশ দেয় : আর তুমি ব্রাহ্মণগতপ্রাণ নারায়ণ, সেই ঔদ্ধত্য  
স্থির হ'য়ে সহ্য ক'রছ ? চমৎকার ! এ কি, দিব্যদেহধারী  
একদল পুরুষ এদিকে আসছে ! এই বিজন সাগর বেলায়  
ওরা কোথা হ'তে আবির্ভূত হ'নো ? আমারই দিকে অগ্রসর  
হচ্ছে, কি চায় ওরা—কি বলে—

দিব্যদেহধারী মূর্তিচয়ের প্রবেশ ও গীত।

কাকি সিন্ধু—কাওয়ালী।

রুতজ্ঞতা কেমনে জানাব দ্বিজবর।

চরণে তোমার অশেষ প্রণাম, জয় গানে ভরুক পৃথ্বী অম্বর ॥

যে করুণা তুমি ক'রেছ দান

শক্তি নাহি তা' করি ব্যাধান,

তোমার রূপায়, হে মহাপ্রাণ, মোরা ধরেছি এ দিব্য কলেবর ॥

বিজ্ঞা। কি আশ্চর্য্য ! এ আপনারা কি ব'লছেন ? আমি আপনাদের  
জন্ম কি ক'রেছি যে এ ভাবে আপনারা আমার প্রশংসা  
ক'রছেন ? মহাত্মাগণ, আপনারা কোন্ মহাপুরুষ, তা ত'  
আমি জানি না।



দিব্যমূর্তিচয় ।

গীত

ছিলাম আমরা হীন পতঙ্গ পিপীলিকা,  
তোমার ত্যক্ত প্রসাদের পেয়ে ক্ষুদ্র কণিকা  
জনম সফল হ'য়েছে মোদের, ল'ভেছি শান্তি-সরোবর ,  
চলি'লু এবার অমর ভুবন হেরিতে শ্রাম-নটবর ॥

[ দিব্যমূর্তিচয়ের প্রস্থান ।

বিজ্ঞা । এঁয়া, কি অদ্ভুত কথা ! কি রোনাঙ্কুর বর্ণনা ! সাগর  
তীরের কীট, পতঙ্গ আমি অবহেলার বশে, দন্তের ভরে যে  
মহাপ্রসাদ স্পর্শ করি নি—সেই প্রসাদের কণা মাত্র পেয়ে দিব্য  
শরীর ধারণ ক'রেছে ? হায় ! হায় ! কি অমূল্য ধন—কি  
পরম পদার্থ—আমি স্বেচ্ছায় হারিয়েছি । কই—কই সে মহা-  
প্রসাদ ? সেই ত্রিলোক বাঞ্ছিত সুখ—সেই সর্ব দুঃখ-জালা-  
ব্যথাহারী অমৃত কই ? ( পাত্র দেখিয়া ) কি আশ্চর্য্য ! পাত্র  
একেবারে শূণ্য—প্রসাদের কণিকামাত্র নাই । বেলাচারী ক্ষুদ্র  
পিপীলিকা সব নিঃশেষ ক'রেছে । আমার অহঙ্কার—আমার  
দর্প চূর্ণ করবার জন্য বিন্দুমাত্র অবশিষ্ট নাই । কই—কোথায়  
আপনি শবর দেহধারী মহাপুরুষ,—কোন্ সুরলোক হ'তে,  
আমার অভিমান দূর ক'রে, আমার জ্ঞান-চক্ষু ফুটিয়ে দিতে  
এসেছিলেন ? মহাত্মন—শবররূপী মহাপুরুষ, দি'ন—দি'ন,  
আমায় মহাপ্রসাদ দি'ন । মূর্থ—অন্ধ—জাত্যাভিমानी আমি  
—হেলায় ভেলা ভাসিয়ে দিয়েছি । দি'ন দি'ন, আমায় সে  
প্রসাদের কণিকামাত্র দিয়ে ধন্য করুন ।

[ উদ্ভ্রান্তভাবে প্রস্থান ।

## চতুর্থ গর্ভাঙ্ক ।

সমুদ্রতীরের অগ্ৰাংশ ।

যমদূতগণ ।

১ম দূত । হায়—হায়—হায় ! কি সৰ্কনাশ হ'লো ! কি সৰ্কনাশ

হ'লো ! মর্তলোক থেকে আমাদের নাম এবার বুঝি উঠে যায় !

২য় দূত । এ কি রে বাবা পেসাদ ! মানুষ ত' মানুষ—গরু, ছাগল,

পশু, পক্ষী, পোকা, মাকড়—যে খাবে সেই একেবারে চতুর্ভুজ !

৩য় দূত । আমরা আর তবে এই সব ভূতের বোঝা ব'য়ে মরি কেন ?

ধর্মরাজের দু'টো কাজই না যদি কতে পারবো, তবে কেন

মিছি মিছি ধরায় থেকে লোকের চক্ষুশূল হই ? তার চেয়ে

চল—এই সব ডাঙা সোঁটা জলে ভাসিয়ে দিয়ে, বাপের

সুপুত্রুর হ'য়ে সব ঘরে ফিরে বাই ।

গীত ।

মঙ্গল বিভাষ—একতালা ।

আর আমাদের কাজের রইল কি !

চল ডাঙা সোঁটা সাগর জলে সব ভাসিয়ে দি !!

বাধালে মহা ফ্যাসাদ, বিদকুটে ঐ মহা পেসাদ,

হায়, আমাদের মনের সাথে কে সাধলে বাদ ;

সব ডেং-ডেঙিয়ে স্বর্গে যাবে, মোদের দেখিয়ে বুড়ো আঙ্গুলটা ॥

খোঁতা মুখ হ'লো ভোঁতা,

লাজের মুখ লুকাবো কোথা !

হায়, পোড়া কপালে এত কষ্ট লিখেছিল বিধাতা !

আমরা করছি মন্দ কার ?

তবে এ বিচার কেন তার ? ছিঃ ছিঃ ছিঃ !!

১ম দূত । ওরে কি হবে রে ?

২য় দূত । কোথা যাব রে ?

৩য় দূত । ওরে বাবা—রে !

যমের প্রবেশ ।

যম । ভয় নেই—ভয় নেই ! এই বে আমি এসেছি ।

সকলে । পেরান হই রাজা মশার ! ( প্রগাম )

যম । বেঁচে থাক' বাপ, সবাই ।

১ম দূত । বেঁচে থেকে আর লাভ কি ? যে পেসাদ বেরিয়েছে—

২য় দূত । একেবারে আমাদের হাতে পায়ে পক্ষাঘাত ধরিয়ে দেবে ।

যেখানের যত আটখুটে, বিদকুটে—

৩য় দূত । অত্যাচারী—অনাচারী—

৪র্থ দূত । জরাজেঁদার—সুদখোর—

১ম দূত । শঠ—কপট—লম্পট—

২য় দূত । ষণ্ড—ভণ্ড—পাষণ্ড—

৩য় দূত । পাপী—তাপী—

৪র্থ দূত । সবাই একদম ঠেলে স্বর্গে উঠে যাবে ।

১ম দূত । এক টুকরো পেসাদ—বলে কনিকা মাত্র—জিভে ঠেক্তে

না ঠেক্তেই অমনি জীবের উদ্ধার ।

২য় দূত । আর আমরা বেঁচে থেকে কি করবো মশাই ?

৫ম দূত । ( সুরে ) “মরিব মরিব সখি, নিশ্চয় মরিব” ।

যম । এই—এই, এখন গান ! একটা—এত বড় গুরুতর বিষয়,

চিন্তার বিষয় আলোচনা হচ্ছে—আর তুই বেটা গান ধ'রে

দিলি ? ছিঃ !

৫ম দূত । গান ধরুঁ নেই নাকি হুজুর ? আমি ত' জানতুম—সব  
অবস্থাতেই গান গাওয়া যায় ! বাল্মিকী মুনি গোটা রামায়ণটাই  
গান গেয়ে রচনা করেছিলেন ।

যম । বেটা তর্কবাগিশ আবার কেমন আমার মুখের ওপর চোপা  
ক'রছে দেখ ?

১ম দূত । দোব হুজুর ওটাকে শূলে তুলে ?

২য় দূত । না না ; দিন মশায় বেটাকে পুড়িয়ে মারবার হুকুম ।

৩য় দূত । তার চেয়ে সাঁড়াশী দিয়ে জিভটা টেনে বার ক'রে, শলাঠি  
দিয়ে চোখ ফুঁড়ে—

৪র্থ দূত । আরে, তা হ'লে যে কাণা হ'য়ে যাবে—কিছু দেখতে  
পাবে না । ধর্ম-অবতার, আপনি ওকে গরম তেলের কড়ায়  
ফেলে বেশ কড়া ক'রে ভেজে আনতে আদেশ দি'ন ।

৫ম দূত । হুজুর, যখন এত জনের এত রকম মত ; আর আপনি  
নিজে কোন্টা ক'রবেন, কোন্টা না ক'রবেন তাই ঠাওরাতে  
পাচ্ছেন না, তখন আমি বুঝেছি—মরণ আমার কপালে নেই ।  
—( সুরে ) “আমার মরা হ'লো না সখি !”

যম । এই—এই খবদার ! অমন ক'রো না বলছি । আমি এখনি  
হেসে ফেলবো ।

১ম দূত । ওরে বাপরে ! তা হ'লে মহাভারত অশুদ্ধ হ'য়ে যাবে !  
যমের মুখে হাসি !

২য় দূত । এখনি ছিটি উটে যাবে । মড়া-কান্নার সঙ্গে যার শুধু  
সম্পর্ক, তিনি হঠাৎ হেসে ফেললেই সর্বনাশ !

যম । এই পির হও । দেখছ, কে একজন এ দিকে আসছে !  
শুকনো মুখ, উদাস চোখ, কি অদ্ভুত মূর্তি ! কে ও ?

১ম দূত । যখন মূর্তি অদ্ভুত—আকার কিন্তুূত—তখন বোধ হয় ও  
কোন আবেগের বেটা ভূত ।

যম । তা যাই হোক ; তোমরা একটু আড়ালে আড়ালে যাও ।  
ওকে সামান্য লোক ব'লে বোধ হচ্ছে না । আমি একা ওর  
সঙ্গে একটু আলাপ করি ।

২য় দূত । তা যাচ্ছি । কিন্তু পেসাদের গুঁতোর কথাটা ভুলবেন  
না ।

যম । আরে না না—তোমরা যাও ।

[ যমদূতগণের প্রস্থান ।

ঠাটা মস্কনা ক'রে, ছ'টো ফাস্ কথা ক'রে এদের ভুলিয়ে রাখতে  
চাইলেও সত্যি বিষয়টা বড়ই গুরুতর—তাতে আর সন্দেহ নাই ।  
নীলমাধবের প্রসাদ যে গ্রহণ ক'রবে, সেই মুক্ত হ'বে বৈকুণ্ঠ  
ধারার অবিকারী হবে ; এ বড় কম কথা নয় ! আমি যমরাজ,  
জীবের অমুষ্টিত যত পাপ পুণ্যের বিচার ক'রে, আমিই তাদের  
জীবনান্তের পর গতির ব্যবস্থা করি । আমার অমুচরেরা  
পাপীকে শাস্তি দিতে যেমন মজবুৎ, তেমনি ঐ কাজে আমোদ  
পায় তারা বিশেষ । এখন যদি পাপী পুণ্যাত্মার বিচার না  
থাকে—যদি কণা মাত্র প্রসাদ খেয়েই জীব পরম গতি পায়—  
তা হ'লে আমি রাজত্ব ক'রবো কি নিয়ে—আর আমার ঐ  
সব পোষা অমুচরদেরই বা ঠাণ্ডা রাখবো কি দিয়ে ?

সমুদ্রের প্রবেশ ।

সমুদ্র । আমারই মত চিন্তাকুল—আমারই মত হতভাগা, কে তুমি  
একাকী এখানে বিচরণ ক'রছ ?

যম । আমার পরিচয় জেনে আপনার লাভ ?

সমুদ্র । আমি এই প্রদেশের অধিপতি । তুমি আমার অধিকার মধ্যে এসেছ, সুতরাং তোমার পরিচয় না জেনে, আমি তোমায় এ ভাবে একাকী থাকতে দিতে প্রস্তুত নই ।

যম । এ স্থান আপনার অধিকারভুক্ত ? আপনি কি—

সমুদ্র । আমি সমুদ্র । ধরণীর ত্রি-চতুর্থাংশ আমার ।

যম । আর আমি ধর্মরাজ যম । জগতের সমস্তটাই আমার অধিকার-ভুক্ত ।

সমুদ্র । ধর্মরাজ তুমি ? তুমি এত শীর্ণ, এত মলিন হ'য়ে গেছ ? আশ্চর্য্য ! তোমায় দেখে সহসা চেনবার উপায় নাই ।

যম । আর তুমি বন্ধু জলধি, তোমার এ দুর্দশা কেন ? তোমার সে লাষণ্য, সে চাঞ্চল্য, উদ্যম উচ্ছ্বাস—সে অনন্ত উল্লাস কই ? তুমি কেন এত বিমর্ষ—এত স্নান সখা ?

সমুদ্র । বন্ধু, আমি এক সুন্দরীর প্রণয়প্রার্থী হ'য়ে, তার ভ্রাতা এক বালকের হস্তে—লাঞ্ছিত—অপমানিত হ'য়েছি । তাই আমার এই দুর্দশা । আমি আজ কয় দিন অবধি, অহোরাত্র সেই যুবক ও সেই সুন্দরীর অবেষণে ইতস্ততঃ কক্ষ ভ্রষ্ট উদ্ধাখণ্ডের মত ছুটে বেড়াচ্ছি । আমার আহারে রুচি নাই—শয়নে তৃপ্তি নাই—বিশ্রামে শান্তি নাই—আমি তাদের আবিষ্কারের জন্ত ক্ষিপ্ত হ'য়ে বেড়াচ্ছি ।

যম । সখা, তাদের কোন পরিচয় জানতে পারলে, তোমার এই অরুত্রিম সুহৃৎ, তোমার জন্ত তাদের অনুসন্ধান ক'রতে পারে বোধ হয় ।

সমুদ্র । সুন্দরীর নাম বলভদ্রা । রূপে যেন স্থির বিজলী—কথায়

যেন মূর্তিমতী রাগিনী—মাধুর্য্যে যেন স্বর্গের সুধা । তার শ্রী—  
তার কান্তি—তার সৌন্দর্য্য—সবই বুঝি উপমা হীন ।

যম । আর তার ভাই ?

সমুদ্র । অবসর পাই নি সখা, তার নাম জিজ্ঞাসা করবার । তবে  
পরিধানে তার নীলাম্বর, হস্তে তার হল, নরনে বয়ানে প্রসন্ন  
মধুর হাসি । তার শক্তির তেজে সমুদ্র পরাজিত ; কিন্তু তার  
মাধুর্য্যের নিকট বোধ হয় সমগ্র বিশ্বব্রহ্মাণ্ড নত শির । সখা,  
সখা কুতান্ত, তুমি পারবে ? পারবে এদের সন্ধান ক'রে আমার  
সুখী ক'রতে ? আমি এখন বড় উদ্ভ্রান্ত—বড় অশ্রু মন হয়েছি ।  
লৌকিক শিষ্টাচার পর্য্যন্ত হারিয়েছি । তোমার এতক্ষণ পর্য্যন্ত  
কোন অভ্যর্থনা করি নি । মার্জনা কর বন্ধু ! আমার মার্জনা  
কর । আমি ক্ষমা চাচ্ছি ।

যম । কিছু করবার আবশ্যক নাই সখা । আমিও বড় বিমনা—বড়  
চিন্তাশ্রিত আছি । আমার এখন সামান্য লৌকিকতার দিকে  
লক্ষ্য করবার অবসর নাই ।

সমুদ্র । তোমার কি জন্ত এমন চিন্তা, শুনতে পারি কি বন্ধু ?

যম । তোমার তীরে নীলাচল আছে । সেখানে গোলক-পতির  
নীলমাধব মূর্তি আছে । শবর বিশ্বাবসু সেই মূর্তির পূজা করে ।  
ঠাকুর এই শবরের পূজায় এত প্রীত যে প্রত্যহ স্বয়ং স্ব হস্তে তার  
নিবেদিত নৈবেদ্য গ্রহণ করেন—পরম পরিতোষের সহিত  
সেবা করেন । তাঁর সেই প্রসাদ—মহাপ্রসাদ নামে অভিহিত  
হ'য়েছে । জগতের যে কোন প্রাণী সেই প্রসাদ পাবে,—তা  
সে যত বড় দুষ্কৃতি-পরায়ণ, যত দূর পাতকীই হোক—তদগেই  
হ'য়ে, দিব্য দেহে স্বর্গে চ'লে যাবে । এখন সখা,

আমার বিপদ বৃদ্ধ। আমি ধর্মরাজ নামে জীবের পাপ পুণ্যের হিসাব রাখবো—আর সকলে আমার অসুষ্ঠ দেখিয়ে, সকায়ে বৈকুণ্ঠবাসী হ'তে থাকবে।

সমুদ্র। তা, তুমি এর প্রতিকারের কিছু উপায় ঠিক ক'রেছ ?

যম। এতক্ষণ কিছু স্থির ক'রতে পারি নি সখা। কিন্তু তোমার দেখে আমার প্রাণে আশার সঞ্চার হচ্ছে,—উৎসাহে বুক বাঁধতে ইচ্ছা হচ্ছে।

সমুদ্র। কেন—কেন বন্ধু ?

যম। অসীম অনন্ত পারাবার, উদার হৃদয় বন্ধু আমার, তুমি যদি রূপা ক'রে তোমার দোর্দিগু লীলায়িত তরঙ্গ তাড়নায়, তোমার তটস্থ বালুরাশির দ্বারা সেই নীলমাধব মূর্তি আদৃত কর, তা হ'লে আর সে শবর তার সন্ধান পাবে না। আর আমারও সকল চিন্তা—সকল উদ্বেগ—সকল ভাবনার অবসান হবে।

সমুদ্র। উত্তম বন্ধু ! তাই ক'রবো। চলো, এ চিন্তাক্রিষ্ট জীবন বড় দুর্ভাগ হ'য়ে উঠেছে। চলো, যদি তোমার কোন উপকারের ছলে নিজেকে কার্ষ্যে ব্যাপ্ত রেখে, এ বিষম চিন্তার হাত হ'তে অব্যাহতি পাই। চলো—চলো সখা। বিলম্বে প্রয়োজন নাই : বিলম্বে মন আমার হয় ত' অন্ত পথে ধাবিত হ'তে পারে।

যম। চলো বন্ধু।

[ উভয়ের প্রস্থান।



পঞ্চম গর্ভাঙ্ক ।

বিখাবসুর বাটীর অদ্বন ।

ললিতা ও সখীগণ ।

১ম সখি । এতদিনে বুঝি সহইয়ের দুঃখ ঘুচলো ।

২য় সখি । সখির সখা এদিনে বুঝি জুটলো ।

৩য় সখি । বুঝি কেন ? সত্যি এদিনে বিয়ের ফুল ফুটলো । দেখছি  
নি, কি রকম রং বেরংএর প্রজাপতির আমদানী হ'য়েছে । আর  
কত—যেন ঝাঁকু ঝাঁকু !

ললিতা । আমার জন্মই প্রজাপতির আমদানি হ'য়েছে, সেটা কেমন  
ক'রে জানা গেল ? আমি যদি বলি—তোমার বিয়ের খবর রটাতে  
ওরা এসেছে !

৩য় সখি । তা হ'লে ওরা আমার গায়ে উড়ে এসে ব'সতো ; হাতে,  
নাথায়, বুকে, গালে—সব জায়গায় । যেমন তোমার  
ব'সছে ।

সকলে । হোঃ—হোঃ—হোঃ ( সকলের হাস্য )

ললিতা । না ভাই তামাসা নয় । সত্যি আজ আমার মনটা যেন  
কেমন এক রকম হ'য়েছে । প্রাণ যেন আমার আকুল হ'য়ে  
কাকে ডাকতে চাচ্ছে,—যেন আজ আমার গলা ছেড়ে ব'লতে  
ইচ্ছে হচ্ছে—

গীত ।

হাসির—একতারা ।

এস হে তুমি এস ।

মম চিত-সঞ্চিত চির-বাহিত অন্তরতম এস ॥

আমার ব্যাকুল বক্ষে এস,      আমার আকুল চক্ষে এস,

আমার প্রেম-পারাবার-মহন-ধন ভুজ-বন্ধনে এস ॥

আমার পরম কান্তি এস,      আমার চরম শান্তি এস,

আমার সরম-ভরম-ধরম-করম, মরম মাঝারে এস ॥

৩য় সখি । তবে আর কি ! তোমার প্রাণ যখন আকুল হ'য়ে ডাকছে  
তখন এলো ব'লে—এলো ব'লে । ওমা, এ কে গো ?

লীলাধরের প্রবেশ ।

লীলা । আমি লীলাধর !

ললিতা । লীলাধর ! ভাই—ভাই—

১ম সখি । ও কপাল ! ভাই ! একেবারে ভাই ! আমি মনে  
ক'রেছিলুম “ভাই” !

লীলা । কেমন দিদি, আজ এসেছি । ব'লেছিলুম—তোমার বিয়ের  
দিন ঠিক আসব । আজ তোমার বিয়ে হবে খবর পেলে,  
অমনি ছুটে এসেছি ।

ললিতা । এরা সবাই পাগল হ'লো না কি ? সকলেই ব'লছে আজ  
আমার বিয়ে । কিন্তু কা'র সঙ্গে যে বিয়ে হবে, বর যে কে,  
তার ত' কোন সংবাদটা পর্য্যন্ত পাওয়া যায় নি ।

২য় সখি । “বর আসছে বাঘনা পাড়া । বড় বৌ গো রাগা চড়া ॥”

লীলা । বর এলো ব'লে ; ছুটে আসছে—খুব ছুটে । আমি দেখে  
এলুম । ঐ—ঐ দেখ দিদি, তোমার বাপ কাকে সঙ্গে ক'রে  
নিয়ে এই দিকে আসছে । আমার দেখলে আবার কি মনে  
ক'রবে.—আমি একটু গা আড়াল দিই ।

[ লীলাধরের প্রস্থান ।

ললিতা। তেজঃপুঞ্জ শরীর কে ও ব্রাহ্মণ ? ওকে দেখে আমার প্রাণ  
নেচে উঠছে কেন ? মাথা ঐ চরণ-যুগলে নুটিয়ে পড়তে  
চাচ্ছে। কি এক অজ্ঞাত লজ্জায় আমার চোখ ওর দিকে  
চাইতে পারছে না। আনি এখানে দাঁড়িয়ে থাকতে পারছি না  
—এখান থেকে চ'লে যেতেও প্রাণ চাচ্ছে না। একি ভাব—  
একি পরিবর্তন।

৩য় সখি। ওলো নেকি, অত নেচে উঠছিন্স্ কাকে দেখে ? তোর  
বাপের সঙ্গে যে আসছে—ও যে বামুন !

ললিতা। ব্রাহ্মণ ! ব্রাহ্মণ ! শবর কন্টার বহু উর্ধ্বে অবস্থিত—  
সে ব্রাহ্মণ !

২য় সখি। কি হ'লো ! ওমা, হাওয়া টাওরা লাগলো নাকি ! কি  
ব'কছে লো ?

ললিতা। সূর্যমুখী ফুল ধরায় মলিন মাটিতে ফোটে,—ছোট গাছে  
ছোট হ'য়ে জন্মায়,—কিস্ত তার লক্ষ্য থাকে কোথায় ? কত  
উচ্ছে ? কার দিকে ? ঐ—ঐ প্রচণ্ড তেজাধার, জগৎ-চক্ষু ঐ  
সূর্যের দিকে। কে ও ক্ষুদ্র ফুল-বালার ক্ষুদ্র বৃকে অত উচ্চ  
আশা, অত উচ্চ আকাঙ্ক্ষা জাগিয়ে দেয় ? কে তাকে সমস্ত  
দিবসের রোদ্র, আলা, তাপ উপেক্ষা ক'রে—তার নিজের  
নীচতা, দীনতা, ক্ষুদ্রতা ভুলিয়ে—ঐ বিরাট, মহান্ ভাষর  
বিকর্তনের প্রণয় পিপাসা বৃকে পোষণ ক'রতে শিখিয়ে দেয় ?

১ম সখি। ও সখি, অত “নাগর নাগর” ক'রে ক্ষেপে উঠলে, পুরুষের  
কাছে দর থাকে না। ও তো সবে আসছে। ও কে, কি  
জন্তে আসছে, কি বিত্যান্ত আগে জানো, তারপর নাচতে  
হয় নেচো, ক্ষেপতে হয় ক্ষেপো।

২য় সখি। এখন চলো, আমরা বাড়ীর ভেতর যাই—পুরুষ মানুষের সামনে একটু লুকিয়ে থাকা ভাল।

৩য় সখি। এতটা বরস পর্যন্ত আইবুড়ো থাকলে, মানুষ একটু হেংলা হর সত্যি।

[ সকলের প্রস্থান।

বিশ্বাবস্থ ও বিদ্যাপতির প্রবেশ।

বিদ্যা। প্রভু,—বহু ভাগ্য ফলে আপনার পুনঃদর্শন পেয়েছি। আমি আপনার নিকট শত অপরাধে অপরাধী। আপনি আমার প্রতি প্রসন্ন হোন। আমায় সে দেব-হুল্লভ মহাপ্রসাদ আশ্বাদ করান।

বিশ্বা। শতাব্দিক বার ভূমি ও কথা ব'লেছ ব্রাহ্মণ নন্দন। তোমার অপরাধ স্বাকার, ক্ষমা প্রার্থনা, অনুতাপ, প্রসাদ ভিক্ষা করা, সবই আমার নিকট অভিনয় ব'লে বোধ হ'চ্ছে। আমি জানি আপনার প্রভুর প্রসাদ স্বর্গের সুখা হ'তে সুখাদ, নির্দাণ মোক্ষ হ'তে জগৎ বাঞ্ছিত। কিন্তু ভূমি,—নদগব্বী, জাত্যা-ভিম্বানী দ্বিজমুত,—ক্ষণপূর্বে যে প্রসাদ গ্রহণের জন্য অনুরুদ্ধ হ'য়েও অবহেলা ক'রেছ : মৃত্যু আসন্ন দেখলেও যাকে স্পর্শ ক'রবে না ব'লে দস্ত প্রকাশ ক'রেছ,—সেই তুমি, সেই আমার শবর হস্তের স্পৃষ্ট কন্দ ফল নেবার জন্য এত ব্যগ্র, এত লালায়িত কেন, এ জানুতে আমার বড় কৌতূহল হ'চ্ছে।

বিদ্যা। মহাত্মন, যে মৃগ নিজ নাভিদেশে কস্তুরী বহন করে, সে জানে না যে তার দেহে সঞ্চিত ঐ পদার্থ কত শক্তিশালী—কত মার্ঘ্য। শুধু সে তার সৌরভে আকুল হ'য়ে বন হ'তে বনাস্তরে ছুটে বেড়ায়। কিন্তু যে ভাগ্যবান সেই কস্তুরীর গুণ

চক্ষে দেখবার অবকাশ পায়, সে বোঝে যে কি মৃত সঞ্জীবনী সুধা তার মধ্যে লুক্কায়িত আছে—বার বিন্দু মাত্র গ্রহণে মুমূর্ষুও প্রাণ ফিরে পায়। মহাশয়, আপনি আপনার প্রভুর প্রসাদের প্রতি ভক্তিপরায়ণ সত্য; কিন্তু আপনি জানেন না, যে ঐ নিবেদিত নির্মাল্য জগতের যাবতীয় প্রাণীর মুক্তির কি সহজ সুগম পন্থা নিহিত আছে। আপনি তা জানেন না, কিন্তু আমরা তা জানবার—স্ব চক্ষে দেখবার সৌভাগ্য হ'য়েছে। তাই—তাই আমি এত লালসায়িত হ'য়ে আপনার অনুগ্রহ ভিক্ষা ক'রছি।

বিশ্বা। বিচিত্র কথা ত'! কি দেখেছ তুমি আমার প্রভুর প্রসাদের গুণ ব্রাহ্মণ কুমার?

বিদ্যা। সে এক অদ্ভুত ব্যাপার! এক অলৌকিক ঘটনা! আমি যদি স্ব চক্ষে না দেখতাম,—স্বকর্ণে না শুনতাম—তা হ'লে আমি নিজেই হয় ত' সে কথার প্রত্যয় করতাম না। মহাশয়, আপনি অনুগ্রহ ক'রে যে প্রসাদ আমার জন্ম সাগর তীরে রেখে এসেছিলেন, আমি গ্রহণ না করাতে, সমুদ্র তীরস্থ গিপালিকা, মগ্নিকা প্রভৃতি কীট পতঙ্গ নিচর সেই প্রসাদ আহার ক'রতে থাকে,—আর—আর ব'লবো কি মহাভাগ, সেই প্রসাদের এক এক কণিকা গ্রহণ ক'রে, এক একটা নীচ ক্ষুদ্র প্রাণী দিব্য দেহ ধারণ ক'রে, বৈকুণ্ঠে যেতে থাকে। আমি তাই দেখে বিশ্বাসে বাকশূন্য হ'য়ে আপনার উদ্দেশে ছুটে এসেছি।

বিশ্বা। ওঃ বুঝেছি—এতক্ষণে বুঝেছি। তুমি আমার ঠাকুরের মহা-প্রসাদের অলৌকিক শক্তি, অসাধারণ গুণ, মোক্ষ প্রদানের অসামান্য ক্ষমতা দেখে,—লোভী, স্বার্থপর, আত্মাশ্বেষী বিপ্র,

তুমি অনায়াসে সেই ত্রিলোকবাস্তিত মোক্ষ্য পাবে ব'লে আমার নিকট প্রার্থী হ'য়েছ। ব্রাহ্মণ,—শ্রদ্ধায় নয়, ভক্তিতে নয়, প্রেমে নয় ;—তুমি চাও আমার প্রেমের ঠাকুরের মহাপ্রসাদ কামনার বশে, বাসনা তপ্তির আশে, স্বার্থ-সিদ্ধির উপাদান রূপে ! যাও—যাও তুমি আমার সান্নিধ্য হ'তে। তোমার ও অপবিত্র, কামনা-পঙ্কিল মন নিরে, আমি নিষেধ ক'রছি—তুমি আমার পিতৃ পিতামহের পুত্র পদরঞ্জ স্পৃষ্ট আলয়ে প্রবেশ করো না। দূর হও ! এই আমার আশ্রয় বুঝতে পারছ না তুমি।

বিদ্যা। প্রভু—প্রভু, আর আমার নিষেধ করবেন না, আর আমার বিরত করবার চেষ্টা ক'রবেন না। আমি আপনার রূপা প্রার্থী—অনুগ্রহ ভিখারী। আমার দিন—দিন—আপনার ভাঙারে সঞ্চিত সেই মহা মূল্য—সেই অমূল্য নির্মাল্যের এক ক্ষুদ্র কণিকা আমার দিয়ে ধন্য করুন। ( বিশ্বাবসুকে ধরিতে উদ্ভত )

বিশ্বা। ( বাধা দিয়া ) সাবধান ! আমার স্পর্শ করো না—আমার ছুঁয়ো না ! তোমার ও কলুষ-পঙ্কিল দেহের স্পর্শে আমার এ দেহ অপবিত্র করো না। জানো!—আমার এ দেহের অভ্যন্তরস্থ হৃদ-মন্দিরে আমার ইন্দ্রদেবের—আমার পরম প্রভুর বিরামকুণ্ড—বিহার ভবন রচিত আছে।

বিদ্যা। ( স্বগতঃ ) নারায়ণ ! নারায়ণ ! একি তোমার লীলা ! অস্পৃশ্য নীচ অসু্যজ আজ নরদেব ব্রাহ্মণকে তার অঙ্গ স্পর্শ ক'রতে নিবারণ ক'রছে। ওঃ ! একি তোমার ছলনা ! একি তোমার পরীক্ষা। ( প্রকাশে ) ও, আমি বুঝেছি শবরপতি। আমি জাতীয়তার অভিমানে, বর্ণের গৌরবে আপনাকে অবহেলা, উপেক্ষা করেছিলান, তাই আপনি একুণ রূঢ় বাক্যে আমার

সেই আচরণের প্রতিশোধ নিতে চাচ্ছেন। কিন্তু মহাশয়, আপনি ভুলে যাবেন না, যে আমি যা ক'রেছি, তার জন্য আমি নিজে দায়ী নই। কারণ ব্রাহ্মণের অন্ত্যাজকে স্পর্শ ক'রতে বা তার প্রদত্ত দ্রব্য গ্রহণ ক'রতে শাস্ত্র চিরদিন নিষেধ ক'রে এসেছে।

বিশ্বা। শাস্ত্র!—কিসের শাস্ত্র দ্বিজ নন্দন? লৌকিক শাস্ত্র? যা চির দিন ঋষিকে, মানবতাকে, সত্যকে নীচে চেপে রেখে দিতে চায়? শাস্ত্র? কে তার রচয়িতা ব্রাহ্মণ কুমার? তোমারই মত ব্রাহ্মণ! তাই সে তোমার নিষেধ ক'রে রেখেছে, আমার মত শবরকে স্পর্শ ক'রতে। যদি আমার মত কোন শবর, নিষাদ, কি চণ্ডাল—শাস্ত্র প্রণয়ন ক'রতো, তা হ'লে দেখতে পেতে, তার পত্রে পত্রে, ছত্রে ছত্রে অমুশাসন আছে যে আমরা বই জগতে আর কেউ বড় নয়, উচ্চ নয়, পূজ্য নয়। আমরা ভিন্ন অন্য সকলে হীন—নীচ—অন্ত্যাজ।

বিশ্বা। মহাভাগ, আপনি উত্তেজিত হবেন না। ধীর ভাবে বিবেচনা ক'রে দেখুন—ব্রাহ্মণ কি জন্ম জগৎ-পূজ্য। কেন ত্রিসংসার তার শীর্ণ শুষ্ক তপঃক্লিষ্ট চরণতলে সম্মুখে মস্তক নত করে। সে কি তার পরার্থপরতা,—লোকহিতৈষিতা—উদারতা,—চির-নির্লোভতা,—নিত্য সন্তুষ্টতা,—সদা ভগবৎ পরায়ণতার জন্য কিছু প্রশস্ত নয়?

বিশ্বা। ব্রাহ্মণ, তোমাদেরই অমোঘ বিধান সবলে অপর সকল জাতিকে ঐ সকল উচ্চ গুণ গরিমা হ'তে বঞ্চিত ক'রেছে। কেন তোমরা আমাদের শিক্কা না দিয়ে, জ্ঞান না দিয়ে, আলোক না দেখিয়ে, চিরদিন অন্ধকারে ডুবিয়া রাখতে চেরে-

ছিলে ? কেন তোমরা শবরীর জিহ্বা কেটেছিলে—কেন শম্বুককে হত্যা করবার পরামর্শ দিয়েছিলে ? তোমাদের অপ্রতিহত প্রভাব ক্ষুণ্ণ হবে ব'লে নয় কি ? যদি স্বভাবের সহজ নিয়মকে তোমাদের গঠিত নির্ধর্ম নিষ্ঠুর বিধান টুঁটি টিপে মেনে ফেলতে না চাইতো, তা হ'লে দেখতে ব্রাহ্মণ,—আমাদের মদ্য হ'তেও কোন বিশিষ্ট ভার নিজের মৃত্যু নিশ্চিত জেনেও, শত-পুত্র-বিনাশকারী শক্রর মারণ-যজ্ঞে আত্মপ্রাণ আহুতি দেবার জঙ্ক দাঁড়াত ;—দেখতে পেতে আমাদের ভিতরই কত ভাগব উন্নত ক্ষাত্র-শক্তির মূলোচ্ছেদ ক'রতে যেত ;—কত অগস্ত্য গর্ষিত বিদ্যের গর্ভোন্নত শির চির নত ক'রে রাখতো ;—কত বগিল এক ক্রুদ্ধ দৃষ্টির লেলিহান তেজে তৃষ্ণা-পরায়ণ মগর মহানগরকে ভস্ম স্তূপে পরিণত ক'রতো । এত কর্তব্যপরায়ণতা—এত তেজস্বিতা তাদের মধ্যেও দেখতে পেতে তুমি বিজ পুত্র, যে তারা হাসতে হাসতে ধূলিকণার ছায় সায়াজ্য পরিত্যাগ ক'রে, শুধু জ্ঞানের চর্চার, বাণীর সাধনায়, মুষ্টি প্রদান তণ্ডুল আহার ক'রে, অজীন শয্যায় শয়ন ক'রে, বিজন বন মধ্যে জীবনের সমস্তটাই কাটিয়ে দিত । কিন্তু এ কথা তুমি হির জেনো বিপ্র, যে তোমার পিতৃপুরুষগণ কৌশলে সকল জাতির লনশ্রু শক্তি আত্মসাৎ ক'রে, যে গর্বে অন্ধ হ'য়ে ব'লেছিল—আমাদের কষ্টপের ঔরসে ভগবান জন্ম নিয়েছে—আমাদের মান্দীপনি মুনি জগৎপতির শিক্ষা দান ক'রেছে—আমাদের ভৃগু দর্শ ভরে নিদ্রিত নারায়ণের বক্ষে পদাঘাত ক'রেছে—আমাদের মধ্যে কোন পণ্ডিত, কোন পৌরাণিক, কোন শাস্ত্রবেত্তা সে স্পর্ধা, সে ঔদ্ধত্যের প্রশয় দিত না ।



## ললিতার প্রবেশ ।

ললিতা । বাবা,—বাবা, অমন উত্তেজিত হ'য়ে, অমন উন্মনা হ'য়ে  
এ কি ব'লছ তুমি, বাবা ! স্থির হও ! শান্ত হও ! তোমায় ত'  
কোন দিন এমন চঞ্চল, এমন বিচলিত দেখি নি, বাবা !

বিশ্বা । কে ললিতা ? স্নেহময়ী কন্যা আমার—সংসারের সকল অব-  
লম্বন আমার ? ব্রাহ্মণ কুমার,—ব্রাহ্মণ কুমার, তুমি না আমার  
শ্রুতুর প্রসাদ প্রার্থী ? হ্যা—হ্যা ! তুমি আমার শ্রুতুর প্রসাদ-  
প্রার্থী বটে । দেখেছি নন্দন, আমি তোমায় সে মহাপ্রসাদ  
দেবো—দেবো । শুধু সে প্রসাদ নয়—তার সঙ্গে যার প্রসাদ  
সেই পরম পুরুষ, সেই নীলমাধবের দর্শন দিয়ে দেবো—যদি  
তুমি ত্যাগ ক'রতে পার এক অতি সামান্য বস্তু । তা হ'লে  
আমি তোমায় দেখাব সেই নীলমাধব মূর্তি, যা মর্ত্যলোকে অসি-  
ব্যতীত আর কেউ দেখবার ভাগ্য পায় নি—যার সন্ধান জগতের  
সমস্ত প্রাণীর নিকট অজ্ঞাত ।

বিদ্যা । মহাত্মন, আপনি—আপনি জানেন সেই নীলমাধবের সন্ধান  
—যার অন্বেষণে আমি উদ্ভ্রান্ত হ'য়ে এত দিন ছুটেছি ? এখন  
—বনুন শ্রুতুর কি সে বস্তু, যা ত্যাগ ক'রলে আমি সেই দিব্য  
বস্তু—সে পরম নিধির সাক্ষাৎকার পাব । সে কার্য্য যত কঠিন,  
যত সাংঘাতিক হোক—আমি স্বেচ্ছায়, সানন্দে তা অন্বেষণ  
ক'রতে পশ্চাৎপদ হব না ।

বিশ্বা । ব্রাহ্মণ নন্দন, সে ত্যাগের সামগ্রী হ'চ্ছে—তোমার চিরাচরিত,  
চিরাভ্যস্ত, রক্তগত, মজ্জাগত জাত্যাভিমান । বিপ্র তনয় তুমি  
যদি তোমার বংশাভিমান, ব্রাহ্মণত্বের অভিমান ত্যাগ ক'রতে  
পার, তা হ'লে আমি তোমায় তাঁর কাছে নিয়ে যাব—বিনি

ব্রাহ্মণ চণ্ডালের বিচার করেন না,—যাঁর কৃপা ক্ষুদ্র মহৎ নির্বিচারে সম ভাবে বণিত হয়—যাঁর নিকট চণ্ডালের সখ্য, রাখালের উচ্ছ্রষ্টও উপেক্ষিত নয়। পারবে তুমি, ব্রাহ্মণ ?

বিদ্যা। পারব প্রভু। উদ্দেশ্য সিদ্ধির জন্ত আমি আমার ব্রাহ্মণ্যের গর্ব, দ্বিজত্বের অভিমান কি,—আমার এই প্রাণ পর্যন্ত হামি মুখে বিসর্জন দিতে পারি।

বিশ্বা। বটে—বটে ! এত তুমি সিদ্ধিকামী ? এত দূর অগ্রসর হ'রেছ ? ভাল, দেখ দ্বিজ স্মৃত, আমরা মূর্থ, অসত্য, বর্বর শব্দ,—আমরা বাক্যের ছটা অধিক পছন্দ করি না। আমরা চাই কার্য। তুমি যদি সত্য তোমার জাত্যাভিমান ত্যাগ ক'রতে প্রস্তুত থাক, তা হ'লে এস—এই আমার কন্যার পাণি গ্রহণ কর।

বিদ্যা। এঁ্যা !

বিশ্বা। তোমার উচ্চারিত বাক্য শুধু মৌখিক আশ্ফালন নয়—প্রয়োগে তার প্রমাণ দেখাও। জগৎবাসীর চক্ষে আজ তুমি প্রতিপন্ন কর, যে জগন্নাথ দর্শন করবার পূর্বে সত্যই তুমি সকল অভিমান, সব অহঙ্কার, সমস্ত মালিন্য, সর্ববিধ দৌর্বল্য হ'তে মুক্ত হ'তে পেরেছ।

বিদ্যা। মহাভাগ, এ আপনি কি ব'লছেন ? একি সম্ভব ? একি সম্ভব ? না—না, আমি বুঝেছি, আপনি আমার পরীক্ষা করবার জন্ত পরিহাস ক'রছেন।

বিশ্বা। কখন নয়—কিছুতেই নয়। আমি আমার প্রিয়তমা কন্যাকে যখন তোমার পাণি পাশে আবদ্ধ হবার জন্ত তোমায় ব'লেছি—তখন আমার এ জ্ঞান বেশ ছিল, যে নিজ কন্যার বিবাহের কথা নিধে কোনরূপ পরিহাস করা পিতার কর্তব্য নয়। বাক্য বীর,

আমি এখন বুঝতে পারছি—তুমি বাক্য ছটায় কার্য উদ্ধার হবে মনে ক'রে আশ্ফালন ক'রছিলে, এখন কার্য কালে কর্তব্যের কঠোর যুক্তি দেখে পশ্চাৎপদ হ'চ্ছ। ধিক্!

ললিতা। (স্বগতঃ) এ কি আশ্চর্য্য! বাবা হঠাৎ এ কি প্রসঙ্গের অবতারণা ক'রে ব'সলো! আমি অন্তরে অন্তরে এই ব্রাহ্মণের পাণিপ্রার্থী, এ কথা বাবা কেমন ক'রে জানলে?

বিদ্যা। (স্বগতঃ) একি কঠোর পরীক্ষা! নারায়ণ, একি কঠিন সমস্যা! দয়াময় দীনবন্ধু—দীন ব্রাহ্মণের মান রাখ—লজ্জা নিবারণ কর—লজ্জা নিবারণ কর!

লীলাধরের পুনঃ প্রবেশ।

লীলা। দিদি, আমি আজ তোমার কাছ ছাড়া কিছুতেই হ'তে পারছি না। আজ বলে তোমার বিয়ে! আবার ঘুরে ঘুরে এলুম।

বিদ্যা। লীলাধর! লীলাধর! দীনবন্ধু—দীননাথ—তুমি উপায় কর—তুমি বিধান দাও। আমার এ দারুণ সংশয় সঙ্কটে ত্রাণ কর।

লীলা। আরে ফেপা ঠাকুর কি বকে শোন। আমি উপায় ক'রবো কি ঠাকুর? বিয়ে ক'রবে তুমি। আর কি উপায়। বলিহারী—

বিদ্যা। এ যে অন্ত্যজ শবর কন্যাকে বিবাহ লীলাধর—এ যে—

লীলা। আমার অভিমানে বাধে লীলাধর! আমার কুল শীল মান সঙ্কম সব যে এর বিরোধী লীলাধর! ছিঃ ঠাকুর! ভুলে গেছ'। তোমাদের কে ব্রাহ্মণই না এক দিন বলেছিল—“স্ত্রী রত্নং দুষ্কুলাদপি”। তা ছাড়া জন্ম ত' কারো হাত-ধরা নয়—জন্মটা যে দৈবাধীন। মানুষের নিজের আয়ত্ত্ব হ'চ্ছে তার কর্ম। আমার

দিদি কখনও 'ত' কোন কুর্কম, কার্যে নয়, মনেও পোষণ  
করে নি !

বিদ্যা । কি সম্মোহিনী শক্তি এর কথায় ! কি সুন্দর যুক্তি বিদ্যাস !

লীলা । তুমি ঠাকুর কি সেই গানটা শোন নি ? সেই যে—

### গীত

খান্নাজ—যং ।

কূলে কিবা আসে যায় ।

জন্ম কারো হাত ধরা নয় কর্ম ভাল হওয়া চায় ।

মুক্তা জন্মে শক্তির গর্ভে, কে না তারে ধরে গর্ভে ?

কল্পনা খনির হীরক নধি রাজার তাজে শোভা পায় ।

কাঁটা বনের কেতকী ফুল গন্ধে করে প্রাণ আকুল ;

পাঁকে ফোটা পঙ্কজেতে তুই সদা দেবতায় ॥

বিদ্যা । যথার্থ বলেছ তুমি লীলাধর । বড় সত্য কথা—বড় যথার্থ কথা

বলেছ তুমি । মহাভাগ, আজ আমার সব অভিমান, সব সংশয়

অপনোদন করে, এই জ্ঞানদাতা চৈতন্যদাতা বালক আমার

সত্যের সন্ধান দেখিয়েছে । এখন আপনি অনুগ্রহ করে, আমায়

সেই সত্য-বিগ্রহ, নিরঞ্জন—চিন্ময় গুণি দেখাবেন চলুন । আমি

আপনার প্রস্তাবে সম্মত । আমি আপনার কন্যার পাণি গ্রহণের

জন্য এই আমার নিরভিমান, নিরহঙ্কার, আবেগ-কম্পিত হস্ত

প্রসারিত করলাম । দিন আপনি আমায় আপনার স্নেহের দান

—আপনার সংসারের শেষ অবলম্বন ঐ লাবণ্যময়ী কন্যাকে ।

বিদ্যা । ব্রাহ্মণ, ব্রাহ্মণ, ধন্য তুমি—ধন্য তুমি । ধন্য তোমার উদারতা

—ধন্য তোমার বদান্যতা । তুমি সংসারের কুলিশ কঠোর

নাগ-পাশ হ'তে মুক্ত হ'য়ে আজ যে মহৎ, যে উদারতার পরিচয় দিচ্ছ, তাতে আমি আশীর্বাদ ক'রছি, তুমি জগন্নাথকে সত্বর তোমার অস্তরের মাঝে দেখতে পাবে—তাকে চক্ষের সমক্ষে সাকার দেখতে পাবে। আর তুমি প্রচার কর্তে পারবে, যে ভগবানের নিকট ভক্তই সব—সর্বের সর্বময়। সেথায় জাতি নাই, কুল নাই, মান নাই, অভিমান নাই। এই আমি পরম আনন্দ ভরে আমার আদরিণী কন্যাকে তোমার হাতে সমর্পণ ক'রে স্বস্তির নিশ্বাস ছাড়লুম।

( মলিতাকে বিদ্যাপতির হস্তে অর্পণ। নেপথ্যে শঙ্খ ধ্বনি। )

লীলা। ঐ গো, শাঁখ বেজেছে। বাবা, তুমি একটু আড়ালে বাও। মেয়েরা বরণ ক'রে বর ক'নে ঘরে তুলুক।

[ বিশ্বাবসুর প্রস্থান।

কৈ গো সব, এস না। উনু দাও না। শুধু পৌ পৌ ক'রে শাঁখ ফুঁকে কি হবে? একটা গান হোক।

সখীগণের বরণের দ্রব্যাদি লইয়া প্রবেশ ও গীত।

পিনু বাঁরোয়া—দাদরা।

ও মালতী-ফুল!

এত দিনে ভাঙলো বিধির ভুল ॥

ঝাঁকে ঝাঁকে পাখনা নেড়ে, প্রজাপতি আছে উড়ে,

ব'সছে তারা গায়েতে তোর—(বলছে) ফুটলো বিয়ের ফুল ॥

আমরা যত কুলবালা, সাজিয়ে সাধের বরণডালা,

উনু চিরে শাঁক ফুঁকে লো—বাধিয়ে দোব হনুস্থল ॥

# তৃতীয় অঙ্ক

## প্রথম গর্ভাঙ্ক ।

অক্ষয়-বটবৃক্ষতলে নীলমাধব মূর্তি ।

পূজার সামগ্রী হস্তে বিশ্বাবস্থ এবং ললিতার মস্তকে ধান্যের  
কুনিকা রাখিয়া তাহা হইতে ধান কাটিতে কাটিতে  
বিদ্যাপতির প্রবেশ ।

বিদ্যা । মহাশয়, কত দূর ? কত পথে—কত দূরে আছে সে মাধব ?  
একটা একটা ক'রে ধান ফেলতে ফেলতে এসেছি, কিন্তু এত বড়  
পাত্র ধান শূন্য হ'য়েছে । আপনার কলা পথ পরিশ্রমে ক্লান্ত  
—অবসন্ন হ'য়ে প'ড়েছে । আমি নিজেও বেশ পরিশ্রান্ত বোধ  
ক'রছি । আর কত দূর গেলে সে নীলমাধবের সন্দর্শন পাব ?

বিশ্বা ! মূর্খ, পাচ্ছ না তুমি পদ্মের গন্ধ আশ্রয় কর্তে ?—বুঝ না,  
এই জলাশয়ের চিহ্নমাত্র শূন্য স্থানে পদ্মই বা কোথায় ফুটেছে—  
আর তার এমন মনোলোভা গন্ধই বা কোথা থেকে আসছে ?  
অন্ধ, দেখতে পাচ্ছ না তুমি, এই তোমার সম্মুখেই সেই যুগ-  
যুগান্ত স্থায়ী অক্ষয় বট ? ওরই মূলে—ঐ ঐ আমার বহু  
সাধের—বহু সাধনার ধন—ঐ জগদানন্দ কন্দ—ঐ নীলমাধব  
আমার বিরাজ ক'চ্ছে ।

বিদ্যা । ধন--ধন আমি । আজ আমি ধন—আমার জীবন ধন—  
জনম ধন । মরি, মরি কি রূপ ! কি নরন-মন-মোহন রূপ !  
চক্ষু, দেখ—দেখ, তোর দেখার যত সাধ আছে সব মিটিয়ে

দেখ। হৃদয়, তোমার মেথানে যতটুকু স্থান আছে, সব পূর্ণ  
ক'রে নে, পরিপূর্ণ ক'রে নে—ঐ ভুবন-ভোলা—সকল-ভোলা  
রূপের ছটায়। আমার জীবনের নিধি—আমার প্রাণের সাধনা  
—আমার জনমের তপশ্চা, আমার আশা-আকাঙ্ক্ষা-সাধ-বাসনার  
নিদান তুমি,—তুমি এখানে—এই ভাবে আছ? আমি যে  
তোমায় সারা ভুবন খুঁজে বেড়াচ্ছি, ভুবনেশ্বর! আমি যে  
ব্যাকুল হ'য়ে আকুল আস্থানে তোমায় ডেকে ডেকে ফিরছি  
জগতের দ্বারে দ্বারে, জগন্নাথ! দীন ব্রাহ্মণের কাতর রোদন  
কি তোমার কাণে পশে নি, প্রাণে বাজে নি? তাই কি  
এতদিন এমন নীরব নীথর হ'য়ে এখানে ব'সে আছ, বনমালী?  
আজ পেয়েছি—ধরেছি: হৃদয়ের নিধি, আজ যে তোমায়  
হৃদয়ের মাঝে আঁকড়ে ধ'রে রেখে দেবো। চপল—চঞ্চল—  
চির-অস্থির, সেই—সেই একদিন তুমি স্বপ্নে দেখা দিয়েছিলে,  
—নিমেষের তরে দেখা! তারপর বিকলাঙ্গ দেখিয়ে নিমেষের  
মধ্যে অন্তর্দান হ'য়েছিলে। সেই দিন থেকে আমার কত  
পরিবর্তন হ'য়েছে জান' তুমি, জনার্দন? আমি উন্মাদ হ'য়েছি,  
অবহেলে নারীহত্যা ক'রেছি, মৃত্যুর দ্বারে নীত হ'য়েছি,  
দেশান্তরে নির্বাসিত হ'য়েছি, শবরীর পাণি গ্রহণ ক'রেছি।  
আজ তোমায় পেয়েছি, প্রাণময়! আজ আর ছেড়ে দেবো  
না। না—না কিছুতেই না। এই তোমায় বুকে তুলে—  
( ধরিতে উত্তত )

বিশ্বা। ( বাধা দিয়া ) কি কর, কি কর তুমি, অবোধ ব্রাহ্মণ!  
আমার সমক্ষে তুমি আমার ঠাকুরকে তুলে কোথায় নিয়ে যেতে  
চাও? স্থির হও—নিরস্ত হও।

বিদ্যা। মহাত্মন, আমার অন্তরের অঙ্ককার নাশ ক'রে, জ্ঞানের অভি-  
মান—বর্ণের অহঙ্কার দূর ক'রে, আপনি আমার গুরুর স্থান  
অধিকার ক'রেছেন; নিজ কণ্ঠ্য সম্প্রদান ক'রে আপনি  
আমার কণ্ঠাদাতা পিতার আসন লাভ ক'রেছেন; আর আজ  
জগন্নাথের দর্শন করিয়ে আপনি আমার জীবন সার্থক ক'রে-  
ছেন। আমি আপনার শিষ্য—আপনার সন্তান। আমার  
চপলতা—আমার নির্বুদ্ধিতা—আমার যত কিছু চাঞ্চল্য, তারল্য  
—সব, সব আজ আপনাকে ক্ষমা ক'রতে হবে। আপনি  
ক্ষমা ক'রতে বাধ্য। কেন না আমি আপনার শিষ্য—আপনার  
সন্তান—আপনার স্নেহের অধিকারী—আপনার মনতায় পাত্র  
—আপনার সকল সম্পত্তির দায়াদ! আজ আমি নিয়ে যেতে  
চাই এই নীলমাধবকে আমার ক্ষম্কে ক'রে, বক্ষে ধ'রে সেই  
বহু দূরস্থিত অবন্তীনগরে।

বিদ্যা। কিপ্ত হ'য়ো না দ্বিজপুত্র। শাস্ত হও! প্রভুর নিত্য-পূজা  
সমাপ্ত হ'তে দাও। দেখছ না—এত বেলা হ'য়ে গেছে—  
ঠাকুর আমার এখন চন্দন মাখতে পার নি ব'লে ঘেমে উঠেছে।  
দিচ্ছি—দিচ্ছি তোমার স্নান করিয়ে, চন্দন মাখিয়ে, শীতল  
ক'রে দিচ্ছি। ওটা ক্ষেপা—ক্ষেপা! ওর কথায় তুমি কাণ  
দিও না। নিয়ে যাবে। হুঁ, গেলেই হ'লো—না? তুমি  
মুখ ভার ক'রো না—ভেবো না। কে তোমার নিয়ে যাবে,  
আমি থাকতে? দ্বিজপুত্র, তুমি বিশ্রাম কর গে ঐ বৃক্ষতলে  
ব'সে, আমি আমার প্রভুর পূজা শেষ ক'রে, তোমায় প্রসাদ  
নিত্যে ডাকব 'খন। যাও ত' মা ললিতা, তুমি ও পাগলাটার সঙ্গে।  
বে আলবুড্ডা লোক—একা ছেড়ে দিতেও ভরসা হয় না।



ললিতা। বাবা, তুমি পূজা কর না ; আমরা ব'সে ব'সে দেখি।  
এই ত' এত পথ হেঁটে হেঁটে এলুম। বাবা ! কি ভয়ঙ্কর রাস্তা !  
এই বাক ত' এই ঘোর, এই ঘোর ত' এই বাক। ডাইনে বায়ে  
—বায়ে ডাইনে ঘুরতে ঘুরতে মাথা ঘুরে যায়। তুমি কেমন  
ক'রে রোজ এ রাস্তা চিনে এস বাবা ?

বিশ্বা। আরে বেটী, এই রকম বকর বকর বকবি ? না যা বলুম  
করবি ?

ললিতা। বলছি ত' বাবা আমরা পূজা দেখব' !

বিশ্বা। না। আমার ঠাকুর বড় লাজুক। সে অন্য লোক থাকলে  
থাবে না,—কিছু থাবে না ; একটা কথা কবে না ; একটু  
ফিক্ ক'রে হাসবেও না। তোরা যা না মা, একটু আড়ালে  
আবুডালে।

বিছা। নিখিল বিশ্বের লজ্জা নিবারণ, তুমি নাকি লাজুক। বেশ,  
বেশ—থাক' তুমি তোমার লোক-দেখান লজ্জা নিয়ে। আমি  
যখন একবার তোমার সন্ধান পেয়েছি, তখন হে আমার  
সকল সন্ধানের সার সন্ধান, সকল পাওয়ার শ্রেষ্ঠ প্রাপ্তি, আমি  
আর তোমায় এমন ক'রে লুকিয়ে লুকিয়ে থাকতে দেবো না।  
আমি তোমায় জগতের চক্ষের সমক্ষে দাঁড় করাবো জগন্নাথ !  
লোকে দেখবে—তুমি ভক্তের ডাকে লুকিয়ে থাকো না,—  
থাকতো পারো না। মহাভাগ, পিতা, গুরুদেব, আমি  
চল্লেম। আপনার প্রসাদে যে মহানিধির দর্শন পেয়েছি,  
তাতে আমার জীবন ধন্য—জনম সার্থক হ'য়েছে। আমার  
জীবনের মহা ফল লাভ হ'য়েছে। আমি এখন বিদায় নিচ্ছি,  
মহাত্মন। আমার অন্য কর্তব্য—আমার জগতের যাবতীয়

জীবের মুক্তির পথ প্রদর্শনের উচ্চাভিলাষ—আমায় আহ্বান  
ক'রছে ;—আমি চললাম।

বিশ্বা । কোথায় যাবে ?

বিজ্ঞা । অবহীপুর ।

বিশ্বা । তোমার পত্নী, সহধর্মিণী—তাকে সঙ্গে নেবে না ?

বিজ্ঞা । পূজ্যপাদ দেব, পত্নী সহধর্মিণী । তাকে নিগড ক'রে আমায়  
আবদ্ধ রাখবেন না । আমি উচ্চ আকাঙ্ক্ষার তাড়নায় ছুটেছি,—  
জগদ্বাসীর কল্যাণের জন্ম ছুটেছি,—ভগবানের ভাবনায় মূর্তি  
লোক চক্ষের গোচর কর্তে ছুটেছি । আপনি অনুগ্রহ ক'রে  
আমায় বিরত করবার চেষ্টা ক'রবেন না । কন্যা আপনার  
সুশীলা, সুধীরা, বুদ্ধিমতী—আমায় অনুরের অভিলাষ উনি  
বুঝেছেন । উনি আপনার নিকট থেকে, আমার ইষ্টসিদ্ধির  
জন্ম অবিরত প্রার্থনা ক'রবেন । আর আমি স্ত্রী সঙ্গে নিয়ে  
—ওঃ ! মার্জ্জনা করুন—মার্জ্জনা করুন । মহাত্মন, আমার  
মার্জ্জনা করুন । স্ত্রীলোকের উপর আমি অনুরে অনুরে কি  
বিদেষ পরায়ণ তা আপনি জানেন না । আমি স্ত্রীলোকের নামে  
আতঙ্কে আকুল হই । আমি শ্রীভগবানের নির্দেশে রমণী জাতির  
উপর খড়্গহস্ত । আপনার কন্যা রইলো এখানে, আপনার  
নিকটে—আমি চললাম !—বিদায়—বিদায়—

[ উদ্ভ্রান্তবৎ প্রস্থান ।

ললিতা । একি ! নক্ষত্রবেগে ছুটে ও যে চলেইছে বাবা ! ওকি  
তবে পালালো ?

বিশ্বা । পাগলী মেয়ে, পালাবে কোথা ? এ বন কি রকম গভীর  
তা ত' দেখেছি । তার উপর কি আঁকা বাঁকা পথ । ওর

সাধ্য কি, যে এ বনের বা'র হয় ; এখুনি ঘুরে ঘুরে আবার ফিরে আসবে দেখ না।

ললিতা। আমার বড় ভয় হচ্ছে বাবা ! যদি না ফিরে আসে !

বিশ্বা। আশ্চর্য্য ! ঠাকুর, এই কি তোমার সংসার ? এই কি তার নমুনা ? আমি বাপ, আবালা লালন পালন ক'রে এসেছি। মাতৃহীনা বালিকাকে নিজের বক্ষের স্নেহ দিয়ে, মত্ত দিয়ে, মমতা দিয়ে এত বড় ক'রেছি। এই দীর্ঘ দিন আমি ভিন্ন এর অন্ত আশ্রয় ছিল না, অবলম্বন ছিল না, চিন্তা ছিল না ; আর আজ এক দিনে, কোথাকার কে এক অপরিজ্ঞাত, অপরিচিত যুবককে পেয়ে, এর চিরদিনের আশ্রয় পিতার কোলেও ভয় পাচ্ছে। চমৎকার ! মাধব, তুমি এত শীঘ্র আপনার জনকে পর ক'রতে আর পরকে আপন কর্তে কি ক'রে পার, তা বুঝা আমার সাধ্য নয়।

ললিতা। কি হবে বাবা !

বিশ্বা। ক্ষেপী মেয়ে, যা দেখে করিস্ নি। ঐ ওখানে, ঐ বড় গাছটার ছাওয়ান গিয়ে ব'সে থাক গে। সে এখুনি ফিরবে। আমি আমার মাধবের পূজা সেরে নিই। বড় দেরি হ'রে গেছে।

ললিতা। আমার বড় মন কেমন ক'চ্ছে বাবা !

[ বলিতে বলিতে প্রশ্নান।

বিশ্বা। ( নীলমাধব-বিগ্রহের প্রতি ) আঃ ! এতক্ষণে তোমায় একলা পাওয়া গেছে ! ব'লেছি ত' তোমায় কতবার, আমায় এ সব ঝগাটে রেখ' না। একলাটী ক'রে দাও—তোমায় আমায় দু'জনে এক সঙ্গে দিন রাত এই নিরালা নির্জন বন তলে বাস

করি! তুমি শুনবে না ত' আমি কি ক'রবো। এস, চান করিয়ে দিই। কত রোদুর উঠেছে; তাতে সংসার ভেঙে উঠেছে, আর তুমি ঠায় শুকনো হ'য়ে আছ,—একটু জল গায়ে পড়ে নি। আঃ—আঃ! চান ক'রে বেশ আরাম হ'লো, না? গা মুছিয়ে দিই। এইবার এই চন্দনটুকু পর'। দেখ কেমন চন্দন—আজ ঐ মেয়েটা ঘ'ষেছে। আমি নিজে এমন ঘ'ষতে পারি না,—না? বাঃ! বেশ মানিয়েছে! দিব্যিটা! মালা পর'। এটাও ঐ ললিতার হাতের গাঁথা। আমি এমন সুন্দর মালা গাঁথতে পারি না। বেটা সারা রাতটা ঘুমোয় নি;—নিজেই তোমার পূজোর সব যোগাড় ক'রেছে। চমৎকার মানিয়েছে মালাটা তোমার গলায়! আহা! রূপ যেন আজ শতগুণ হ'য়ে ফুটে বেরুচ্ছে তোমার! আহা-হা! মরি—মরি! রূপের বালাই নিয়ে মরে যাই। এইবার খাও। এ সব আমি নিজে যোগাড় ক'রেছি। যা তুমি খেতে ভালবাসো। সেই কাঁচা কুল—বুনো শশা—ডিংরে কলা—শকরকন্দ। নাও, খাও। হাত গুটিয়ে যে? খাও—হাত বার কর'! ও কি, খাবে না? অভিমান হ'য়েছে? বেলা হ'য়েছে ব'লে রাগ ক'রেছ? না, ছিঃ! রাগ কর্তে নেই! আমি কি ক'রবো বল',—তুমি যে সবার সামনে খাও না। তাই ত' ওদের এখান থেকে সরাতে দেবী হ'য়ে গেল। রাগ ক'রো না; খাও! মাণিক আমার, খাও! ঘাট মান্ছি—খাও! কি পোড়া মা! এমন ক'রে দঙ্কাচ্ছ কেন? শুনবে না? ওগো, তোমার হুঁচী পায়ে পড়ি, খাও! আমার মাথা খাও—খাও!

সহসা নীলমাধবের আবির্ভাব ও গীত ।

খাঘাজ—লোফা ।

কর কি, কর কি, কর কি !

মাথা খেতে ব'লছ আমার তুমি পাগল হ'লে না কি ?

বিশ্বা । এ কি ! কে তুমি ? আমি যে মালা আমার প্রভুর গলায়  
পরিয়েছি, তুমি সে মালা পেলে কোথা থেকে ?—যে রকম  
চন্দন-রেখা আমি এঁকে দিয়েছি ওঁর কপালে, তোমার কপালে  
সে রকম ক'রে কে চন্দন পরিয়ে দিলে ? কে তুমি ছুঁই বালক,  
—দাঁড়িয়েছ ঠিক আমার ঠাকুরের মত নোহন ঠামে,—হাসছ  
সেই চপল হাসি,—কথা কইছ সেই রকম বাঁশীর স্বরে ।

নীলমাধব ।

গীত ।

বাহবা—বাহবা—বাহা রে !

( হাঃ হাঃ ) হাসি পায়, আর দুঃখ ধরে,

এ কথা ক'ব গো কাহারে !

আমি যে তোমার সব—ঐ নীলমাধব ;

চিন্লে না কো আমার—

কারে ব'সতে ব'লছ আহারে ?

বিশ্বা । তুমি মাধব ? নীলমাধব ? হ্যাঁ—হ্যাঁ তুমিই ঠিক বটে ।  
আমি নিত্য অন্তরে বাইরে যে রূপ দেখি, সে তোমারই এই  
ভুবন ভোলান রূপ বটে । তা বেশ ! যদি এসেছ খাও ।  
আমার সামান্য ক্রটিতে এত অভিমান কি ভাল ? খাও ; এই  
তোমার সব সাধের ফল পাকড় । দেখ—দেখ, আমি কত  
আগ্রহ ক'রে সংগ্রহ ক'রেছি দেখ ! নাও—খাও ।

নীলমাধব ।

গীত ।

কন্দ ফল আর খাব না—রাজভোগে মন ট'লেছে ।

এসেছে ইন্দ্রদ্যুম্ন

খাওয়াবে সে পরমায়

যাব আমি অবন্তীপুর—রাজার ডাকে মন গলেছে ॥

বিশ্বা । রাজা ইন্দ্রদ্যুম্ন কখন এলো ?

নীলমাধব ।

গীত ।

কেন ভাঙতে নিজের মাথা, জানাতারে আনলে হেথা ?

রাজার চর সে ব্রাহ্মণ—সেই ব'লেছে রাজাব কথা ॥

বিশ্বা । রাজা তোমার নিয়ে যাবে ? নিষ্ঠুর, তুমি যাবে ? আমায়

ছেড়ে যেতে পারবে ?

নীলমাধব ।

গীত ।

পরজ--একতাল।

হারি পারি পরের কথা—এখন ত' চলে বাই ।

কাছে দূরে যেথার থাকি—আমি বাধা আছি তোমার ঠাই ॥

[ অন্তর্দ্বান ।

বিশ্বা । ওঃ ! ( মূর্ছা )

ললিতার গীত গাহিতে গাহিতে প্রবেশ ।

পিলু—ঠাঁরি ।

কত দূরে গেছ,

কত দূরে আছ,

এখন' এলে না ফিরে ।

কি দোষ দেখিলে, তাইতে ত্যজিলে,

ভাসালে দাসীরে নয়ন নীরে ॥

অচেনা অজানা পথ, ( তুমি ) নূতন পথিক ;

তাইতে তরাসে মরি, ওগো প্রাণাধিক !

ফিরে এস তুমি

প্রিয়তম স্বামী

কাঁদারো না আর অধিনীরে ॥

বিধা । ( মূর্ছান্তে ) কে, ললিতা ? রাক্ষসী, তোর জন্ম আমার  
কি সর্বনাশ হ'য়েছে দেখ । প্রভু আমার সামান্ত অর্থ্য নেয়  
নি,—সামান্ত নৈবেদ্য গ্রহণ করে নি,—আমার দেওয়া ফল মূল  
আর তার মনঃপুত হয় নি । সে যাবে রাজ সকাশে—রাজার  
পূজা নিতে—রাজভোগে তৃপ্ত হ'তে । ওরে পাপীয়সী,—ওরে  
সর্বনাশী, তোর জন্মই আমার এই সর্বনাশ হ'লো ।

ললিতা । সে কি বাবা ! আমি তোমার কি অনিষ্ট ক'রলুম ?

বিধা । ওরে রাক্ষসী, তোর সঙ্গে বিয়ে দিয়ে যাকে আমি আমার  
প্রাণের ধনকে দেখাতে এনেছিলুম, সে চোর—সে ডাকাত ।  
আমার সর্বস্ব লুটে নিতে সে এখানে এসেছিল ; সে আমার  
সর্বস্ব হ'রে নেবার সন্ধান জেনে, এখান থেকে পালিয়েছে ।

ললিতা । সে কি বাবা, তুমি যে বললে—গভীর বন, অঁকা বাঁকা  
পথ,—এর ভিতর থেকে সে একলা কিছুতে বার হ'তে  
পারবে না !

বিধা । পারবে—পারবে ; হতভাগিনী কন্যা আমার ! পারবে । আমি  
নিজে হাতে তার পালাবার পথ প্রস্তুত ক'রে দিয়েছি । আজ  
তোদের সঙ্গে নিয়ে—নব বর-বধুকে সঙ্গে নিয়ে—আমি ঠাকুরের  
কাছে আসছিলুম । তাই তোদের মঙ্গলের জন্ম, সারা পথ

তোদের দিয়ে ধান ছড়াতে ছড়াতে এসেছিলুম। সে ব্রাহ্মণ  
সেই ধানের চিহ্ন ধ'রে এই বন পার হ'য়ে যাবে। হা ভাগা।  
হা ভগবান!

ললিতা। বাবা, বৃথা আর্তিনাদে ফল নেই। তার চেয়ে চল, আমরা  
ক্রম গিয়ে দেখি যদি পথেই তাকে ধরতে পারি। অচেনা পথে  
সে আর কতদূর গেছে বাবা।

বিশ্বা। বটে—বটে। চল্ চল্—তাই চল্। ধরবো—ধরবো—তাকে  
ধরতেই হবে—ফেরাতেই হবে।

[ উভয়ের প্রস্থান।

## দ্বিতীয় গর্ভাঙ্ক।

বালুকাচ্ছাদিত প্রদেশ।

গ্রামবাসিগণের প্রবেশ ও গীত।

জয়জয়ন্তী মিশ্র—একতাল্লা।

স্ত্রীগণ—হায় হায়! কি হ'লো রে!

দেশটা চাপা প'লো রে, বালিতে—শুধু বালিতে!

পুরুষগণ—এলো রুদ্ধ-রূপে সমুদ্র আজ (মোদের) কপালে আগুন জালিতে

স্ত্রীগণ—কবু কবু কবু উড়ছে বালি—দিগ্বিদিক্ সব অন্ধকার!

পুরুষগণ—যাচ্ছে ঢেকে নিমেষ মাঝে বাস্ত ভিটে, দেবাগার!

স্ত্রীগণ—গরু-বাছুর ছেলে-পিলে সাগরে সব গিলে নিলে!

সকলে—আমরা শুধু রইলু প'ড়ে নয়ন বারি ঢালিতে !!

[ প্রস্থান।



বলভদ্রা ও নীলাশ্বরের প্রবেশ ।

বল । কি হতভাগিনীই আমি এ দেশে এসেছিলুম, দাদা ! আমার জন্ম নিরীহ গ্রামবাসীদের কি দারুণ নিগ্রহ ভোগ ক'রতে হ'চ্ছে ।

নীলা । তোমার জন্ম কেন বোন ? সাগরের বালিতে সারা দেশ ডুবে যাচ্ছে ; কাজে কাজেই তারা সব ঘর বাড়ী ছেড়ে অন্ত্র পালিয়ে নিজেদের প্রাণ বাঁচাতে ছুটেছে । এতে তোমার অপরাধ কি তা ত' আমি বুঝে উঠতে পাচ্ছি না ।

বল । আমার জন্মই—এই অভাগিনীর জন্মই বেচারীদের এই সর্বনাশ উপস্থিত হ'য়েছে । দাদা, এতদিন ত' সমুদ্রের বালি এই সব গ্রামবাসীদের কোন অনিশ্চয় করে নি ? আর এ ক' দিনের মধ্যেই বা কেন এমনটা হ'লো ? তুমি বুঝতে পারছ না দাদা, যে সমুদ্র আমার অন্ত্রের এই নীলাচল পর্যন্ত ছুটে এসেছে ! আমার জন্ম পারাবার এমন উন্মাদ—উদ্দান হ'য়ে এসেছে, যে তার লক্ষ্য করবার অবসর মেলে নি—তার গমনে কা'র কি সর্বনাশ হ'চ্ছে ।

নীলা । বটে ? সে আমার শাসন—আমার নিষেধ সব ভুলে গেল এত শীঘ্র । আমি যে তাকে নিমেষে নিখর নিশ্চেষ্ট ক'রে জড়ের মত স্থির ভাবে এক স্থানে আবদ্ধ রাখতে পারি, এ কথা সে একবারও ভাবলে না ?

বল । ভাববার তার অবসর কোথা দাদা ? যে মুগ্ধ, মোহিত—সে যে দিগ্বিদিক্ জ্ঞান শূন্য ! বিশেষতঃ পাপের তাড়নার যার সমস্ত বোধ শক্তি লোপ পেয়েছে—সে কেমন ক'রে বুঝবে, যে বলরূপী তুমি অনন্তদেব একবার তাকে ক্ষমা ক'রেছ,—কিন্তু

বারাস্তরে তার নিস্তার নাই ? সে যেতে আছে—তার লালসা, তার আকাঙ্ক্ষা, তার ইন্দ্রিয়ের তাড়না নিয়ে ।

নীলা । তা হ'লে আমি এখুনি তাকে এই হলাঘাতে বুঝিয়ে দিয়ে আসি বোন, সে যে দিকে চ'লেছে, তা শুধু দ্রাস্ত পথ নয়—তার সর্বনাশের সুগম পস্থা । আমি এই লাঙ্গলে খুঁড়ে সনস্ত বালুরাশি দ্বারা সাগর-গর্ভ বুজিয়ে দিয়ে, এক সমতল ক্ষেত্র প্রস্তুত ক'রে জগৎ হ'তে সমুদ্রের নাম—চিহ্ন মাত্র লোপ ক'রে দিয়ে আসি ।

লীলাধরের প্রবেশ ।

নীলা । কি—কি—ব্যাপার কি ?

বল । এই যে দাদা !—দাদা, দাদা, আমার এই সংশয় ভঞ্জন কর দাদা । একের অপরাধে, একজনের অবিস্ময়কারিতার জন্য অপরে যন্ত্রণা ভোগ করে কেন ?

নীলা । একজন গাছ পুতলে, আর পাঁচ জন তার ফল খায় কেন ? একজন বৃক্ষ-প্রতিষ্ঠা ক'রলে, জলাশয় খনন ক'রলে হাজার হাজার লোক তার ছাওয়ায় জুড়ায়, জলে শীতল হয় কেন ? এ সংসারের নিয়ম হ'চ্ছে—একের সঙ্গে অপরের সম্বন্ধ অঙ্গাঙ্গী-ভাবে বর্তমান । কেউ—কাউকেও ছেড়ে নাই । হাতে লাগলে চোকে জল পড়ে—কান টানলে মাথা আসে । তাই হেথা একজনের সুখে আর দশ জন সুখী হয়, একের দুঃখে অন্তের বুকে বাজে । তা দিদি, আজ হঠাৎ এত বড় দার্শনিক প্রশ্নটা ক'রে ব'সলি কেন, বল্ দেখি ?

নীলা । সমুদ্রের বালি সারা দেশটা ডুবিয়ে দিলে, সব বাড়ী খর পথ

ঘাট মঠ মন্দির বালিতে ঢাকা প'ড়ে গেছে। ওর ধারণা, সমুদ্র ওকে আয়ত্ব ক'রতে না পেরে, এই নিষ্ঠুরতা ক'রে বেড়াচ্ছে। তাই ও জানতে চায়,—ওর জন্ত নিরীহ গ্রামবাসীদের এ নির্যাতন ভোগ কেন ?

লীলা। না রে না! তোর জন্ত সমুদ্র এমনটা ক'রবে কেন ?  
আমার জন্তই তার এই মুখ'তা—এই নিশ্চয়তা।

বল। কি রকম ?

লীলা। সে চায়—আমার নীলনাথ মূর্তি, যা নীলাচলে লুকান' আছে, তাকে আবৃত ক'রে চির তরে লোক চক্ষুর বাইরে রাখতে। যমরাজের সঙ্গে তার এই পরামর্শ ঠিক হ'য়েছে।

নীলাম্বু. বড় আশ্চর্য্য ত' ! ব্যাপারটা কি আমার খুলে বল' ত' ভাই। আমার বড় কৌতূহল হ'চ্ছে।

লীলা। আমার সেই কৈবল্যপ্রদ মূর্তি যে দর্শন ক'রবে, সেই মুক্ত হ'য়ে আমার সাবুজ্য লাভ ক'রবে। এই ভয়ে যমরাজ আমার সেই মূর্তি লোক লোচনের অস্তরালে রাখতে সমুদ্রকে অহুরোধ ক'রেছে,—আর সমুদ্র সেই অহুরোধ রক্ষা করতে তার সকল শক্তি দিয়ে এই প্রদেশ বালুকা মধ্যে লুপ্ত রাখতে ব্যস্ত হ'য়েছে।

নীলাম্বু. তুমি কি এখন তোমার সেই নীলনাথ মূর্তি জগৎবাসীর সমক্ষে বার ক'রতে চাও ?

লীলা। ইচ্ছা ত' আছে। রাজা ইন্দ্রদায় দেখা দিয়েছে। ভক্ত ব্যগ্র হ'য়ে, ব্যাকুল হ'রে ফিরছে—আর কি লুকিয়ে থাকা ভাল।

নীলাম্বু. ইচ্ছানয়, তুমি ইচ্ছা ক'রেছ আত্মপ্রকাশ ক'রতে, আর মূঢ়তা ত' কম নয় যমরাজের, সে তোমার ইচ্ছার গতিরোধ ক'রতে চায়।

বল। দাদা, আমি একটু ধর্মরাজের হ'য়ে ওকালতি করি। আমার এই সংশয়টা ঘুচিয়ে দাও ত' দেখি।

নীলা। আবার কি সংশয় রে? তোর সংশয়ের চাপে যে আজ আমি ভারি হ'য়ে উঠছি।

বল। যমরাজকে তুমিই পদ দিয়েছ,—সে তোমার সৃষ্টির শৃঙ্খলা বজায় রাখবে। পাপের শাস্তি বিধান—তার তোমারই দেওয়া কর্তব্য। এখন যদি নীলমাধব মূর্তিতে তুমি জগৎ সমক্ষে প্রকট হও, তো সে বেচারী যার কোথা? সবাই অবলীলাক্রমে তোমার দর্শন ক'রে মোক্ষ্য পাক; আর সকলের হাস্তস্পর্শ হ'য়ে, তোমার প্রদত্ত ধর্মরাজ নাম নিয়ে সে ধুয়ে থাক! !

নীলা। দূর পাগলী! আমার সে মূর্তি কি সবার দেখবার ভাগ্য হবে? যে সত্যই আকুল আগ্রহে আমায় দেখতে চাইবে, তার ত' মুক্তি নিশ্চিত। কিন্তু সে ব্যাকুলতা—সে আকুলতা আছে ক' জনার বোন? আমি যে নিয়ত সকলকেই ডাকছি—“ওরে আর আর”! তা কে শুনছে? ক' জন আমার ডাকে কাণ দিচ্ছে।

বল। কেন কাণ দেয় না, দাদা? তুমিই ত' সবাইকে নানা মতে ভুলিয়ে রেখে—তোমার সে ডাক শুন্তে দাও না,—শোনবার অবসর দাও না। জীব যখন মাতৃগর্ভে থাকে, তখন সে তোমা বই জানে না; ভূমিষ্ঠ হ'য়েও তোমার কথাই তার মনে থাকে—আর কিছু না। কিন্তু ক্রমশঃ তার সে মন, কেন তোমার দিক থেকে ফিরে অন্য দিকে যার দাদা?

নীলা। দেখ, বোন, মা তার ছেলেকে দেখে, অননুমনা হ'য়ে তার ভাবনা ভাবে ততদিন, যতদিন ছেলে সেই মা ভিন্ন অন্য কিছু

না জানে । ছেলেকে কিছু বলতে হয় না । শুধু “মা” বলেই হ’লো । মা অমনি সেই ডাক শুনে বোধে তার কি আবশ্যক । তার ক্ষিদে পেলে খাওয়ায়—শীত পেলে বস্ত্র দেয়—গরম বোধ হ’লে বাতাস করে—ঘুম পেলে নিজের স্নেহ-শীতল বক্ষে ঘুম পাড়ায় । কিন্তু যখন সেই শিশু নিজের পায়ে ভর দিয়ে দাঁড়াতে শেখে, উপার্জন ক’রে নিজের ভাবনা নিজে ভাবে, তখন মা-ও তত—তত দূরে স’রে যায়, এটা দেখেছিস্ ত ? ওরে, আমিও এই বিশ্ব-ব্রহ্মাণ্ডের সেই “মা” । আমার যে চায়—আমি তার কাছে কাছে ফিরি । যে চায় না—সে দেখতেও পায় না ।

### গীত

কানাড়া—একতাল্লা ।

আমি আছি যে সব ঠাই ।

চোখ থাকতে যে জন কাণা, সেই ত বলে “নাই নাই ।”

পিতার কোড়ে, মাতার স্তনে,

প্রেয়সীর প্রেম-আলিঙ্গনে,

শিশুর মধুর সরল হাস্তে থাকি আমি সর্বদাই ॥

আছি যোগীর যোগে, ধ্যানীর ধ্যানে,

ভ্যাগীর ত্যাগে, জ্ঞানীর জ্ঞানে,

ভক্তের ভক্তি নিবেদনে আমি যে মেতে বাই ।

সরল প্রাণের অধীর ডাকে,

শ্রবণ কি মোর বধির থাকে ?

ছুটে গিয়ে কোলে নিয়ে নয়নবারি তার মুছাই ॥

নীলাম্বর আশ্চর্য্য ! সব ভুলিয়ে দেয়—সব গুলিয়ে দেয় । আমি ওর  
ভাই, তুই ওর ভগ্নী, এ সব কথা যেন ফাঁকা ফাঁকা ঠেকে ।  
বল । দাদা, ঐ সমুদ্র আসছে । কি ভয়ঙ্কর আকৃতি ! কি হৃদ-  
কম্পিতকারী মূর্তি ! আমি বিহ্বল আড়ষ্ট হ'য়ে যাচ্ছি, দাদা ।

সমুদ্রের প্রবেশ ।

সমুদ্র । একি ! কুল কুড়তে গিয়ে মালা মিলে গেল যে । সাপ ধ'রতে  
গিয়ে মানিক পেয়ে গেলুম যে । তুমি—তুমি এখানে—এই  
ধ্বংসাবশিষ্ট বালুকাচ্ছাদিত—পরিভ্যক্ত পর্বত মূলে বিরাজ  
ক'রছ ;—এতো আমি কল্পনাও করি নি—স্বপ্নেও ভাবি নি !

নীলাম্বর । সলাজ ব্যক্তি কোন কর্মের জন্য একবার অপমানিত হ'লে,  
জীবনে আর সে কাজ ক'রতে যায় না । কিন্তু নিল্লঞ্জের সে  
প্রকৃতি নয় । তাই সে তোমার মত, অপমানকে ঙ্গের ভূষণ  
মনে করে । মূর্খ, সে দিনের লাঞ্ছনা তুমি এত শীঘ্র ভুললে  
কেমন ক'রে ?

সমুদ্র । আমি মোহনুষ্ক, রূপোন্মাদ সত্য । কিন্তু আমি কাপুরুষ নই,  
বীর । আমি তোমার সে দিনের অমৃত বীরত্ব বিস্মৃত হই নি ।  
আমার অন্তরের অন্তঃস্থলে, তোমার সে বিচিত্র বীর্য্যবতার কথা  
গাঁথা হ'য়ে আছে । তাই আমি আজ তোমাদের অকস্মাৎ,  
সম্পূর্ণ অপ্রত্যাশিত ভাবে সাক্ষাৎ পেয়ে, নিজেকে ভাগ্যবান  
ব'লে বোধ ক'রছি । ভদ্র, ভুলে যাও আমার রূঢ় আচরণ  
তোমাদের প্রতি । তোমার ভগ্নীর উপর আমি যে ব্যবহার  
ক'রেছি, সে জন্য আমি অনুতপ্ত । সুন্দরি, আমার আজ মার্জনা  
ক'রতে হবে । আমার নিকরুদ্বিতা—আমার অনুষ্ঠিত অভব্য  
আচরণ সব—সব মার্জনা ক'রতে হবে ।

নীলা । বাঃ ! চমৎকার !

বল । এ কি ! সমুদ্র গর্জনে এ কি নিৰ্ম্মলিণীর কুলুধ্বনি, সিংহের  
ছঙ্কারে এ কি পিক কাকলি, মেঘমল্লৈ এ কি শান্তির সঙ্গীত !  
মহাশয়, আপনার কর্ণস্বর করুণ—আপনার বাক্যবিন্যাস কোমল  
—কিন্তু আপনার মূর্তি এমন উগ্র—এত ভীতিপ্রদ কেন ? আমি  
আপনার আচরণের সঙ্গে আপনার আকৃতির সামঞ্জস্য ক'রতে  
না পেরে, বিষয় ও বিভীষিকায় আচ্ছন্ন হ'ছি ।

( বলভদ্রার নীলাস্বর ও লীলাধরের মধ্যে অবস্থান )

সমুদ্র । সুন্দরি, আমি উন্মাদ—রূপোন্মাদ । তোমার ঐ অপরূপ রূপ  
দেখে, সকল জ্ঞান হারিয়ে ফেলেছি । আমার ভিতর যে  
অসামঞ্জস্য—যে অসমতা লক্ষিত হবে, সে সবও তোমায় ক্ষমা  
ক'রতে হবে । আর—যে ঠামে—যে ভাবে দাঁড়িয়েছ তুমি, এই  
দিব্য মোহন রূপে—আমার মানস নয়নে নিত্য বিরাজ ক'রতে  
হবে তোমাকে । এই তুমি বিশ্বধাত্রীরূপা বলভদ্রা মধ্যস্থলে,  
দক্ষিণে তোমার বলদৃপ্ত অনন্ত শক্তিশালী অনন্তরূপ এই নীলাস্বর,  
বামে তোমার ভুবন ভোলা কাল বরণ কালাচাঁদ ! এই রূপ—এই  
ঠাম—এই অবস্থিতি । বিশ্ব বিমোহন শোভা ! জগদানন্দ মূর্তি !

লীলা । জলধি, তোমার বাহা অপূর্ণ থাকবে না । তুমি কাম-কামনা-  
শূন্য অন্তরে—শুধু সুষমার—শুধু সৌন্দর্যের সেবা করবার জন্য  
আমার ভগ্নীর রূপে আকৃষ্ট হয়েছিলে । এখনও তুমি সেই  
সৌন্দর্যের পূজার জন্য লালারিত । তাই আমি ব'লছি—আমরা  
দুই ভাই, আমাদের এই বিপুল শোভাময়ী, সুন্দরী ভগ্নীকে নিয়ে  
তোমার তীরে চিরদিন বিরাজ ক'রবো । তুমি যখন আমাদের  
সাক্ষাৎ চাইবে—তখনই দেখা পাবে । কেবল তোমার কর্ণ

স্বর যেন আমার কোমল-প্রাণা বোন্টীর কাণে প্রবেশ ক'রে,  
তার প্রাণে আতঙ্কের সঞ্চার না করে ।

সমুদ্র । অসীম করুণাসিন্ধো ! কে তুমি সত্যসন্ধ কিশোর ! আমার  
প্রাণের সমস্ত জালা—সব বেদনা এক কথায় গুছিয়ে দিলে ?  
আমি প্রতিজ্ঞা ক'রছি, আমার কণ্ঠস্বর তোমাদের আর কোন  
দিন শোনবো না ।

নীলা । উত্তম । তবে যাও বারীন্দ্র ! এখন তুমি স্বস্থানে অবস্থান কর'  
গে । অদূর ভবিষ্যতে আমি তোমার সাহায্য প্রার্থী হব । তুমি  
তখন আমার সহায় হ'য়ে ।

সমুদ্র । যথা আজ্ঞা ।

[ সমুদ্রের প্রস্থান ।

নীলা । চল্ বোন্—আমার এক দিদি আছে, তার সঙ্গে তোমার  
আলাপ ক'রে দিই । দাদা, তুমি কি সঙ্গে যাবে ?

নীলা ।—চলো ।

[ সকলের প্রস্থান ।

## তৃতীয় গর্ভাঙ্ক ।

রাজ-অস্তঃপুর ।

জগাপাগলা, ঋত্বিকগণ ও ইন্দ্রদ্যুম্ন ।

১ম ঋ । মহারাজ ! ধন্য তুমি । তোমার পুণ্য প্রভাবে, তোমার  
মহাযজ্ঞের ঋত্বিক আমরা, আমরাও ধন্য—অধিক কি তোমার  
ন্যায় অদ্ভুতকর্মা ভক্তিমান সাধককে অঙ্কে ধারণ ক'রে স্বয়ং  
ধরণী ধন্যা হ'য়েছেন ।



২য় ঋ। রাজন্! তোমার আরকু শত অশ্বমেধ যজ্ঞ—বার নান শুনে  
লোক বিশ্বয়ে অবাক হয়—সেই সুদুসাধ্য যজ্ঞ আজ সম্পূর্ণ  
হ'লো। এই দ্বাদশবর্ষ-ব্যাপী অবিশ্রান্ত আছতি ভক্ৰণের পর,  
হতাশন বোধ হয় আবার মন্দাগ্নি দূর করবার জন্য দ্বিতীয় খাণ্ডব  
বনের সন্ধান ক'রবেন। তোমার এ মহাযজ্ঞ, তোমায় যাবচ্ছনী  
দিবাকর জগদ্বাসীর স্মরণ পথে জাগরুক রাখবে। তুমি ধন্য!

৩য় ঋ। হে মুক্তহস্ত উদারদাতা, তোমার বিপুল দান ধর্মের কথা  
জগতে চিরকাল রূপকথার ন্যায় অদ্ভুত মনে হবে। তুমি কি  
অসাধারণ দানী, তা বর্ণনায় নিরূপিত হয় না। এই ত্রিলোক-  
দুর্লভ যজ্ঞাঙ্কণের সঙ্গে সঙ্গে তুমি যে ধন, রত্ন, ভূমি, শস্য  
অকাতরে বিতরণ ক'রেছ, তার ইয়ত্তা হয় না। তোমার প্রদত্ত  
ধন সম্পদে এ রাজ্য দারিদ্র-দোষ শূন্য হ'য়েছে। তোমার বশ,  
তোমার খ্যাতি, তোমার কীর্ত্তি-কথা আজ সহস্র কণ্ঠে ধ্বনিত।

৩র্থ ঋ। মহাভাগ, তুমি যে সকল গাভী দান ক'রেছ, গণনায় তাদের  
সংখ্যা নির্দেশ করা যায় না। তোমার প্রদত্ত পয়স্বিনী,  
তেজস্বিনী, সুলক্ষণা গাভীর প্রভাবে বনবাসী তপস্বীর যেমন  
কদাচ হবির অভাব হবে না, তেমনি সংসার আশ্রম বিলাসীর  
পঞ্চগব্যে দেবার্চনা ও নিজ নিজ ভোজ্য-ভোজ্যের অপ্রতুল  
রবে না। তুমি যে কত গাভী দান ক'রেছ, তার প্রমাণ ঐ  
সরোবর—যা অনন্তকাল ইন্দ্রদ্যুম্ন সরোবর নামে অভিহিত হ'য়ে  
লোকের বিশ্বয় উৎপাদন ক'রবে। শুধু গো-পদাঘাতে ঐ  
সরোবরের সৃষ্টিকা খোদিত হ'য়েছে, আর তাদের উৎসর্গের  
জন্য নিক্রিপ্ত কুশাগ্র বারিতে সেইস্থান জল পূর্ণ হ'য়ে, ঐ সুবৃহৎ  
হ্রদের সৃষ্টি ক'রেছে। কোন কবি-কল্পনাও এমন অদ্ভুত

জলাশয় উদয় হয় নি। আশীর্বাদ করি, অমৃত পানে দেবগণ  
যে রূপ আনন্দিত হন, তোমার নামিত ঐ সরোবরের বারি-পানে  
মানবগণ সেইরূপ আনন্দিত হ'য়ে অনন্ত-কাল তোমার কীর্তি-  
কথা ঘোষণা করুক।

জগা। মহারাজ, পালাও,—ভাল চাও ত' পালাও। এরা তোমার  
শেষ না ক'রে ছাড়বে না। বাবা, এমন ক'রে লোকের মাথা  
খেতে হয় ?

ইন্দ্র। না ভাই না। আমি কিছু বিচঞ্চল হই নি।

জগা। ওহে, তুমি ত' তুমি—খোসামুদী শুন্লে স্বয়ং নারায়ণ পর্যন্ত  
গ'লে জল হ'য়ে বান। জান' না, দেবতাদের মুখে হরিনাম শুনে,  
অর্থাৎ নিজের গুণ ব্যাখ্যা শুনে, ঠাকুর গ'লে জল হ'য়ে গেছিলেন।  
—তাই সুরধুনি গঙ্গার উদ্ভব।

ইন্দ্র। কি বে তুমি বল' ?

জগা। মাছুবের কাছে সব চেয়ে উপাদেয় কি, জান' ? একটা নিজের  
প্রশংসা, আর একটা পরের কুৎসা। ভারি মোতামী—বড়  
মুখরোচক। রাজা, তুমি ও দু'টা থেকে তফাতে থাক'। দোহাই  
তোমাদের ঠাকুররা,—তোমরা এ ভাবে আর রাজাটাকে  
বিগড়ে দিবে ওর মাথাটা খারাপ ক'রো না।

১ম ঋ। মহারাজ, আমরা চিরদিন তোমার মঙ্গলাকাজী। আমরা  
যে কথা ব'লেছি, তাতে তোমার প্রশংসাবাদ আছে সত্য,—  
কিন্তু সে সব, মিথ্যা বা চাটুকারিতা নয়।

২য় ঋ। ব্রাহ্মণ চিরদিন আশীর্বাদ ক'রতে আসে। আমরা তোমার  
যজ্ঞান্তে তোমার হৃষ্ট মনে আশীর্বাদ ক'রেছি। তার জন্ত এ  
অপবাদ কেন, রাজা ?

জগা । প্রশংসাবাদ—আশীর্বাদ—ধন্যবাদ ! বাপ্ ! কিছু বাদ যায় নি ।  
তাতিও না ঠাকুর, মিনতি ক'রছি তাতিও না । মাটি হ'য়ে  
যাবে । যে ভাবে তোমরা হরেক রকম বাদের আবাদ শুরু  
ক'রেছ, আমরা ভাবাকালু রাজার অস্তরে, তাতে বেচারী এখনি  
অহঙ্কারে ডগমগ হ'য়ে না মাটি হ'য়ে যায় ।

ইন্দ্র । তুমি জান' না—এঁরা সকলে আমরা মঙ্গলাকাজী সুহৃদ ।  
তাই তুমি এই সব আ'বোল তা'বোল ব'লে—এঁদের মর্যাদাহানি  
ক'রতে উদ্বৃত্ত হ'রেছ ।

জগা । বটে ! কিন্তু দেখ' মহারাজ, মানুষের মঙ্গলকামী সুহৃদের দ্বারা  
বত ক্ষতি—যত সর্বনাশ হয়, শত্রুর দ্বারা তত হয় না । শত্রুর  
গুণ কি জান' ? সে দোষ ধ'রে দেয় ; আর মিত্র, বন্ধু, সুহৃদ,  
সখা তারা দোষটা ঢেকে রাখতে চায় ।

১ম ঋ । তুমি যথার্থ বলেছ ভদ্র ! তোমার বাক্যাবলী উন্মাদের  
প্রলাপ বলে উপেক্ষা করা, নিজেরই উন্নততার পরিচায়ক ।  
তোমার সারগর্ভ বচন আমার চক্ষু ফুটিয়ে দিয়েছে । রাজন্,  
আমরা সত্যই তোমার গুণগান ক'রে, তোমার ধর্মসের পথ  
প্রস্তুত ক'রছিলাম ।

ইন্দ্র । তেজঃপুঞ্জ বিজগণ, আপনারা যে এই বাতুলের কথার ক্রুদ্ধ  
হবেন না, এ আমি জানুতাম । কিন্তু আপনার হৃদয়ের এই  
উদারতার তুলনা নাই । আপনারা যে হাসি মুখে সব বিরুদ্ধ-  
বচন, নিন্দা, কুৎসা সহ্য ক'রলেন, সে মহানুভবতা কেবল  
ব্রাহ্মণেই শোভা পায় ।

জগা । ষাক্ । তুমি আবার ওদের খোসামোদ ক'রে ফুলিয়ে দিও  
না । ওরা যা ক'রেছে, তা ওদের উচিত কার্য । তা ক'রে

কোন বশ নেই,—না ক'রলেই অপবশ ছিল। যেমন তুমি  
বা ক'রেছ তাতে তোমার প্রশংসা করবার কিছু নেই—না  
ক'রলে নিন্দা হ'তো। কাজ—কাজ! কর্মের সংসারে কাজ  
নিয়ে সবাইকেই মেতে থাকতে হবে—নইলেই সব মাটি!

✓ ইন্দ্র। আমার এখন কি কাজ আর আছে, বন্ধু? যজ্ঞারম্ভের পর  
হ'তে এই দীর্ঘকাল তার সমাপ্তির জন্তু কার্য্য ক'রেছি। এখন  
সে যজ্ঞ সমাপ্ত হ'য়েছে। আর কি ক'রবো আমি বল'।

জগা। বল' না গো ঠাকুররা! রাজা যে কোন কাজ খুঁজে পাচ্ছে  
না। একটা কাজের কথা বল'।

### শুণ্ডিচার প্রবেশ।

শুণ্ডিচা। মহান্ কার্য্য তোমার সম্মুখে উপস্থিত মহারাজ! আর  
কাজের জন্তু চিন্তা ক'রতে হবে না। আমার প্রতি দিবসের  
চিন্তা—প্রতি রাত্রে স্বপ্নকে চাক্ষুষ দেখে, আমার পুত্র বিদ্যাপতি  
ফিরেছে। রাজন্, এবার শুভদিন শুভক্ষণ দর্শনে সেই নীলমণি-  
ময়-ভক্ত নীলমাদবকে সসন্মানে এনে তোমার রাজ্যে প্রতিষ্ঠিত  
করবার জন্তু শুভযাত্রা কর।

✓ ইন্দ্র। বিদ্যাপতি—বিদ্যাপতি? আমার রাজ্য হ'তে নির্বাসিত—  
প্রাণদণ্ডে দণ্ডিত—ভক্তবীর বিদ্যাপতি ফিরেছে?

### বিদ্যাপতির প্রবেশ।

এস'—এস' দ্বিজপুত্র—এস' সাধকবর—আমার বাহর বন্ধনে  
এস' ; আমার ভবিষ্যত বন্ধের মাঝে এস'। ( আলিঙ্গন ) তোমার  
আগমনে আমার হৃদয় যে আনন্দে নেচে উঠছে,—চল' আনন্দের

অগ্রদূত, জগন্নাথসীর হৃদয়ে সে আনন্দ বিতরণ ক'রবে চল' ।  
নীলমাধবকে জগৎ সমক্ষে উপস্থাপিত ক'রতে, চল' ব্রাহ্মণ,  
আমায় নিয়ে চল' সেই নীলাচলে—যেখানে দেখেছ তুমি  
বিশ্বের সকল শোভা,—সকল সৌন্দর্য—সকল কাঙ্ক্ষিত নিদান  
সেই শ্রীকান্তের নীলকান্ত মূর্তি !

বিজ্ঞা । মহারাজ, নীলাচলে যাবেন আপনি ? সে বে বহু দূরে ! নানা  
বিপদসঙ্কুল পথের পারে ! সেথা ত' কুম্ভমাস্কৃত রাজপথ নাই  
—নগরের ব্যস্ত কোলাহল নাই—বিপুল জন প্রবাহের বৈচিত্র  
নাই ! সেথায় আপনার মত রাজশ্রী-সম্পন্ন, সুখ-পালিত ব্যক্তির  
যাওয়া ত' সুবিধাজনক নয় । সেথা আছে শুধু সারল্যের  
অনাড়ম্বর—দীনতার নিরহঙ্কার—বিশ্বাসের ব্যাকুলতা—সত্যের  
মুক্ত-সৌন্দর্য । মহারাজ, সে এমন স্থান—যেখানে গেলে উচ্চ  
নীচ বিচার থাকে না—ধনী নিধনের পার্থক্য থাকে না—  
জাত্যাভিমानी ব্রাহ্মণ হেলায় শবরীর পানি গ্রহণ করে ।  
পারবেন কি আপনি সেখানে যেতে ? সেখানে হয় ত' আপনার  
রাজমুকুট আতপ নিবারণের উপায় মাত্র ব'লে গণ্য হবে—  
রাজদণ্ড শিশুর ক্রীড়নক মধ্যে ধার্য হবে—রাজৈশ্বর্য লোকের  
বিশ্বয় উৎপাদন ক'রলেও, শ্রদ্ধা জন্মাতে পারবে না ।

ইন্দ্র । খুব পারব' ব্রাহ্মণ,—নিশ্চয় পারব । কেন পারব' না ? আমি  
কি কেবল ঐশ্বর্যের মোহে, বিভবের বৈভবে বিভোর  
থাকবার জন্য এই যত্নে গড়া সোণার শিকল প'রে থাকব ? না  
না; বিজ্ঞপুত্র । আমি যাব—নিরহঙ্কার—নির্ভীক—নিঃসঙ্গ আমি  
যাব । তুমি শুধু রূপা ক'রে আমার পথ প্রদর্শক হও । আমার  
রাজ্য, ঐশ্বর্য, সম্পদ—আমার মান, মর্যাদা, প্রতিষ্ঠা—আমার

সুখ, স্বাচ্ছন্দ, সমস্তোগ—সমস্ত রইলো এখানে প'ড়ে। আমি সকল ফেলে, সব ছেড়ে যাবার জন্য লালায়িত। চল—চল তুমি ব্রাহ্মণ, আমায় সঙ্গে ক'রে ল'য়ে যাবে চল।

জগা। সাবাস! এই তো চাই! যাও—যাও বেরিয়ে পড়, শ্রীহরি স্মরণ ক'রে বেরিয়ে পড়'। পেছনে দেখ' না। পেছ ফিরলেই অন্ধকার! এগিরে যাও—সামনে আলো দেখা যাচ্ছে; ঐ আলো ধ'রে চ'লে যাও।

✓ গুণ্ডিচা। মহারাজ, ব্রাহ্মণ পরিশ্রান্ত। কত দীর্ঘকাল পরে, সে যখন তার সাধনার সিদ্ধ হ'য়ে ফিরতে পেরেছে,—তখন রাজন্, কিছু বিশ্রামের অবসর তাকে দাও। সে তার আকাজ্জিত জন্মভূমিতে ফিরে এসেছে; তাকে দু'দিন সেথা ক্লাস্তি দূর করিতে দাও। এই মাতার স্নেহাতুর বক্ষে, আমার পুত্রকে দু'দণ্ড শান্ত হ'তে দাও। এত অরা, এত ব্যস্ততার আবশ্যকতা কি, প্রভু?

✓ জগা। ওরে বাবা! দেরি ক'রলেই সব মাটি। “গয়াংগচ্ছ,” “হচ্ছে হবে” ক'রে কি ভগবানের আরাধনার ফুরসুৎ মেলে? ধোপানী বলে, “বেলা গেল, বাসনার আগুন দাও”। তাই শুনে যে কুবেরের ঐশ্বর্য, প্রাণাধিক-প্রিয় আত্মীয়বর্গ, নিজের ঐহিক সকল সুখে জলাঞ্জলি দিয়ে, সমস্ত বাসনার আগুন দিতে পারে— সেই না তাঁর দর্শন পাবার, কৃপা পাবার অধিকারী হয়! অত ভাবে চিন্তে—হিসেব খতিয়ে সংসার করা হয়, সাধনা করা হয় না। পাজীতে নব বস্ত্র পরিধানের দিন আছে, জীর্ণ-বস্ত্র ত্যাগের দিন নেই। বাধন প'রতে শুভদিন দেখার দরকার—খুলতে নয়।

✓ গুণ্ডিচা। বেশ! তবে যাও মহারাজ, আর বিলম্ব ক'রে কাল হরণের

প্রয়োজন নাই। আর পুত্র আমার, বৎস আমার, প্রাণাধিক আমার, তোমার ব্রাহ্মণত্বকে আমার মাতৃত্ব আজ ছাপিয়ে উঠেছে। আজ আমি তোমায় ভূদেব ব'লে প্রণাম না ক'রে, সম্মান ব'লে বুকে নিতে ব্যগ্র। কিন্তু ওদের যুক্তির জাল— আগ্রহের উন্মাদনা আমাদের মধ্যে ব্যবধান রচনা ক'রে, দূরে দূরে রাখতে চায়। তবে ভাই হোক। ওদের ব্যাকুলতা,

ওদের ব্যস্ততা আজ ওদের বাসনা পূরণের পথ সুগম করুক। ওদের অভীষ্ট তোমার চেষ্টায়—তোমার বত্রে—তোমার রূপায় সম্বর সিদ্ধ হোক। যাও মহারাজ, যাও। আর বিলম্ব ক'রো না। আমার হৃদয়ের সকল আবেগ—সব শুকমার বৃত্তি জোর ক'রে চেপে রেখেছি। তুমি বিলম্ব ক'রলে হয় ত' তারা আর আমার বাধা নানবে না। হয় ত' তখন নিগড় হ'য়ে তোমার পাশে জড়িয়ে থাকবে। যাও! আমি বহু কষ্টে চক্ষু অশ্রু শূন্য রেখেছি—অসংখ্য দীর্ঘশ্বাসকে বন্ধে লুকিয়ে রেখেছি। আর বিলম্ব ক'রে, তাদের তোমার পথের কণ্টক হ'তে ডেকে এনো না।

ঋত্বিকগণ। জয় হোক মহারাজী! ধন্য তুমি মা জননী।

জগা। আর কি মহারাজ, এইবার রওনা হও।

ইন্দ্র। এস ব্রাহ্মণ, আমার হাত ছুঁখানি ধ'রে, আমায় নিয়ে যাবে চল'। আমি তোমার অনুসরণ ক'রে ধল হই।

বিদ্যা। আশুন।

[ ইন্দ্রদ্রব্য ও বিদ্যাপতির প্রস্থান। ]

গুণ্ডিচা। সূর্য্য অস্ত গেছে—জগৎ অন্ধকারে ঢেকে থাক !

জগা। আক্ষেপ ক'রো না মা। দুঃখ কিসের? মহারাজ গেলেন

জগৎপতির দর্শনে—জগন্নাথকে ধ'রতে । তুমি মা, তাঁর সহায় হ'য়ে, প্রকৃত সহধর্মিনীর কার্য্য কর ।

শুণ্ডিচা । কি ক'রবো আমি বাবা ?

জগা । ঠাকুর এসে ব'সবে কোথা ? থাকবে কোথা ? তার ব্যবস্থা কর তুমি । দেখ, এই যে শতাব্দে যজ্ঞ ক'রলেন মহারাজ—এই যজ্ঞের জন্য লক্ষ শালগ্রাম সংগ্রহ ক'রতে হ'য়েছিল তাঁকে । তুমি সেই সব শালগ্রাম মূর্ত্তি একত্রিত ক'রে এক বেদী রচনা কর—সেইখানে এসে প্রভু আমার ব'সবেন ।

শুণ্ডিচা । কেন, রাজ-ভাণ্ডারে মণি রত্নের ত' অভাব নেই । এক রত্ন-সিংহাসন নিশ্চয় করালে কি হয় ।

জগা । আর লক্ষ শালগ্রাম দর্শন করা কি সোজা ? যে আমার ঠাকুরকে দেখবার সুযোগ পাবে, তার ভাগ্যে লক্ষ শালগ্রাম দর্শনও হ'য়ে যাবে । আর “রত্ন রত্ন” ক'রে যদি এত উতলাই হ'য়ে থাক, তা হ'লে বাছা, ঐ বেদীরই নাম দিও—“রত্নবেদী ।” সকল রতনের সেরা রতন—আমার নীলরতন ব'সবেন তার উপর ।

১ম ঋ । উত্তম যুক্তি—চমৎকার ব্যবস্থা ।

২য় ঋ । এ অপূর্ব বেদী জগতে লোকের বিশ্বয় উৎপাদন ক'রবে নিশ্চয় ।

জগা । আর দেখ', একটা মন্দির তৈয়ারী করাও ।

শুণ্ডিচা । মন্দির ! কি মন্দির করাব আমি, বাবা ? এই বিশাল ভূমণ্ডল যার চরণ, অস্তরীক্ষ যার নাভী, দশদিক্ যার কর্ণ, চন্দ্র সূর্য্য যার-মুগল নয়ন, স্বর্গলোক যার মস্তক, সেই ত্রিলোকব্যাপী পরমেশ্বর পুরুষোত্তমের বাসযোগ্য মন্দির নির্মাণ করাতে কি সক্ষম হ'ব' বাবা !



জগা। পারবে মা, তুমিই পারবে। সমুদ্রতীর—যেখানে ধরণী সাগরকে আলিঙ্গন ক'রছে, সাগর আকাশকে চুম্বন ক'রছে, সেই স্থানে এমন এক দিব্য আয়তন গঠন করাও—যা উর্ধ্বে আকাশ ভেদ ক'রে মাথা তুলে দাঁড়াবে, যার শীর্ষের আন্দোলিত ধ্বজা বহু দূর হ'তে দেখে, পাপী-তাপী-ব্যথিত-পতিতের প্রাণে আশার সঞ্চার হবে, ঐ—ঐখানে আমার মুক্তির উপায়—উদ্ধারের নিদান বিরাজ ক'রছে।

[ বলিতে বলিতে প্রশ্নান।

শুভিচা। বাবা—বাবা, কোথায় যাও! কোথায় যাও! আমার বিধান দাও—যুক্তি দাও। দেউল নির্মাণের পরামর্শ না দিয়ে কোথায় যাও।

[ শুভিচার প্রশ্নান।

ঋদ্ধিকগণ। বিমনা হ'রে মহারাণী ছুটলেন। চল' দেখা যাক—কি হ'তে কি হয়।

[ সকলের প্রশ্নান।

## চতুর্থ গর্ভাঙ্ক ।

উৎসবচন্দ্রের বাটী ।

গুড়ুক টানিতে টানিতে উৎসবচন্দ্রের প্রবেশ ।

গীত

দেশ মিশ্র—তাল ফেব্বতা ।

তোমায় চিন্তে পারে কে, ও আমার সাধের গুড়ুক !

তোমার শুভ্র জয়-পতাকা ধোঁয়ারূপে সদাই উড়ুক ॥

ব্যথিতের তুমি ব্যথাহারী,

শোকাতুরের মুছাও অঁাখি বারি,

ক্লান্ত ভ্রান্ত পরিশ্রান্ত তোমায় পেলে হয় জীবন্ত

প্রাণে তাদের নব বসন্ত নাচে যেন তুড়ুক তুড়ুক ॥

মনিবের খেয়ে মুখ-ঝাড়া,

গিল্লীর দেখে নথ-নাড়া

আত্মারাম হ'লে খাঁচা-ছাড়া,

কে তারে আবার ফিরায় ধড়ে তুমি ছাড়া ?

কুঁড়ে লোকের তুমি মুরুবি, খাটিয়ের তুমি বল শক্তি,

বোকা লোকের বুদ্ধি বাড়ে তোমায় করিলে ভক্তি ; ( গুড়ুক হে ! )

তোমার গুণে ঠাণ্ডা হয় কত রগ-চটা,

কাঠ খোট্টার নীরস প্রাণে খেলে ভাবের ঘটা,

তুমি কত নজলিস্ রাখ গুল্জার গুনিয়ে বোল “তুড়ুক তুড়ুক” !!

বিশ্বাধরার প্রবেশ ।

বিশ্বা । ওগো, নাচ গণ্ডা পয়সা দাও ।

উৎসব । পয়সা ! দেখ প্রেয়সি, আমি কতবার ব'লেছি—আবার ব'লছি, পয়সার কথা আমায় শুনিও না । অর্থ হ'চ্ছে অনর্গের মূল । আমি সাধ ক'রে ও ঝঞ্জাটে সেঁধুতে চাই না । গোবিন্দ !

বিশ্বা । ঝঞ্জাট ত' তোমার সবই । কঁড়ের সর্দার নাগর আমার কি নিঝঞ্জাটী মানুষ গো ? দিন নেই রাত নেই, সকাল নেই, সন্ধ্যা নেই একপাল অকর্ম্মার দল জুটিয়ে খালি গুড়ুক কুকুবে, আর কার সর্কনাশ ক'রবে তার মতলব খাঁটবে । কেবল আমি খরচের জন্তে হাত পাতলেই ঝঞ্জাট !

উৎসব । খরচটা কিসের শুনি ? কিসের খরচ ? সংসারে অভাব কি যে পয়সা খরচ ক'রে তার যোগাড় ক'রে হবে ? মাঠে ধান, বাগানে আনাজ, গোয়ালে দুধ, জঙ্গলে জালন—

বিশ্বা । হাতে কলা, গাছে কাঁটাল, ভাঁড়ারে ইঁদুর, উল্লে নাকড়মার কাঁদ ব'লে যাও—ব'লে যাও । কি আমার ফকিরত্ব পুরুষ গো ! ধন দৌলত সোণা দানায় ঘর একদম জল জলাট ।

উৎসব । আহা-হা, আমার যে কিছু নেই—সে কথা তুমিও জান', আমিও জানি । তবে মিছি মিছি ও কথা তুলে, আমায় দেক কর কেন বল দেখি ? আমি কবে ব'লেছি যে আমি কুবের পুত্রুর কাণ্ডিক চন্দর !

বিশ্বা । মরি, কি শাস্তুর জ্ঞান গো ! ফাত্তিক ঠাকুর বুঝি যকিরাজ কুবেরের ছেলে ?

উৎসব । না । সে তোমার মত প্রচণ্ডা উগ্রচণ্ডার বেটা ।

বিশ্বা । হ্যা গো ! আমি উগ্গুর চণ্ডী—দশবাই চণ্ডী—মালাই চণ্ডী

সবই ত' আনি। আমার দাপটে ঘরের লোক তিষ্ঠতে পারে না। পাড়ার লোক টিকতে পারে না। নাচে অতিথ আসে না। চালে কাক বসে না। দেখ', আমার চটিও না ব'লছি—  
শীগ্গির নাচ গাণ্ডা পয়সা দাও; নইলে আজ একটা কাণ্ড  
ক'রে ব'সবো।

উৎসব। কেন? পয়সার এত দরকার কিসের? একটু ঠাণ্ডা হ'য়ে  
জবাব দাও দেখি, বিশ্বামণি!

বিশ্বা। আমি কলসী দাগব'।

উৎসব। কলসী দাগবে কি রকম?

বিশ্বা। আজ জল-সংক্রান্তি না? আজ নাচটা কলসী—নাচ সর'  
চাল—নাচ খানা পাখা—নাচটা ক'রে পান স্পারি—নাচ জন  
বামুনের হাতে দিলে—

উৎসব। অক্ষয় স্বর্গ—অনন্তকাল বৈকুণ্ঠে বাস—একেবারে চতুর্ভুজ!  
তা এর দাগটা কি?

বিশ্বা। ওগো, শ্রাদ্ধের সময় ষাঁড় দাগে না? তাকে ভাল কথায়—  
শুদ্ধ ভাষায় কি বলে?

উৎসব। বৃষ-উৎসর্গ।

বিশ্বা। ঐ হ'য়েছে। ঐ কথাই বলে ত'? তবে কলসী "ইয়ে"  
করাকে, কলসী দাগা না ব'লে আমার গতি কই? ভাল ক'রে  
—শুদ্ধ, ক'রে ব'লতে গেলেই ত' তোমার নামটা ধরা হ'য়ে যাবে।

উৎসব। আমার নাম উৎসবচন্দ্র, আর এখন উচ্ছুগ্গু ব'লে আমার  
নাম ধরা হয়। সাবাস্—ধন্তি গিষ্টি! এমন নইলে পতিভক্তি!

বিশ্বা। ওগো, ঠাট্টা কিসের? মেয়ে মানুষকে সোয়ামীর নাম, শশুর  
ভাস্করের নাম, গুরুজনের নাম ধরতে নেই। আমার মেজ

বোনের বড় জায়ের খুড়তুতো ভায়ের মামাতশালী নাম পালতো  
 যে রকম তুমি শুন্লে ত' গালে হাত দিয়ে প'ড়তে । তার পিস্-  
 খশুরের নাম ছিল “কৃষ্ণ” আর ভাসুরের নাম ছিল “রাম” ।  
 কিন্তু ঐ দুটা নাম না নিলে মানুষের উদ্ধার নেই—তারক-বোম্-  
 বোম্ নাম হয় না । কি করে—মেয়ে মানুষ, উপায় নেই ! তাই  
 সে রোজ সন্ধ্যের সময় মালা ঘুরিয়ে ব'ল ত' “ফরে পিস্-খশুর  
 ফরে পিস্-খশুর, পিস্-খশুর পিস্-খশুর ফরে ফরে । ফরে  
 বটঠাকুর ফরে বটঠাকুর, বটঠাকুর বটঠাকুর ফরে ফরে ।”

উৎসব । ওঃ ! এ তারকব্রহ্ম নামে তার মুক্তি নিশ্চয় । সে এতদিন  
 স্বর্গে গিয়ে—

বিদ্যা । বালাই—ঘাট ! সে স্বর্গে যাবে কেন ? শত্রুররা স্বর্গে থাকে ।  
 সে এখনও জলজ্যান্ত বেঁচে আছে ।

উৎসব । কোথায় আছে ? এমন চিজ্ একবার দেখতে পেলে ভাগ্য  
 ব'লে মানি । হরে কৃষ্ণ !

বিদ্যা । সে এখন ঠিক কোথায় আছে, তা আমি জানি না । শুনেছিলুম  
 —তাদের গ্রামে এক ময়রার সঙ্গে তীর্থি ক'রতে গেছলো, সেই  
 তীর্থেই দু'জনে রয়ে গেছে ।

উৎসব । আ—হা—হা ! শ্রীগোবিন্দ ?

বিদ্যা । তা দাও পয়সা । বেলা কি হ'চ্ছে না ?

উৎসব । আবার বেসুরো গাইলে কেন সোণা ? বেশ ত' পাঁচটা  
 রসালাপ হ'চ্ছিল ।

বিদ্যা । তোমার রস ধরে না, তুমি রসের কথা কও । আমার চোদ্দ  
 পুরুষকে জলদান ক'রব, তার ব্যবস্থা আগে কর ।

উৎসব । আরে, একদিন জল দিলেই কি চোদ্দ পুরুষের সারা বছরের

তেটা মিটেবে ? তারা কি উট জাতীয় না কি ? একদিন জন  
দিলে সাত দিন নিশ্চিন্ত ।

বিদ্বা । কি ! আবার গালগাল ? আমার চোদ্দপুরুষ ফুট !

উৎসব । আরে ফুট কে ব'লে ।—উট—উট—

বিদ্বা । হ্যা—হ্যা । ঐ হ'লো । ঠাকুর-মশায়ের নামটা ধরি কি ক'রে ?

উৎসব । ঠাকুর-মশায়ের নাম ? তাঁর নাম ত' উপেন্দ্র ।

বিদ্বা । তা হ'লেই ঐ নাম আসে না ? যেমন বুদ্ধি !

উৎসব । উট ব'লে উপেন্দ্র জানে ! ধন্তি বাবা !

বিদ্বা । আনুক, আর না আনুক, আমার কলসী দাগার কি ব্যবস্থা  
ক'রছ, শুনি । ভাল চাও ত', নাচ গণ্ডা পরসা,—যেমন ক'রে  
হোক দাও । নইলে তোমার ঐ ভুড়ুক ভুড়ুক গুড়ুক ফোঁকা  
বার ক'রবো—হঁকে কলকে ভেঙ্গে চুর-মার ক'রে দোব ।

গীত ।

ভূপালী মিশ্র—ভাল ফেরতা ।

বিদ্বা—ভাল যদি চাও পরসা দাও—নইলে ভাঙব' হকো কলকে ॥

উৎসব—সত্যি নাকি পদ্মখী রস যে উঠছে ছলকে ॥

ভাঙ' গে' ভাতের হাঁড়ি, ভাঙ' নিজের হাতের শাঁখা,  
রেগেছ তুমি যে তার পরিচয় হবে পাকা ।

বিদ্বা—ভাঙলে পরে ভাতের হাঁড়ি, গিলবে কিমে কাঁড়ি কাঁড়ি  
হাতের শাঁখা ভাঙলে কে ঠেকাবে যমের দলকে ?

উৎসব—ও আমার এয়ারানী, ভাগিয়ানী,

তোমার পেরে আমি ভাগি মানি,

আমার অস্ত্রে তুমি বই কে দেখার দরদ এতখানি !

বিদ্যা—এমি ধারা ক'রলে ঠাট্টা, থাকবে না আর ঐ ঠাট্টা-টা,

দেখেছ চেলা কাঠ-টা—ভাঙব' মাথায় ওল-কে ॥

উৎসব—তুমি অসাধ্য সাধিকে ! কালী কমলা রাধিকে !

এ উগ্রমূর্তি সঙ্ঘর, তুমি সব পার' গো সব পার'

তুমি বোল্কে পার কর্তে ফল,—ঝোল কর গো ঘোলকে ॥

উৎসব । ( গীতান্তে ) আরে চুপ্ ! চুপ্ ! লেগেছে—লেগেছে । এক

জন জাঁকালো পোষাক, ভড়কালো চেহারা এ দিকে আসছে ।

সঙ্গে একটা মাত্র সঙ্গী । আমাদের বাড়ীর দিকেই আসছে ।

চুপ্ ! সব্ ! শিকার একদম মুখে এসে জুটেছে । নারায়ণ !

নেপথ্যে বিদ্যাপতি । বাটীতে কে আছেন ? দ্বারে অতিথি । কে

আছেন বাটীতে ?

উৎসব । আশুন, আশুন—আমার বহু ভাগ্য ! আজ কি সুপ্রভাত !

অতিথি আমার দ্বারে । আশুন—আশুন !

### ইন্দ্রদ্যুম্ন ও বিদ্যাপতির প্রবেশ ।

বিদ্যা । ভদ্র, রাজাধিরাজেন্দ্র মহারাজ ইন্দ্রদ্যুম্ন তোমার দ্বারে অতিথি ।

উৎসব । ওরে বাপ্‌রে ! ( মাত্ৰা দিয়া ) রাজাধিরাজেন্দ্র মহারাজ

ইন্দ্রদ্যুম্ন । যেন একটা ধামারের বোল । কং ধেটে ধেটে ধা

গ দেনে দেনে তা ।

বিদ্যা । অশিষ্ট, মহারাজ স্বয়ং তোমার দ্বারে উপস্থিত, আর তুমি

এ ভাবে তাঁর সঙ্গে বিক্রম পরিহাস ক'রতে সাহসী হ'চ্ছ ?

বিদ্যা । না বাবা ! পরিহাসি নয় । রাজ-দর্শনের আনন্দে ওর মাথা

খারাপ হ'রে গেছে, তাই অমন আবোল তাবোল ব'কছে ।

উৎসব। ( জনান্তিকে ) সাবাস, বিদ্যামনি ! শ্রীগোবিন্দ !

বিদ্যা। বাবা, আমরা দুঃখী মানুষ, নাচ গণ্ডা পয়সার জন্তে, আজ চোদ্দ পুরুষের মুখে জল দিতে, নাচটা কলসী দাগবো, তা পারছি না। আমরা কেমন ক'রে রাজা মহারাজের ষড় আড়ি সেবা ক'রবো ?

ইন্দ্র। কোন চিন্তা নাই মা ! এই আমার অলঙ্কার, রাজবেশ সব নাও। এর বিনিময়ে আমাদের জন্ত কিছু সংগ্রহ করা, তোমাদের পক্ষে কঠিন হবে না।

উৎসব। রাজা—রাজা, মহারাজ, রাজচক্রবর্তী, এ আপনি কি ব'লছেন ? এত অলঙ্কার—রাজ ভাণ্ডারের উজ্জ্বলতম রত্নরাজি-ধচিত এত অলঙ্কার আপনি স্বেচ্ছায় মানন্দে আমাদের দান ক'রতে চাচ্ছেন ?

ইন্দ্র। আশ্চর্য্য হ'চ্ছ কেন ভদ্র ! আমি তোমাদের কুটীরের ধার দিয়ে বাচ্ছিলাম। সামান্য কয় গণ্ডা পয়সার জন্ত তোমাদের উভয়ের কলহ হঠাৎ আমার কাণে প্রবেশ করে। আমার মনে ধারণা ছিল, অহঙ্কারে অহঙ্কার ছিল—যে আমার রাজ্য আমার দানের প্রভাবে দারিদ্র্য শূন্য। কিন্তু তোমাদের কলহ আমার সে ভ্রম ঘুচিয়ে দিয়ে, সে অহঙ্কার চূর্ণ ক'রেছে। তাই আমি এখন এসেছি তোমাদের কাছে—হে আমার অভিমান বিদূরিত-কারী, অহঙ্কারনাশী, জ্ঞানদাতা, চৈতন্যদাতা গুরু-দম্পতী, আমার এই সামান্য অর্ঘ্যে তোমাদের পূজা ক'রতে। পূজা অস্ত্রে আমি বাব—কাঙাল বেশে, আমার সেই কাঙালের ঠাকুর, নিরভিমান—নিরহঙ্কার নীলমাধবের সন্দর্শনে।

বিদ্যা। হ্যা বাবা। তা দাও—দাও। গুরুগিরি আমাদের বেব'সা—



বামুনের মেয়ে ! দাও—বা কিছু দেবে, সব আমার দাও ।  
ওকে দিও না বাবা,—ফক্কিছাড়া মিসের হাড়ে ফক্কি নেই ;—  
সব ছু'দিনে উড়িয়ে দেবে ।

উৎসব । দি'ন মহারাজ, আপনি যে অর্থ স্বেচ্ছায় ত্যাগ ক'রে  
নিজের মহত্ত্ব দেখাতে এসেছেন—সেই অর্থের রজ্জুতে আমার  
বাঁধবেন না । দি'ন তা ঐ লোভী, স্বার্থপর, সুখাশ্বেষী  
রমণীকে । ও তাই নিয়ে মেতে থাক । আমি শুধু আপনার  
সঙ্গে যাব । সেই সকল সম্পদ, সব বৈভবের মূলাধার, সেই  
মুরলীধরের দর্শন ক'রতে ।

বিদ্যা । ( স্বগতঃ ) আশ্চর্য্য ! জগন্নাথ, তুমি রাজা ইন্দ্রদ্যুম্নকে দীনবেশে  
সাজিয়ে আজ তোমার দীননাথ রূপ দেখাতে লালসিত । কিন্তু  
এ কি বিচিত্র ব্যাপার প্রভু ! ঋণপূর্বে যে অর্থলোলুপ,  
কার্পণ্যের অবতার, সামান্ত কিছু তাম্রমুদ্রার জন্ত স্ত্রীর সঙ্গে  
কলহে রত হ'য়েছিল, সে কেমন ক'রে এই রাজ-ঐর্ষ্যের মোহ  
একদণ্ডে কাটিয়ে দিতে পারলে ?

ইন্দ্র । কি দ্বিজনন্দন ! তুমি অবাক হ'য়ে কি দেখছ' ?

বিদ্যা । বাবা-ঠাকুর বড় আক্লাস্ত হ'য়ে এসেছে, অনেক পথ হেঁটেছে  
বোধ হয় । একটু ব'সে জিরোও না বাবা ! বল' না গো  
একটু ব'সতে । কি লোক মা !

উৎসব । না—না—না । ঠাকুর—ঠাকুর, মহারাজ—মহারাজ, আর  
এখানে নয়—এখানে নয় । এক দণ্ড নয়—এক মুহূর্ত্ত নয় ।  
চলুন—পালিয়ে চলুন । এখান থেকে পালিয়ে চলুন । এ রকম  
নরকে আপনাদের স্থান নেই । চলুন দেবদূত, দেবলোকের  
শিথল আলোক দেখিয়ে, আমার এ নরকের বাইরে নিয়ে যাবেন

চলুন। বিদ্যা, রইলো তোমার ঘর সংসার—বিষয় আশয়—  
 ধন দৌলত। আমি চল্লম সেই পরম ধনের সন্ধানে। শ্রীহরি—  
 [ উন্মত্তবৎ প্রস্থান।

ইন্দ্র। মা, তুমি এ সব অলঙ্কার গুছিয়ে তুলে রাখ। আমরা চল্লাম—  
 দেখি, যদি পথ হ'তে তোমার উদ্ভ্রান্ত স্বামীকে ফিরাতে  
 পারি।

বিদ্যা। (স্বগতঃ) এই নারী। শ্রীভগবান এইরূপ কোন নারীর  
 পাপাত্ম্যানে অঙ্গহীন যে না হ'তে পারেন, তা কে ব'লবে?

ইন্দ্র। চল' দ্বিজপুত্র!

[ ইন্দ্রদ্বয় ও বিদ্যাপতির প্রস্থান।

বিদ্যা। কার মুখ দেখে আজ উঠে ছিনুম রে! আঃ! এত হীরে  
 মুক্ত মাণিক! যা বা মুখপোড়া মিন্লে, তুই গেলি ত' ব'য়ে  
 গেল। আমি এই সব নিয়ে সুখে দিন কাটাবো। বলে—  
 “ধন নেই ষার, কেউ নেই তার”। আমার ষখন ধন দৌলত  
 মিলেছে—তখন সাই সান্তির ভাবনা কি? খবর দিই গে  
 আমার ভায়েদের।

[ প্রস্থান।

পঞ্চম গর্ভাঙ্ক ।

নগর উপকণ্ঠস্থ পথ ।

জনৈক পথিকের প্রবেশ ও গীত ।

মালকোষ—ধামার ।

শুনেছে পতিত জন তোমার আহ্বান ।

ছুটেছে তোমার পথে ল'য়ে শঙ্কাকুল প্রাণ ॥

তুমি তারে ডেকে লও,      লও তারে কোলে,

ধুয়ে দাও মলা মাটি,      স্নেহ-মাথা বোলে,

ধরিয়া শঙ্কিত হাত পদতলে দাও স্থান ॥

বহিতে পতাকা তব      দাও তারে শক্তি,

সন্দ ধনু ভরা প্রাণে      দাও প্রেম ভক্তি,

নয়নে তার বহুক ধারা, কর্ণে উঠুক তব জয় গান ॥

[ প্রস্থান ।

উদ্ভ্রান্ত উৎসবচন্দ্রের প্রবেশ ।

উৎসব । তাই ত' কোন্ পথে যাব ? মনের আবেগে—প্রাণের উত্তেজনায় বাড়ী ছেড়ে বেরিয়ে এলাম । কিন্তু মহারাজ আর সেই মহাতেজা ব্রাহ্মণ যুবকের সন্ধান ত' ক'রে উঠতে পারছি না । কোন্ পথে গেলেন তাঁরা ? সত্যি কি তাঁরা আমার সেই পাপ পুরী ছেড়ে বেরুতে পেরেছেন ; না পাণ্ডিষ্ঠা বিশ্বাধরার চক্রান্তে প'ড়ে, সেই নরকেই এখনও আবদ্ধ আছেন ? কি ক'রবো ? একবার বাড়ী ফিরে গিয়ে দেখে আসবো— সত্যি তাঁরা সেখানে আছেন কি না ? না না । বাপ্‌রে,

যে ফাঁস একবার কাটিয়েছি, আর তাতে পা দিচ্ছি না। বিশ্বাস  
কবলে আবার প'ড়লে আর নিস্তার থাকবে না। যাক্—  
মহারাজ কি ব্রাহ্মণকুমার যে পথেই যান না কেন, আমি একবার  
যখন সত্য-পথের সন্ধান পেয়েছি, আর বিপথে যাচ্ছি না।  
গোবিন্দ—গোবিন্দ ! রাজেশ্বর যখন তাঁর রাজেশ্বর্য ফেলে  
ছুটে বেরতে পেরেছেন,—আমি কি এতই অভাগা যে মানান্ন  
অর্থের মোহ কাটাতে পারব' না ? কেন পারব' না ? লোকে  
বলে,—মানুষের অসাধ্য কিছুই নেই। আমি যদি সত্যি “মানুষ”  
হই তবে কেন পারব' না ? মধুসূদন, আমার “মানুষ” কর'।  
“মানুষ” হবার শক্তি দাও !

[ উদ্ভ্রান্তবৎ প্রস্থান ।

একদল গ্রাম্য নর নারীর গীত গাহিতে গাহিতে প্রবেশ ।

দেশ-সিন্ধু—ধেমটা ।

স্বীগণ—আউ টান না পিকা ।

রাজা সব লুটাই দিলা, চঞ্চড় সব টিকা ।

পুরুষগণ—রইথা—রইথা—টিকে র',

ইমিতি করুচু কাইকি হ' !

বাইয়ানী হলা মাইকিনী সব

অনানি বাইধর, মঘা, ভিথা ॥

স্বীগণ—বাগ্ন-লো, মা-লো, করিবি কঁড় ?

পিটিবি মুণ্ড, না মুয়েরে মারিবি চাপড় !

অলসিয়া নাই তমর বড় !!

পুরুষগণ—টকা পয়সা কঁড় হব ?

রসবতি তন্তুর মুয়েরে অছি সব ।

তুন্তে আমর রূপা, সোণা, হীরা, পদ্মা,

ধাঁড়, চাউড়, খাড়ি, কঁসা, ঘর-কন্না,

তন্তুকু মিড়িচি যেত্ত বেড়ারে

হেড়া সব সম্পদ ফিকা ॥

[ প্রস্থান ।

## চতুর্থ অঙ্ক

### প্রথম গর্ভাঙ্ক।

নৌলাচল।

### ইন্দ্রদ্যুম্ন ও বিদ্যাপতি।

ইন্দ্র। একি ভয়ঙ্কর স্থান! উর্দ্ধে মধ্যাহ্ন সূর্যের ধর তাপ, নিম্নে অনন্ত বালু রাশি অগ্নি-কণার ঞ্চার তপ্ত, মধ্যস্থলে উষ্ণ বায়ু যেন অবসাদ-ক্লিষ্ট হ'য়ে নিথর দাঁড়িয়ে নিজের শ্রান্তি দূর ক'রছে। দ্বিজপুত্র, এ কোথায় এলে? এখানে এসে আমার সমস্ত ইন্দ্রিয় যেন অবসন্ন হ'য়ে প'ড়ছে। এখানে কি দেবতা কখনো বাস ক'রতে পারেন?

বিদ্যা। মহারাজ! এইস্থানে পুরুষোত্তমের বাস, এ বিষয়ে কেমন আমারও সন্দেহ হ'চ্ছে! কিন্তু রাজনু, এ কি আশ্চর্য ব্যাপার! যোজন যোজন পথ অতিক্রম ক'রে আমি অক্লেশে আপনাকে এতদূরে আনতে পেরেছি—কোথাও কোন বিপ্ল উৎপন্ন হয় নি—কোথাও এতটুকু পথ ভুল হয় নি,—আর এখন আমি আমার আকাঙ্ক্ষিত লক্ষ্য-স্থলে, নির্দিষ্ট গম্য-স্থানে, সেই নৌলাচলে এসে পথ হারিয়ে ব'সেছি—এ কথাও যেন প্রাণের সঙ্গে বিশ্বাস ক'রতে পারছি না। এ কি সত্য, এ কি সম্ভব!

ইন্দ্র। ব্রাহ্মণকুমার! তুমি কি বেশ স্মরণ ক'রতে পারছো, যে যেখানে তুমি সেই জগৎপতি জগন্নাথের মূর্তি দেখেছিলে, সে স্থান

এইরূপ জন-মানব-হীন তরু-গুল্ম-মতা-বিবর্জিত, পশু-পক্ষী-কীট-পতঙ্গ-বিরহিত, পানীয়ের চিহ্ন-মাত্র-শূন্য ভীষণ মরুভূমি ? সেথায় দিক্দিগন্ত ব্যাপ্ত হ'য়ে আছে শুধু তপ্ত রবির দীপ্ত রশ্মি-জালে—আর বালুকার অনল উদগীরণকারী উষ্ণ নিশ্বাসে ? না—না ব্রাহ্মণ, নিশ্চয় তা নয় । তুমি বোধ হয় এমন ভয়ঙ্কর স্থান এই প্রথম দেখেছ !

বিদ্যা । সত্য মহারাজ, আমি এমন স্থান জীবনে এই প্রথম প্রত্যক্ষ ক'রছি । এ স্থান, আর যেথায় আমার প্রভু নীলমাধব রূপে বিরাজ ক'রছেন, এদের মধ্যে প্রভেদ—স্বর্গ আর নরক । আমি দেখেছি সে স্থানে অনন্ত প্রসারি বটবৃক্ষ অনন্ত বাহু বিস্তার ক'রে ক্লান্ত—শ্রান্ত—তাপিতকে স্নেহশীতল কোলে নিতে ব্যগ্র । সেথায় বনানীর শ্যাম শোভা নভঃ নীলিমার প্রতিদ্বন্দ্বী হ'য়ে গর্ভ ভরে দাঁড়িয়ে আছে । অগণিত ফুল রাজি—তাদের বর্ণের বৈচিত্র, সৌষ্ঠবের বৈচিত্র নিয়ে—মৃৎ-মলয়-হিল্লোলে সদাই দোহল । সেথা বিহগের কাকলি মৌন নিশীথিনীরও ধ্যান ভঙ্গ ক'রে দেয় । আর সবার উপর—সবার উপর সচ্চ বিকশিত পদ্য গন্ধে সে স্থানের আকাশ-বাতাস-জল-স্থল মাতোয়ারা—আত্মহারা । মহাভাগ, এ সে স্থান নয়—নয় । রাজেন্দ্র, আমি অকারণ আপনাকে এত কষ্ট দিয়ে, কোন বিপথে নিয়ে এসেছি—আমার শাস্তি দি'ন—দণ্ড দি'ন ।

ইন্দ্র । না—না, তুমি দোষী নও, তুমি দায়ী নও । এ আমার কর্মফল ! আমার অভিমানের—আমার অহঙ্কারের ফল ! সেই সাধন দুর্লভ ধনকে আরত্ব ক'রতে না ক'রতে আমি মনে মনে অহঙ্কার পোষণ ক'রেছিলাম, যে “মাহুৰ কি মুৰ্থ ! কেন তারা

এত কঠোর সাধনা, এত দুষ্কর তপস্বী ক'রে মরে ! এই ত' আমি আজ অনায়াসে, বিনা সাধনায়, সেই জগৎচিন্তামণির দর্শন লাভ ক'রতে সমর্থ হ'ব ।” এ বিড়ম্বনা এ দুর্বোগ ভারই প্রতিফল । স্বজনন্দন, মূর্থ আমি, অভিমানি আমি, অহকারী আমি,—আমার মাৎসর্যের জন্ত তোমাকেও এই ক্লেশ ভোগ ক'রতে হচ্ছে ।

যমের প্রবেশ ।

যম । কেন অকারণ এই নিদারুণ ক্লেশ ভোগ ক'রে, তোমার সুখ-পালিত, ঐশ্বর্য্য লাভিত দেহকে নিরন্তর খিন্ন ক'রছ মহারাজ ? ছেড়ে দাও এ খেয়ালের খেলা । এ উন্নততা ত্যাগ ক'রে, রাজা তুমি,—রাজ্য শাসন, প্রজা পালন প্রভৃতি মহান্ কার্য্যে আত্ম-নিয়োগ কর গে ।

ইন্দ্র । কে তুমি আশ্চর্য্য পুরুষ, এই জন-মানব-শূন্য, অশান তুল্য মরু মাঝে একাকী বিচরণ ক'রছ ? তুমি কে ?

যম । মহারাজ, আমি এ মাটির মেদিনীর জীব নই । মহুষ্ণ সমাজ হ'তে বহু উচ্ছে আমার স্থান । আমি ধর্ম্মরাজ যম ; জগতের যাবতীয় জীবের পাপ পুণ্যের বিচারকর্তা ।

ইন্দ্র । বটে—বটে ! আমার অপরাধ হ'য়েছে ধর্ম্মরাজ । আমি আপনাকে চিনতে না পেরে, আপনার সঙ্গে ধৃষ্টতা ক'রেছি—আমার মার্জনা করুন ।

যম । রাজন্, শিষ্টাচার ও বিনয় গুণে তুমি জগতের আদর্শ, তা আমি জানি । আমি তোমার উপর পরম পবিত্র । জান ত'—ধর্ম্ম ব্যতীত মানব কিছুতেই উন্নত হ'তে পারে না । আর তুমি যে এত দূর উন্নতি ক'র্তে পেরেছ', সে শুধু আমারই আহুকুল্যে ।



ইন্দ্র । তা সত্য দেব । ধর্ম বটে, আমি অধর্মকে কোন দিন প্রশ্রয় দিই নি । তাই আপনিও আমার কৃপা-কটাক্ষে সদাই দেখে থাকেন ।

যম । বৎস, আমি তোমায় বিশেষ অনুগ্রহ করি ব'লেই, আজ এই ভীষণ মরুভূমে আবির্ভূত হ'য়ে, তোমায় নীলমাধবকে তোমার রাজ্যে প্রতিষ্ঠিত করবার উপক্রম হ'তে নিবৃত্তি ক'রতে এসেছি ।

ইন্দ্র । কেন প্রভু ?

যম । কারণ, তুমি বোধ হয় জান যে, যে কেউ সেই নীলমণিময় মূর্তি দেখবে, সেই জীবনমুক্ত হ'য়ে সকায়ে বৈকুণ্ঠ গমনের অধিকারী হবে ।

ইন্দ্র । তা জানি দেব !

যম । তবে বুঝে দেখ,--- আমি যমরাজ, তাদের আজন্ম আচরিত কুকর্মের হিসাব নিয়ে ব'সে থাকব' ; কিন্তু তারা তোমার প্রতিষ্ঠিত দেব দর্শন ক'রে যদি মুক্তি লাভ করে, তা হ'লে তাদের অনুষ্ঠিত পাপের ফলভোগ তোমায় ক'রতে হবে ।

ইন্দ্র । আমি তাদের অনুষ্ঠিত পাপের ফলভোগ ক'রব ?

যম । নিশ্চয় ।

ইন্দ্র । কি ফলভোগ ক'রতে হবে ?

যম । অনন্তকাল নরকবাস ।

ইন্দ্র । আর তারা ? তাদের মুক্তি ত' নিশ্চিত ?

যম । হ্যা, তা নিশ্চিত বটে ।

ইন্দ্র । তবে দেব, আমার আর বিরত ক'রতে চাইবেন না । আমার ধ্যানের ধন, জীবনের সাধনা, সেই জগবন্ধু জগন্নাথকে জগৎ সমীপে উপস্থাপিত, প্রতিষ্ঠিত ক'রে আমার কৃতার্থ হ'তে দিন ।

যম । কি বাতুলের প্রলাপ ব'কছ তুমি রাজা !

ইন্দ্র । বাতুলতা নয়—প্রলাপ নয় ধর্মরাজ ! আমি একা নরক ভোগ ক'রলে যদি কোটি কোটি জীব মুক্তি লাভে সমর্থ হয়, তাদের চির বাঞ্ছিত—চির আকাঙ্ক্ষিত মোক্ষের অধিকারী হয়, তা হ'লে দেব কৃতান্ত, আমি এক জীবন নয়—অনন্ত জীবন ধ'রে, কোটি কল্প কাল পর্য্যন্ত নরকের অন্ধকার আবর্তে প'ড়ে থাকতে পশ্চাৎপদ নই । দেব—প্রভু—ধর্মরাজ, তখন সে কুস্তিপাক—দে রোরব—আমার গোরবের সৌরভে পূর্ণ হবে । নরকে আমি স্বর্গের সুখ—স্বর্গের শান্তি লাভ ক'রে ধন্য হব ।

বিষ্ণা । ধন্য হবেন কি মহারাজ ? আপনি চির ধন্য জগন্নাথ ! আপনাকে বক্ষে ধ'রে ধরিত্রী নিজে ধন্য । আপনার এ মহানুভবতা, এ হৃদয়ের প্রসার, চিরদিন শমনের দ্রুতী, মৃত্যুর মিথ্যাচারকে উপেক্ষা ক'রে, আপনাকে চির ভাস্বর, চির স্মরণীয়, অমর ক'রে রাখবে । ঐ দেখুন মহারাজ, কৃতান্ত আপনার কথায় বিশ্বয়ে বাক্ শূন্য হ'য়ে, শুধু আপনার মুখের পানে চেয়ে আছে ।

যম । ( স্বগতঃ ) ক্ষোভে অঙ্গ জলে যায় । দাস্তিক রাজার কি দস্ত ! ( প্রকাশ্যে ) সত্য মহারাজ, আমি বিশ্বয়ে অবাক্ হ'য়ে গেছি ! তোমার মহত্বের মিকট, তোমার উদারতার সমক্ষে শমনের দণ্ড শিথিল হ'য়ে যায় । তুমি ধন্য ! তবে যাও বৎস, তোমার অভীষ্ট সাধন উদ্দেশ্যে, জগতের অশেষ কল্যাণ কামনায়—যাও সেই কমলাকান্তের দর্শন লাভে চরিতার্থ হও গে । আমি তোমার পরীক্ষা করবার জন্ত তোমার সঙ্গে এ ভাবে ছলনা ক'রছিলাম ।

ইন্দ্র । দেব, কোথায় সে সুদর্শন মাধব আছেন, যদি আপনার অগোচর না থাকে তা হ'লে, আমার নির্দেশ করুন । আমার সঙ্গী—আমার পথ প্রদর্শক—আমার প্রাণ-তুল্য-প্রিয় এই ব্রাহ্মণ-কুমার, কি জানি কোন কুহকীর কুহকে, পথ হারিয়েছে । আপনার দয়া ব্যতিরেকে শ্রীভগবানের সন্দেশ লাভ আমার ভাগ্যে নাই ।

যম । ( স্বগতঃ ) হ'য়েছে । দর্পাক রাজা, এইবার তুমি আমার আয়ত্তে এসেছ । ( প্রকাশে ) রাজন্, জগৎপতির সে নিত্য-বিগ্রহ শবর বিশ্বাবসু কোথায় লুকিয়ে রেখেছে, তা কেউ জানে না । সমুদ্র তরঙ্গে, উৎকৃষ্ট বালুকারাশি এ প্রদেশকে সমাচ্ছন্ন সমাহিত ক'রেছে । শুধু সেই শবর, আর তার কন্যা ললিতা এই পরিত্যক্ত প্রান্তরে বিরাজ ক'রছে । সেই শবর ঋত্র জানে কোথায় নীলমাধবের নীলমণিময় বিগ্রহ লুকায়িত আছে । তুমি প্রথমে সেই শবরের নিকট যাও, তার নিকট হ'তে কোশলে সকল সন্ধান জেনে তারপর—

ইন্দ্র । কোশলে ?

যম । ই্যা কোশলে । সে শবর বড় ধূর্ত, তার নিকট হ'তে সন্ধান পেতে হ'লে, তুমি শুধু কোশল নয়, আবশ্যক হয় ত' পীড়ন—কঠোর উৎপীড়ন ক'রতেও পরাশ্রয় হয়ো না । জান ত' “শঠে শাঠ্যং সমাচরেৎ” । তা হ'লে আমি এখন আসি বৎস, তুমি তার নিকট যাও । ঐ অদূরে বে বালুকার স্তূপ দেখতে পাচ্ছ—ওরই বিপরীত দিকে সন্ধ্যা শবর অবস্থান ক'রছে । যাও, তুমি সত্বর তার কাছে যাও । ( স্বগতঃ ) ভক্তবীর বিশ্বাবসুর উপর অত্যাচার উৎপীড়ন ক'রলেই রাজা

পুণ্যভ্রষ্ট হ'রে নীলমাধব দর্শনে বঞ্চিত হবে ;—তা হ'লেই আমার উদ্দেশ্য সিদ্ধ হ'বে । ( প্রকাশ্যে ) আমি আসি মহারাজ, তুমি দূত হস্তে নিজের উদ্দেশ্য সিদ্ধির জন্য অগ্রসর হও ।

[ প্রস্থান ।

ইন্দ্র । স্বজনন, চল—আমরা অগ্রসর হই । পথ হারিয়েছিলাম, দেবতা স্মরণ হ'য়ে পথের সন্ধান দিয়েছেন । এবার সেই পথে, এস' আমরা অগ্রসর হই ।

[ উভয়ের প্রস্থান ।

## দ্বিতীয় গর্ভাঙ্ক ।

অক্ষয় বটতল ।

ললিতা ও বলভদ্রা ।

ললিতা । বোন, ভাগ্যে তোমাদের পেয়েছিলুম, তাই এই জন-মানব-শূন্য মরুভূমে দুটো কথা কইবার, প্রাণের দুঃখ, মনের কষ্ট জানাবার লোক পাওয়া গেছে ।

বল । আমরা আর তোমার মনের দুঃখ কষ্টের কথা শুনলে কি হ'চ্ছে দিদি ! আমরা ত' তোমার কিছু ক'রতে পারছি না ।

ললিতা । তবু তোমাদের সঙ্গে হৃদয় বুক জুড়িয়ে দুটো কথাও কইতে পাচ্ছি । নইলে একে এই নির্জন বালুকার শ্মশান, তাতে বাবার এই দারুণ অবস্থা । তিনি ত' উন্মাদও নন, প্রকৃতিস্থও নন । যেন সদাই অশ্রুমন—বিচঞ্চল । আমি একা তাঁকে নিরে কি ক'রতুম বল' দেখি বোন ! তোমার দাদারা

ত' যথাসাধ্য চেষ্টা ক'রে বাবার সেবা ক'রছেন। তাঁর নিজের ছেলে নেই সত্য—কিন্তু কারো নিজের ছেলেও এ রকম পারে কি না সন্দেহ। আর তুমি ত' মূর্ত্তিমতী করুণা! আমার আশা, ভরসা, সম্বল, সাহুনা—সবই তুমি। তোমার ঋণ আমি কখনও শোধ ক'রতে পারব' না।

বল। দিদি আমার ফেরী। ফেরীর মত কি যে বকে তার ঠিকানা নেই। আমরা তোমাদের সেবা পরিচর্যা ক'রছি, না তোমরাই আমাদের আশ্রয়স্থল হ'য়ে এই ভয়ঙ্কর স্থানে আমাদিগের রক্ষা ক'রছ? তোমরা না থাকলে, আমরা এই বালি ঢাকা মরুভূমির কোথায় যেতুম বলত' ?

ললিতা। বেশ বেশ খুব ব'লেছ। এখন বাবার জন্ত কি করি? নীলমাধবের ভাবনা ভেবে—ঠাকুর তাঁকে ছেড়ে চ'লে যাবেন ভেবে—বাবার যে আহাৰ নিদ্রা বিরাম বিশ্রাম কিছুই নেই, এর কি উপায়? আচ্ছা বোন, তোমার বড় ভাই নীলাধর ত' ব'লেছ খুব শক্তিমান বীরপুরুষ! তা, যদি রাজা ইন্দ্রদ্যায়ের লোক জোর ক'রে নীলমাধবকে এখান থেকে নিয়ে যেতে আসে ত', সে কি তাদেরকে হটিয়ে দিতে পারবে না! তা হ'লে ত' মাধব এখানেই থাকবেন—আর বাবারও উদ্বেগ উৎকর্ষা থাকবে না।

বল। ব'লেছ—কথাটা মন্দ নয়। কিন্তু যে রকম আলবড্ডা লোক সে, কখন কোথায় থাকে তার ঠিক নেই। রাজার লোক যদি তার অনুপস্থিতে এসে পড়ে, তখন কি হবে?

ললিতা। কোথায় গেছে বল ত' বোন, নীলাধর? আজ ফিরে এলে তাকে এ জায়গা ছেড়ে আর কোথাও যেতে মানা ক'রে দেব। আমার কথা সে রাখবে না বোন?

বল। আমার ভায়ের একটা গুণ দেখি, তারা আর্ন্তের কথা—  
বিপন্নের কথা কিছুতেই উপেক্ষা করে না—ক'রতে পারে না।  
সেটা যেন তাদের স্বভাব বিরুদ্ধ কাজ। ঐ দেখ না, দাদার  
কথা তোমার মনে জাগতে না জাগতেই লাজল কাঁধে দাদা  
আমার এসে উপস্থিত হলো।

### নীলান্বরের প্রবেশ।

নীলা। আমার আরো আগে ব'লতে হয় দিদি! এই—দেখ দেখি  
সব ধান গুলোই বালির ভেতর থেকে বার ক'রেছি কি না?

ললিতা। একি, এত ধান তুমি পেলে কোথায়?

নীলা। ব'লছি না বালির ভিতর থেকে। তুমি ব'ললে না “ধান  
ছড়াতে ছড়াতে তুমি আর তোমার স্বামী প্রথম নীলমাধবকে  
দর্শন ক'রতে এই অক্ষয় বট মূল পর্য্যন্ত এসেছিলে? তারপর  
সমুদ্রের ঢেউয়ে সে সব ধান চাপা পড়েছিল?”

ললিতা। হাঁ। তাতে কি?

নীলা। ঐ কথা শুনেই আমি ভাবলুম, কি এত ধান বালি চাপা  
থাকতে এতগুলো প্রাণী এই বালি আড়ির উপর অনাভাবে  
মরবে! দেখি বালি খুঁড়ে ধান বার ক'রতে পারি কি না।  
যেন্নি ভাবা অম্নি লাজল কাঁধে দে দৌড়! ফাল্ ফাল্ ক'রে  
বালি আড়ি কেটে ফেলে, একটা একটা ক'রে খুঁটে খুঁটে দেখ  
দিদি, সব ধান গুলিই এনেছি কি না!

ললিতা। আশ্চর্য্য মানুষ তুমি! এত পরিশ্রম ক'রলে এই ক'টা  
ধানের অল্প!

নীলা। ক'টা কি গো! এই লাজলের ইস্ দিরে খেঁতো ক'রে তু'ব

উঠিয়ে এনে দেখাচ্ছি, কত চাল বেরুবে। এক কুঁড়ি ভাত হবে দিদি. সবাই মিলে বেশ চোর্কচোষ্য আহার করা যাবে এখন।

বল। ভাত ফুটবে কিসে দাদা! হাঁড়ি কুঁড়ি সবই ত' বালি চাপা প'ড়েছে!

নীলা। কিছু ভাবনা নেই। সুখে থাক এই অক্ষয়বট। এর এমন ঢলা ঢলা পাতা আছে। এতেই পুট তৈরী ক'রলে চাল ফুটে ভাত হবে। আমি চলুম।

[ প্রস্থান।

বল। কি দিদি, কি দেখছ' ?

ললিতা। দেখছি এ'কি রকম মানুষ! এত শক্তি, এত ধৈর্য্য, এত অধ্যবসায় একাধারে যাতে বর্তমান, সেই মেদিনীর বক্ষ হ'তে ক্ষীর ধারা পান ক'রবার যোগ্য পাত্র। সেই ধরিত্রীকে কর্ষণ ক'রে তার ভাঙারের রত্নরাজি আপন আয়ত্তে আনতে সমর্থ।

বল। দিদি, পুরুষের এই কর্ষণী শক্তিই ত' তাকে মানুষ ব'লে পরিচিত করায়। যে জন নিজ শক্তির হল চালনার দ্বারা সংসার ক্ষেত্রকে কর্ষণ ক'রে কাম্য ফল লাভ ক'রতে না পারে, সে কিসের পুরুষ? এই কর্ষণী শক্তিই জগতে পুরুষের শক্তি। আর প্রকৃতির হ'চ্ছে আকর্ষণী শক্তি। সংসারে পুরুষ—তার দেহের শক্তি, মস্তিষ্কের ক্ষমতা, হৃদয়ের বল, ধৈর্য্য হৈর্য্যের প্রভাব বিস্তার ক'রে মাটির মেদিনীকে সোণায় মুড়ে দেবে, সুখে ভ'রে দেবে, শান্তির সদন ক'রে তুলবে। আর নারী—তার আকর্ষণী শক্তিতে পুরুষকে কর্ষণের দিকে, উৎসাহের পথে, সাধনার মুখে আকর্ষণ ক'রে, তাকে সর্বদা সিদ্ধির আশায় উদ্ভাসিত ক'রে তুলবে।

জগতে নারীর এই আকর্ষণ না থাকলে, পুরুষ মাতার স্নেহে—  
বনিতার প্রেমে—কণ্ঠার ভক্তিতে—ভগ্নীর প্রীতি সৌহার্দ্যে  
আকর্ষিত না হ'লে, কিসের জন্ত এত ক'রতে চাইবে দিদি !

ললিতা। বাঃ চমৎকার ! এত কথা তুমি শিখলে কোথায় বোন ?  
এত সুন্দর, এত মিষ্ট, অথচ এমন জ্ঞানগর্ভ !

বল। ঐ যে—যে কথা শেখায় সে আসছে। গুণধর ভাইটি আমার  
সকল গুণের গুণমণি।

লীলাধরের প্রবেশ।

ললিতা। কি, আজ যে চুপ্ চাপ্ ? মুখটা বুজে এলে যে ? গান  
কই ? গান গাইতে গাইতে না এসে, এমন নিস্তব্ধ হ'য়ে এলে  
কেন ?

লীলা। আমি ত' আর একটা গানের কল নই, যে যখন ইচ্ছা চাষি  
ঘুরিয়ে দেবে, আর আমি গান ধরে দেব।

ললিতা। ও কি, এমন কেন ? এত রুম্মু ! মুখে হাসি নেই—  
কথায় রস নেই—চোখে যেন বিরক্তি মাখান ! কি হ'য়েছে  
ভাই ?

লীলা। আমি আর এখানে থাকব' না। জ্বালাতন হ'য়ে গেলুম  
আধ পাগ্‌লা বুড়োকে নিয়ে—তার উপর মোমাছির কামড়।

ললিতা। কিসের কামড় ?

লীলা। মোমাছির গো, মোমাছির। দেখছ' না ঐ বটের ডালে কত  
বড় এক মোচাক হ'য়েছে ? আর যত রাজ্যের মোমাছি আমার  
সর্ব্বদে দিন রাত কেবল ছল ফুটিয়ে অস্থির ক'রে তুলছে।

ললিতা। কেন, তোমার গায়ে ছল ফোটাচ্ছে কেন ? তুমি ত' আর  
ফুল ফুলটা নও, যে মধুর লোভে অলি ধেয়ে গিয়ে—



বল । পদ্মনাভ এইবার বুঝি—

লীলা । ( বলভদ্রাকে নীরব হইতে ইঙ্গিত করিয়া ললিতার প্রতি )  
আমি একটু মধুর লোভে ঐ চাক্টায় একটা খোঁচা দিয়েছিলুম ।  
সেই অবধি ছাই মৌমাছির কামড়ে কামড়ে একেবারে অস্থির  
হ'য়ে উঠছি ।

ললিতা । হঠাৎ তোমার মধুতে লোভ হ'ল কেন ভাই ?

লীলা । ভাবলুম, ক'দিন ত' উপবাসে কাটছে,—আজ নীলাধর দাদা  
যখন ভাতের যোগাড় ক'রেছে, তখন শুধু ভাত না খেয়ে, মিঠে  
ভাত—মধুমাখান ভাত খাওয়া যাবে, তাই ।

বল । কতটা মধু পেয়েছ ?

লীলা । অনেকটা,—বট পাতার একটা ঠোঙ্গা ভর্তি হ'য়ে গেছে ।  
সে যা হোক, আমি এখানে আর থাকব' না দিদি ! অনাহার—  
অনিদ্রা—পাগলের খিসমৎ, তার উপর এই মৌমাছির কামড় !  
কেন, আর কি আমার কোন ঠাই নেই ? যে দিকে ছ' চক্ষু  
যায়, সেই দিকেই চলে যাব ।

### বিশ্বাবস্থুর প্রবেশ ।

বিশ্বা ! যাবে বই কি ? পাষণ, আমার বুকে শেল মেরে, মাথায়  
বাজ হেনে চ'লে যাবে বই কি ! কই কেমন ক'রে যাবে  
যাও দেখি । হনুমই বা বুড়ো, তবু ত' একেবারে অর্থক্স নই—  
এই বুকের মাঝে তোমার এম্নি শক্ত ক'রে ধ'রে রেখে দোব  
না ! ( লীলাধরকে বক্ষে ধারণ )

লীলা । আঃ, ছাড় ছাড়, লাগে । দমবন্ধ হ'য়ে যাচ্ছে আমার ।

বিশ্বা । লাগুক, হোক দমবন্ধ তোমার, আমার কি তাতে আসে ব্যাধ ।  
আমি এম্নি ধারা নিবিড় ক'রে ধ'রে রাখতে চাই তোমার

সেইখানে—আমার যেখানে ব্যথা—যেখানে উদ্বেগ—যেখানে ভয়, ভাবনা, আশঙ্কা। নিষ্ঠুর, নির্দয়, হৃদয়হীন! তুমি ছেড়ে যেতে চাও—রাজভোগের লোভে আমার সামান্ত অর্ঘ্য—আমার সামান্ত ফলমূলের নৈবেদ্য? তুমি না দীনবন্ধু? তুমি না ভক্তবৎসল? ( ছাড়িয়া দিল )

লীলা। এই নাও—পাগলের প্রলাপ শোন। আমার মনে ক'রেছে আমি ওর উপাস্ত্র দেবতা নীলমাধব। ও বাবা, তুমি কাকে কি ব'লছ? আমি যে তোমার লীলাধর।

বিখা। আমিও ত' তাই ব'লছি, তুমি আমার লীলাধর। তুমি আমার—আমার—আমার। জগন্নাথ সে জগতের, কিন্তু তুমি লীলাধর আমার—শুধু আমার—একা আমার—আর কারো নয়—কারো নয়। আমি তাই ত' তোমার আঁকড়ে ধ'রে রাখতে চাচ্ছি আমার এই লোল বক্ষে, এই কম্পিত বাহর বন্ধনে বেঁধে।

লীলা। কি যে তুমি বল' বাবা! আমাকে কি ও সব কথা বলতে আছে? তাতে যে অপরাধ হয়। আমি সামান্ত মানুষ—

বিখা। মানুষ। তুমিও মানুষ? তা হ'লে সমুদ্র—কৃপ, রবি শশী—বালুকণা, হিমাচল—বল্মীকস্তূপ! ছলনাময়, আর কত ছলনা ক'রবে! এ ক'দিন ধ'রে আমি আমার আরাধ্য নীলমাধবকে পূজা ক'রতে, ধ্যান ক'রতে ব'সলেই যে কেবল তোমার মূর্তি দেখতে পাচ্ছি। প্রাণের ব্যাকুলতার আকুল হ'য়ে “মাধব” ব'লে ডাকতে গিয়ে—“লীলাধর” ব'লে ডেকে ফেলছি। এত মতিভ্রম—এত ভ্রান্তি সত্যই কি আমার জন্মেছে? না—না না! এতদিন পরে আমি সব ভ্রান্তি, সব ভ্রম, সব অন্ধকার

কাটিয়ে সত্যের আলোক দেখতে পেয়েছি। এতদিনে আমি বুঝেছি—চিনেছি যে লীলাধরই আমার লীলাময় শ্রীধর।

ললিতা। ঠিক ব'লেছ তুমি বাবা। আমারও যেন মনে মনে ঐ সন্দেহ হ'তো। অনেক বার আমি ভেবেছি যে এ কেমন মানুষ, যাকে কখনও দেখি নি—অথচ দেখবা মাত্র মনে হ'লো যেন কত জন্ম জন্মান্তরের পরিচিত। যখনই দুঃখের পাথারে, কষ্টের সমুদ্রে পড়েছি—তখনই দেখেছি আমাদের দুঃখমোচন, ক্লেশ দূর করবার জন্ত এই মানুষটি সর্বাগ্রে এসে দাঁড়িয়ে আছে—যেন অন্তর্যামী ভগবান।

বিশ্বা। ললিতা মা, ও পালিয়ে যেতে চার—রাজা ইন্দ্রদ্যয়ের কাছে রাজভোগ খাবার জন্ত। পরমান্ন ভোগে ওর লোভ হ'য়েছে। তা, মা, আমি আড়ালে দাঁড়িয়ে দেখেছি নীলাধর ধান কুটে চাল তৈরী ক'রছে, নীলাধর নিজে মধু আহোরণ ক'রেছে, বাকী শুধু একটু দুধ। তুই একটু চেষ্টা ক'রে খানিক দুধের সংস্থান কর না মা! আমি তা হ'লে আজ পরমান্ন রেঁধে ওর ভোগ দিয়ে দেখি, কেমন ক'রে আমার ছেড়ে ও যায় সেই রাজার দোরে—হেংলার মত নোলা নিরে।

ললিতা। (স্বগতঃ) দুধ! এই ধু ধু করা বালির দেশে দুধের ষোগাড় হয় কেমন ক'রে?

বিশ্বা। কি গো বাছা, পারবে না একটু দুধের ষোগাড় ক'রতে? কি সর্বনেশে মেয়ে বাবা! আমার সর্বনাশ ক'রে দিলে। হতভাগি, জানিস্ তোর জন্মেই আমার ঠাকুর রাজা ইন্দ্রদ্যয়ের সন্ধান পেয়েছে—তোর জন্মেই আমি তাকে হারাতে ব'সেছি। রাক্ষসী, এতটুকু—এক ঝিনুক, কি এক ফোঁটাও দুধের সংস্থান

ক'রতে পারিস্ না তুই এই নধর পুষ্ট দেহ নিয়ে ? ভাল, দেখি আমি নিজে চেষ্টা ক'রে, যদি অক্ষয়বটের দুগ্ধ-গুহ্র আটা সত্য দুধে পরিণত হয়। আশ্চর্য্য নয়—কিছু আশ্চর্য্য নয় ( লীলাধরের প্রতি ) তোমার কৃপা হ'লে—ইচ্ছা হ'লে সব হয়, সব হ'তে পারে। চল তো—চল তো একবার দেখি চেষ্টা করে।

[ প্রস্থান।

লীলা। ছুটলো যেন ধনুক ছাড়া বান। নাও, আবার কি বিপদ বাধায় কে জানে। ( ললিতার প্রতি ) তুমি কিছু মনে ক'র না দিদি। অকারণ তোমার কতক গুলো কটু ব'লে গেল বই ত' নয়। আমি যাই, দেখি কোথায় গেল।

[ প্রস্থান।

বল। কি দিদি, এমন মন ভার ক'রে, মুখ গুঁজে রয়েছ যে ? ব'ললেই বা ছ'কথা—অন্য পর ত' কেউ নয়, বাপ। তার মাথা ধারাপ ; তার কথায় কি কাণ দিতে আছে, না মন ভার ক'রতে আছে !

ললিতা। তাঁর ইচ্ছায়—তাঁর কৃপায় সব হয়—না ? কাল সাপের বিষ অমৃত হ'য়ে যায়, শুকনো গাছে ফুল ফোঁটে, মরা গাছে বান ডাকে—না ? তাঁর ইচ্ছায় একদিন রাক্ষসী পুতনার বিষমাথা শুনে ক্ষীর ধারা বয়েছিল—না ?

বল। দিদি, এমন আনুমনা হ'য়ে তুমি কথা কইছ কেন ? তোমার যেন কি ভাবাস্তুর দেখা যাচ্ছে।

ললিতা। বাবা আমার রাক্ষসী ব'লে ডেকে গেল। আমি কি পুতনার চেয়েও বড় রাক্ষসী, যে আমার শুনে ছুধের ধারা বইবে না ?

বল । দিদি, কি পাগলের মত ব'কছ ? পুত্রবতী ভিন্ন কি অন্য নারীর  
স্তনে দুধ হয় ?

ললিতা । হয় না ? তাঁর ইচ্ছা হলেও না, কৃপা হ'লেও না ? তবে  
 কেমন ক'রে কুরুক্ষেত্রের রক্ত-রাঙা রণস্থলে ভোগবতীর শ্রোত  
 ব'য়েছিল ? বোন, চাই তাঁর কৃপা—তাঁর করুণা । তা হ'লেই  
 আমার এই শুষ্ক, নীরস, মাংসপিণ্ড-সার কুচে পীযুষের লহর ছুটে  
 যাবে । আয়, আয় বোন, একবার সেই করুণাময়ের করুণা-কণা  
 ভিক্ষা ক'রে দেখি, এ অসাধ্য সাধন ক'রতে পারি কি না !

গীত ।

দেশ—ঠুংরি ।

চরাচর-নন্দিত, সুর-নর-বন্দিত,  
 নব-যন-নিন্দিত, মনোহর ঠাম ।  
 বদনে মধুর হাসি, নয়নে করুণা রাশি,  
 চরণে নিখিল আসি লভয়ে বিরাম ॥  
 কিশোর কাম মুরতি, অখিল ব্রহ্মাণ্ড-পতি,  
 সব অগতির গতি, নটবর শ্যাম ।  
 সন্দ ধনু কর চূর্ণ, প্রকাশ মহিমা তূর্ণ,  
 করুণায় কর পূর্ণ মম মনস্কাম ॥

দেখ' দেখ' বোন, দেখ' বলভদ্রা, আশ্চর্য্য—অত্যাশ্চর্য্য ব্যাপার  
 দেখ' ; অশ্রাস্ত ধারায় ছুঙ্ক লহর প্রবাহিত হ'য়ে আমার বসন  
 সিক্ত ক'রে দিচ্ছে । দিদি—দিদি—বোন, একটা পুট—একটা  
 পাত্র দাও, আমি এই অমৃতধারা ধ'রে রেখে দিই । বাবার  
 আমার বহু দিনের অভিলাষ পূর্ণ হবার সুযোগ ঘটবে দিই ।

বল । ( পূর্ণ পুট দিয়া ) এই নাও দিদি—ভরিয়ে দাও ঐ ক্ষুদ্র পুট,

ভরিয়ে দাও বিশ্বের সকল মাতৃ-হৃদয় তোমার ঐ অমৃত  
নিষ্কন্দিণী ক্ষীর-ধারায় ।

ললিতা । ( নিজ স্তন্য দুহু পুট পূর্ণ করিল । ) বাবা, বাবা এস'—  
নাও তোমার অভিলষিত সামগ্রী, প্রভুর ভোগের অত্যাবশ্যক  
উপচার—পরমান্নের পরম উপাদান এই দুগ্ধ—আমার হৃদয়ের  
ভক্তি উৎসের উৎসারিত সুধা—আমার আজীবন সাধনার চরম  
সিদ্ধি । নাও বাবা !

বিশ্বাবসুর পুনঃ প্রবেশ ।

বিশ্বা । পেয়েছি—পেয়েছি ? আদরিণী কন্যা আমার—স্নেহের  
হুলানী আমার—পেয়েছি মা, দুধ ? দে, দে, আমি আজ  
দেখব, কেমন ক'রে আমার ফাঁকি দিয়ে পালাতে পারে এই  
পরমান্ন-ভোজন-লোলুপ লীলাধর । আমি আজ বুঝাব—রাজার  
বেতন-ভুক পাচকের রন্ধন হ'তে, বৃদ্ধ বৃদ্ধ শবরের আয়াস প্রস্তুত  
পায়স কিছুতেই নিকৃষ্ট নয়—সে সত্যই পরম-অন্ন । দে তো  
মা, দে তো ।

ললিতা । এই নাও । ( দুগ্ধপাত্র দিয়া ) আমি দেখি তোমার  
অভীপ্সিত পরমান্নের অন্যান্য উপকরণ, চাল ও মধু, কোথায়  
রেখেছে যুগল কারুণিক নীলাধর আর লীলাধর । এস' ত'  
বোন বলভদ্রা, আমরা তাদের সন্ধান করি গে ।

[ বলভদ্রা ও ললিতার প্রস্থান ।

বিশ্বা । আজ—তোমায় তোমার সাধের ভোজ্য খাওয়াব মাথব ।  
পালাবে—আমায় ছেড়ে পালাবে ? বড় সোজা না ?

ইন্দ্রদ্যুম্নকে লইয়া লীলাধরের প্রবেশ ।

লীলা । বাবা, বাবা, এই একজন পথিক রোদে পুড়ে, পিপাসায় কণ্ঠশুক হ'য়ে এসেছে তোমার কাছে কিছু জল চাইতে ।

বিশ্বা । কপটী, আবার ছলনার জাল বিস্তার ক'রেছ ! এই কালানল তুল্য তপ্ত বালুময় মরু মধ্যে তুমি হঠাৎ পথিকের আবিষ্কার ক'রে আমার সম্মুখে এনেছ ? তার পিপাসার কথা শুনিয়া আমার সাধনার ধন—সাধের সামগ্রী—বহু আশা আকাঙ্ক্ষার বস্তুটিকে কেড়ে নিতে চাও ? পাষণ, তুমি কি জান না, যে এখানে কোন পানীয়ের সংস্থান নেই ! আছে শুধু আমার কণ্ঠার প্রগাঢ় ভক্তির পুত্র নির্যাস—এই তার স্তন্য-দুগ্ধ ! তুমি এই অমূল্য নিধিটী আমার কাছ থেকে ছলনা ক'রে ভুলিয়ে নিতে চাও ? না, তা হ'বে না,—আমি এ দুগ্ধ দেব না,—কিছুতেই না ।

লীলা । পিপাসায় যে একজন মরবে বাবা ।

বিশ্বা । মরুক, তাতে আমার কি ! নির্দয়, তোমার নিজের চক্রান্তে, নিমেষে নিমেষে বিশ্বের কোটী কোটী জীবের জীবনান্ত হ'চ্ছে না ? তার জন্য ত' এত ব্যাকুলতা ফোটে না তোমার ! কত পতিহারা পত্নী—মাতৃহারা শিশু—পিতৃহারা অপোগণ্ড—পুত্রহারা জননী প্রতি মুহূর্ত্তে কাতর রোদনে দিগ্‌মণ্ডল বিদীর্ণ ক'রে তুলছে না ? কই, তাদের জন্য ত' তোমার প্রাণ এতটুকু কাঁদে না ! আর আজ যত ব্যাকুলতা, যত আকুলতা, কোথাকার কোন এক গৃহহীন—ভাগ্যহীন—পথহারা পথিকের জন্য !

ইন্দ্র । বৃদ্ধ, আমি বড়ই—পিপাসার্ত্ত । আমার কৃপা ক'রে একটু পানীয় না দিলে আমি আর মুহূর্ত্ত মাত্র স্থির থাকতে পারব' না ।

বিশ্বা। এ যে শবরীর দুগ্ধ। তোমার পান ক'র্তে বাধা নাই ?

তোমায় দেখে ত' ক্ষত্রিয় ব'লে বোধ হ'চ্ছে।

ইন্দ্র। বৃদ্ধ, পিপাসার আমি অত্যন্ত পীড়িত।

বিশ্বা। বটে, বটে! এখন আর জাতি বিচার, জাত্যাভিমান, সামাজিক নিয়ম কিছুই থাকা সম্ভব নয়। যত জাত শুধু দুর্কালের পীড়নের সময়—না ?

ইন্দ্র। দারুণ তঞ্চায় আমি হতজ্ঞান হ'য়ে যাচ্ছি। সম্মুখে দুগ্ধ সঞ্চিত ; তুমি স্বেচ্ছায় আমার ও দুগ্ধ পান ক'রতে না দিলে, আমি তোমার হস্তের ঐ পুট কেড়ে নিতে বাধ্য হব।

বিশ্বা। জোর ক'রে ? বেশ—তাই নাও ! আমার প্রভুর উদ্দেশ্য—আমার ইষ্টদেবতার উদ্দেশ্যে আহোরিত বস্তু যদি তুমি ক্ষমতার বলে, শক্তির মাদকতার কেড়ে নিতে পার, নাও ! কিন্তু এ কথা তুমি নিশ্চয় জেনো পথিক, আমি তোমায় স্বেচ্ছায় এর বিন্দুমাত্রেরও অংশ নিতে দোষ না।

ইন্দ্র। তবে এই মর—( দুগ্ধপাত্র আকর্ষণ )

বিশ্বা। নাও—কেড়ে নাও। জোর ক'রে, আরো জোরে টান'—যত শক্তি আছে দেহে তোমার সব দিয়ে টান'। কি হলো ? পারলে না ? বাতুল, এ কি যে সে সামগ্রী, যে তুমি ইচ্ছা ক'রলেই আয়ত্ত ক'রতে পারবে ? এ যে আমার কন্ঠার—আমার জননীর বুকের রক্ত, এ যে অমাবস্থায় চাঁদের আলো, এ যে অকালে তুর্গোৎসব। আমার কন্ঠা—অজাতাপত্যা, স্বামী-সঙ্গ-বিবর্জিতা কন্ঠা আমার—তার হৃদয়ের ভক্তির উৎস ছুটিয়ে, নীলমাধবের পরমায় প্রস্তুতের জন্ত এই দুগ্ধ নিজের বক্ষ হ'তে উৎসারিত ক'রে দিয়েছে।



ইন্দ্র । নীলমাধব ! আপনি জানেন সন্ধান সেই নীলমাধবের ?  
আপনিই কি তবে সেই শবরোত্তম মহাপুরুষ বিশ্বাসস্থ ? দি'ন  
দি'ন মহাশয়, আমার সেই নীলনিময় তনু নীলমাধবের সন্ধান-  
ব'লে দি'ন । আমি ইন্দ্রদ্যুম্ন । লোকে আমার রাজা সহোদনে  
উপহাস করে । তারা জানে না, যে রাজরাজেশ্বর আপনার  
নিকট বাঁধা । আমি আসছি বহু—বহু দূর হ'তে । ভদ্র,  
অবস্তীপুর হ'তে আপনার করুণার ধনু হ'বার জন্তু ছুটে এসেছি ।  
দি'ন—দি'ন, আমার সে মহানিধি দিয়ে ধনু করুন !

বিশ্বা । চমৎকার ! রাজা ইন্দ্রদ্যুম্ন তুমি ! যার ভয়ে, যার আশঙ্কায়  
আমি অহোরাত্র ত্রস্ত হ'য়ে ফিরছি ! তুমি—তুমি সেই রাজা  
ইন্দ্রদ্যুম্ন ? হাঃ—হাঃ—হাঃ ( হাস্য )

ইন্দ্র । আমি আপনাকে চিনতে না পেরে অবজ্ঞা ক'রেছি—অপমান  
ক'রেছি । আমার রাজ-শক্তির অহঙ্কারে আপনাকে লাঞ্চিত  
ক'রতে উচ্ছত হ'য়েছি । আপনি আমার যথোচিত দণ্ড দি'ন ।

বিশ্বা । দণ্ড দেব—হ্যাঁ দণ্ড—ভীষণ দণ্ড । লাঞ্ছনা—অবজ্ঞা—অপ-  
মান—সব অপরাধের দণ্ড । রাজা ইন্দ্রদ্যুম্ন, তুমি আমার উপর  
এরূপ রূঢ় আচরণ ক'রলে কেন ?

ইন্দ্র । পিপাসায় কাতর হ'রে পানীয়ের আশায় ।

বিশ্বা । উত্তম । তোমারই মত একজন রাজা—তোমারই মত এমনই  
দারুণ তৃষ্ণায় হিতাহিত জ্ঞানহারা হয়ে, এক ব্রাহ্মণের কণ্ঠে  
মৃত সর্প জড়িয়ে দিয়ে তার অপমান করেছিল—না ?

ইন্দ্র ! হ্যাঁ মহাশয়, রাজা পরীক্ষিৎ মুনিপুত্রব শমীকের কণ্ঠে মৃত সর্প  
আরোপ ক'রেছিলেন ।

বিশ্বা । তার ফল কি হ'য়েছিল রাজা ?

ইন্দ্র । নিদারুণ ব্রহ্মশাপ । সপ্তাহকাল মধ্যে রাজা তরুণ দংশনে কাল সদনে গমন করেন ।

বিষ্ণা । ব্রহ্মশাপ ! কিন্তু রাজা, আমি ব্রাহ্মণ নই—শবর । আমি বৃষি মানুষ মাত্রেই ব্রাহ্মণ বশ, দৌর্বল্যের অধীন, প্রলোভনের দাস । তার ক্ষুদ্র ক্রটি—কর্ণেকের মোহ—নিমেষের পদস্থলন রূপার চক্রে—অনুকম্পার নেত্রে—করণার দৃষ্টিতে দেখতে হয় । ব্রাহ্ম নরকে তার ভ্রম সংশোধনের অবকাশ দিতে হয় । তাই রাজা ইন্দ্রদ্যুম্ন, অপরাধী—উদ্ধত ইন্দ্রদ্যুম্ন, আমার লাঞ্ছনাকারী ইন্দ্রদ্যুম্ন, আমি তোমার ভীষণ অভিসম্পাত না দিয়ে—তোমার সব দোষ, সকল অপরাধ ক্ষমা ক'রে, নীলমাধবকে তোমার হাতে তুলে দেব । ঐ—ঐ দেখ রাজা, ঐ দেখ ভাগ্যবান । ঠাকুর আমার তোমায় দেখা দিতে সশরীরে এসে উদর হ'লেন ।

### শ্রীমূর্ত্তির আবির্ভাব ।

। আমি তোমার উপর প্রীত হ'য়ে আসি নি রাজা ! আমি এসেছি ভক্তের মহিমা ঘোষণা ক'রতে । ( বিষ্ণাবসুর প্রতি ) কি ক'রলে তুমি, বৃদ্ধ ? কেন তুমি আমার রাজার হাতে দিতে প্রতিশ্রুতি দিলে ? আমার কি আর তোমার ভাল লাগছে না ?

বিষ্ণা । বল—বল—আরো বল ! ষত দোষ সব আমার ঘাড়ে চাপাও । নীলমণি, তোমার না আর ফল মূলে মন ওঠে না ? তুমি না রাজা ইন্দ্রদ্যুম্নের সন্ধান পেয়েছিলে ? তুমি না রাজভোগ খাবার অল্প লালারিত হ'য়ে উঠেছ ? তোমার ইচ্ছা না হ'লে আমার রসনার এত শক্তি কোথা হ'তে এলো—বে সে প্রাণ থাকতে তোমার পরের হাতে তুলে দেবার কথা বলতে পারলে ?

বেশ। তোমার শ্রীমুখে যখন উচ্চারিত হ'য়েছে—তখন তা আর বিফল হ'বে না। রাজা ইন্দ্রদ্যুম্ন, শোন—আমি যাব তোমার রাজ্যে সত্য—তোমার সঙ্গে নয়, স্বতন্ত্র। আর এ মূর্তিতে নয়—ভিন্ন রূপে। দারুমের মূর্তিতে আমি সমুদ্রের তরঙ্গে ভাসতে ভাসতে তোমার রাজধানী সম্বিহিত বাকি-মোহনার উদয় হ'ব। তুমি সেই দারু দণ্ডে আমার মূর্তি নির্মাণ ক'রে প্রতিষ্ঠিত ক'রো।

ইন্দ্র। প্রভু, তোমার সঙ্গে না পেলো, আমি কি নিয়ে ফিরে যাব ?

শ্রীমূর্তি। অনুতাপ। আমার ভক্তকে পীড়ন করার অপরাধেই তোমার এই শাস্তি। তুমি তোমার রাজ্যে ফিরে যাও, তোমার অনুষ্ঠিত কু-কর্মের জন্য অনুতাপকে সঙ্গে নিয়ে,—আমি চলেন।

( অস্তর্ধান। )

ইন্দ্র। প্রভু—প্রভু—

[ উদ্ভ্রান্তবৎ প্রশ্নান। ]

বিশ্বা। চ'লে গেলে মাধব ! তবে—আমার এত সাধের—এত সাধনার—এত আগ্রহের নৈবেদ্য—এত আয়াস সঞ্চিত পরমায় কার ভোগে লাগবে মা—ধ—লীলাধর !

লীলা। এই যে বাবা আমি দাঁড়িয়ে আছি। যদি আমার পরমায় খাইয়ে তোমার তৃপ্তি হয়, আমি খুব আহ্লাদ ক'রে, পেট পুরে খাব।

বিশ্বা। তুমি ? লীলাধর ! মাধব নাম আর আমার মুখে ভাল উচ্চারণ হয় না। তোমার নামে জিহ্বা অবশ হ'য়ে আসে। অন্তর হ'তে নীলমাধব অন্তর হ'য়ে যাচ্ছে—তার স্থানে দাঁড়িয়ে আছি—তুমি। চক্রে জগৎ লুপ্ত হ'য়ে যাচ্ছে ! আমি ঘুমিয়ে

পড়তে চাচ্ছি—শুধু তোমার বুকে মাথা রেখে ঘুমিয়ে পড়তে  
চাচ্ছি ।

লীলা । ষুমোও বাবা আমার বুকে ।

সুরসপ্তকের আবণ্ডা

গীত

শ্রাম—রাঁপতাল ।

সুর-সপ্তক—চিন্তাহরণ, শঙ্কাবারণ তোমার শীতল বক্ষ ।

ওই তো জীবের চরম নিলয়,

ওই তো পরম লক্ষ্য ॥

লীলাধর—আয় রে তাপিত, আয় রে ছুটে,

বুকে আমার পড় রে লুটে,

হেথায় আছে শান্তি-সুখা,

হেথায় আছে পরা মোক্ষ ॥

সুর-সপ্তক—তুমি এমন স্নেহ-সম্ভাষণে

ডাকছ জীবে সর্ষক্ষণে,

তার মত নাই অভাগা আর

শুনেও সে ডাক যে না শুনে !

লীলাধর—নাইক' বিচার বোগ্যাযোগ্য,

ভাগ্যবান্ কি হতভাগ্য,

আমি সবার, সবাই আমার

নাইক' যে ভেদ পক্ষাপক্ষ ।

সুর-সপ্তক—রক্ষ রক্ষ কমলাক্ষ,

হৃদে ধরে জগৎ রক্ষ !!

## তৃতীয় গর্ভাঙ্ক ।

নীলাচলের একাংশ ।

বিদ্যাপতি ।

বিদ্যা । ধর্মরাজ যম,—মহারাজ ইন্দ্রদ্যুম্ন তাঁর উত্তেজনার উত্তেজিত হ'য়ে, শবরপতি বিখ্যাবসুর নিকট হ'তে, যে কোন রূপেই হোক, জগন্নাথকে আয়ত্ত্ব ক'রতে ছুটলেন । কেন কৃতান্ত রাজাকে প্রতিনিবৃত্ত হবার জন্ত অসুরোধ ক'রলেন ? আর কেনই বা আবার তাঁকে নীলমাধবকে আয়ত্ত্ব করবার জন্ত, কৌশল—ছল—উৎপীড়ন, কিছুতেই পশ্চাৎপদ না হ'তে পরামর্শ দিলেন ? আমি বলেছিলুম রাজন, ভক্তকে পীড়ন ক'রে, ভক্তের নিকট ছলনা ক'রে, ভগবানকে পাওয়া যায় না । এই আমার অপরাধ । এই জন্ত তিনি আমাকে এখানে অপেক্ষা ক'রতে ব'লে, একা গেছেন সেই তেজোময়, উদার, ভক্তবীর শবরপতির নিকট হ'তে নীলমাধবের সন্ধান ক'রে, তাঁকে অবস্খীপুরে নিরে যাবার জন্ত । ভালই হয়েছে—ভালই ক'রেছ ঠাকুর ! রাজা যে ভাবে উন্নতের মত ছুটেছেন, তাতে সেই বৃদ্ধের উপর যে কোন পীড়ন করা, তাঁর পক্ষে অসম্ভব নয় । আর সেই পীড়ন—সেই সব অশ্রীর অশ্রুষ্ঠান আমার সমক্ষে, আমার চক্ষের উপর অশ্রুষ্ঠিত হ'লে, আমি উভয় সঙ্কটে পড়তুম, তাতে সন্দেহ নাই । এক দিকে রাজার আগ্রহ—রাজার ব্যাকুলতা ; অন্যদিকে আমি যাকে গুরু জানে ভক্তি করি, কন্যাদাতা পিতা আমার যিনি, তাঁর কাতরতা—তার সঙ্কলের দৃঢ়তা । এই দু'য়ের মাঝে থেকে আমি বড়ই বিপন্ন হয়ে পড়তুম । তাই বিপদভঞ্জন ঠাকুর

আমার রাজার মতি পরিবর্তন ক'রে, আমার এখানে থাকবার আজ্ঞা তাঁর মুখ থেকে উচ্চারিত করিয়ে, আমার ধন্য ক'রেছেন। কিন্তু মহারাজ এখনও ফিরলেন না কেন? দিননগি যে অস্তা-চলচুড়াবলম্বী হয়েছেন। বেলা বে' প্রায় শেষ হ'য়ে এল! আমার ভয় হ'চ্ছে—বুঝি বা কোন বিভ্রাট বাধিয়ে ব'সেছেন আমার অতি ব্যস্ত—উত্তেজিত রাজা। ও কি? শবরকন্যা ললিতা, আমার পত্নী—সহধর্মিণী ললিতা যে এইদিকে আসছে। সন্দেহে তার ও কে অপরিচিতা অশেষ লাবণ্যময়ী যুবতী?

ললিতা ও বলভদ্রার প্রবেশ।

বল। এগিয়ে চল' না দিদি! লজ্জা কিসের? স্বামীর কাছে যাবে তাতে এত লজ্জা—এত সঙ্কোচ কেন?

ললিতা। আ—আপনি এখানে কেমন ক'রে এলেন? কখন এলেন? এতদিন পরে কি এ দাসীকে মনে পড়েছে? আমার ভাগ্য কি এতদিন পরে সুপ্রসন্ন হ'ল?

বিষ্ণা। সুন্দরি! তুমি এতগুলি প্রশ্ন এক সন্দেহ ক'রে ব'সলে বটে, কিন্তু এ সবে উত্তর আমি এক কথা ব'লছি,—তুমি বড় অভাগিনী। তাই এই দুর্ভাগ্য ব্রাহ্মণকে বিবাহ ক'রতে বাধ্য হ'য়েছিলে। তোমার ভাগ্যাকাশ চির অন্ধকার—চির কুহেলিকাচ্ছন্ন।

বল। বালাই, বালাই! মহাশয়, আপনি আমার দিদির স্বামী—ভর্তা—ধর্মপতি। আপনি বর্তমানে তাঁর সৌভাগ্যের অভাব কি? বিশেষতঃ এতকাল পরে যখন আবার আমার দিদিকে স্মরণ ক'রে আপনি তার কাছে এসেছেন, তখন তার ভাগ্যকে নারী সমাজের অনেকেই হিংসা ক'রবে, সন্দেহ নাই।

বিজা। চমৎকার! আমি তোমার ভগ্নীকে মনে ক'রে—তাকে স্মরণ ক'রে এখানে এসেছি, এ সংবাদ তুমি পেলে কোথা থেকে? বল। আমরা অমন সংবাদ পাই। তটের নীড় ছেড়ে, সরোবরের লীলারিত জলরাশির পানে ভ্রমর ছোট্টে কার উদ্দেশ্যে—কাকে স্মরণ ক'রে? কমলিনীকে নয় কি? নি'ন চলুন; আর এখানে থেকে সময় ক্ষেপে আবশ্যক নেই। চলুন—আবাসে চলুন। দিদি, ডাক' না তুমি! আমার কথা তেমন গুঁর কাণে লাগছে না। আমি বরং একটু এগিয়ে গিয়ে সবাইকে সংবাদ দিই গে যাই।

[ প্রস্থান।

ললিতা। প্রভু, আজ আমাদের বড় দুর্দিন। আজ নীলমাধব আমাদের ছেড়ে, রাজা ইন্দ্রদ্যুম্নের সঙ্গে যেতে প্রস্তুত হয়েছেন। বাবা সেই কথা শুনে অবধি, মূর্ছিত হ'য়ে পড়ে আছেন। আজ আমাদের বড় বিপদ! তাই আমি বিপদবারণের উদ্দেশ্যে আমার অন্তরের ব্যথা নিবেদন ক'রছিলাম। হঠাৎ চেয়ে দেখি, এই বিজন বালিরাশির উপর আপনি দাঁড়িয়ে আছেন। তাই আমার মনে আশার সঞ্চার হয়েছে, যে ব্যথাহারী হরি, আমাদের সব দুঃখ দূর করবার জ্ঞান, আপনাকে এনে উপস্থিত ক'রেছেন। দেব, নীলমাধব চ'লে গেলে, আমাদের পুরী ও প্রাণ দুই-ই অন্ধকার হ'য়ে যাবে। চলুন প্রভু, সেই মাধবের নিত্য-বিরাজ-মন্দিরে আমার স্বামী-দেবতার প্রতিষ্ঠা ক'রে, আমি আবার এ ভাঙ্গা ঘরে সুখের আলো জালি।

বিজা। সুন্দরি! মাধব তোমাদের ছেড়ে যাবেন, এ সংবাদে আমি এত আনন্দিত, যে তাঁর বিচ্ছেদে তোমাদের পিতা পুত্রীর প্রাণে

যে বেদনা বেজেছে, তার জন্ত সমবেদনা প্রকাশ ক'রতে পারছি না। বরাননি, আমি সুদূর অবন্তীনগর হ'তে, রাজা ইন্দ্রদায়কে সঙ্গে ক'রে এখানে এনেছি, মাধবকে নিয়ে বাবার জন্ত। আজ আমার সাধনা সিদ্ধ হ'য়েছে শুনে, আমি আনন্দে অধীর—আত্মহারা হ'য়ে যাচ্ছি। সতি, তুমি আমার এখানে আবদ্ধ রেখো না—রাখতে চেও না। আমি এবার সেই নীলমাধবের শ্রীমূর্তি জগদ্ধাসীর গোচরীভূত করবার মহান উদ্দেশ্যে ফিরে যাব—আবার সেই অবন্তীপুরে। তুমি আমার সহধর্মিনী, আমার এই ব্রতে তুমি সহায় হও।

ললিতা। দেব, বড় কঠিন সমস্যা—বড় বিষম চিন্তায় আপনি আমাকে নিরুৎসাহ ক'রলেন। আপনার পত্নী, আপনার সহধর্মিনী—এই গৌরব যেমন আপনার উদ্দেশ্য সাধনের—ব্রত উদ্ঘাপনের সহায় হ'তে আমার ডাকছে,—সেই মত কন্টার ভক্তি, শ্রদ্ধা, সেবা-ভিলাষ আমার আহ্বান ক'রছে, আমার বৃদ্ধ, অর্কোন্মত্ত, মর্মান্বিত পিতার দিকে। আমি তাঁকে ফেলে যেমন কোথাও যেতে পারব' না—তেমনি আপনার পুনর্দর্শন পেয়ে, আপনাকে ছেড়ে শূন্য ঘরে বাস ক'রতেও পারব' না। এ উভয় সঙ্কটের মাঝে আমার ফেলেছেন আপনি। এখন আপনি ব্যতীত আমার উদ্ধার করবার আর কে আছে, স্বামিন্ ?

বিদ্যা। সমস্যার কথা তাতে সন্দেহ নাই। কিন্তু—কিন্তু সুন্দরি, আমি এখন আমার নিজের কার্যোদ্ধারের চিন্তায় এতদূর মগ্ন, যে অন্য দিকে লক্ষ্য করবার অবসর আমার একটুও নেই। আমি এত আত্মমগ্ন, যে অহোর কৃতি বৃদ্ধির প্রতি দৃকপাত্ত করাটা আমার পক্ষে এখন একরূপ অসম্ভব।



ললিতা। দেব! এ আপনি কি বলছেন? বিচার নয়—বিবেচনা নয়—যুক্তি নয়, শুধু স্বার্থের প্রতি লক্ষ্য রেখে চ'লে যেতে চান আপনি, এই বিশাল ধরার বন্ধের উপর দিয়ে? জগন্নাথকে আপনি নিয়ে যেতে চান জগৎসীর সমক্ষে এত কাঠিন্য—এত হৃদয়-হীনতার মধ্য দিয়ে? না, প্রভু না। আমি বুঝেছি, এ আপনার অন্তরের কথা নয়। আপনি এত কঠিন, এত পুরুষ নন। পথশ্রম, উৎকর্ষা ও উদ্বেগে আপনি উদ্ভ্রান্ত হ'য়েছেন, তাই এরূপ অসংলগ্ন, অযৌক্তিক কথা আপনার মুখ হ'তে উচ্চারিত হ'য়েছে। চলুন দেব, আমাদের আশ্রমে। সেখান গিয়ে শ্রান্তি অপনোদন ক'রে, স্থির চিত্তে ভেবে, যা কর্তব্য তাই ক'রবেন।

বিদ্যা। সাধি, আমি এখানে রাজা ইন্দ্রদ্যুম্নের প্রতীক্ষায় অপেক্ষা ক'রছি।

ললিতা। ভাল, তিনি ফিরে আসুন, তারপর আমরা সকলে একসঙ্গে যাব। আজ নীলমাধবের পরমায় ভোগের আয়োজন হ'য়েছে। ভোগান্তে রাজ অতিথি, স্বামী-দেবতা সবাইকে সে মহাপ্রসাদের অংশ দিয়ে আমি ধন্য হব।

বিদ্যা। পরমায়? কন্দ ফলেই মাধবের নিত্য পূজা হ'ত না?

ললিতা। হাঁ। কিন্তু ঠাকুর বাবার নিকট পরমায় আশ্বাদের ইচ্ছা প্রকাশ করার, আজই—কি আশ্চর্য্য প্রভু,—আজই সেই ভোগের আয়োজন হ'য়েছে।

বিদ্যা। আজই? বড় চমৎকার ত'! তা কিরূপে এই বালুময় মরুভূমে পরমায়ের উপকরণ সংগৃহীত হল'?

ললিতা। প্রভু! আমরা মাধবকে প্রথম দেখতে আসি যান ছড়াতে

ছড়াতে—আপনার স্বরণ আছে বোধ হয় ? আমার ভাই  
নীলাধর—

বিদ্যা । তোমার ভাই ? তুমি ত' শবরপতির একমাত্র সন্তান ?

ললিতা । আমার পাতান ভাই । আর বলভদ্রা, যে এইমাত্র আমার  
সঙ্গে ছিল, আমার বোন ; বড় মিষ্টি—বড় মিষ্টি তারা । এত  
মাধুর্য, এত প্রেম, এত ভালবাসা—আর কারো নেই—  
কোথাও নেই ।

বিদ্যা । ভাল, তারপর পরমান্নের উপকরণ কি ভাবে সংগৃহীত হ'ল ?

ললিতা । নীলাধর বালি খুঁড়ে সেই সব ধান বার ক'রে, তা থেকে  
চাল ক'রেছে । অক্ষয়বট বৃক্ষে মধুচক্র ছিল, তা হ'তে মধু  
মিলেছে । আর দুগ্ধ মিলেছে এই ললিতার—এই আপনার  
সহধর্মিণীর স্তন হ'তে । পরমান্নের সকল উপচার, সকল উপকরণ  
এই খানেই পাওয়া গেছে, স্বামিন্ !

বিদ্যা । তোমার স্তনে দুগ্ধ-ধারা বইলো ! আর সে এত দুগ্ধ, যার দ্বারা  
এতগুলি লোকের আহার উপযোগী পরমান্ন প্রস্তুত হ'তে  
পারে ?

ললিতা । আশ্চর্য্য হচ্ছেন কেন প্রভু ?

বিদ্যা । দুশ্চরিত্রা, আশ্চর্য্য হচ্ছি কেন, তা জিজ্ঞাসা ক'রছ ? তোমার  
স্তনে দুগ্ধ, পাপিষ্ঠা, এ যে আমার কি লজ্জা—কি অপমান—  
কত কলঙ্কের কথা, তা তুমি বুঝতে পারছ' না ? আমি তোমার  
স্বামী,—আমি তোমার কাছে নেই—আমার সাহচর্য্য তুমি  
কখনো পেলে না—আমার দ্বারা কোন সন্তানের মাতা হবার  
ভাগ্য তোমার হ'লো না, আর তোমার স্তনে দুগ্ধের লহর ব'য়ে  
গেছে, এ কাহিনী যে শুনবে, তার কি বুঝতে বাকী থাকবে,

যে গোপনে তুমি সন্তানের জননী হ'য়েছ ? আমার কুলে, আমার পূর্বপুরুষগণের বদনে তুমি কলঙ্কের কালি মাখিয়ে দিয়ে, তাদের অক্ষয় স্বর্গবাসের অন্তরায় হ'য়েছ ? হার—হার, আমি কি কাল সর্পিণীকে—কি ভীম ভুজঙ্গিনীকে মণি-হার ভ্রমে বক্ষে ধারণ ক'রেছিলাম !

ললিতা । ( স্বগতঃ ) নারায়ণ ! নারায়ণ ! নীলমাধব ! এ কি কথা—এ কি নিশ্চয় বচন—এ কি বজ্র-কঠোর বাণী আমার শোনালে ঠাকুর ! এ কি তোমার পরীক্ষা ! স্বামী আমার—দেবতা আমার—ইহজীবনের সাধনা—পরজীবনের স্বর্গ আমার—তঁার মুখে এ কি উক্তি, মনে এ কি সংশয় ! ( সরোদনে বিজ্ঞাপতির প্রতি ) প্রভু ! দেবতা ! স্বামিন ! আপনি আমায় এত নীচ—এত হীন—এত ক্ষুদ্র ভাবছেন কেন ? সতী সাধবীর গর্ভে আমার জন্ম—সাধক পিতার ক্রোড়ে আমি লালিত—বর্ণশ্রেষ্ঠ ব্রাহ্মণের আমি বনিতা । আমার দ্বারা কি কোন নীচ কার্য—কোন কু-কর্ম হওয়া সম্ভব ! দেখুন দেখি প্রভু, একবার ভাল ক'রে চেয়ে আমার মুখের পানে ? হেথায় সত্যই কি কোন পাপের—কোন অনাচারের—কোন অধর্মের চিহ্ন অঙ্কিত আছে ? না, না দেব—না । তা নেই—তা থাকতে পারে না ।

বিজ্ঞা । নারী, কুহক মন্ত্রে তোমরা সিদ্ধ । সকল রকম মোহিনী বিজ্ঞা তোমাদের করতলগত । তোমাদের মুখে মধু, অন্তরে বিষভরা সুবর্ণ কলসী । তোমাদের আপাদ মস্তক কপটভার ভরা । তোমরা না পার এমন কাজ জগতে নাই । তোমারই মত এক নারী ছলনায় প্রতারিত ক'রে, রামচন্দ্রকে বনে পাঠিয়ে নিজ পতির প্রাণ সংহার ক'রতে বিধা করে নি ; তোমারই

মত নারীর প্ররোচনার পূর্ণব্রহ্ম রঘুনাথ স্বর্ণ যুগের অস্ত্র লুক্ক  
হ'য়েছিলেন ; তোমারই মত নারী আমার প্রেমের ঠাকুরকে  
পায়ে ধরাতে, চরণতলে চূড়া বাঁশী রাখিয়ে লজ্জিত ক'রতে  
সঙ্কোচ করে নি। নারী, তোমাতে সবই সম্ভব, তুমি কাল  
নাগিনীর স্থায় দিব্য-দর্শন—কিন্তু সেই নাগিনীর মতই বিধ-  
বর্ষিনী। তোমার সান্নিধ্য পরিহার আমার এখনই কর্তব্য।

[ প্রস্থানোত্তত।

ললিতা। ( পদধারণ করিয়া ) পায়ে ধরি প্রভু, অকারণে—বিনা দোষে  
আমায় ত্যাগ ক'রে যাবেন না। আমি নিরপরাধ ; আমার  
অহেতু মর্শ্বপীড়া দিলে, সকল স্থায় অস্থায়ের বিচারকর্তা যিনি—  
যাঁর চক্ষে সকল কিছুই নিত্য প্রত্যক্ষ—যাঁর নিকট কোন  
কিছুই লুকান নাই—সেই সর্বসাক্ষী, সর্বজ্ঞাতা, সর্ববেত্তা  
নারায়ণের নিকট আপনি অপরাধী হবেন।

বিষ্ঠা। স্তব্ধ হও পাপীয়সী ! তোমার ঐ পাপ জিহ্বায় নারায়ণের  
পবিত্র নাম উচ্চারণ করো না। এখনি সেই গদাধরের ভীষণ  
গদা তোমার মস্তকে পড়বে ? চক্রপাণির চক্রে তোমার নাসা  
কর্ণ দেহচ্যুত হ'য়ে, তোমায় নির্লজ্জা রাক্ষসী সূৰ্পণখার দশা  
ঘটিয়ে দেবে।

ললিতা। তাই হোক—তাই হোক। যদি সত্যই আপনার মন  
আমায় কলঙ্কিনী ব'লে নির্দেশ ক'রে থাকে, তা হ'লে হে  
সর্বদেবময় স্বামিন্, আমি নিত্য নারায়ণ রূপে আপনার পূজা  
ক'রেছি—ধ্যান ক'রেছি, আপনি স্বয়ং স্বহস্তে আমার বিকলাঙ্গ  
ক'রে আমার পাপের দণ্ড বিধান করুন।

বিষ্ঠা। বিকলাঙ্গ ! ওঃ বিকলাঙ্গ ! নারী, তোমারই মত রমণীর অস্ত্র

শ্রীভগবান—আমার সাধের ধন—আমার হৃদের ধন—শ্রীভগবান  
বিকলাঙ্গ হবেন, আমার তিনি স্ব-মুখে একথা ব'লেছেন।  
পাপীয়াসী, তুমি—তুমিই কি সেই রমণী ? ওঃ—অগ্নি—অগ্নির  
জালা ! দূর হও—দূর হও জালামুখী, কালামুখী, কুলকলঙ্কিনী।  
আমি তোমায় পদাঘাতে বিদূরিত ক'রে, এ পাপ স্থান এই  
মূর্হর্তে পরিহার করলাম।

( ললিতাকে পদাঘাত করিয়া প্রস্থান। )

ললিতা। মাগো ! বসুন্ধরে, তুমি দ্বিধা হও—আমি তোমার গর্ভে  
লুকুই। জননি, একদিন সন্ধিদ্ধ পতির সংশয়ের লজ্জা হ'তে  
রক্ষা ক'রতে, নিজ নন্দিনী জানকীকে তুমি অঙ্ক দিয়েছিলে।  
আজ আবার তোমার এই কন্যা স্বামীর নিকট অবিখাসিনী  
ব'লে বিবেচিত হ'য়েছে। আমার এ জীবন ধারণে ফল কি  
মা ? দাও—দাও তোমার শাস্ত শীতল অঙ্কে এ কলঙ্কিনী  
কন্যার জন্ম এতটুকু স্থান দাও মা !

লীলাধরের প্রবেশ ও গীত।

ইমণ কল্যাণ—ফেরুতা।

লীলাধর—সজলে নয়নে ধরণী শয়নে কি ফল ভাগিনী ?

ভাসি অ'ধি নীরে পাইবে কি ফিরে তারে, হা হতভাগিনী !

ললিতা—দেবতা ঠেলেছে চরণে, জুড়াইব জালা মরণে,

শুনি নি পতির সোহাগ বচন মৃত্যু শুনাবে শাস্তির রাগিনী ॥

লীলাধর—মরণে মিলিবে শাস্তি, কেন এ মনের ভ্রাস্তি,

মরণে যাবে না মরম বেদনা, ( শুধু ) হবে কলঙ্ক-ভাগিনী ॥

ধরায় এসেছ যবে            কত না সহিতে হবে  
তবে সে শান্তি পাবে ।

তুমি কি জান না কত লাঞ্ছনা, সহি' ব্রজাঙ্গনা,  
হ'লো কুম্ভ প্রেম সোহাগিনী ?

ললিতা—কোথা কালাচাঁদ, আছ কোথা,  
ঘণিতা, দলিতা, অভাগী ললিতা  
নিজ গুণে তারে কর তব অমুরাগিনী ॥

### চতুর্থ গর্ভাঙ্ক ।

সমুদ্র-বন্ধ ।

জলে দারুমূর্ত্তি ভাসমান ।

সমুদ্র ।

সমুদ্র । অশেষ করুণা-সিক্কো—দীনবন্ধো—আজ তোমায় বন্ধে ধারণ  
ক'রে, আমার তাপিত বন্ধ শীতল হ'লো । তুমি নিজে চ'লেছ,  
নিজের লীলায়—নিজের খেলায়—নিজের দেহখানি হেলিয়ে  
ছলিয়ে, নাচিয়ে নাচিয়ে, আর জগদ্বাসী দেখছে, আমি তোমায়  
ব'য়ে নিরে যাচ্ছি রাজা ইন্দ্রচ্যবের রাজধানী অবন্তীপুরে ।  
চমৎকার ! জগন্নাথ, তোমার এ লীলায়িত নর্ত্তন ভঙ্গি, এ  
অপরূপ লাস্ত্র মাধুরী দেখে, আমার মনে মনে গর্ভ বোধ হ'চ্ছে,  
বুঝি বা আমি আজ তোমার সেই স্নেহময়ী, সুধাময়ী জননী  
যশোদা—যাঁর কোলে তুমি নিত্য নাচতে এমনই মোহন ভঙ্গিতে  
—এমনি মধুর ছন্দে ! ( করতালি দিয়া ) নাচ—নাচ বনমালি—

নাচ । আমার করতালির তালে তালে—আমার হৃদ-স্পন্দনের  
 ঘাতে ঘাতে—আমার আবেগ ভরা প্রতি অঙ্গের পুলক-কম্পনে  
 —নাচ কালাচাঁদ—নাচ নীলমণি—নাচ নীলমাধব ।

[ প্রস্থান ।

তরঙ্গমালার গীত ।

গজল—তালফেরুতা ।

দারুবশে যাচ্ছে ভেসে জগবন্ধু সিন্ধু জলে ।  
 নীলমণি আজ নীল সাগরে, নীলে নীলে খেলা চলে ॥  
 আজ ক'রেছে মোদের দেহে ভর  
 বিশ্বপতি বিরাট বিশ্বস্তর,  
 ধরেছি আজ তাঁরে ষখন, ছাড়ব' না ত' কোন ছলে ।  
 মিটিয়ে নোব মনের যত সাধ,  
 কেমন ক'রে পালায় দেখি কপাট কালাচাঁদ,  
 ধরব' ছেঁদে গলাটা তাঁর লহর ভূজে কুতূহলে ;—  
 বিরাগে মুখ ফিরায় যদি, মরব' তাঁর-ই চরণ তলে ।

## পঞ্চম অঙ্ক

### প্রথম গর্তাঙ্ক ।

অবন্তীপুর—বাঁকি মোহনা ।

নাগরিকগণ ।

১ম নাঃ। এম্নি ধারা হা পিত্যেস্ ক'রে, আর কতদিন সমুদ্রের ঢেউ  
গুণবো ! নীলমাধব সমুদ্র তরঙ্গে ভেসে ভেসে এই বাঁকি  
মোহনার লাগবেন—মহারাজের মুখে এই সংবাদ শুনে অবধি  
ত', রাজ্যশুদ্ধ লোক, দিনের পর দিন, এই জায়গায় এসে  
প্রতীক্ষা ক'রছে । কে জানে কতদিনে ঠাকুরের দয়া হবে ।

২য় নাঃ। তুমিও যেমন দাদা ! ঠাকুর আসবেন জলে ভাসতে  
ভাসতে ! কেন, তিনি স্থল পথে আসতে পারেন না ? তাঁর  
পারে কি হয়েছে—যে হেঁটে আসতে তাঁর কষ্ট হবে ? ও সব  
কিছু নয় ; মহারাজ নীলমাধবের সন্ধান ক'রতে গিয়ে বিফল  
হ'য়ে ফিরে এসেছেন, এখন কি আর বলেন—রাজ্যে কেমন  
ক'রে মুখ দেখান—তাই ঐ রকম উদ্ভট একটা কথা রটিয়ে  
দিয়েছেন ।

৩য় নাঃ। ছিঃ ! অমন কথা মুখে আনিস্ নি । আমাদের মহারাজ  
মহাভক্ত । তিনি রাজ্য ছেড়ে—সংসার ছেড়ে বেরিয়ে গেছিলেন  
ঠাকুরের সন্ধানে, আর তাঁর নামে এই কুৎসা রটাতে তোঁর  
লজ্জা হয় না ? বিশেষতঃ এ ভাবে রাজ্য নিন্দা ক'রলে, তোঁর



নিজের প্রাণ সংশয় হওয়া অসম্ভব নয়। রাজার নফর চারি-  
দিকে ফিরছে জানিস্ ত' ? এখনি কেউ যদি তোকে—  
২য় নাঃ। হ'য়েছে—হ'য়েছে। বলে “সচ্ কও—ত' ধাকা খাও”।  
রাজ-রাজড়ার কথা, বড় ঘরের কথা, মুখ ফুটে ব'ল্লেই—প্রাণ  
সংশয়। এখন তোমাদের মথ থাকে নীলমাধব দর্শন ক'রতে—  
এই ঠিকে রোদে তাতা বালির উপর দাঁড়িয়ে দেখ। আমি  
চলুম—গরু গুলোকে জল দেখাই গে।

[ প্রস্থান।

৪র্থ নাঃ। মনে একটা সন্দেহ—একটা নিরুৎসাহের ভাব জাগে বটে।  
অনেক দিনই ত' এই রকম আশায় আশায় কাটলো।

৩য় নাঃ। ওহে বাপু, ভগবৎ দর্শন এত সোজা, এত সহজ নয়। তার  
জন্ত একটু কষ্ট স্বীকার ক'রতে হয়। এ ত' আর ইন্দ্রিয়-মুখ নয়,  
যে ঝাঁ ক'রে লাভ হয়ে যাবে। এ যে মনের ভিতরের, অন্তরের  
অন্তরের ব্যাপার। আনন্দময়কে নিয়ে আনন্দ করা একটু  
কঠিন বৈ কি !

১ম নাঃ। তা, এ রকম চূপ চাপ্ দাঁড়িয়ে থাকলে—বাজে কথা কাটা-  
কাটি চ'লবে—আর মনেও সংশয় জাগতে থাকবে। তার  
চেয়ে এস, সবাই মিলে ঠাকুরের নামাঙ্কীর্তন ক'রে তাঁকে  
ডাকা থাক।

নাগরিকগণের গীত

ভৈরবী—একতাল।

আর লুকিয়ে থাকা চলবে না। ( ওহে হরি )

কাঙাল ডাকে সকাতরে তোমার আসন কি আর চলবে না ॥

শুনি তুমি দীনের ঠাকুর,—আমরা অতি দীন ;  
 জানি না হে তোমার সাধন আমরা ভজন হীন,  
 তবু দেখব কেমন মোদের ডাকে থাক' উদাসীন ;—  
 তুমি ভক্তে শুধু ক'রবে কৃপা, মোদের ডাকে গ'লবে না ?  
 তবে "পতিত-পাবন" "অধম-তারণ" নাম ত কেউ আর ব'লবে না ॥  
 ( ওহে দীনবন্ধু হরি ) ( ওহে কৃপাসিন্ধু হরি )

[ প্রস্থান ।

### ইন্দ্রদ্যুম্নের প্রবেশ ।

ইন্দ্র । নিরঞ্জন, অশুশোচনার অসুদর্দাহে আর কতদিন পোড়াবে !  
 আমার ঋণিকের দৌর্বল্য—নিমেষের মনশ্চঞ্চল্য কি তোমার  
 অনন্ত কৃপার কণামাত্র পেতে আজও সমর্থ নয় ? আমার  
 অনুতাপ কি এখনও তোমার চরণ কমল তপ্ত ক'রে তোলে নি ?  
 লীলাময়, আর লুকিয়ে থেকে না । আমি তোমার ভক্তের  
 প্রতি রুঢ় ব্যবহার ক'রেছি—তঁার নিকট হ'তে তোমার  
 ভোগার্থে সংগৃহীত দুগ্ধ সবলে কেড়ে নিতে চেয়েছি ; কিন্তু  
 এততেও কি তার শাস্তি হয় নি বনমালি ? আমার অমুরক্ত,  
 ভক্ত-ব্রাহ্মণ বিদ্যাপতিকে হারিয়েছি ; রাজ্যশুদ্ধ লোক আমার  
 প্রতি উপেক্ষা ভরে চায়,—মনে করে আমি স্তোক বাক্যে  
 তাদের ভুলিয়ে রেখেছি । তুমি এস' দয়াময়, এস' ! শাস্তির  
 স্নিগ্ধবারি সেচনে আমার তাপিত প্রাণ শীতল ক'রতে এস' ;  
 প্রদীপ্ত প্রত্যক্ষ মূর্তিতে আমার রাজ্য মধ্যস্থ অবিখাসের অঙ্ককার  
 নাশ ক'রতে এস' । সমুদ্রের জলে ভেসে আসবে তুমি মাধব !  
 আমি যে তৃষিত চাতকের দৃষ্টিতে প্রতিফণে ঐ বিস্মৃতিত,

আন্দোলিত, সাগর তরঙ্গের সংখ্যা নির্ণয় ক'রে ফিরছি,  
দয়ানিধি। জলধি যে আমার নেত্রজলে আরও পরিপুষ্ট হ'য়ে  
যাচ্ছে। কৈ, কত দূরে—কত পথে রয়েছ' তুমি প্রাণময় !  
এস', কূলে এস'—আর অকূলে থেকে, আমার অকূলে  
ভাসিও না।

[ প্রস্থান।

### শুভিচা ও জগাপাগলার প্রবেশ।

জগা। ছিঃ মা, নিরুৎসাহ হয়ো না। নিরাশা, নিরুদ্দম, নিরুৎসাহ—  
এ সব অন্ধকারের রূপ ; অবিশ্বাস ঐ সব মূর্তি ধ'রে দেখা দেয়।  
ভাব'—তিনি আসবেন—নিশ্চয় আসবেন। ভক্তের ডাক—  
এ ত' তাঁর কাছে উপেক্ষণীয় নয়। আসতেই হবে তাঁকে।

শুভিচা। বাবা, জানো ত' তুমি, রমণী স্বভাবতঃ দুর্বলা—তার মন  
স্বতঃই চঞ্চল। তার উপর মহারাজের এই দারুণ অবস্থা,—  
আমি যে মনকে আমার কিছুতেই মনের মত ক'রে নিতে  
পারছি না বাবা !

জগা। আরে বেটা পারবি বই কি ? পারবি—নিশ্চয় পারবি। তবে  
“আমি ক'রবো” বলে দস্ত দেখালে হবে না। বল',—ঠাকুর  
তোমার দেওয়া মন, তুমি আর সব দিক থেকে ফিরিয়ে, শুধু  
তোমার দিকে ক'রে নাও। আমি কে ? কতটুকু—কত নগণ্য !  
তুমি করাও করি, বলাও বলি, চলাও চলি। তুমি বাজাও  
আমি বাজি, তুমি নাচাও আমি নাচি ; তোমার ইচ্ছা হ'লে সব  
হয়। হে ইচ্ছাময়, আমার শক্তি দাও,—আমার বাসনা  
পুরণের শক্তি দাও।

শুভিচা। কৃপাসিদ্ধ, দেখা দাও—নিজগুণে দেখা দাও—আমার  
বাসনা পূর্ণ কর।

সমুদ্রে দারুমূর্তির আকির্ভাব।

জগাপাগলা।

গীত।

গজল—ফেবৃত্তা।

আকাশ বাতাস ব্যাপ্ত ক'রে মেহুর মধুর কল্লোলে,  
ঐ এলো সে নেচে নেচে নীল সাগরের হিল্লোলে।

মরি মরি মরি কি নাচ রে! কি প্রাণ মাতান, মন গলান,  
ভুবন ভোলান নাচ রে!—

গীত।

তুমি কি এমনি ধারা-ই  
ভেসেছিলে ক্ষীরোদ জলে বট-পত্র-শায়ী,  
না এমনি ধারা নাচতে তুমি যশোদার কোলে।

দেখ, দেখ মা দেখ! তুমি ষত আকুল আগ্রহে অপেক্ষা ক'রছ  
—তার কত গুণ অধিক ব্যাকুলতায় ঠাকুর আমার তোমার  
পানে ধেয়ে আসছে।

গীত।

গোঠের মাঝে রাখাল সাজে  
নাচতে কি হে এমনি ধাঁজে,  
দোল দোল দোল এমনি তনু ছলতো কি হে হিন্দোলে।

ধর ধর—নিয়ে চল' ঐ নীলমাধবকে তোমার নিশ্চিত দিব্য  
মন্দিরে, সেই বিশ্ববিশ্রুত পীঠ—সেই রত্নবেদীর উপর প্রতিষ্ঠিত  
ক'রতে ।

গীত ।

হে নাটুয়া ! আজকে আবার  
যে নাচে প্রাণ মাতাও সবার,

( যেন ) এই নাচেতে ধরার বক্ষ চিরদিন দোলে ।

শুণিচা । এ কি বাবা, এ কি ব'লছ তুমি ? এই কি সেই নীল-  
মাধব ? এ যে একটা প্রকাণ্ড নিম গাছের গুঁড়ি । এ যে  
একখানা কাঠ !

জগা । দূর আবেগের বেটী ! কাঠই শুধু দেখ্‌ছিস্, আর কিছু না ?  
ওগো, ঐ দারুদণ্ডেই যে এই ব্রহ্মাণ্ড-পতির চাকু মূর্তি ফুটে  
রয়েছে ! চোখ মেলে, মন খুলে দেখ্‌ দেখি ভাল ক'রে ।

শুণিচা । ঠাকুর, এ রহস্য বুঝতে পারি না, তাই মনে সন্দেহ জাগে ।  
ব্রহ্মাণ্ড-পতি যিনি, সামান্য কাঠ ধণ্ডে তাঁর অধিষ্ঠান কেমন ক'রে  
সম্ভব হয় ?

জগা । হয়—হয় । তুই বেটী এই ত' মানুষ ;—মাত্র চোদ পোয়া,  
লম্বো চোদ পোয়া—আর হাত দু'খানা বাড়িয়ে দিলে চওড়াও  
চোদ পোয়া । তুই কেমন ক'রে এত বড় বিশ্ব ব্রহ্মাণ্ডটা দেখ্‌বি  
বল । তাই তোমর জন্ত, তোমর শক্তি সামর্থের মত হ'য়ে, ঠাকুর  
আমার ক্ষুদ্র তনু, ছোট খাটটা হ'য়ে দেখা দিতে এসেছেন ।

শুণিচা । ঠাকুর ! ভগবান শুনেছি বিরাট—অনন্ত—অসীম । তিনি  
কেমন ক'রে ঐ একখানা কাঠ হ'য়ে এলেন !

জগা। ভগবানের শুধু ঐ বিশেষণগুলোই শুনেছ ? আর কিছু শোন নি ? তিনি সর্বব্যাপী—সর্বময়—সর্বৈশ্বর, এ সব বৃষ্টি শোন নি ? তিনি যে সর্বশক্তিমান ! তাঁর কি শুধু বড় হবার, বিরাট হবার শক্তি রে পাগলী ! তিনি “সর্ব” শক্তিমান । এই ‘সর্ব’ কথাটার অর্থ কি ? তিনি বড়—অতি বড় মহতোমহীয়ান—গরীয়তোগরীয়ান হবার শক্তি ধরেন : আবার ছোট—অতি ছোট—অনু-পরমানু হতেও পারেন । তাই না জগৎ স্রষ্টা কাল হতে সেই বিরাট-পুরুষ, অচিন্ত্য, অননু-রূপ, বিশ্ব-ভূপকে ছোট পটে, ক্ষুদ্র ঘটে, মৃৎপিণ্ডে, দারুদণ্ডে, শিলাখণ্ডে অধিষ্ঠিত দেখে আসছে । তাই না সেই মায়াতীত পরমাত্মাকে যশোদা দড়ি দিয়ে বেঁধেছিল, রাখালে উচ্ছিষ্ট খাইয়েছিল, গয়নার মেয়ে পারে ধরিয়ে কাঁদিয়েছিল ।

শুশিলা। বাবা, এ পাপিষ্ঠাকে তুমি এত ক’রে বোঝাচ্ছ. তবুও আমার মনে কি যেন সংশয় উদয় হচ্ছে ।

জগা। সন্দেহ, সংশয়, অবিশ্বাস—ও সব মন থেকে সরিয়ে দাও মা । তিনি আসব’ বলেছিলেন, এসেছেন । কি মূর্তিতে—কি রূপে, সে সব ভাববার দরকার কি ? রবি, শশী, গ্রহ, তারা, জল, স্থল, মরুৎ, ব্যোম, সারা জগৎ ব্যাপ্ত ক’রে আছেন সেই এক অবিচ্ছিন্ন, অননু-চিন্ত্য সত্ত্বা । ঐ দারুদণ্ডে অধিষ্ঠিত জেনে নিয়ে চল’ মা তাঁকে তোমার সেই সাধের মন্দিরে, যা লক্ষ লক্ষ ভাস্কর এত দিন ধ’রে নির্মাণ ক’রেছে—যা শিল্প-সম্পদে, শোভার বৈভবে, আরতনের বিশালত্বে—জগতে অতুলনীয় । নিয়ে চল’ মা, নিয়ে চল’ ।

জনতা সহ ইন্দ্রদ্যুম্নের প্রবেশ ।

জনতা । জয় মহারাজ ! জয় মহারানী !

ইন্দ্র । আর মহারাজ, মহারানীর জয় নয়, বৎসগণ । জয় দাঁও সেই রাজার রাজা বিশ্বরাজের । আমার অনুতাপ—অনুশোচনা—আত্মগ্নানি সব বিদূরিত ক’রতে, আজ তিনি এসে উদয় হয়েছেন আমার সামান্য রাজধানীতে । সকলে তাঁর জয়গান ক’রে পৃথিবী প্রকম্পিত ক’রে তোল ।

মন্ত্রী । কৈ কৈ ! মহারাজ, কোথায় সেই ঠাকুর নীলমাধব ?

ইন্দ্র । ত’ জানি না । আমার চক্ষু এখনও সে বিগ্ৰহ দর্শনের সৌভাগ্য পায় নি । কিন্তু বকসিত পুষ্প পল্লবে লীন থাকলেও, তার গন্ধেই তার সংবাদ জগতে প্রচারিত হয় । আমি তাঁর চরণ কমলের আশ্রয় পাচ্ছি । অন্তর আমার ব’লছে, তিনি এসেছেন—এসেছেন ।

জগা । দেখতে পাচ্ছ না, মন্ত্রী মশায় ? ঐ যে ঠাকুর আমার সাগর তরঙ্গে নেচে নেচে সবাইকে মাতিয়ে তুলছে ।

মন্ত্রী । কি—ঐ কাঠটা ?

জগা । ছিঃ ! তোমারও মুখে ঐ কথা ? কাঠ কি ? বল “দারুব্রহ্ম” ।

মন্ত্রী । মহারাজ মহারানীকে দেখছি তুমিই সারবে ঠাকুর । ভগবানের কি খেয়ে দেয়ে কাজ নেই, তাই তিনি তোমার ভক্তির স্তোত্র কাঠ হ’রে এসে হাজির হ’লেন ?

১ ম নাঃ । মানুষ ত’ ভয়েই কাঠ হয়—ভগবান কি ভক্তিতেও কাঠ হন নাকি ?

জগা । ওহে হন—হন । তিনি সবই হন । এই তুমি সে দিন, তোমার নাতির আশ্রয় রাখতে, ঘোড়া হ’রে তাকে পিঠে

নিরেছিলে না ? তা তোমার মত অঁকড়া মদ—রাজ দরবারের একজন হোমরা চোমরা ধনুর্ধর—যদি নাতির জন্যে ঘোড়া হ'রে লাগাম পরতে, চাবুক খেতে পারে, ত' ভক্তের মনোরঞ্জনের জন্ত—তার প্রবোধের জন্ত ভগবান একটা রূপ পরিগ্রহ ক'রতে পারেন না ? খুব পারেন—নিশ্চয় পারেন। রাজা, রাজা, আর অথবা কাল-ব্যাজে লাভ নেই। লোক লঙ্কর ডাক, তারা এসে ঠাকুরকে তুলে নিয়ে যাক। কতক্ষণ আর প্রভু আমার এখানে প'ড়ে থাকবেন ?

২য় সভা:। লোক লঙ্করের অভাব নেই—এই ত' একদল নাগরিক।

ওদের দিয়ে তুলিয়ে নিয়ে যাওয়া যাক না।

ইন্দ্র। ভাল, তুমি ব্যবস্থা কর' ভাই।

[ ২য় সভাসদের প্রস্থান।

মন্ত্রী। কাঠখানা পেল্লার বড়; অল্প লোকের সাধ্য নয় যে ওকে তোলে।

১য় স:। এ কি! ওরা যে এক পা-ও নড়াতে পারলে না ঐ কাঠখানাকে।

ইন্দ্র। তাই ত', কি আশ্চর্য ব্যাপার।

২য় সভাসদের পুনঃ প্রবেশ।

২য় সভা:। নগর শুদ্ধ লোক ভেঙ্গে পড়েছে ঐ দারু দণ্ডটা তুলে নিয়ে যেতে, কিন্তু কি অদ্ভুত ব্যাপার মহারাজ, সে কার্য সমাধা কিছুতেই হ'চ্ছে না। কাঠ খণ্ডকে কেশ পরিমিত স্থানও নড়ান যায় নি।

শুশ্রীচা। বিচিত্র কথা! রাজ-বাহিনীর সমস্ত হস্তী ও অশ্ব নিয়ে ভক্ত, তাদের সমবেত শক্তিতে ঐ কাঠ স্থানান্তরিত কর।



জগা। মা, শারীরিক শক্তি—দৈহিক বলের কৰ্ম নয়। ভক্তির জোরে ভগবানকে নিয়ে যেতে হবে। ভক্তি-বিহীন চিন্তে তুমি আর রাজা ধর, তা হ'লেই ঠাকুর আমার হাসতে হাসতে যেতে থাকবেন।

শুশিলা। বাবা, তোমার উপদেশ শুনেও আমার মন সংশয়-পাশ হ'তে মুক্ত হ'তে পারে নি। আমি ঐ কাষ্ঠ খণ্ডে শ্রীভগবানের অধিষ্ঠান এখনও কল্পনা ক'রতে পারছি না। আমার অন্তরে ভক্তি কৈ, যে আমি ওকে ধরতে যাব বাবা ?

জগা। বটে। আর তুমি রাজা ?

ইন্দ্র। ভাই, আমি আপনার দোষে সে পথ রোধ ক'রেছি। শ্রীভগবানের নিজের মুখের বাণী—তিনি আমার মত দান্তিকের সঙ্গে যাবেন না।

জনতা। সেই ক্ষেপা বাগুন ফিরেছে। বিদ্যাপতি ঠাকুর আসছে।  
বিদ্যাপতি—

### বিদ্যাপতির প্রবেশ।

বিদ্যা। জগবন্ধু, কোথা তুমি! আমি যে অহুর্দাহে দগ্ন হচ্ছি। শান্তিময়, আমার হৃদয় শান্ত কর'—আমায় শান্তি দাও।

শুশিলা। এই যে পুত্র আমার। নিষ্ঠাবান, ভক্তিপরায়ণ-বিশ্ব, তুমি চেষ্টা ক'রলেই এ বিপদ হ'তে আমরা উদ্ধার পাই। তুমি নিয়ে চল', তোমার ভক্তির রঞ্জু আকর্ষণ ক'রে, ঐ দারুণপী বিশ্বস্তরকে।

বিদ্যা। কৈ, কৈ সে জগন্নাথ ? আমি যাব, তাঁরে আমার বুকে ধ'রে তুলে নিয়ে।

জগা

গীত ।

সাহানা মিশ্র—লোফা ।

তুই কাণাকে পথ দেখাবি কি, তোর নিজেরই যে চক্ষু বোজা ।

পরের বোঝা বইবি কি তুই, তোর ঘাড়ে আছে মস্ত বোঝা ॥

তুই নিভাবি কি বাইরের আগুন,

তোর বুকে জ্বলছে চিতা তার যে শত গুণ,

তুই অঁধার দেখে অঁধকে উঠিস্ কেমন ক'রে হ'বি ওঝা ॥

কেমন ক'রে ধরবি তরীর হাল,

তুফান দেখে নিজেরই যে তুই হয়েছিস্ বেহাল ;

এই অঁকা বাঁকা মন নিয়ে তোর সোজা পথ কি দেখা সোজা ॥

বিজা । সত্যই ত' । আমি এত দুর্বল, এত অবসন্ন হ'য়ে গেলুম

কেন ? হস্ত পদ যে অসাড়, অনড় হ'য়ে গেছে । এ কি

হলো ! এ আমার কি হলো !

জগা । ঠাকুর, বুঝতে পারছ না—কেন ? তুমি যে দম্ভের বশে,

অজ্ঞতার আতিশয্যে, তোমার নিজের শক্তিকে অবজ্ঞা ক'রে—

লাঞ্ছিতা, অপমানিতা ক'রে চ'লে এসেছ' । শক্তি তোমার আর

ধাকবে কেন ? তুমি যে তাকে পদাঘাতে দূর ক'রে দিবেছ' ।

বিজা । আপনি কি ক'রে জানলেন—আমি আমার শক্তির অমর্যাদা

ক'রেছি ?

জগা । আমি জানি । যা যে আমার কেঁদে কেঁদে ফিরচে । তার

রোদনের স্বর যে সমস্ত ব্রহ্মাণ্ডের আকাশ বাতাস ব্যাপ্ত

ক'রে দিবেছে । নিষ্ঠুর, তোমার নির্ধম ব্যবহার যে তোমার

আগার মস্তক কলুষিত ক'রে দিবেছে । তুমি তোমার

সহধর্মিণীকে, সেই সরলা সুশীলা ভক্তির মূর্ত্ত-প্রতিমাকে কেমন  
অকারণে মর্শ্ব-পীড়া দিয়ে এলে, দম্ভের অবতার ?

বিজ্ঞা । সে যে ভ্রষ্টা—কুলটা—পাপীয়সী । তাই তাকে পদাঘাতে  
দূর ক'রে, তার পাপের সমুচিত শাস্তি দিয়ে এসেছি ।

জগা । না—না—না । সতী-সাধ্বী সাবিত্রী সে, তাকে লাঞ্ছনা করে  
তুমি তোমার নিজের পাপের পথ প্রশস্ত ক'রেছ । এখন  
বুঝতে ত' পারছ, শক্তি তোমার দেহে আদৌ নাই । যাও  
ভ্রান্ত, দর্পাক্ষ. মূঢ়—যাও তুমি তোমার সেই সহধর্মিণীর নিকট,  
আমার জননীর নিকট, তোমার কৃতকর্মের জন্ম ক্রমা ভিক্ষা  
ক'রতে । তার মার্জনা বা গীত তোমার গতি নাই ।

বিজ্ঞা । সত্য কি ? এক নীচ শবর কন্যা—তার এত ক্ষমতা ?

জগা । নারীর ক্ষমতা । জান না তুমি ব্রাহ্মণকুমার, আত্মশক্তি রমণী  
মূর্ত্তিতে জগতের গৃহে গৃহে পূজিতা । মহাশক্তি মা কচের ঘরে  
কুচ-রমণী হয়েছিলেন । গোয়ালিনী রূপে গোপের গৃহে বিরাজ  
ক'রতেন গোবিন্দ-প্রিয়া, নিখারাধ্যা রাধিকা । জগতে সকল  
শক্তির প্রতীক যে নারী ।

বিজ্ঞা । সর্বজ্ঞ মহাপুরুষ, আপনি যথার্থ ব'লেছেন । আমি আমার  
পাপের প্রায়শ্চিত্ত ক'রতে এখনি চল্লাম—সেই লাহিতা, উপে-  
ক্ষিতা শবর-ছহিতার শরণ গ্রহণে ।

শুভিচা । বৎস, আমাদের উপায় কি হবে ? আমার শ্রীমন্দির শূন্য  
প'ড়ে র'য়েছে ; তুমি ভিন্ন কে তা'তে নীলমাধবকে বসাবে ?

ইন্দ্র । বন্ধু, আমার হৃর্তাগ্য আজ নানা বাধা বিয়ের মূর্ত্তি ধ'রে  
আমার উদ্দেশ্য সাধনের অন্তরায় হ'রে দাঁড়াচ্ছে । এ সেই  
নীলমাধবের অমোঘ বাণীর প্রতিক্রিয়া ।

জগা। না হে, না। নীলমাধবের উপর দোষ চাপিয়ে দিয়ে, কেন নিজেকে মন্দভাগ্য মনে ক'রছ ? তুমি পরম ভাগ্যবান, তা'তে সন্দেহ নাই। তবে তোমার রাজ্যে সংশয়, সন্দেহ, অবিশ্বাস রাজত্ব ক'রে বেড়াচ্ছে ; তাই এই অন্ধকার পুরে আমার ঠাকুর আসতে প্রস্তুত নয়। তুমি এ রাজ্য ব্যাপী অপ্রত্যয়, অবিশ্বাস দূর কর'—দেখবে, সে ঠিক আসবে—আসবে—আসবে।

ইন্দ্র। তাই কি—তাই কি ?

মন্ত্রী। ও পাগলের পাগলামী, মহারাজ।

দৈববাণী।

দৈব। রাজা ইন্দ্রচান্দ্র, ব্রাহ্মণ উন্মাদ নয়। তোমার রাজ্যে আমার প্রবেশের বাধা কি, তা উনি যথার্থ নির্ণয় ক'রেছেন। সংশয়, সন্দেহ যেখানে, সেখানে আমি মূর্ত্তের তরেও যাই না।

ইন্দ্র। এ সংশয়ের পাশ আপনি ভিন্ন কে ছিন্ন ক'রবে প্রভু ?

দৈব। ভক্তবীর বিশ্বাসনু। রাজন, তুমি তাকে সত্বর তোমার রাজধানীতে নিয়ে এস। তার ভক্তির প্রবাহে এ রাজ্য-ব্যাপী অবিশ্বাস দূর হবে। আর সেই অকপট বিশ্বাসী মহাপুরুষের স্পর্শ ব্যতীত, আমার ঐ দারুণ কলেবর স্থানান্তরিত হবে না। তুমি তাকে দিয়ে, এই কাঠ খণ্ড রাণী গুণ্ডিচার নব-নির্মিত-মন্দিরে নিয়ে গিয়ে আমার বিগ্রহ প্রস্তুত করিও।

জগা। ওনলে ত', রাজা ? এখন লোক পাঠাও সেই ভক্ত-সাধক বিশ্বাসনুর কাছে। তুমি নিজে গিয়ে কাজ নেই—এখানের কাজের তার অনেক তোমার উপর র'য়েছে। কে যার ?

বিদ্যা। মহাপুরুষ, আমি যাব। আমি যাব, সেই উপেক্ষিতা—  
লাঞ্ছিতা—পদাহতা শবর-কণ্ঠার নিকট মার্জনা ভিক্ষা ক'রতে !  
চিরদিন রমণীর উপর বিদ্বেষপরায়ণ হ'য়ে যে অন্ময় ক'রেছি,  
তার প্রায়শ্চিত্ত ক'রতে ! আর আমার সেই ভক্তিমতি ভার্যার  
স্বপ্নের বাস্তব নিদর্শন রূপে আনতে—এই অবস্খীপূরে, সেই  
পরম ভক্ত, সেই বিশ্বাসের মূর্ত্ত-অবতার, সেই শবরোত্তম—  
বিশ্বাবসুকে ।

জগা। সাবাস্ সাবাস্ ! আর কি মহারাজ, এই ত' যাবার ঠিক  
লোক পাওয়া গেছে। যাও, যাও বেরিয়ে পড়'—শ্রীহরি স্মরণ  
ক'রে বেরিয়ে পড়' ।

বিদ্যা। শ্রীহরি—শ্রীহরি—

[ প্রস্থান ।

জগা। ও ত' চ'লে গেল। তোরা এখানে দাঁড়িয়ে কি ক'রবি।  
আর সকলে মিলে সমস্বরে তাঁর করুণা ভিক্ষা করি। সকলে  
ডেকে তাঁকে চঞ্চল ক'রে তুলি। ও রে তোরাও আয়—আয়,  
এই আহ্বানে যোগ দিবি আয় ।

নাগরিকগণের প্রবেশ ও গীত ।

শুক টোড়ি—ঠুংরি ।

পঙ্কু জনে শক্তি দাও, অন্ধে দেখাও আলো ।

তাপিত তৃষিত কণ্ঠে তুমি প্রেম-সুধা ঢালো ॥

সংশয়ের পারাবার !

তুমি পারে লও তার ;

অবিশ্বাসী, অঁধার হৃদে তোমার আলোক আলো ॥

বিপথে ধরিয়া হাত

চল তুমি সাথে সাথে ;

রাঙা হ'য়ে উঠুক তোমার পরশে যত কিছু আছে কালো ।

ফুল হ'য়ে ফুটুক কঠিন কাঁটা, মন্দ যত হোক ভালো ॥

[ সকলের প্রস্থান ।

যমের প্রবেশ ।

যম । তবু ভাল । নিরাশ হৃদয়ে তবু ক্ষীণ আশার সঞ্চার হ'য়েছে । এই ভাবে রাণী গুণ্ডিচার মনে সংশয়ের অবিশ্বাস বদ্ধমূল হ'লে, ভাব-রূপী ভগবানের আবির্ভাব স্বদূর পরাহত হবে নিশ্চয় । তা হ'লেই আমার উদ্দেশ্য সিদ্ধ হ'বে । তা হ'লেই আমার উদ্বেগ — আশঙ্কা — সব লোপ পাবে । তা হ'লেই মর্ত্যলোকে আমার অধিপত্য অক্ষুণ্ণ থাকবে । সে যা হোক — যাতে রাণীর এই সন্দিক্ত মন কিছুতে আর বিশ্বাসের আলোক দেখতে না পায় — যাতে তার হৃদয় হ'তে শ্রদ্ধা ভক্তির নাম পর্য্যন্ত বিলুপ্ত হয় — বিহিত বিধানে আমার সেই চেষ্টা ক'রতে হবে । সর্ব্ব প্রথমে আমার সেই কার্য্যে তৎপর হ'তে হবে । “বিশ্বাসে মিলয় বস্ত, তর্কে বহুদূর ।” এই বিশ্বাসহারা ক'রে, রাজার অন্তরে বিবিধ কু-তর্কের সৃষ্টি ক'রে, আমার স্বকার্য্য সাধন ক'রতে হবে । দেখি এবার সফল-কাম হ'তে পারি কি না !

[ প্রস্থান ।

দ্বিতীয় গর্ভাঙ্ক ।

নীলাচল ।

ললিতা ও বলভদ্রা ।

বল । এমন সর্বনাশ সাধ ক'রে কি কেউ করে দিদি ! এমন  
সোণার অঙ্ক পুড়িয়ে নষ্ট ক'রেছ ?

ললিতা । ঠিক ক'রেছি । যে রূপ আমার স্বামী-দেবতার সেবার  
লাগলো না, বরং যা দেখে তাঁর মনে সন্দেহের সঞ্চার হ'ল,  
সে সর্বনেশে রূপের এই-ই যথার্থ পরিণাম ।

বল । সে বায়ুন পাগল । পাগলামী ক'রে সে একটা কি ব'লেছে,  
কি ক'রেছে, তার ভুল তোমার এতটা করা ভাল হয় নি ।

ললিতা । বোন, থাম' তুমি । “পাগলের পাগলামী—” “সামান্য কি  
একটা”—এ সব আমিও ভাবতে চেষ্টা ক'রেছিলুম । কিন্তু বল'  
দেখি বোন, রমনীর সত্য সত্য সন্ধানে সন্ধিহান হওয়া—সত্যই কি  
“সামান্য ব্যাপার” ? স্বামীর উপেক্ষা, কটক্টি, পদাঘাত—  
পাগলের পাগলামী হ'লেও, নারীর প্রাণে সে সব কত আঘাত  
করে । তা ছাড়া আমি ত' ভুলতে চেয়েছিলুম ; যথাসাধ্য—  
না সাধ্যাতীত চেষ্টাও ক'রেছিলুম ; কিন্তু শাস্তিসদন মধুসূদন  
যে আমার মনের অশান্তি দূর ক'রলেন না—আমার বে সে  
অপমান, সে লজ্জার কথা এক নিমেষের তরেও ভুলতে  
দিলেন না ।

বল । তাই ব'লে দিন রাত এই গোড়া-ঘায়ের আলা সহ ক'রতে  
হ'চ্ছে ত' ?

ললিতা । বোন, যে অন্তর্দাহে আমি নিশিদিন দগ্ধ হচ্ছি, তার কাছে

এ জালা কত সামান্য—কি নগ্ন, তা আমি বই বুঝবার ভাগ্য আর যেন জগতে কারো না হয়। তাই ভেবেছিলুম, রূপের মুখে আশুন.দিতে পারলে, বাইরের দেহের যন্ত্রণার ফলে আমি অন্তরের যন্ত্রণার হাত হ'তে নিষ্কৃতি পাব। কিন্তু এখন দেখছি—না, বাইরের জালা বাইরেই জুড়িয়ে যায়, অন্তর্দাহে সে এতটুকুও প্রলেপ দিতে পারে না। তবু—তবু বোন, আমার মনে এখন একটা সাস্থনার আশা জাগছে।

বল। কি, কি দিদি ?

ললিতা। একবার—একবার যদি আমি তাঁর দর্শন পাই—তা হ'লে—তা হ'লে তাঁকে আমি দেখিয়ে দিই, যে এই দেহটাই আমার সর্বস্ব নয়,—এটা নষ্ট হ'য়ে গিয়েও, এর মধ্যে যেটা বর্তমান আছে—সেইটাই যথার্থ আমি। সেটা নিষ্পাপ, নিষ্কলঙ্ক, জ্যোতির্শ্বর। আর এইটা যদি তাঁকে আমি একবার ঠিক মত বোঝাতে পারি, তা হ'লে আমার এ অন্তর বাইরের সব জালা তাঁতে সংক্রামিত হবে নিশ্চয়। তখন বত জলুতে থাকবেন তিনি, আমার জালাও শীতল হ'তে থাকবে ততখানি, বোন।

নীলান্বরের প্রবেশ।

নীলা। দূর পাগলী, তাও কি কখনো হয় ? জালায় কি কখনো জালা নিভায় ? বাড়ে—বরং বাড়ে। তোমার জালা যদি জুড়োতে চাও, ত' বার যেখানে যে ব্যথা, যে জালা আছে সব জুড়িয়ে দিতে চেষ্টা কর, দেখবে তোমার সব জালা যন্ত্রণা জুড়িয়ে জল হ'য়ে যাবে।

ললিতা। কি ব'লছ' তুমি, বাতুল ?



নীলা । আমি বাতুল ? সাবাস্ ! আমি দেখছি তুমিই ত' জ্ঞানহারা  
—বুদ্ধিহারা—ভক্তিহারা । সত্যিই যদি কেউ বাতুল থাকে—  
সে তুমি ।

ললিতা । কি রকম ?

নীলা । তোমার সেই রূপ, সেই হৃদে আলতায় গোলা রং, সেই  
নিটোল নখর গঠন, সেই চাঁদপানা মুখ, সেই টানা টানা চোখ  
সব তুমি নষ্ট ক'রলে, কেন বল' দেখি ?

ললিতা । “কেন” সে কথা ব'লে প্রকাশ করবার নয় । সে কথার  
সঙ্গে আমার কুল, শীল, মান, মর্যাদা, ইহকাল, পরকাল সব  
জড়িত আছে । সে কথা আমি ব'লতে পারব' না ।

নীলা । ভাল, নাই পারলে । কিন্তু সেই রূপ নষ্ট করবার তোমার  
অধিকার কি ? তোমার রূপ কি তুমি নিজে রোজগার  
ক'রেছিলে ? সে কি তোমার নিজের ইচ্ছায়, কি চেষ্টায়  
তোমার দেহে এসেছিল ? সে ত' আর একজনের দেওয়া  
সামগ্রী—গচ্ছিত ধন, তুমি তাকে নষ্ট ক'রলে কোন্ আক্কেলে ?

ললিতা । কি ব'লছ তুমি, নীলাস্বর ?

নীলা । ওগো, রূপ ত' বিশ্বরূপের দান—ঐশ্বর অবাচিত করুণার  
উজ্জ্বল নিদর্শন । তুমি সে রূপ পুড়িয়ে ছাই করবার কে ?

ললিতা । তাই ত' ।

নীলা । এতে তুমি শুধু নিরুদ্বিতার পরিচয় দাও নি, নিজের শাস্তির  
পথ হেলায় রোধ ক'রেছ । “শাস্তি দাও” বলেই কি শাস্তি  
পাওয়া যায়, দিদি ? শাস্তিময়ের উপর বরাং দিয়ে, ঐশ্বর দেওয়া  
সকল কিছুই মাথায় তুলে নিতে পারলে, তবে না শাস্তি ।  
মান সম্মান যার সৃষ্টি, নিন্দা ঘৃণাও যে ঐশ্বরই গড়া । আলোক

ধীর তৈরী, অন্ধকারও যে তাঁরই রচা। এটা চাই না, ওটা চাই, এ ব'লে হাতড়ালে কি কিছু মেলে? তিনি যা দেন তাই নাও, দেখবে মজা কত। ও দিদি, তিনি শিং দিলে মাথা পেতে নিতে হয়, ঘুণা উপেক্ষা দিলে নিতে হবে না?

ললিতা। ভাই, ভাই, আমার অন্ধকার যেন কেটে আসছে। আমি আমার মোহ—দুর্ভলতা—ভ্রান্তি সব বুঝতে পারছি। সত্যিই ত' আমি মনের দুর্ভলতায়—নিমেষের উন্মাদনার কি সর্ব-নাশই না ক'রেছি। আমার স্বামী আমার অবজ্ঞা ক'রেছেন, তা'তে আমার কি ক্ষাত হ'য়েছিল! আমি কেন বুঝি নি, অপকলঙ্ক কখনও চিরস্থায়ী হয় না। কেন ভাবি নি, বহুপতি জনার্দন স্বয়ং শ্রীকৃষ্ণকেও মণিহরণের কলঙ্কভাগী হ'তে হ'য়েছিল; কিন্তু সে মিথ্যা রটনা ক'রিলে লোক মুখে শ্রুত হ'য়েছিল! ভাই, ভাই, আমার জ্ঞান-চক্ষু উন্মীলনকারী মঙ্গ-পুরুষ, আমার অপরাধ হ'য়েছে—শ্রীভগবানের চরণে অপরাধ হ'য়েছে। তুমি আমার প্রায়শ্চিত্তের বিধান কর—আমার মুক্তির যুক্তি দাও।

নীলা। বটে, প্রায়শ্চিত্ত পিপাসা তোমার অন্তরে ছেগেছে! ভাল, ভাল। আচ্ছা মনে কর, যদি তোমার স্বামী, সেই বিজাপতি এখানে এসে উপস্থিত হয়, তা হ'লে তুমি তাকে নিরে কি কর?

ললিতা। তুমি ব'লে দাও কি ক'রব?

নীলা। আমি ব'লে দোব কি? তোমার মন কি ক'রতে চায়?

তোমার বাসনা কি বল' না?

ললিতা। আমি ত' তাঁর সেই রূঢ় আচরণ, সেই নির্দয় কঠোর

বচন এখনও উপেক্ষা ক'রতে পারছি নি। তাই আমার মন  
 প্রাণ ত' এখনও তাঁকে ক্রমার চক্ষু দেখতে পারবে না, ভাই !  
 নীলা। পারতেই হবে। ক্রমা তাকে ক'রতেই হবে। ক্রমা করা  
 চাই। তোমার অন্তরে এখনও রিষের বিষ জমে আছে,  
 তাই না এ কথা ব'লছ'। কিন্তু পাগলী দিদি আমার, তাঁকে  
 ডাক না—তাঁকে বল না—“ঠাকর তোমার কৃপায় কালসাপের  
 বিষ মৃত-সঞ্জীবনী সুধায় পরিণত হয়, আর আমার এ রিষের  
 বিষ, এই অন্তরের হলাহল কি মুছবে না”। জানাও—জানাও  
 দেখ্বে তাঁর কৃপায় সব সম্ভব হবে।

ললিতা। হে হরি, হে সর্বতাপ—সৰুজালা—সর্বব্যথাহারী হরি,  
 আমার অন্তরের তাপ, প্রাণের বাথা, মনের সন্তাপ দূর কর  
 কৃপানিধি। তোমার কৃপায় সব হয়। আমার প্রতি—এই দীনা,  
 হীনা, কান্দালিনীর প্রতি কৃপা বিতরণে বিমুখ থেকে না  
 নিরঞ্জন।

### নীলাধরের প্রবেশ।

নীলা। বড় জালা—জলে গেলুম—পুড়ে গেলুম। দিদি, দিদি—জলে  
 পুড়ে থাক্ হ'রে গেলুম যে। ওঃ এ কি তাপ—অন্তরে বাইরে  
 এ কি নিদারুণ যন্ত্রণা !

ললিতা। ভাই, ভাই, এ তোমার কি হ'ল ভাই ? তোমার অন্তরে  
 বাইরে জালা ? তুমি জলে পুড়ে যাচ্ছ ? সে কি, কেন ভাই ?

নীলা। ধরা প'ড়ে গেলে ভাই। লুকিয়ে থাকতে পারলে না। এক  
 স্তর  
 অঁচড়েই চেনা দিয়ে ফেললে ?

লীলা। রোদের তাতে দেহ আমার পুড়ে যাচ্ছে—তাই আমি জলে  
 যাচ্ছি। তুমি কি সব বক্ বক্ ক'রচ' ?

ললিতা। দীনবন্ধো, আর ছলনা ক'র না। আমার জালা যে সব জুড়িয়ে গেল। আমি যে অন্তরে বাইরে শান্তির শীতল স্পর্শ অনুভব ক'রছি দয়াময়! আমার জালা যে তুমি নিজের বরাঙ্গে ধারণ ক'রে, আমার গৌরব বাড়িয়ে দিতে এসেছ' লীলাময়! আর ত' তোমার লুকিয়ে থাকা চ'লবে না। আমিও যে তোমায় চিনে ফেলেছি, চিন্তামণি!

লীলা। বলভদ্রা, বোনটী আমার কি অবাক হ'য়ে দেখছিস্ রে? এরা সব বলে কি? কাকে কি ব'লছে দেখ। আমি এলুম রোদের তাতে আধ পোড়া হ'য়ে একটু জুড়োবার জন্তে, তা দিদি আমার একটা কেঁচু বিষ্টু ঠাওরে কত কি ব'লে যাচ্ছে দেখ না। চল বোন, আমরা এখান থেকে পালাই চল। বুঝতে পারছিস্ নি, বাপে ঝিরে এরা এইবার আমাদের তাড়াতে চায়, তাই ঠাকুর দেবতার কথা ব'লে আমার অকল্যাণ ক'রছে।

[ প্রস্থানোত্তর।

ললিতা। ( হস্ত ধরিয়া ) না, না—বেও না।

লীলা। ( হাত ছাড়াইয়া ) ছাড়।

ললিতা। হাত ছিনিয়ে যাবে, যাও। কিন্তু প্রাণ থেকে যাবার শক্তি কোথা তোমার, প্রাণময়?

লীলা। পারলুম না, দিদি—পারলুম না। তোমার কাছ ছাড়া হ'তে পারি না—পারবার যো নেই। তুমি যে আমার আঁটে পিটে বাঁধন দিয়ে বেঁধেছ। কিন্তু একবার যে আমার যেতে হবে দিদি।

ললিতা। কোথায় যাবে?

লীলা । অবস্খীপুরে । আমি একা যাব না । আমার সঙ্গে যাবে  
বুড়ো-বাবা—বিশ্বাবসু ।

ললিতা । কেন ?

লীলা । তার বিশ্বাসের—তার ভক্তির বলে, আমার মূর্ত্তি জগৎ সমক্ষে  
প্রতিষ্ঠিত ক'রতে । যাবে না বুড়ো-বাবা আমার সঙ্গে দিদি ?

ললিতা । ঐ যে বাবা এদিকে আসছে, তাকে ব'লে দেখ না ।

### বিশ্বাবসুর প্রবেশ ।

বিশ্বা । কি ব'লবে ? তুমি যা ব'লবে সেই ত' বলা—তুমি যা ক'রবে  
তাই ত' করা । আবার কে কি ব'লবে ? আমার যেতে হবে,  
না ? রাজা ইন্দ্রদ্যুম্নের রাজধানীতে, না ? তা তোমার যখন  
ইচ্ছা হ'য়েছে, তখন আর অন্য কথা কি—চলুম । কিন্তু যাবার  
আগে একবার তোমায় জিজ্ঞাসা ক'রব কি লীলাধর, আমাকে  
দিয়ে সেই গোড়ে কাঠ তোলাবার তোমার এত সাধ কেন ?

লীলা । কেন, তা কি জান' না, বৃদ্ধ ? ভক্তির বল, সব চেয়ে বড় বল ;  
তার কাছে ধন বল, জন বল, শারীরিক বল, মস্তিষ্কের বল,  
কোন বলই প্রবল নয়—এইটাই না জগতে দেখাবার জন্য  
আমার এই লীলার অবতারণা । ভক্ত, তোমায় যেতে হবে—  
জগতে ভক্তির মহিমা প্রতিষ্ঠিত করবার জন্য—পাপী তাপীর  
সমস্ত অস্তরে ভক্তির নিষ্কার বহাবার জন্য ।

ললিতা । বাবা কি একাই যাবে তাই ?

বিশ্বা । পাগলী বেটী, একা কি রে ? একলা কি কেউ থাকে—না  
থাকতে পারে ? সবার সঙ্গে—সর্বদাই যে আছে আমার  
লীলাধর—চিরসঙ্গী হ'য়ে, চিরন্তন সাথীরূপে । তুই বেটী বুঝি

এখনও আমার একলা দেখ্‌ছিস্ ? না—না—আমি একা নই, একাকী নই। আমার দোসর আছে—আমার সঙ্গী আছে—আমার চির সহচর ঐ দাড়িয়ে আছে—মোহন ঠামে, বিনোদ-বেশে। চল, চল লীলাধর।

### বিদ্যাপতির প্রবেশ।

বিদ্যা। যাবার আগে আমার একটা গতি ক'রে দিয়ে যাও, বাবা।

বিদ্যা। কে—বিদ্যাপতি ? বাঃ—বাঃ—এ আবার তোমার কোন্ লীলা, লীলাধর ? শুভ যাত্রার উজোগে আবার এ কি পরীক্ষা ক'রতে চাও তুমি ?

লীলা। বেশ ত'। তোমার জামাই এসেছে—তার যত্ন কর' না আগে, তারপর না হয় রাজা ইন্দ্রদ্যুম্নের রাজধানীতে যেও।

বিদ্যা। কপটী, এত ছলনাও জান' ! এখনও পরীক্ষা ক'রবে ? এখনও মারার ফাঁসে—মোহের ফাঁদে আমার বেঁধে রাখতে চাও ? জামাই—জামাতা—কি কথাই শুনালে গো। যাও—যাও—আমি 'ও বাঁধন আর সেধে পরব' না। জামাই কে,—তুমি—তুমি—তুমিই আমার সব—সর্বস্ব।

বিদ্যা। ( স্বগতঃ ) ভগবতি বশুকরে, দ্বিধা হও—বজ্র, প্রলয় ছঙ্কারে গর্জে উঠে সব শব্দ ঢেকে দাও—এ পাপ কথা যেন কারো কাণে না পশে।

লীলা। কি ঠাকুর, থ হ'য়ে গেলে যে ! অনাৰ্য্য বুড়োটার আঙ্গুঠা দেখেছ ! তোমার সামনেই আবার জামাই ঠিক ক'রে নিচ্ছে।

বিদ্যা। এ কি ! আগুন জলে উঠলো যে। জালা—চারিদিকে জালা। আমার এ ভাবে অপমানিত করবার জন্যই কি আমাকে এখানে এনেছ, অগস্ত্য !

নীলা । হা রে অন্ধ ! দেখ দেখি দিদির আমার মুখপানে চেয়ে—  
ওখানে কি কোন কালিমার রেখা আছে ? এই দিদিকে আমার  
তুমি এখনও কলঙ্কিনী ভেবে বিষের দাহ বুকে পুষে রেখেছ ?

বিজা । ভদ্র, সারা পথ নিজ কর্ণের জন্ত অনুশোচনা ভরা বুকে, ওঁর  
কাছে ক্ষমা প্রার্থনার আগ্রহে ছুটে এসেছি । কিন্তু এ আমার  
কি হলো—আমি এখানে এসে উপস্থিত হবা মাত্র, আমার  
নির্ঝাণোন্মুখ অন্তরাগ্নিতে ফুৎকার দিয়ে, বৃদ্ধ শবরপতি আমার  
সুপ্ত সন্দেহকে জাগিয়ে দিলে । আমি যে আর সে প্রাণের  
আবেগে ক্ষমা চাইতে পারছি না ।

ললিতা । কিন্তু না চাইলেও আমি তোমায় ক্ষমা ক'রেছি, স্বামীন্ ।  
এ আমার মৌখিক ক্ষমা নয়—লৌকিক শিষ্টাচার নয়—আমি  
সত্যই সর্কাস্তকরণে তোমায় মার্জনা ক'রছি । আর প্রার্থনা  
ক'রছি, যেন তোমার ভ্রাস্তমতি সুনিয়ন্ত্রিত হয়—সংশয় দৃষ্ট  
হৃদয় শান্ত হয়—প্রাণে তোমার শাস্তি ফিরে আসে ; যেন তুমি  
এই নবীন কিশোর—নবজলধর—পীতাম্বর—লীলাধরকে চিন্তে  
পার ; যেন আমার সঙ্গে—সবার সঙ্গে ওঁর কি সম্বন্ধ—তা  
বুঝতে তোমার বিলম্ব না হয় ।

বিজা । সাধি, সহধর্মিণি,—ব্রাহ্মণী আমার, তোমার কৃপায় আমার  
জ্ঞান-চক্ষু ফুটেছে । আমি মোহ মালিন্যের অন্ধকার হইতে মুক্ত  
হ'য়ে, ক্রমে সত্যের আলোক দেখতে সক্ষম হ'ছি । এই যে—  
এই যে সম্মুখে আমার আনন্দময় স্বরূপ—বৃন্দারণ্য-মধুপ—  
মধুময়-রূপ—অখিল বিশ্বভূপ !

“অধরং মধুরং বদনং মধুরং  
নয়নং মধুরং হসিতং মধুরং

হৃদয়ং মধুরং গমনং মধুরং

মধুরাধিপতেরখিলং মধুরং ।”

বিখা। সাবাস্ বেটা। এই ত’ চাই। নাও ঠাকুর, আর দেরী  
নয়, চল’। তোমার আশা-পথ চেয়ে রাজাটা কত আকুল হ’য়ে  
উঠেছে, তা ত’ আর তোমার বুঝতে বাকী নেই। আর কেন  
জগন্নাথ, জগৎ সমক্ষে আত্মপ্রকাশ ক’রবে চল’।

লীলা। ভক্তের বাহা কোন দিনই অপূর্ণ থাকে না—আজও থাকবে  
না। দিদি, তোমার অন্তরের সাধ—এই ক্ষেপা ঠাকুরের সঙ্গে  
তোমার সম্পর্ক কি—তা লোককে জানাও, না? তা চল’,  
আমরাও যখন যাচ্ছি, তুমিই বা আর একলাটি কোথায়  
থাকবে। চল’,—বাবা, তুমি, ক্ষেপা ঠাকুর সবাই মিলে আজ  
যাই চল’।

বল। আমরা কি এখানে প’ড়ে থাকব’ দাদা? আমি না হয়  
তোমার চক্ষুঃ শূল—কিন্তু নীলাধর দাদাকেও কি ছেড়ে রেখে  
যাবে?

লীলা। অভিমানিনী বোনটা আমার—তাকে ডাকি নি বোলে  
অভিমান হয়েছে? ওরে তুই ত’ যাবি সবার আগে—তাকে  
মধ্যে নিয়ে আমরা দুই ভাই সাগরতীরে বিরাজ ক’রবো—  
এই যে আমার প্রতিজ্ঞা সমুদ্রের কাছে দিদি, ভুলে গেছিস?  
চল।

[ সকলের প্রস্থান।



তৃতীয় গর্ভাঙ্ক ।

বাঁকী মোহানা ।

দেবদাসীগণের প্রবেশ ও গীত ।

খান্ধাজ—ঠুংরি ।

আজ বাসর সাজা ওলো নাগরী ।

কালচাঁদ আসছে লো তোর, ও গোরচনা-গোরী ॥

এসেছে বাঁশরী রব, অঙ্গের সৌরভ,

মলয়ের শিহরণে পরশ তাহার হয় যে অমুভব,

পিরাসায় মরিস্ নি আর, আসছে সুধার গাগরী ॥

মুছে ফেল তোর নয়নের লোর,

অঁধি তলে অঁক্ উজর কাজর,

অধরে জাগা হাসি, বাঁধ্ বিনোদ কবরী,

কাঁচলী এঁটে, ক'সে পরু রঙিন্ ঘাঘরী ॥

[ প্রস্থান ।

উৎসবচন্দ্রের প্রবেশ ।

উৎ । ঠাকুর, দয়াল ঠাকুর, আজ না কি তোমার আবির্ভাব হবে !  
নিশ্চয়, নিশ্চয়, আজ তুমি আসবে—আসবে । আর কতদিন  
—কতদিন এমন ক'রে সকলকে কাঁদাবে ? তোমার পথ চেয়ে  
চেয়ে যে চোখ ঠিকরে যাবার ষোগাড় হ'য়েছে । তবু কি  
তোমার দয়া হবে না ? হবে—হবে—নিশ্চয় হবে । তা না হ'লে  
কেন এমন ক'রে সকলকে মাতিয়ে তুলেছ—কেন সবাইকে  
আর সব ভাবনা ভুলিয়ে, কেবল তোমার চিন্তায় মগ্ন রেখেছ ?

সকলের সংসার ত' আর আমার মত ঋশান নয়—সকলের  
ঘরে ত' আমার মত চামুণ্ডা বাস করে না। তবে কেন  
তাদেরকে সব ছাড়িয়ে, এই সাগর তীরে আনিয়েছ? দয়া  
তোমার হ'তেই হবে, নইলে ছাড়বে কে?

গীত।

বেহাগ খাঘাজ—লোকা।

দেখি কতদিনে দয়া তোমার হয় দরদী!  
নয়ন জলের ঝরণা ঝ'রে ব'হে থাক না নদী ॥  
চেরে রব তোমার আশা পথ,  
দেখি কত দিনে পূরে মনোরথ,  
তোমায় মরণেও পাব না কি,—  
জীবনেতে না পাই দেখা যদি ॥

বিশ্বাধরার প্রবেশ।

বিশ্বা। কার গলার স্বর! ঠিক তার মত—ঠিক তার মত! পাপিষ্ঠা,  
এখনও তোর মনে আশা আছে, তুই তার দেখা পাবি! হা  
হতভাগিনী, তোর এ শুধু মরীচিকার পেছনে দৌড়ে নিজের  
পাপের প্রায়শ্চিত্ত করা। সে কি আর আছে? সে তোর  
হাত থেকে নিস্তার পাবার জন্ত মরেছে—মরেছে।

উৎ। (স্বগতঃ) এ কি! নারায়ণ—নারায়ণ! এ বে আমার ব্রাহ্মণী।  
এর এ কি মূর্ত্তি—এ কি বেশ—এ কি পরিবর্তন!

বিশ্বা। (স্বগতঃ) ঐ যে কে একজন গেকুরা-পরা—দাড়িওয়ালা  
মিনুসে ওখানে দাড়িরে আছে। বা থাকে অদৃষ্টে, একবার

- স্বা। ক'রে দেখি না! (প্রকাশে) ঠাকুর, তোমার—  
আপনার বাড়ী কোথা গা?
- উৎ। (স্বগতঃ) কণ্ঠস্বরেরও কি পরিবর্তন।
- স্বা। কথার জবাব দাও না, ঠাকুর! (স্বগতঃ) মরণ আর কি—  
ঠাকুরে মাটিতে পা দেন না। (প্রকাশে) বলি নাগা ঠাকুর,  
কাণের মাথাটা খেয়েছ আপনি?
- উৎ। সন্ন্যাসীর রমণীর সহিত বাক্যালাপ নিষেধ।
- স্বা। আমি রমণী নই। আমার নামাতো ভাইয়ের বোয়ের নাম  
ছিল রমণী,—তা সে ত' অনেক দিন মারা গেছে, নাগা ঠাকুর।
- উৎ। আমি নাগা নই—সন্ন্যাসী।
- স্বা। হ্যাঁ হ্যাঁ—তা জানি। তবে কি ক'রব ঠাকুর—আমার ও  
নামটা ধরতে নেই। আমার বড় মামাশ্বশুরের—
- উৎ। তা সে ষা হোক, তুমি যাও। আমাদের কোন স্ত্রীলোকের  
সঙ্গে কথা বলার নিয়ম নেই।
- স্বা। কেন?
- উৎ। এই আমাদের আশ্রমের নিয়ম।
- স্বা। আশ্রমে তুমি ত' এখন নেই ঠাকুর, তুমি ত' এখন পথে  
দাঁড়িয়ে আছ। যখন আশ্রমে যাবে, তখন না হয় মেরেমানুষ  
দেখলে ঘোমটা দিয়ে মুখ ঢেকে,—এখন আমার কথার জবাব  
দাও।
- উৎ। কি কথা?
- স্বা। তোমার বাড়ী কোথা?
- উৎ। সন্ন্যাসীর আবার বাড়ী কি? বেথায় থাকি সেথায়-ই বাড়ী।
- স্বা। বলি ঠাকুর, ঐ—ঐ তুমি পাট-নাশি হবার আগে—

উৎ। পাট-নাশি ?

বিদ্যা। কি আপদ মা ! ব'লনুম না—ঐ নামটা আমার ধ'রতে নেই—  
মামাখণ্ডরের নাম। তা তুমি পাট-নাশি হবার আগে থাকতে  
কোথা ?

উৎ। হরিপুরে।

বিদ্যা। ফরিপুর ? কোন্ ফরিপুর ?

উৎ। ( স্বগতঃ ) এই ধ'রে ফেলে রে।

বিদ্যা। ফক্কিকান্তপুরের উত্তরে যে ফরিপুর—সেইখানে ? দাঁড়াও  
দাঁড়াও ! তুমি ঠাকুর ভাল ক'রে আমার দিকে চাও দেখি !

উৎ। রমণীর দিকে চাওয়া—

বিদ্যা। ওগো আমি রমণী নই—আমি বিদ্যাধরা। দেখি—হ্যা ঠিক  
চিনেছি। আমায় লুকিয়ে থাকবে তুমি ? রোস' ত'—রোস'  
ত', এই যে নাকের কাছে অঁচিলটাও ঠিক আছে। তবে—  
এইবার ত' তোমায় ধ'রে ফেলেছি, পাট-নাশি।

উৎ। নারায়ণ—নারায়ণ ! বিদ্যা, আর কেন আমায় মিছে বাঁধন  
দিয়ে বেঁধে রাখতে চাও ? আমি অনেক চেষ্টায় যে ফাঁস কাটিয়ে  
এসেছি—আরও কেন সেই ফাঁসে আমায় জড়াতে চাও !

বিদ্যা। ওগো, সে কথা হবে পরে। কিন্তু ক'দিনই বা বাড়ী ছেড়েছ,  
এরই মধ্যে এমন নাচ হাত লম্বা দাড়ী ক'রলে কি ক'রে ?  
পরচুলো নয় ত' ?

[ আকর্ষণ ।

উৎ। আঃ—ছাড়' লাগে। দেখ বিদ্যা, আমি তোমার মিনতি ক'রছি  
—ব্যগ্রতা ক'রে জানাচ্ছি—তুমি আমার আশা ত্যাগ কর'।  
আমি তোমার সংসারের মোহ কাটিয়ে, যখন একবার বেয়িবে

প'ড়েছি—তখন আমাকে আবার সংসারী ক'রে, আমার পর-  
কালের পথে কাঁটা দিও না।

বিষা। ও ফরি! কে-ই বা তোমার সংসারী হ'তে ব'লছে, আর কে-ই  
বা তোমার পথে কাঁটা দিতে চাচ্ছে। সংসার! কাঁটা মারি  
সংসারের মুখে—সংসারের সুখের মুখে। তুমি পুরুষ বেটা-ছেলে,  
তুমি যখন রাজার দেওয়া ধন সম্পত্তি এক কথায় ছেড়ে চ'লে  
গেলে; তখন আমি মনে ক'রলুম, বয়েই গেল আমার, আমি  
ঐ সব সোণা, দানা, হীরে, জহরৎ নিয়ে সুখে দিন কাটাব।  
এই না ভেবে, আমার বুকটা ফাল্লাদে দশ হাত হ'য়ে উঠলো।  
তাই ঠা'কারে—অহঙ্কারে তোমার খোঁজ খবর নিলুম না।  
তারপর দু'দিন না যেতে যেতেই, পাড়ার নাচ বেটা বেটার  
নজর প'ড়লো আমার সেই অগাধ সম্পত্তির উপর। কি  
করি, একা প্রাণী—মেয়ে মানুষ—খালি বাড়ী। তাই আমার  
ভায়ের আনিয়ে বাড়ীতে রাখলুম। কিন্তু সেই ভায়েরা—  
আমার মারের পেটের ভায়েরা ভাজ্জের সঙ্গে পরামর্শ ক'রে,  
আমার মেরে ফেলে, আমার বিষয় হাতাবার মতলব ক'রলে।  
একদিন সত্যি সত্যি দুধের সঙ্গে কি মিশিয়ে, আমার মেজভাজ  
আমার সামনে ধ'রে, কত সোহাগ ক'রে আমায় খেতে  
অনুরোধ ক'রলে। আমি একটা অছিলে ক'রে সে দুধটা  
না খেয়ে, ফেলে দিলুম। একটা বেড়াল এসে সে দুধের  
বাটাটা চাটতে লাগলো, আর সঙ্গে সঙ্গে তেউড়ে বেকে  
মরে গেল। এই না দেখে, সংসারের পারে দণ্ডবৎ ক'রে,  
বাড়ী ছেড়ে বেরিয়ে প'ড়েছি। তুমি ব্যস্ত হয়ো না, আমি  
এতদিন তোমার আলিয়েছি ব'লে চিরদিন আর আলাব না।

তুমি আমার স্বামী—দেবতা—ইহকালের সুখ—পরকালের স্বর্গ।  
তোমার চরণ ছেড়ে আমার কোথাও শান্তি নেই। তাই  
শান্তিময় ফরি, তোমার চরণ তলার আমার আবার এনে  
দিয়েছেন।

উৎ। চমৎকার! তুমি এক নিশ্বাসে এত কথা ব'লে ফেললে কি  
ক'রে! তা দেখে বিস্বাসনি, আমি বাড়ী ছেড়ে এসে পর্য্যন্ত  
“মানুষ” হবার জন্য মধুসূদনের কাছে প্রার্থনা ক'রছিলুম।  
দয়াময় ঠাকুর আমার এইবার “মানুষ” হবার অবকাশ দিয়েছেন।  
তিনি আমার পরীক্ষা ক'রতে চান। আমি তোমায় মার্জনা  
ক'রে, তোমার সকল অপরাধ—সব দোষ ক্ষমা ক'রে, নিজের  
মহুয্যত্বের পরিচয় দোব। আর—আর আজ আকাশ বাতাস  
ব্যাপ্ত ক'রে আমার প্রভুর আবির্ভাবের যে আগমনী সুর  
বেজে উঠেছে, সে সুরে যোগ দিয়ে—সেই ছন্দে মেতে—চল'  
বিদ্যা, আমরা দু জনে যাই—আমার সেই পরম প্রভুর দর্শন  
লাভে ধন্য হবার জন্য।

বিদ্যা। ধন্য আমি—ধন্য আমি! আজ আমি ধন্য—আমার জীবন  
ধন্য—জনম ধন্য! আর ধন্য তুমি ভক্ত-বাঁধা-কল্পতরু ফরি!

( নেপথ্যে শব্দ ঘণ্টা ধ্বনি ও “জয় জগন্নাথ” রব )

উৎ। কি—কি হল' ? কিসের এ উল্লাস বিদ্যা? এত শব্দ ঘণ্টা  
ধ্বনি—এত জয় জগন্নাথ রব ?

বিদ্যা। কিছু ত' বুঝতে পারছি না ঠাকুর!

উৎ। ( দেখিয়া ) বুঝতে পারছ না, বুঝতে পারছ না? আমি  
পেরেছি। বিদ্যা, বিদ্যা, ঐ দেখ', ঐ দেখ' প্রভু বিশ্বস্তর শবর-  
কুলোত্তম বিশ্বাবসুর কোলে উঠে, ঐ চ'লেছেন রাণী-মারু

শ্রীমন্দিরে । ঐ দেখ,—মহারাজ, মহারানী, উচ্চপদস্থ রাজ-  
কর্মচারী সব, পাগলবেশী মহাপুরুষ যজ্ঞেশ্বর, আর প্রজাবৃন্দ  
সবাই চলেছে সেই শবর-রূপী মহাত্মার অনুসরণ ক'রে, সেই  
বিশ্ববিশ্রুত মন্দির অভিমুখে । বিশ্বা, চল' আমরাই বা আর  
কেন এখানে দাঁড়িয়ে অবথা কাল হরণ করি । চল, আমরাও  
ঐ মহোৎসব—ঐ আনন্দ প্রবাহে যোগ দিতে ছুটে যাই ।

বিশ্বা । চল' প্রভু, চল' নাথ । আজ আমার নারী জন্ম সার্থক ! আজ  
হৃদয়-নাথকে পেয়েছি—এইবার জগন্নাথকে দেখি গে, চল' ।  
উভয়ে । জয় জগন্নাথ স্বামী, জয় জগন্নাথ স্বামী ।

[ প্রস্থান ।

গীত গাহিতে গাহিতে একদল নাগরিকের প্রবেশ ।

রামকেলী—একতালা ।

ঐ চলে যার জগৎ-চিন্তামণি ।

( ভক্তের কোলে হেলে হলে )

যেন যশোদার কোলে নীলমণি ॥

ধন্য তুমি ধন্য ভগবান, রূপার তোমার নাইক' পরিমাণ,

তুমি এমনি ক'রে বাড়ায় ভক্তের মান—

বিশ্বস্তর হও কুম্ভ-লঘু,—

বিশ্বরূপ হও স্নেহের ছলল বাহুমণি ।

[ সকলের প্রস্থান ।

## চতুর্থ গর্ভাঙ্ক ।

শ্রীমন্দির ।

বিশ্বাবস্থ, ইন্দ্রদ্যুম্ন, শুণ্ডিচা, জগাপাগলা, ললিতা ও বিদ্যাপতি ।

ইন্দ্র । মহাভাগ, আপনার অলুকম্পায় আজ আমি কৃতার্থ । আপনার অসামান্য, অনন্ত-সাধারণ ভক্তির বলে জগদ্বাসী ধন্য । আপনার অতুল গৌরবে দিগ্‌মণ্ডল সমুজ্জল । আপনি আজ যে অসাধ্য সাধন করলেন, তার জন্য আমার চির দিনের মত দুঃশ্বেদ্য কৃতজ্ঞতার পাশে বদ্ধ করে রাখলেন ।

বিশ্বা । হিঃ, মহারাজ, অত করে কি বলে ! আমি কি করেছি ! আমার শক্তি কতটুকু—সামর্থ্য কতটুকু ! আমি কি করতে পারি ! যার কাজ তিনিই করেছেন । ভাগ্যবান তুমি মহারাজ, তাই ভগবান তোমায় স্বপ্নে দেখা দিয়েছিলেন—তার শ্রীমূর্তি নীলাচলের গুপ্ত কন্দর হ'তে আনিয়ে জগদ্বাসীর সমক্ষে প্রতিষ্ঠিত করতে আদেশ দিয়েছিলেন । আবার আজ তোমার সৌভাগ্য পূর্ণ মাত্রায় পরিস্ফুট করাতে, তিনিই এসেছেন তোমার রাজ্যে—তোমার মহীয়সী রাজ্যের নির্মিত মহানু মন্দিরে । আমি ত' শুধু উপলক্ষ্য, মহারাজ । এর জন্য আমার এত প্রশংসা ত' সঙ্গত নয় ।

ইন্দ্র । নরোত্তম, আমার মন আজ যেমন আনন্দে নেচে উঠতে চাচ্ছে নীলমাধবের আগমনের জন্য, তেমনি সঙ্কচিত হ'চ্ছে আপনার সন্মুখে দাঁড়াতে—আপনার সঙ্গে এ ভাবে আলাপ করতে । হিঃ হিঃ, আমি কি কাণ্ডজ্ঞান হীন পাপিষ্ঠের মত



আপনার সঙ্গে ব্যবহার ক'রেছি ! আমি আপনাকে লাহিত, অপমানিত ক'রতে বিন্দু মাত্র দ্বিধা বোধ করি নি ।

বিধা । মহারাজ, আজ আনন্দময় এসেছেন, আজ শুধু আনন্দ— আনন্দ কর ; অতীত কথার উল্লেখ ক'রে এ আনন্দ স্রোতে বাধা দিলে অপরাধী হ'তে হবে । মুছে ফেল' রাজা, হৃদয় থেকে অতীতের জালাগরী স্মৃতি—দূর কর মন থেকে ভবিষ্যের অজ্ঞাত, অনির্দিষ্ট ছবি । এস'—এই উজ্জ্বল বর্তমানকে জড়িয়ে ধ'রে আমরা শুধু মেতে যাই সেই লীলাময়ের লীলার রঙ্গে, তাঁর আবির্ভাবের আনন্দে, তাঁকে পাওয়ার পরিতৃপ্তিতে ।

জগা । হেঁ—হেঁ—এমন নইলে হয় । ঠিক্—ঠিক্—ঠিক্ বলেছ' তুমি শব্দরপতি ! এমনি ক'রেই ত' সব ভুলে—সব ফেলে—মেতে যেতে হয় আমার প্রভুর লীলায়—তাঁর খেলার মেলায় । তা নইলে কি এই বেটী চালতা-মুখীর মত মুখ গোমড়া ক'রে থেকে, জোর ক'রে তাঁর আনন্দ-লহর হ'তে নিজেকে দূরে রাখা ভাল ?

শুশিলা । বাতুল, সাবধান । তুমি কার সম্বন্ধে কথা ব'লছ, তা স্মরণ রেখ' । মনে রেখ'—আমি এ রাজ্যের রাণী ।

জগা । ওরে বাবা, এ যে কাল নাগিনীর মত ফোস্ ক'রে উঠলো । এত অভিমান—এত অহঙ্কার—এত দণ্ড নিয়ে তুমি এসেছ আমার প্রেমময়—রসময়—মধুময় ঠাকুরের শ্রীমন্দিরে ! হারে গর্কিতা রমণী, তুমি কি জান না, যে ঠাকুর আমার দীনবন্ধু ! দীন কাদালই যে তাঁর কৃপার পাত্র । রাজ্যের মাৎসর্য—সম্রাজ্যের অহঙ্কার, তাঁর নিকট হ'তে—তাঁর চরণ সাধিধ্য হ'তে তোমার কেবল দূরেই নিয়েই যাবে । তাই না তুমি এতদিন শুধু অন্ধকারে অন্ধকারেই বেড়িয়েছ । এ রাজ্যবাসী সকলেই

যাতে শ্রীভগবানের সঙ্গ দেখে নিজেদের ভাগ্যবান বোধ ক'রলে, তুমি এই জগুই না তাকে শুধু কাষ্ঠ ব'লে উপেক্ষা ক'রে এসেছ ?

গুণ্ডিচা । স্থির হও উন্মাদ ! আমি তোমার প্রলাপ বাক্য শুনতে এখানে আসি নি ।

ইন্দ্র । এ কি মহারানী ! এ কি তোমার উদ্ধত বচন ?

গুণ্ডিচা । উদ্ধত বচন নয় মহারাজ—স্পষ্ট উক্তি । সত্য কথা চিরদিনই কিছু শ্রবণ-কটু হয় ।

ললিতা । ( বিদ্যাপতির প্রতি ) নাথ, এই কি এ রাজ্যের নারীর নিদর্শন ? এত উগ্রা—এত মুখরা—এমন দাস্তিক নারী আমি কোনও দিন কল্পনাও ক'রতে পারি নি ।

বিদ্যা । ( জনাস্তিকে ) না সুন্দরি, এ স্থান পুণ্যময় স্থান । এ রাজ্যের রমণীর শ্রী-সম্পদের জগু, এ ক্ষেত্রের অপর নাম “শ্রীক্ষেত্র” । চরিত্রের মাধুর্য্যে—স্নেহের প্রাবল্যে—গৃহিণীর গরিমায়—সেবার মহিমায়—এ রানী গুণ্ডিচাই আমার মাতার মহিমাময় সিংহাসন অধিকার ক'রেছিলেন । কিন্তু কি আশ্চর্য্য প্রিয়ে, আমি আজ ওঁর এ পরিবর্তন দেখে বিস্ময়ে নীর্ব্বাক হ'য়ে যাচ্ছি ।

ইন্দ্র । বন্ধু, তুমি অসম্ভষ্ট হয়ো না । রাজ্ঞী হয় ত' কোন আকস্মিক কারণে এরূপ অপ্রকৃতিস্থা হ'য়েছেন ।

জগা । আরে রাম রাম !

গুণ্ডিচা । না মহারাজ, না । আমি জানি আমার মত স্থির-মস্তিষ্ক উপস্থিত এ রাজ্যে কেহই নাই । আমি যা ব'লেছি সে সব কথাই স্মৃতিস্তিত । আমি কি বুঝি নি, যে তুমি আমাকে স্তোক-বাক্যে প্রবোধ দিয়ে, নিজের অকৃতকার্য্যতা লুকোবার জন্ত,

এই উন্মাদবেশী চতুরের সঙ্গে পরামর্শ স্থির ক'রেছ। আমি কি বুঝি নি, যে তোমরাই চক্রান্ত ক'রে এক খণ্ড কাষ্ঠ সাগর জলে ভাসিয়ে এনে, আমার অনন্ত-রূপ ভগবানের স্বরূপ ব'লে বিশ্বাস করাতে চেয়েছ! আমি কি বুঝি নি, যে তোমরা সেই প্রকাণ্ড কাষ্ঠ খণ্ডকে, এই ষাটুকর কর্তৃক কোন ইন্দ্রজাল প্রভাবে বহিয়ে এনে, আমার বহু আশাস-অর্থ-শ্রম-নির্মিত মন্দিরের পবিত্রতা নষ্ট ক'রেছে।

ললিতা। আমার পিতাকে ষাটুকর ব'লে অবমানিত ক'রলে, আমার প্রাণে যে ব্যথা লাগবে, মহাদেবি।

শুণ্ডিচা। কে তুমি ?

বিদ্যা। আমার ধর্মপত্নী—আমার ব্রাহ্মণী—এই শবরপতির দুহিতা ললিতা। মা, আমি নীলাচলে নীলমাধবের জন্ম বারবার তিন বার যাতায়াত করি। সৌভাগ্য আমার মা, আমি এবার ফিরেছি তাঁকে—সেই নীলমাধকে নিয়ে; এই শবররূপী ভক্ত-বীরকে নিয়ে; আর ও'র সুশীলা, সুধীরা কন্যা—আমার বনিতাকে নিয়ে। মা, আমি আমার পিতৃ-পিতামহের দেশে—আমার সাধের জন্মভূমিতে ফিরেছি, কত আশা—কত আকাঙ্ক্ষা বুকে ধ'রে, আর তুমি কি অন্তরে অন্তরে এই অবিশ্বাসের ছবি অঁকড়ে ধ'রে আমার এখান হ'তে আবার নির্বাসন দিতে যাবে ?

শুণ্ডিচা। বিদ্যাপতি! আমার সন্তান—আমার স্নেহের নন্দন! এই ত'—এই ত' তোমার সাকার বিগ্রহ, জগন্নাথ! এই তোমার বাস্তব মূর্তি! এই আমার পুত্র—এই আমার ননীর গোপাল! নীলমাধব, জগন্নাথ, তুমি মায়ের ছেলে হওয়ার চেয়ে আর

কি বড় রূপ—কি মধুর মূর্তি—কি সুন্দর কলেবর ধারণ ক'রতে পার ? বৎস, বৎস, বিঘাপতি আমার, চল'—চল' আমরা এখান হ'তে পালাই চল' । এ স্থান ছলনার পূর্ণ—এ স্থান পাপে পঙ্কিল । চল', আমরা এ স্থান ছেড়ে, বাইরের মুক্ত বায়ুর মাঝে, উদার আকাশের তলে যাই চল' । ওরে তোরা সব শাঁখ বাজা, আমার পুত্র ফিরেছে—বধুমাতাকে সঙ্গে নিয়ে ফিরেছে, তোরা সব শাঁক বাজা—শাঁক বাজা ।

[ বিঘাপতি ও ললিতাকে লইয়া গুণ্ডিচার প্রস্থান ।

ইন্দ্র । উন্নততার লক্ষণ বলে বোধ হ'চ্ছে । জগন্নাথের আগমনে আনন্দের আতিশয্যে রাজ্ঞী কি জ্ঞানহারা উন্মাদিনী হ'য়ে গেলেন !

জগা । না মহারাজ, না । আমার মঙ্গলময় ঠাকুরের আনন্দ-প্রবাহে মাতলে মানুষ জ্ঞানও হারায় না, উন্মাদও হয় না । বরং তাঁর সে আনন্দে যোগ দিতে না পারলেই—জ্ঞান, বুদ্ধি, বিবেক সব হারিয়ে মানুষ অমানুষ হ'য়ে যায় । রাণী-মার ও কি হ'য়েছে জ্ঞান ? বিকার—ঘোর বিকার । অবিশ্বাস, সংশয়, সন্দেহ, সব তাঁর মনের মধ্যে এমন গোড়া গেড়ে ব'সেছে, যে তাদের চাপে সব চাপা প'ড়ে গেছে ; তাই তিনি কেবল অন্ধকারই দেখছেন । এ সেই অন্ধকারের প্রতিক্রিয়া । অন্ধকারে থেকে যার দিন কেটেছে, সে হঠাৎ আলো দেখলে কাণা হ'য়ে যায় ।

বিধা । তোমার দেখে—তোমার রূপ দেখে অন্ধকার ঘোচে না, এ কেমন তোমার লীলা, লীলাধর ? তোমার আগমনে রাজ্যে যে আনন্দের ঢেউ খেলে যাচ্ছে—শুধু এ অভাগিনী রমণীই কি তা হ'তে দূরে প'ড়ে থাকবে, আনন্দময় ?

জগা। সে কি মশায়, ও কি কথা ? আনন্দময়ের এ আনন্দের মেলা । এতে সবাই ত' যোগ দেবেই । এ যে আনন্দ বাজার,— হেথায় যদি রাণী-মা না বসেন, তা হ'লে এর যে অঙ্গহানী হবে । তবে কি জানেন, ঠাকুরটী আমার নিজেই বাঁকা কি না, তাই চির দিনই বাঁকা রাস্তায় চ'লতে ভালবাসেন, সোজা পথ বড় একটা পছন্দ করেন না,—তাই ও বেটীকে একটু ঘুরিয়ে নাক দেখাতে চাচ্ছেন । রাজা, তুমি ভেব না ; রাণী-মার এ অঙ্ককার কেটে যাবে । তিনি সেই দারু দণ্ডটীতে আমার ঠাকুরের কোন রূপ কল্পনা ক'রতে না পেরেই, এই বিপদে প'ড়েছেন । তুমি সেই দারুদণ্ডে তাঁর এক ভুবন মোহন রূপ গড়িয়ে, রাণী-মার সামনে ধর, দেখবে তিনি আবার প্রকৃতিস্থ হবেন ।

বিশ্বা। সত্য কথা । অরূপের মাঝে বিশ্বরূপকে কল্পনা করা কষ্টসাধ্য বটে । সকলের পক্ষে তা সম্ভব নয় । তাই প্রতীকে প্রতিমার তাঁর পূজার ব্যবস্থা চিরদিন আছে । রাজন, তুমি সত্বর ঐ দারু দণ্ড হ'তে ব্রহ্মাণ্ড-পতির বিগ্রহ প্রস্তুত করবার উদ্যোগ কর ।

ইন্দ্র। আমি কি উদ্যোগ ক'রব ! ঐ দারু দণ্ডকে অঙ্গুলি মাত্র স্থান নড়ান' রাজ্য শুদ্ধ লোকের সমবেত শক্তির অতীত,—আর কে এমন শিল্পী আছে, যে ঐ মহৎ কাষ্ঠ খণ্ড হ'তে শিল্প কোশলে শ্রীভগবানের মূর্তি নির্মাণ ক'রতে সক্ষম হবে ? তবে আপনি মহাপুরুষ, আপনি যদি অঙ্গুগ্রহ ক'রে সে ভার গ্রহণ করেন, তা হ'লে শুধু আপনার দ্বারায় সে কার্য সমাধা হওয়া সম্ভবপর ঘটে ।

বিশ্বা। আমি বিগ্রহ নির্মাণ ক'রব কি ? আমি ত' কাষ্ঠ শিল্পের

কিছুই জানি না। ই্যা, তবে পারি, তাঁর কৃপা হ'লে সব পারা যায়। আমি কেন? তাঁর কৃপায় যে কেউ সে কার্য সম্পন্ন ক'রতে পারে। কিন্তু ঠাকুর—লীলাধর—দয়ানিধি, আর আমার ও ভার দিও না এইটুকু অনুগ্রহ আমায় কর।

ইন্দ্র। কেন মহাভাগ, আপনি ও কার্য হ'তে নিজেকে বিরত রাখতে চাচ্ছেন?

বিষ্ণা। কেন? লীলাধর, বল ত' কেন? বল ত' আমি নিজেকে কেন দূরে রাখতে চাচ্ছি ঐ গৌরবময় কার্য হ'তে! বল ত'!

জগা। রাজা, এটা বুঝতে পারছ না! জগন্নাথ এত দিন গুপ্ত ছিলেন নীলাচলে। এবার যখন তিনি জগতের সমক্ষে প্রকাশ হ'তে প্রস্তুত হয়েছেন, তখন তাঁর সেই প্রকট লীলায় চারি বর্ণের নিজস্ব ছাপ থাকা চাই। হেথায় মিলেছে ব্রাহ্মণ বিদ্যাপতির কঠোর তপশ্চা, ক্ষত্রিয় ইন্দ্রদ্যয়ের দুর্বার শক্তি, শূদ্র বিশ্বাসুর ঐকান্তিক সাধনা; অবশিষ্ট আছে বৈশ্যের শিল্প কৌশল; মেইটা হ'লেই না হেথায় চারি বর্ণের সমবেত চেষ্টায়—তাদের অকপট প্রাণের নৈবেদ্য নিতে—জগৎবাসীর সমক্ষে এসে দাঁড়াবেন জগবন্ধু জগন্নাথ।

ইন্দ্র। ষথার্থ ব'লেছ তুমি, বন্ধু। তোমার কথায় আমার কৌতূহল দূরে গেল—অন্তর আবার এই মহাপ্রাণ শবররাজের চরণে ভক্তিতে লুটিয়ে প'ড়তে চাচ্ছে।

বিষ্ণা। নারায়ণ—নারায়ণ! সে কথা থাক মহারাজ। এখন চেষ্টা দেখ, এমন নিপুণ শিল্পী—এমন ভক্তিমান বর্দ্ধকী—বৈশ্য কুলের এমন উজ্জল রত্ন কে কোথায় আছে, যে তোমার অভিলষিত মূর্তি নির্মাণে সক্ষম হবে।

বৃদ্ধ বর্দ্ধকী বেশে বিশ্বকর্ম্মার প্রবেশ ।

বর্দ্ধ । আমি আছি মহারাজ ! যদি অনুমতি করেন ত' আমি ঐ কাঠ হ'তে দারুব্রহ্মরূপ নির্মাণ ক'রতে পারি ।

ইন্দ্র । তুমি ? শীর্ণদেহ, স্থবির বর্দ্ধকী, তুমি এই কাজ ক'রতে স্বেচ্ছায় এসেছ ? আমি তোমার এ উচ্চম—এ উৎসাহের প্রশংসা ক'রছি, কিন্তু আমি তোমার এ কার্যের ভার দিতে পারব' না, বৃদ্ধ ।

বর্দ্ধ । কেন মহারাজ ! এই বৃদ্ধ শবরপতিই ত'—আপনার রাজ্য শুদ্ধ সকলে সমবেত চেষ্টায় যা পারে নি, তাই ক'রেছেন । বর্দ্ধকী আমার দেহকে অধিকার ক'রেছে সত্য, কিন্তু আমার মন এখনও নবীন । উৎসাহে—উচ্চমে আমি কোন যুবক অপেক্ষা হীন নই । তা ছাড়া আমার এত দীর্ঘ দিনের শিল্প-সাধনা, আমার ভূয়োদর্শন, আমার আপনার অভীষিত কার্যে সর্বাপেক্ষা যোগ্য ক'রে তুলেছে, রাজন্ !

বিষ্ণা । মহারাজ, স্মৃত্তধর হৃদয়বান ত্রাতে সন্দেহ নাই । ঔর প্রাণে আগ্রহ আছে বথেষ্ট । আর আগ্রহ যেখানে, অহুরাগ যেখানে, আমার ঠাকুরের অজস্র কৃপাও সেইখানে ।

ইন্দ্র । বৃদ্ধ, তুমি কত দিনে মূর্ত্তি নির্মাণ ক'রতে পারবে ব'লে বিবেচনা কর ?

বর্দ্ধ । তিন সপ্তাহে মহারাজ ।

ইন্দ্র । মাত্র তিন সপ্তাহে ?

বর্দ্ধ । হ্যা প্রভু ! তিন সপ্তাহ সেই মূর্ত্তিভয় নির্মাণের পক্ষে বথেষ্ট সময় ব'লেই আমি বিবেচনা করি ।

ইন্দ্র । মূর্ত্তিভয় ? এর তাৎপর্য্য কি শিল্পী ?

বর্দ্ধ । আমার ঠাকুর আদেশ ক'রেছেন, ঐ বৃদ্ধকাণ্ড হ'তে তিনটি

মূর্তি প্রস্তুত ক'রতে হবে। অনন্তরূপী বলরাম বামে, মধ্যে বিশ্বধাত্রীরূপা সুভদ্রা, দক্ষিণে জগৎগতি জগৎপতি জগন্নাথ। এই সম্মিলিত মূর্তিতে তিনি সমুদ্রতীরে বিরাজ ক'রতে সাগরের নিকট প্রতিশ্রুত।

জগা। বটে! তুমি আদিষ্ট হ'য়ে এসেছ আমার প্রভুর নিকট হ'তে? তবে আর কি, তোমার ত' তা হ'লে চাপ্রাশ মিলে গেছে। তুমি লেগে যাও তবে আজ থেকেই।

বর্দ্ধ। আমি কাজে লাগলে মহারাজ, আমার একটা সর্ভ আপনাকে পালন ক'রতে হবে। আর সেই সর্ভ পালিত না হ'লে আমি এ কাজে হাত দিতে পারব' না।

ইন্দ্র। কি সর্ভ?

বর্দ্ধ। যতদিন না আমার কার্য সমাধা হয়—অর্থাৎ এই তিন সপ্তাহের অন্ত আমি—মাত্র আমি একা এই মন্দির মধ্যে থাকব। আপনি বাহিরে এ মন্দিরের রুদ্ধ দ্বারে অপেক্ষা ক'রবেন। আর তিন সপ্তাহ পরে এসে দ্বার মুক্ত ক'রে মন্দিরে প্রবেশ ক'রবেন। তার পূর্বে আপনি বা অন্ত কেউ-ই যদি হেথায় প্রবেশ করে, আমি তদগুণেই কার্য বন্ধ ক'রে দেবো।

ইন্দ্র। ভাল, তাই হবে! কিন্তু বৃদ্ধ, তুমি যে প্রতিমা প্রস্তুত কার্যে ব্যাপ্ত আছ, তা লোকে কেমন ক'রে জানবে?

বর্দ্ধ। আমি তা জানি না। আমি জানি আমার নিজেকে, আর আমার কার্যকে—কর্তব্যকে। আমি নিযুক্ত থাকব' আমার কর্তব্যের সাধনায়—শিল্পের সাধনায়। বাহিরে কে কি ভাববে, তা দেখবার আমার অবসর ও আবশ্যিকতা কিছুই থাকবে না।

জগা। সাবাস্। এই ত' চাই। শিল্পকলার একনিষ্ঠ সাধক এই ত'



তোমার উপযুক্ত কথা। তুমি ক'রে যাবে তোমার কর্তব্য—  
তোমার প্রাণের অর্ঘ্য তুমি ঢেলে দেবে কলা-লক্ষ্মীর চরণ  
প্রান্তে। তাতে কে কি ব'লবে—কি ভাববে, সে দিকে ক্রক্ষেপ  
ক'রবে না। এই ত' প্রকৃত সাধনা। রাজা, আর কাল ব্যাজ  
নয়, এঁকে এখনি পান গুয়া দিয়ে বরণ ক'রে কার্যে নিয়োগ  
কর।

ইন্দ্র। তাই হবে তাই! এস শিল্পী, আমি তোমায় যথাযোগ্য বরণ  
ক'রে আমার ঠাকুরের শ্রীমূর্তি নির্মাণের জন্ত নিয়োগ ক'রব  
এস'।

[ সকলের প্রস্থান।

### পঞ্চম গর্ভাঙ্ক ।

শুশিচার প্রকোষ্ঠ ।

বলভদ্রা ও লীলাধর ।

বল। আর কতদিন অভাগিনী রাণীকে নিয়ে এ ভাবে রজ ক'রবে  
দাদা! ভিতরে বাইরে অন্ধকার দেখে হতভাগিনী যে দিন দিন  
শ্রীহীন, শান্তিহীন, অস্থির হ'য়ে উঠছে।

লীলা। শুধু কি তাই রে দিদি! তার উপর লোক চক্ষে সে এখন  
কুপার পাত্রী হ'য়ে দাঁড়িয়েছে। যার কণামাত্র করুণা পাবার  
জন্ত রাজ্যস্থ সকলে উদ্গ্রীব হ'য়ে থাকত', সেই রাজ্যেশ্বরী আজ  
বিশ্বাসহারা—ভক্তিহারা হ'য়ে সকলের বিরাগ ভাজন হ'য়েছে।

বল। তা ত' দেখছি। কিন্তু এমনি ক'রে তাকে অন্ধকারে রেখে,

সবার বিরাগ ভাজন ক'রে তোমার লাভ কি? আহা! যে মহিয়সী ললনাকে দেখে এ রাজ্যের প্রজারা সাক্ষাৎ ভক্তি ঠাকরণ ভেবে সঙ্ঘমে মাথা নত ক'রতো, আজ তার অন্তর হ'তে শ্রদ্ধা ভক্তির নাম পর্য্যন্ত মুছে গেছে। চক্রী, তোমার এ চক্রান্ত করবার উদ্দেশ্য কি?

লীলা। ব'লেছি না কতবার তোমায়, বোন—“লীলা”! এ আনার লীলা। এই আমার সখ—আনার খেয়াল।

বল। ভারি মজার খেয়াল ত' ? এক জনের মাথায় পা দিয়ে জলে ডুবিয়ে ধরা—আর সে কেমন ঝাঁক পাঁক ক'রতে থাকে, তাই দেখে আহ্লাদে আট খানা হওয়া। না দাদা, তোমায় এ খেলা শেষ ক'রতেই হবে। রাণী গুণ্ডিচার এ হীনাবস্থা আমি দেখতে পারছি না, দাদা। কি—মুখ টিপে মুচ্কে মুচ্কে হাসি হচ্ছে যে?

লীলা। দয়াময়ী বোনটী আমার, কারো এতটুকু দুঃখ সহিতে পার না তুমি, তা জানি। কিন্তু কি ক'রবো দিদি, আমি যে বড় করে প'ড়েছি।

বল। সে কি?

লীলা। শুষ্কের মান রাখতে হবে—মুখ রাখতে হবে। বিদ্যাপতি ঠাকুরের স্বপ্ন সত্যে পরিণত ক'রতে হবে আমাকে। সেই জন্যই ত' এই খেলার অবতারণা ক'রে ব'সেছি।

বল। কি রকম—কি রকম?

লীলা। অত ব্যস্ত হ'স্ নি। সময় আনুক সব দেখতে পাবি। ঐ মহারানী গুণ্ডিচা এই দিকে আসছে।

## শুশিচার প্রবেশ।

শুশিচা। কে তোমরা ?

লীলা। আমরা মা, তোমার বোমা বলিতার সঙ্গে এসেছি। আমি তার ছোট ভাই, লীলাধর—আর এ আমার বোন, বলভদ্রা।

শুশিচা। বেশ! তা কি ক'রতে এখানে এসেছ ?

লীলা। তোমার অতুল ঐশ্বর্য দেখবার জন্য মা! দুঃখী গরীবের ছেলে মেয়ে আমরা। আমরা ত' এত সোণা দানা, হীরে জহরৎ, একসঙ্গে দেখি নি। তুমি রাজার রাণী—মহারাণী, তোমার ধন দৌলত কত। ওঃ বাবা! আমাদের একেবারে তাক লেগে গেছে।

শুশিচা। শুধু আমার ঐশ্বর্যই দেখেছ, না আর কিছু দেখেছ ?

লীলা। আর দেখেছি এই রাজবাড়ী। ওরে বাপরে! এরই বা কি বাহার; কত বড়—কেমন সাজান'—কি সুন্দর! আর দেখেছি মা, তোমার তৈরী ঐ নূতন মন্দির। রাণী মা, ধন্য মেয়ে তুমি বাছা! এমন মন্দির পৃথিবীতে আর নেই। কত বড়—কত উঁচু—কত চিত্র বিচিত্র করা। সবই যেন তুলি দিয়ে আঁকা। কোন মানুষের সাধা নেই এমন মন্দির তৈরী করে। ই্যা রাণী মা, তুমি কেমন ক'রে এমন মন্দির তৈরী করালে ?

শুশিচা। সে আমার শক্তির জোরে। কত অর্থ, কত লোক খেটেছে তবে না হ'য়েছে। ওরে বাপু, আমি হচ্ছি রাণী। আমার সঙ্গে কি কারো তুলনা!

লীলা। তা ত' বটে—তা ত' বটে!

শুশিচা। কিন্তু জানো লীলাধর,—লীলাধরই বুঝি তোমার নাম, না ? আমি অত কষ্ট ক'রে, অত অর্থ ব্যয় ক'রে অগস্ত্যকে বসাতে

যে মন্দির তৈরী করালুম, সেই মন্দিরে ওরা সব একটা শুকনো কাঠের গুঁড়ি বসিয়ে আমার প্রতারণিত ক'রতে চায়—বলে এই জগন্নাথ। আরে তাও কি হয়? কাঠ হবে পূর্ণব্রহ্ম নারায়ণ!

বল। কেন হবে না মা! ক্ষুদ্র শিলাখণ্ডকে তুমিই ত' নারায়ণ জ্ঞানে সংগ্রহ ক'রেছ। এক লক্ষ সেইরূপ ক্ষুদ্র শীলার সমষ্টি ক'রে তোমার মন্দিরের বেদী নির্মাণ করিয়েছ।

গুণ্ডিচা। থাম্ মুথরা বালিকা। সে কি জানিস্—এতদিন অন্ধকারে ছিলাম, লোক মুখে শুনে শুনে,—আবাল্য আচরিত সংস্কারের বশে মনে করেছিলাম, ঐ শিলাখণ্ড গুলোই বুঝি নারায়ণ। আরে নারায়ণ ত' এক অনাদি অনন্ত সত্ত্বা—একেখর। তাঁর আবার অমন লক্ষ লক্ষ মূর্তি হ'তে গেল কোথা থেকে?

লীলা। কি জানি মা, অত শত বুঝি নি আমি, বাছা। তা ছাড়া, তুমি হ'চ্ছ রাণী—মহারাণী। তোমার বুদ্ধির চেয়ে কি আর কারো বুদ্ধি বেশী! তুমি যা বোঝ—সেই ত' ঠিক বোঝা, তুমি যা কর' সেই ত' ঠিক করা।

বল। ( স্বগতঃ ) একে মনসা—তা'তে ধুনোর গন্ধ। দাদা দিলে—দিলে একেবারে বেচারীকে গোল্লায় দিলে।

লীলা। তা চল্ বোন, আমরা ঘুরে ঘুরে এ রাজ্যের কত ঐশ্বর্য—কত সম্পদ সব দেখি গে চল্। ক'দিন এসেছি—তা এ রাজ্যের এক কোণও আমাদের দেখা হয় নি। আসি মা, আবার আসব'খন।

গুণ্ডিচা। এস।

[ বলভদ্রা ও লীলাধরের প্রস্থান।

বেশ ছেলোটা—দিব্যি ছেলে। কেমন মিষ্টি কথা—কেমন হাসি

হাসি মুখ । মেয়েটা কিন্তু বড় চোয়াড়—বড় মুথরা । ওর বোন—  
—আমার বোমা ললিতা ত' অমন নয় । সে ঠিক তার ভাইটির  
মত—শাস্ত-শিষ্ট, লক্ষ্মীটী । তবে তার বাপ—সেই শবর বুড়োটা  
না কি মস্ত ষাছুকর । অবশ্য এ কথায় বোমা আমার ক্ষুণ্ণ হন  
বটে । কিন্তু সত্যের গলা টিপে ত' তাকে চেপে রাখা যায় না ।  
শবর বিশ্বাসে যে ষাছুকর তা'তে কারো সন্দেহ নেই । নইলে  
সেই গুঁড়িটা—যা নড়াতে রাজ্য শুদ্ধ লোক পারে নি—সে  
একা তুলে নিয়ে গেল কেমন ক'রে ? বলে ভক্তির জোরে ।  
আরে ভক্তি আনাদেরই কি নেই—না তার জোর নেই ।  
ও সব মিথ্যা—ধাঙ্গাবাজী ।

### পূজারীবেশে যমের প্রবেশ ।

যম । মা, নির্মাল্য গ্রহণ করুন গোবিন্দজীর ।

গুণ্ডিচা । কে ? বৃদ্ধ পূজারী । তুমি আজ স্বয়ং নির্মাল্য নিয়ে এসেছ  
যে ?

যম । মা, আমি শুনেছি, আপনি নির্মাল্যে না কি ভক্তি হারিয়েছেন ।  
তাই তা প্রত্যক্ষ ক'রতে আসাই আমার উদ্দেশ্য ।

গুণ্ডিচা । ব্রাহ্মণ ! আমি শুধু নির্মাল্যের উপর ভক্তি হারায় নি ।  
যার নির্মাল্য সেই গোবিন্দজীর উপরও ভক্তিহীনা ।

যম । সে কি ? কেন মা ?

গুণ্ডিচা । ব্রাহ্মণ, আমি বুঝেছি—সব শঠতা, মিথ্যাচার, ধাঙ্গাবাজী ।  
কে ? গোবিন্দজী কে ? একটা কৃষ্ণ প্রস্তরের প্রতিমূর্তি বই ত'  
নয় । কে বললে সেই পাষাণ পুস্তলিকা—জগৎপতি জগদীশ্বরের  
মূর্তি ? আর সেই প্রস্তর মূর্তির সমক্ষে, কতক গুলো ভোজ্য ধ'রে

এক দণ্ড চোখ বুজে তুমি ব'সলেই, বিশ্বপতি জগন্নাথের আহাৰ করা হ'য়ে গেল ? না—না ব্রাহ্মণ, ও সব মিথ্যা—কপটতা । আমি ও সব ভণ্ডামী হ'তে নিজেকে দূরে রাখতে চাই ।

ধম । সত্যই ত' মা ! এ কথা ত' আমার এত দিন মনে আসে নি—  
যে একটা প্রস্তরখণ্ড কেমন ক'রে নিখিল ব্রাহ্মণেশ্বর ব'লে  
পরিগণিত হ'তে পারে । আপনি আমার চক্ষু ফুটিয়ে দিলেন ।  
সত্যই ত'—কেমন ক'রে একটা নিথর পাথর হবে এই চরাচর  
স্বামীর প্রতিকল্প ! হারে অদৃষ্ট ! আমি এতদিন এই সহজ কথাটা  
বুঝি নি । হায়—হায় ! আমি এতকাল পৌরহিত্য ক'রে, ঐ  
প্রাণহীন স্পন্দনহীন শিলা-মূৰ্ত্তি পূজা ক'রে বিশ্বপতিকে উপহাস  
ক'রেছি—সঙ্গে সঙ্গে নিজে প্রতারিত হ'য়েছি ও আপনাদিগকে  
প্রতারিত ক'রেছি । মা—মা এই আমি ফেলে দিচ্ছি—দূরে  
ফেলে দিচ্ছি আপনার জন্তু আনা এই নিৰ্ম্মাণ্য । কারণ এ কিছু  
নয়—কিছু নয় । এ বকম ভোজ্যের রাজ সংসারে অভাব  
নেই । ( নিৰ্ম্মাণ্য নিষ্ক্ৰেপ ) আর মা, আমি আপনার মহিমায়,  
আপনার উপদেশে যে দিব্য-চক্ষু পেয়েছি, সেই চোখে চেয়ে  
দেখছি এ রাজ্যে একা আপনিই ষথার্থ ভক্তিমতী আছেন ।  
আর কেউ নয়—কেউ নয় । কিন্তু মা, আপনাকে বলি—মহা-  
রাজ যে আজ কয়দিন ধ'রে নীলমাধবের মূৰ্ত্তি নিৰ্ম্মাণের প্রতীকা  
ক'রছেন, সেটাও আপনার প্রতিরোধ করা কৰ্ত্তব্য । কেননা  
শিলায় বা কাষ্ঠে কখনও জগদীশ্বরের মূৰ্ত্তি হওয়া সম্ভব নয় ।

শুশিচা । ব্রাহ্মণ, নীলমাধবের মূৰ্ত্তি নিৰ্ম্মাণের জন্তু মহারাজ প্রতীকা  
ক'রছেন কি ? আমি ত' এর কিছুই জানি না ।

ধম । আজ চতুর্দশ দিন হ'ল, এক বৃদ্ধ—অতি বৃদ্ধ—অরাজীৰ্ণ, শীর্ণ,

ক্ষীণ, মরণোগ্নুথ বর্ধকী—যে কাঠটা সমুদ্রে ভেসে এসেছিল, তা হ'তে নীলমাধবের মূর্তি নির্মাণ ক'রে দেবে ব'লে, আপনার মন্দিরে ঢুকে দ্বার রুদ্ধ ক'রছে। মহারাজ এই চোদ্দ দিন দরজায় হা পিত্যাস্ ক'রে ব'সে আছেন—কবে সেই মূর্তি দেখে তিনি চক্ষু সার্থক ক'রবেন।

শুণ্ডিচা। বটে! সে বৃদ্ধ আজ চোদ্দ দিন রুদ্ধ-দ্বার মন্দিরে অবস্থান ক'রছে?

যম। ক'রছে বই কি মা। তবে তার যে অবস্থা দেখা গেছিলো, তা'তে সে যে এতদিন না খেয়ে না দেয়ে বেঁচে আছে, তা বোলে বোধ হওয়া কঠিন।

শুণ্ডিচা। ঠিকই ত'। বৃদ্ধ হুবির—জরাজীর্ণ! মন্দির মধ্যে তার মৃত্যু হওয়া কিছুই বিচিত্র নয়। তা হ'লে আমার মন্দিরের পবিত্রতা নষ্ট হওয়াও অসম্ভব নয়।

যম। সত্যই ত' মা। মন্দির পবিত্র স্থান, সেথায় মৃতদেহ—

শুণ্ডিচা। তুমি কি নিশ্চিত জান' যে, সে বর্ধকী মন্দির মধ্যে মরেছে?

যম। তা কেমন ক'রে ব'লব জননি! তবে আমি প্রত্যহ মন্দিরের দ্বারে কান দিয়ে শোনবার চেষ্টা ক'রেছি, যে ভিতর হ'তে কোন শব্দ আসে কি না। যাই হোক একটা সূত্রধর কার্য ক'রছে ত'। কিন্তু মা তক্ষন কার্যের কোন শব্দই আমার কানে আসে নি।

শুণ্ডিচা। তুমি একাই শুনতে পাও নি—না—আর কেউ—

যম। রাজ্যশুদ্ধ লোক মা,—সকলেই আমার মত কোন শব্দই শুনতে পায় নি।

শুণ্ডিচা। বটে! ওঃ কি অমাহুযিক অত্যাচার। একজন হুবির,

পঙ্ককেশ, জরাগ্রস্ত হতভাগ্যকে এক রুদ্ধ-দ্বার কক্ষে আবদ্ধ রেখে, খাড়াভাবে শুকিয়ে আড়ষ্ট হ'য়ে মৃত্যুকে বরণ করবার এই নিশ্চয় ব্যবস্থা—দেবতার দোহাই দিয়ে, অবাধে সংশোধিত হ'চ্ছে আমার রাজ্যে। আর তার প্রধান প্রায়দাতা আমারই স্বামী—যাঁর হাতে রাজ্যবাসী প্রত্যেক প্রজার জীবন মরণের দায়িত্ব নির্ভর ক'রছে।

যম। অমানুষিক অত্যাচার তা'তে আর সন্দেহ নাই। আপনি মা, রাজলক্ষ্মী! আপনি এ পাপ অনুষ্ঠান হ'তে মহারাজকে বিরত না ক'রলে রাজ্যে অকল্যাণ হওয়ার সম্ভাবনা। তাই মা আমার বিনীত নিবেদন আপনি সত্বর সেই মন্দির-দ্বার উন্মুক্ত ক'রে দেখুন, সে হতভাগ্য সূত্রধর কি ভাবে মৃত্যুর কোলে স্থান পেয়েছে।

শুশিলা। নিশ্চয় নিশ্চয়। আমি এখনই মহারাজকে ব'লে সে দ্বার খোলবার ব্যবস্থা ক'রব।

যম। কিন্তু, মহারাজ কি তা'তে সন্মত হবেন? বৃদ্ধের সঙ্গে তাঁর না কি কথা হ'রেছিল—তিন সপ্তাহ দ্বার-বন্ধ থাকবে।

শুশিলা। কেন, তিন সপ্তাহ কেন?

যম। বৃদ্ধ স্বেচ্ছায় মৃত্যু কামনা ক'রেই আপনার মন্দিরে এসেছিল। হতভাগ্য হয় ত' ভেবেছিল, দেবস্থানে মরণে তার সদগতি হবে। আর সেই জন্তু মন্দির মধ্যে তিন সপ্তাহ প্রয়োপবেশন ক'রে আত্মজীবন নাশের সঙ্কল্প ক'রেছে। কারণ সাধারণ লোকের ধারণা অনাহারে মানুষ একুশ দিন পর্যন্ত বাঁচতে পারে। তাই সে রাজাকে ঐ সময় উত্তীর্ণ হবার পর দ্বার খুলতে অঙ্গীকার করিয়েছে।



শুণ্ডিচা । তা হ'লে আজও তার মৃত্যু না হওয়াও অসম্ভব নয় । কি বল', পূজারী ?

যম । বেঁচে থাকাও সম্ভব বটে ।

শুণ্ডিচা । তা হ'লে আর বিলম্ব নয় । এখনি—এখনি, সে দ্বার খোলা-বার ব্যবস্থা হোক । এখনি দেখা হোক, সে বৃদ্ধ বর্দ্ধকী বেঁচে আছে কি না—আমার পবিত্র দেব-আয়তন সেইরূপ পবিত্র আছে কি না ।

যম । ই্যা মা, আর বিলম্ব নয় ; আপনি এখনি মহারাজকে দিয়ে দ্বার খোলাবার ব্যবস্থা করুন । কি আশ্চর্য্য মা, মহারাজ আজ চতুর্দশ দিন সেই মন্দিরের সম্মুখেই কাটালেন—একদণ্ডের জন্তু সে স্থান ছেড়ে অন্য কোথাও যান নি । যেন দ্বারে প্রহরা দেবার—দ্বার রক্ষা করবার লোক রাজ্যে আর কেহই নাই ।

শুণ্ডিচা । সব বিষয়েই তাঁর কিছু বাতাবাড়ি দেখছি ।

যম । আপনি স্বয়ং গিয়ে সে দ্বার খোলাবার ব্যবস্থা করুন । নতুবা তিনি কারো কথায় কর্ণপাত ক'রবেন না । আমি মা আমি ! আপনার অনেক মূল্যবান সময় অপচয় করিয়েছি—কমা ক'রবেন । ( স্বগতঃ ) আর কি,—এইবার ত' রাণী শুণ্ডিচা আমার সম্পূর্ণ আয়ত্বে এসেছে । এখন ওকে দিয়ে দ্বার খোলাতে পারলেই জগন্নাথের বিগ্রহ চিরতরে লোক চক্ষুর অন্তরেই থেকে যাবে ।

[ প্রস্থান ।

শুণ্ডিচা । পূজারীর বেশ জ্ঞান বুদ্ধি আছে । অথচ কেমন মিষ্টভাষী । কিন্তু কি অত্যাচার ! একজন নিরীহ লোককে রুদ্ধ কক্ষে আবদ্ধ রেখে তার মৃত্যুর পথ প্রস্তুত করা ! এ কি নৃশংসতা ! আর

এই সব অবাধে সাধিত হ'চ্ছে ধর্ম্মার্থানের নামে । সন্ধ্যা হ'য়ে  
আসছে—ভিতরের আলো জ্বালার সময় এগিয়ে এলো । কে  
গান গাচ্ছে ! সেই লীলাধর না ? এই বে এই দিকেই  
আসছে ।

গীত গাহিতে গাহিতে লীলাধরের প্রবেশ ।

কীর্তন—লোফা ।

ওমা গো ধূলি জ্বালে ভরিল গগন প্রকোষ্ঠ ।  
এলো গো তোমার আত্মরে গোপাল সঙ্গে করিয়া গোষ্ঠ ॥  
বাজারে বেণু চরায়ে ধেছু ক্লান্ত তহু তার,  
ওমা দেখ দেখ একবার !  
শ্রম-বারি ঝরে এলাইয়ে পড়ে শুকায়েছে রাঙা ওষ্ঠ ॥  
ওমা কোলে নাও তারে আদরে, চুমায় বদন দাও ভ'রে,  
তুলে দাও রাণি মুখে সর ননী তাইতে গোপাল তুষ্ট ॥

শুশিলা । সুন্দর গান তোমার লীলাধর ।

লীলা । আমি এই গান গেয়ে গেয়েই বেড়াই, মা ।

শুশিলা । আরো সুন্দর তোমার মুখে এই মাতৃ-সম্বোধন । যেন কত  
মধুমাখা ।

লীলা । আমার কিন্তু বড় ভাল লাগে তোমার মা, এই সব স্নেহভরা  
কথা গুলি । যেন কত জন্ম-জন্মান্তর হ'তে তোমাতে আমাতে  
চেনা শোনা ।

শুশিলা । লীলাধর, আমি একটা বিশেষ কার্য্যে একবার মহারাজের  
সঙ্গে সাক্ষাৎ ক'রতে যাব । অবশ্য আমি এখনই ফিরে আসব ।

তুমি তারপর আমার সঙ্গে দেখা ক'র ত'। তোমার সঙ্গে দু'টো কথা কইলে যেন কেমন হ'য়ে যাই। ভারি মিষ্টি তোমার কথা গুলি।

লীলা। বেশ ত' বেশ ত', তুমি মা মহারাজের সঙ্গে দেখা ক'রে এস', আমি ততক্ষণ এদিক সেদিক একটু বেড়িয়ে নি গে।

শুশিচা। ( বাইতে বাইতে সহসা ফিরিয়া ) আচ্ছা লীলাধর, তুমি ব'লতে পার, বিশ্বাসটা অন্ধ না চক্ষুস্থানু ?

লীলা। ও বাবা, ও কি কথা গো ! আমি ওর কিছুই বুঝলুম না।

শুশিচা। তা বটে, তুমি কি ক'রে বুঝবে। সামান্য বালক তুমি, পিতাও তোমার সামান্য শবর বই ত' নয়। আচ্ছা, তুমি এখন যেতে পার।

[ উভয়ের প্রস্থান।

শ্রীমন্দির দ্বার।

নাগরিক-নাগরিকাগণ, ইন্দ্রদ্যুম্ন ও জগাপাগলা।

নাগরিক ও নাগরিকাগণের গীত।

তিলোক কামোদ—গুংরি।

পুরুষগণ—কালিন্দী-তট-বিপিন-বিলাসী, কজ্জল-কালো রূপ।

স্ত্রীগণ—আভীর-নারী-বদন-কমল-আস্বাদ মধুপ ॥

সকলে—হে জগন্নাথ স্বামী, হও নয়ন-পথগামী !!

পুরুষগণ—বর্ষাপীড়, নয়ন-মোহন, মঞ্জু-গুঞ্জা-মালী ।

স্ত্রীগণ—বিষ-অধর-চুষ্ণিত বেণু, মণি-কুস্তল-শালী ॥

সকলে—হে জগন্নাথ স্বামী, হও নয়ন-পথগামী !!

স্ত্রীগণ—খঞ্জন-বর-গঞ্জন-আঁধি, হৃদি-রঞ্জন হাস ।

পুরুষগণ—শিঞ্জত পদে কনক নূপুর, কটি তটে পীতবাস ॥

সকলে—হে জগন্নাথ স্বামী, হও নয়ন-পথগামী !!

ইন্দ্র । মাতৃগণ, আমার প্রাণ-তুল্য-প্রিয় প্রজাগণ, ডাকো—এইভাবে আকুল আগ্রহে, প্রাণের ব্যাকুলতার ডাকো তোমরা সেই জগদানন্দ-নিদান জগন্নাথকে । তোমাদের আহ্বান কখনো ব্যর্থ হবে না—বৃথাই যাবে না । পুত্রগণ, তোমরা আজ এক পক্ষ কাল অবিশ্রান্ত ভাবে—অবিরাম কণ্ঠে যে আবাহন গান গাইছ, সে গান তাঁর আগমন না হওয়া পর্যন্ত যেন বন্ধ না হয় । এক পক্ষ কাল কোথা দিয়ে কেটেছে—কেমন ক’রে অতিবাহিত হ’য়েছে, তা বোঝা যায় নি । এইভাবে আর এক সপ্তাহ কাটাতে পারলেই সিদ্ধি নিশ্চিত । বৃদ্ধ বর্দ্ধকী মাত্র তিন সপ্তাহের সময় নিয়েছে আমার কাছ হ’তে ।

জুগা । বাঃ বাঃ সাবাস্ । এমনি ক’রে জেগে থাকো—জাগিয়ে রাখ’ সবাইকে । মেতে যাও—মাতিয়ে দাও তাঁর নামানুকীর্ণনে । তা হ’লেই আসবেন তিনি নিশ্চয়—আসতেই হবে তাঁকে । ওরে তোরা সব গান থামালি কেন ? গা—গা—আবার গা ।

গীত ।

পুরুষগণ—বদন জিত-শারদ-ইন্দু, কুন্দ-ধবল রদন ।

স্ত্রীগণ—নিখিল-জগত-প্রাণ-বন্ধু, অখিল শাস্তি সদন ॥

সকলে—হে জগন্নাথ স্বামী, হও নয়ন-পথগামী !!

জনতা । মহারানী, মহারানী ! রানী-মা আসছেন—রানী-মা আসছেন ।  
ইহু । রাজ্ঞী আসছেন । কি আনন্দ ! আজ আনন্দময়ের শ্রীমন্দিরে  
বেছার উপযাচিকা হ'য়ে আসছেন মহারানী স্বয়ং । কি আনন্দ !  
জগন্নাথ ধন্য তুমি ! তোমার কৃপায় আবার মহিষী আমার পূর্ব  
জ্ঞান ফিরে পেয়েছেন । তোমার জয় হোক !

জগা । কি !—ভাবছ' কি ? রানী-মা আসছেন, তাই প্রাণটা তোমার  
আহ্লাদে নেচে উঠছে, না ? বাবা, যে উগ্রচণ্ডা মূর্তি ! আমার  
ত' ঐ মূর্তি দেখে চক্ষুঃস্থির হ'বার উপক্রম হ'য়েছে । আমার  
মুরলীধর যে মাধুর্যোর ঠাকুর,—তাঁর কাছে কি অত উগ্র  
মূর্তিতে, অমন চামুণ্ডার মত আসতে হয় ।

### শুভিচার প্রবেশ ।

শুভিচা । মহারাজ ! যথেষ্ট হ'য়েছে । ধর্মের নামে—দেবতার নামে  
ব'থেষ্ট অধর্মাচরণ করা হ'য়েছে । এইবার নিরস্ত হও । আর  
সম্বর এই মন্দির-দ্বার মুক্ত করবার জন্য আদেশ দাও ।

ইহু । সে কি ? কেন রাজ্ঞী ?

শুভিচা । “কেন”—সে কথা বলবার অবসর পর্য্যন্ত নাই । তুমি আগে  
দ্বার উন্মুক্ত হবার ব্যবস্থা কর, তারপর সব কথা উত্তর দেব  
আমি ।

ইহু । এ কি তোমার বালিকোচিত অস্থিরতা, মহারানি ? মন্দির-দ্বার  
তিন সপ্তাহের জন্য বন্ধ হ'য়েছে, আজ চতুর্দশ দিন—মাত্র এক  
পক্ষ কাল গত হবে । এখনও এ দ্বার খোলবার জন্য এক  
সপ্তাহ অপেক্ষা ক'রতে হবে ।

শুভিচা । জানি মহারাজ । এক নিরীহ, অরাগ্রস্ত বৃদ্ধকে এই পবিত্র

মন্দির মধ্যে আবদ্ধ রেখে, তিন সপ্তাহ প্রয়োপবেশনে তার মৃত্যুর নির্ধম ব্যবস্থা তুমি ক'রেছ। হিঃ! এত উন্মাদনা— এমন অন্ধত্ব তোমার জন্মেছে এই ধর্মের নামে, স্বামীন্? তুমি না রাজা? তোমার উপর না প্রত্যেক প্রজার জীবন মরণের দায়িত্ব নির্ভর ক'রছে? তুমি অবাধে এই নৃশংসতার প্রদ্রব দিবেছ কেমন ক'রে?

জগা। ওরে বাবা! এ যে মায়ের চেয়ে দরদী মাসী গো।

ইন্দ্র। মহিষী,—বৃদ্ধ বর্দ্ধকী জগন্নাথের শ্রীমূর্তি নির্মাণ ক'রতে মন্দির মধ্যে প্রবিষ্ট হ'রে, রুদ্ধ দ্বারে তার শিল্প সাধনার শ্রীমন্ন্যায়ণের আরাধনার মগ্ন আছে।

শুশিচা। চমৎকার! ভগ্ন-স্বাস্থ্য—রুগ্ন—স্থবির বর্দ্ধকী, সেই বিশাল বিপুল আয়তন কাঠ খণ্ড হ'তে মূর্তি প্রস্তুত ক'রবে, এ ধারণা— এ বিশ্বাস তোমার মনে স্থান পেলে কি কোরে? তুমি কি জান না, সেই প্রকাণ্ড কাঠকে অঙ্গুলি পরিমিত স্থান নড়ান-ও তার সাধ্যের অতীত। আর সে একা, কোন সহকারী ব্যতিরেকে—সে একাকী সেই কাঠ হ'তে এক মূর্তি গঠন ক'রে তোমার উপহার দেবে? চমৎকার! ক্ষুদ্র বালকেরও বা প্রত্যক্ষ, তুমি দেবতার নামে এত অন্ধ হ'য়েছ যে, তা তোমার দৃষ্টিকে অতিক্রম ক'রে আছে। তুমি কি একবার ভেবেছ মহারাজ, সে অভাগা খাণ্ড পানীরের অভাবে এই পক্ষকাল জীবিত আছে কি না?

জগা। আরে তা ভাববার দরকার কি? খাণ্ড পানীরের তার অভাব হবে কেন?

## গীত ।

রামকেনী মিশ্র— একতালা ।

যে জীবন দিয়েছে ।

জীবন ধারণ করবার উপায় সেই ত' ক'রেছে ॥

মাতৃ গর্ভে শিশু থাকে

সেই আহাৰ্য্য বোগায় তাকে,

( তার ) জন্ম হ'তেই মায়ের বুকে সুধার কলস ভরিয়েছে ॥

সাগর তলে, মাটির নীচে,

সে জন ফিরে জীবের পিছে,

গিরি গুহার, গাছের গোড়ায়, সেথায়ও তার দৃষ্টি আছে ;

করণায় তার ভুবন ভরা তাই ত' সবাই আছে বেঁচে ॥

[ প্রস্থান ।

গুণ্ডিচা । সারহীন উক্তি—বিচারবিহীন যুক্তি । রাজন, বাক্ বিতণ্ডায়  
আমি কর্তব্য ভুলব না । তুমি খোলাও এই দণ্ডে এই মন্দিরের  
রুদ্ধ দ্বার । আমি দেখতে চাই সে বৃদ্ধ জীবিত আছে কি না !

ইন্দ্র । রাজ্ঞী, নিরস্ত হও—কথা রাখ' । বৃদ্ধ তিন সপ্তাহ অস্তে মন্দির-  
দ্বার খুলতে আমার অঙ্গীকার করিয়েছে ।

গুণ্ডিচা । হায় স্বামীন্, এখনও ভ্রাস্তি ? এখনও দুর্বলতা ? বৃদ্ধ যে  
মন্দির মধ্যে মৃত্যুকে আলিঙ্গন ক'রেছে । তার প্রেতাত্মা যে  
তোমায় অহর্নিশ অভিসম্পাত ক'রছে । তার মৃত দেহের দুর্গন্ধে  
যে এ স্থানের বাতাস ভারি হ'য়ে উঠছে । পাচ্ছ' না, পাচ্ছ' না  
তুমি সে পুতি গন্ধ আত্মাণ ক'রতে ?

ইন্দ্র । কই—না । আমি—ত' পুষ্প চন্দনের মধুর গন্ধ—ধূপ ধূনার পুত  
সৌরভ সর্বদাই পাচ্ছি, মহাদেবি ।

শুভিচা। বটেই ত'। তুমি সেই গলিত শবের দুর্গন্ধকে রোধ করবার জন্য, বাহিরে এই গন্ধ পুষ্পের সস্তার সাজিয়ে রেখেছ যে। কিন্তু রাজনু, তুমি পাও আর নাই পাও—আমি তীব্র ভাবে পাচ্ছি! গলিত শবের গন্ধে আমার খাস রোধ হবার উপক্রম হয়ে এলো।

ইন্দ্র। অভাগিনী, এ তোমার নিজের অন্তর নিহিত নরক কুণ্ডের পৃতি গন্ধ! হায় মহিষী।

শুভিচা। নিরস্ত হও, স্বামীনু। আমি এখনি দ্বার খুলিয়ে দেখতে চাই—সে বেঁচে আছে কি না। কি আশ্চর্য্য! তোমরা সকলেই এমন জ্ঞানহারা! যে, ভিতরে একজন সূত্রধর কাঠ তরুণে রত আছে, অথচ তার কার্যের কোন শব্দ বাহিরে শ্রুত হ'চ্ছে না—এ বুঝেও নিশ্চেষ্টে আছ? তোমারা কি বধির, না বিচার-বুদ্ধি-শূন্য?

জনতা। তাই ত' মহারাজ, তাই ত'! কোন শব্দ ত' শোনা যায় নি। সবই ত' নিস্তব্ধ, মহারাজ!

ইন্দ্র। সত্যই ত'! কোন শব্দ ত' আমার কর্ণে প্রবেশ করে নি এই করদিন বাবৎ! বুদ্ধ কি কার্য্য করছে মন্দির অভ্যন্তরে!

শুভিচা। তুমি কাল বিলম্ব না ক'রে মন্দির দ্বার উন্মুক্ত হবার আদেশ দাও, মহারাজ! আমি আর কিছুতেই স্থির হ'তে পারছি না।

জনতা। দরোজা খোলান, মহারাজ। রাণী-মা যথার্থ বলেছেন। ভিতরে বুদ্ধ ম'রেছে। দুর্গন্ধে মরে গেলুম রে বাবা! দ্বার খুলে এখনি দেখুন, ভিতরে কি ঘটনা ঘটেছে।

ইন্দ্র। কি অদ্ভুত! সকলের মুখে একই কথা। সবাই চায় দ্বার খোলাতে। জগন্নাথ, তুমিও কি এই ইচ্ছার প্রথয় দাও?



শুভিচা। কি মহারাজ, কিছু উত্তর পেলো ? তোমার অন্তরস্থিত  
 আশ্রাম কোন উত্তর দিলে ? তা ত' দেবে না। এ বে  
 তোমার নিজের ইচ্ছার বিরুদ্ধ কাজ। কিন্তু এতু, এ কাজ  
 তোমায় ক'রতেই হবে। রাণী আমি এ রাজ্যের—আমার  
 সম্মুখে তোমার এ অধর্ষাচরণ, প্রজাদের এই অনিষ্ট সাধন  
 আমি কিছতেই হ'তে দেবো না। আমি মিনতি ক'রছি,  
 অন্নয় ক'রে ব'লছি, তমি মন্দির দ্বার খোলাও। কি এখনও  
 নীরব ? তবে আমি আদেশ দিচ্ছি। প্রজাগণ, আমি এ  
 রাজ্যের রাণী—তাদের জননী, আমি আদেশ দিচ্ছি—  
 তোমরা সকলে জোর ক'রে এ দ্বার ভেঙ্গে ভূমিসাৎ ক'রে দাও।  
 জনতা। তাই কর' তাই কর'। এস' সকলে মিলে দ্বার খুলি। মার  
 ধাক্কা—ঠেল জোরে—সকলে একসঙ্গে লাগো। এই—ই—ই—  
 ( দ্বার উন্মুক্ত করণ )

দৃশ্যাস্তর—মন্দির-গর্ভ ।

শুভিচা। কই—কই সে হতভাগ্য বর্দ্ধকী ? দেখ' পুত্রগণ, সন্ধান কর'  
 কোথায় তার স্বতদেহ প'ড়ে আছে।

জনতা। তাই ত' কোথাও ত' তাকে খুঁজে পাওয়া যাচ্ছে না, কোথা  
 গেল সে বৃদ্ধ। বাপরে কি ঘুট ঘুটে অন্ধকার—কিছুই দেখা যায়  
 না—তা বুড়োকে পাওয়া যাবে কি !

( জনতার অপসরণ )

শুভিচা। কি মহারাজ ! অবাক হ'রে দাঁড়িয়ে কেন ? খোঁজ সে  
 বৃদ্ধকে। এই অন্ধকার মন্দির-গর্ভ হ'তে বার কর' সে হতভাগ্যের  
 প্রাণহীন তুষার-শীতল দেহ। অঁধার দেখে ভয় পেও না  
 রাজন্ !

ইন্দ্র । হা অভাগিনী ! তুমি শুধু অন্ধকারই দেখছ ? আর কিছু না ?  
 ঐ যে—ঐ যে সব অন্ধকার—সকল অঁধার উজল ক'রে বিরাজ  
 ক'রছেন, আমার আলোর আলো—দীপ্ত-তনু--জ্যোতির্শর  
 জগন্নাথ । রাজ্ঞী, কি মন্দভাগ্য নিয়েই তুমি আজ মন্দির মধ্যে  
 প্রবেশ ক'রেছ । তাই তুমি দেখতে পাচ্ছ না--ঐ রত্নবেদীর  
 উপর ব'সে আছেন আমার প্রভু—কি অপরূপ রূপের ছটা  
 ছড়িয়ে দিয়ে ।

শুশিলা । কি আশ্চর্য ব্যাপার ! বর্দ্ধকী মন্দির মধ্যে নাই, অথচ  
 অসমাপ্ত, অসম্পূর্ণ-গঠন তিনটি মূর্তি ঐ বেদীর উপর অধিষ্ঠিত ।  
 মহারাজ, মহারাজ, এ কি অদ্ভুত ব্যাপার- এ কি বিচিত্র  
 ঘটনা ! তবে কি সেই স্মৃত্তধর সত্যই এই স্থানে মূর্তি নির্মাণ  
 কার্যে ব্যাপ্ত ছিল ।

ইন্দ্র । হ্যা ছিল । সত্যই সে তার সাধনায় নিযুক্ত ছিল । বিশ্বাস  
 বিহীনা রমণী, তুমিই তার সমাধি ভঙ্গ ক'রে, তার সাধনায়  
 বাধা দিয়ে, শ্রীভগবানের এই অঙ্গ হীন বিকল অবয়ব জগদ্বাসীর  
 সমক্ষে উপস্থাপিত ক'রলে । তোমার মন্দির দ্বার মুক্ত করার  
 সঙ্গে সঙ্গে, সে শিল্পকলার একনিষ্ঠ সাধক এ স্থান ত্যাগ ক'রে  
 অন্তর্হিত হ'য়েছে ।

শুশিলা । বিচিত্র কথা ! আমি কি তবে সত্য সত্যই কোন কুহকীর  
 কুহকে আচ্ছন্ন হ'য়েছি ? আমার চক্ষু কি প্রকৃতই সত্য বস্তুর  
 দর্শন পাচ্ছে না ?

ইন্দ্র । রাজ্ঞী, রজনী প্রভাত হ'য়ে এল'—উবার আলোক দেখা  
 দিয়েছে—শীতলবায়ু ধরণীর ললাট স্পর্শ ক'রছে ; চল' বাহিরে  
 চল'—উত্তপ্ত মস্তিষ্ক স্থির ক'রতে মুক্ত বাতাস প্রয়োজন ।

শুভিচা। ( একান্তে ) রাত্রি প্রভাত হ'য়ে এল'—আলোক দেখা দিয়েছে—আমিই বা আর অন্ধকারে থাকি কেন ?

লীলাধরের প্রবেশ।

লীলা। রাণী মা, বেশ বাছা তুমি ! আমার আসতে ব'লে, তুমি মহারাজের সঙ্গে দেখা ক'রতে এলে, আর সেই পথ। আমি বাট চেয়ে চেয়ে সারা রাতটা কাটিয়ে দিলুম, তোমার আর দেখা নেই। শেষে নিজেই এলুম তোমার সঙ্গে দেখা ক'রতে।

শুভিচা। লীলাধর ? তুমি, তুমি এ সময় এসেছ ? আমার যেন চোখের ঘোর কেটে যাচ্ছে। আমি যেন কি একটা জ্যোতির ছটা দেখতে পাচ্ছি, আর সেই জ্যোতির মাঝখানে দাঁড়িয়ে আছ তুমি। কেন—কেন—এমন হ'চ্ছে—লীলাধর ?

ইন্দ্র। কেন, তা বুঝতে পারছ না, প্রেমসী ? লীলাধরের পরিচয় তুমি পাও নি—কিন্তু আমি পেয়েছি। এই লীলাধরই—লীলা-ময় শ্রীধর।

শুভিচা। চতুর, আর আমাকে তুমি ভুলিয়ে রেখেছিলে ? হাতের কাছে থেকেও আমার ধরা দাও নি—চোখের উপর ভেসেও দেখা দাও নি ?

লীলা। ধরা দিতে এসে তোমার যে খুঁজে পায় নি মা ! তুমি যে তখন তোমাতে ছিলে না। নইলে আমি যে সবার কাছে ধরা প'ড়তে, বাঁধা থাকতে সদাই ব্যস্ত।

শুভিচা। কপটী, আমার সঙ্গে তোমার এই ছলনা ! কেন, তোমার ইচ্ছা হ'লে কি আমি প্রাণ দিয়ে তোমার আঁকড়ে ধ'রতে পারতুম না, ইচ্ছাময় ? তুমি না চাপালে, আমার ঘাড়ে

সন্দেহের—অবিশ্বাসের ভূত চেপেছিল কেন? নিষ্ঠুর, আমি না তোমার মা! তুমি না আমার মাতৃ-সম্বোধনে আনন্দ পেতে?

লীলা। কি ক'রব মা—আমি নাচার! ভক্তের জন্মই আমাকে এই করতে হ'য়েছে। ভক্ত বিদ্যাপতি রমণী কর্তৃক আমার দেহ অঙ্গহীন হ'য়ে থাকবার স্বপ্ন দেখেছিল। আমি তার সে স্বপ্নকে সত্যে পরিণত করবার জন্মই তোমার সঙ্গে এই ব্যবহার ক'রেছি।

শুশ্রূষা। ওঃ—নির্দয়! তুমি আমাকে নিমিত্তের ভাগী ক'রে তোমার ভক্তাধীন নাম সার্থক ক'রলে—আর আমি রইনুম জগতের চক্ষে শুধু ঘৃণা, উপেক্ষা আর অল্পকম্পার পাত্রী হ'য়ে, কলঙ্কের ভাগী হ'তে? ধন্য—ধন্য তুমি! লীলাময়, তোমার লীলার এ অংশটা অভিনয় করবার জন্ম কি, এত বড় ভূমণ্ডলে আর কোন রমণী ছিল না? আমি তোমার মা—আমাকে দিয়ে তুমি এই কাজ করলে?

লীলা। জননি, জগতের সকল রমণীর সঙ্গেই যে আমার একটা-না-একটা সম্বন্ধ বর্তমান। কোথাও স্নেহের—কোথাও প্রেমের—কোথাও সখ্যের সম্বন্ধ। আমি কাকে ছেড়ে কাকে ধ'রব, মা?

শুশ্রূষা। না, আর ও সম্ভাবণ নয়। আর আমি তোমার মাতৃ-সম্বোধনে ভুলছি না বঞ্চক। আমি বুঝতে পেরেছি—তুমি যাকেই মা ব'লেছ, তারই প্রাণে ব্যথা দিতে—বুকে শেল মারতে বিধা কর নি। পরশুধারী তুমি—হেলার মাতৃ-শিরে কুঠার হেনেছ; রাজ্যাভিষিক্ত তুমি—গর্ভধারিণীকে কাঁদিয়ে বনে চ'লে গেছ;

নীলমণি তুমি—কংস কারাগারে শৃঙ্খলিতা জননীর বুকে পাষণ-  
ভার দেখেছ ; বশোদার ছলল তুমি—মায়ের স্নেহের পাশ ছিন্ন  
ক'রে অবলীলাক্রমে তাকে নয়ন জলে ভাসিয়েছ । তোমার  
মা হওয়া একটা বিড়ম্বনা—একটা সাজ্যাতিক মর্শ্ব-পীড়াকে  
নিমন্ত্রণ দেওয়া । তাই আজ হ'তে আমি নিষেধ ক'রছি,—  
আমার এ ওড়ুরাজ্যে কোন রমণীই যেন নিজের গর্ভজাত সন্তান  
ব্যতীত, কারও মা ডাকে না ভোলে । কারণ—কে জানে  
কবে তুমি আবার কি ভাবে কোন অভাগিনীকে এমনি ধারা  
বধনা ক'রবে ।

লীলা । ভাল, আজ হ'তে আর তোমার আমি “মা” বোলে না  
ডেকে, “মাসী” ব'লে ডাকব' । আর তোমার এ কলঙ্ক  
অপনোদের জন্ম আমি স্বীকার ক'রছি—বৎসরে এক সপ্তাহ  
কাল তোমার গৃহে—তোমার কোলে ব'সে—নিভুতে—  
নিরালায়—একান্তে তোমার সঙ্গে কাটাব । তুমি আমায় আদর  
দিও—স্নেহ দিও—ভক্তি দিও—পূজা দিও । লক্ষ লক্ষ, কোটি  
কোটি নরনারী আমাকে তোমার প্রকোষ্ঠে প্রতি বৎসর সাদরে  
নিরে যাবে । আর তোমার মন্দিরে গমনকালে আমার যে  
রথারূঢ় দেখবে, সে আর কখনো ধরাবাসের—জন্ম-পরিগ্রহের  
কষ্ট পাবে না ।

শুশিলা । বাঃ—বেশ ভুলিয়ে দিলে ত' ! চমৎকার ! এই ত' তোমার  
বাহাদুরী ! কিন্তু তোমার এ বিরাট বিগ্রহের কি হবে ?

লীলা । বিশ্বকর্ষার নির্মিত এ মূর্তি—

শুশিলা । বিশ্বকর্ষা ?

লীলা । হ্যা বিশ্বকর্ষা ! বৃদ্ধ শূরধরের ছদ্মবেশে এ মূর্তি নির্মাণে ব্যাপ্ত

ছিল—বিশ্বের সকল শিল্পের প্রাণ-প্রতিষ্ঠাতা—সকল শিল্পীর  
আদি গুরু—দেব-শিল্পী বিশ্বকর্মা । এ মূর্তি কি অমনি প'ড়ে  
থাকতে পারে ? এর সেবা ক'রবে শবরপতি বিশ্বাসু ।

### বিশ্বাসুর প্রবেশ ।

বিশ্বা । আমায় দিচ্ছ সেবার ভার ? আমি সেবার কি জানি ?

• মস্তহীন—ক্রিয়াহীন—শৌচহীন—অস্পৃশ্য শবর আমি ; আমি  
তোমার কি সেবা ক'রব ? তুমি পরমার ভোগ খাবে—আমি  
কি ক'রে র'ধব' ?

লীলা । ঐ যে তার লোক আসছে ।

### ললিতা ও বিদ্যাপতির প্রবেশ ।

এই দিদি রান্নাবান্নার ষোগাড় দেখবে—তুমি বাবা আমার ভোগ  
দেবে । হ'লেই বা তুমি শবর—তুমি আমার “সওয়ার” পাণ্ডা  
ব'লে পরিচিত হবে । পাগলা ঠাকুর, আমার কি ক'রতে চাও  
তুমি ?

বিদ্যা । আমি আবার কি ক'রব লীলাময় ? আমার জীবন ধনু—জনম  
সার্থক ক'রতে তুমি আমাকে দিয়ে তোমার লুকান মোহন-রূপ  
জগৎ-সমক্ষে প্রকটিত ক'রলে । আমার স্বপ্ন সত্যে পরিণত কর্তে  
মহারাজীকে মহা ঘোরে আচ্ছন্ন ক'রলে : আমার গৌরব  
বাড়াতে তুমি আর কি বাকী রেখেছ দয়াময়, যে আমি তাই  
ক'রতে যাব ।

লীলা । দুটো ফুল দিয়েও কি আমার ঐ মূর্তিটা সাজাতে তোমার ইচ্ছা  
নেই ?

বিদ্যা। তুমি বললে, আছে বই কি—খুব আছে। তোমার যখন ইচ্ছা,

তখন আমি তোমার “শৃঙ্গার” রচনার জন্তই রইলুম বনমানি!

লীলা। দিদি, একটীও কথা কইবে না তুমি? অভিমান ক’রেছ  
বুঝি?

ললিতা। অভিমান ক’রব কেন, ভাই? আমি নীরব আছি—এই  
মনের কষ্ট যে আজকের এই আনন্দের দিনে নীলাস্বর ভাই,  
আর বলভদ্রা বোনটী কেন তোমার সঙ্গে নেই? কেন  
তোমাদের ঐ অসম্পূর্ণ দারু বিগ্রহ তিনটির পরিবর্তে, আমি  
তোমাদের তিনটীকে সাকার দেখতে পাচ্ছি না।

লীলা। ওঃ—হো। ভাই বটে! কিন্তু দিদি এইবার হাস’! ঐ  
দেখ নীলাস্বর দাদা বলভদ্রা বোনটীকে সঙ্গে নিয়ে এইখানেই  
আসছে।

নীলাস্বর ও বলভদ্রার প্রবেশ।

লীলা। দিদি, তুমি ডেকেছ’—আর অমনি ছুটে এসেছি। তোমার  
ডাক কি না শুনে থাকার ষায়। কাণে গেলেই ছুটে আসতে  
হয়। আর ভদ্রা, আমাদের মাঝখানে দাঁড়া—তু’ধারে আমরা  
দুটী ভাই—মাঝখানে তুই। কেমন মহারাজ, এই ভাবে অব-  
স্থিতিই না তুমি স্বপ্নে দেখেছিলে?

ইন্দ্র। এই ভাবেই বটে। এমনি প্রাণ মাতান—মন ভুলান ভঙ্গি—  
এমন সুন্দর মোহন ঠাম। বাহা কল্পতরু, আমার বাহা পূর্ণ  
ক’রে আজ তুমি নিজ নামের সার্থকতা সম্পাদন ক’রেছ।  
এইবার আমার ঐ পদরজে স্থান দিয়ে, আমাকে সকল বাসনার  
পাশ হ’তে মুক্ত কর।

### জগাপাগলার পুনঃ প্রবেশ ।

- জগা । আরে কর্মময়ের জগৎ—এখানে কর্ম না শেষ ক'রে কি যেতে পারা যায় । রাজা, তোমার কার্য শেষ হয় নি যে এখনো । তুমি এরই মধ্যে মুক্তি চাও কি ?
- ইন্দ্র । কি কাজ আর অবশিষ্ট আছে ভাই ?
- জগা । ঐ যে তিনটে আধ-গড়া মূর্তি রইল প'ড়ে—ও গুলো কি এমনি গড়াগড়ি যাবে ?—ঐ গুলো নাও—রাঙাও—বসন ভূষণে সাজাও—তারপর ঐ বেদীতে স্থাপনা ক'রে কাজের শেষ কর ।
- ইন্দ্র । কি রঙে রঙাব' ?
- বিষ্ণা । সত্যের কঠোর বিগ্রহ বলদেব—শঙ্খশুভ্র বর্ণে সত্যের নির্মলতা প্রকাশ করুক । মঙ্গলময়ী শুভদা সুভদ্রা—গোরচনা গৌরবর্ণে মঙ্গল্যের প্রতিকৃতি হোক । আর সকল শোভার আধার, সমস্ত রূপ বৈভবের নিদানভূত কালশশী আমার—ঘনশ্রাম কলেবরে কঙ্কল-কৃষ্ণরূপে বিরাজ করুক সমস্ত সৌন্দর্য্যের প্রতীক হ'য়ে । এই বর্ণ-বৈচিত্র্যেই জগৎবাসী বুঝবে যে, ঐ বেদীর উপর বিরাজ ক'রছে “সত্য—শিব—সুন্দর” । তারা আকুল আগ্রহে ছুটে আসবে, ঐ খানে মাথা নত ক'রে সকল দণ্ড অহঙ্কার হ'তে মুক্ত হ'তে । ঐ যে তর আর সইলো না । এরই মধ্যে যে সবাই এলো ছুটে রে । সবাই যে ইঁাকছে—জয় জগবন্ধু—জয় জগন্নাথ স্বামী ।

### নাগরিকগণের প্রবেশ ।

নাগঃ গণ । জয় জগবন্ধু—জয় জগন্নাথ স্বামী ।



সমবেত গীত ।

আশা ভৈরবী—একতাল।

অনম সকল হ'লো রে আজ হেরে জগবন্ধু !  
হৃদয়-চকোর উঠছে মেতে দেখে ও মুখ-ইন্দু ॥  
বইছে রে আজ প্রেমের বজ্রা, ধরণী তাই হ'ল ধন্বা,  
আয় রে ছুটে দীন ভিখারী, সে প্রেমের নে এক বিন্দু ;  
তোর ঘুচবে জালা মুছবে মলা, রাখবে পদে দীনবন্ধু ॥

সমাপ্ত





■

4